


ಮದಪ್ಪಿಯೆರಾವಂದಿ ತುಳುವೆರ್ - ೨೧



ಡಾ. ಶಿವರಾಮ ಕಾರಂತೆರ್

ಕರ್ನಾಟಕ  
ತುಳು  
ಸಾಹಿತ್ಯ  
ಅಕಾಡೆಮಿ

ಡಾ. ಪಾಲ್ಗಾಡಿ ರಾಮಕೃಷ್ಣ ಆಚಾರ್



ಮದಪಿಯಿರಾವಂದಿ ತುಳುವೆರ್ - ೨೧

ಡಾ. ಕೋಟ ಶಿವರಾಮ ಕಾರಂತೆರ್

ಡಾ. ಪಾಲ್ಗಡಿ ರಾಮಕೃಷ್ಣ ಆಚಾರ್

ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ  
ಮಂಗಳೂರು

**DR. KOTA SHIVARAMA KARANTHER**  
(Life and Works)

- Written by : Dr. Palthady Ramakrishna Achar  
Nele, Narimogaru - 574 312  
Puttur, D.K.
- Published by : Karnataka Tulu Sahithya Academy  
Corporation Building, Lalbaug  
Mangalore - 575 003  
© : 2459389
- Price : Rs. 15
- Pages : 80
- Copies : 1000
- First Impression : 2003
- Chief Editor : Dr. Vamana Nandavara  
President, Karnataka Tulu Sahithya Academy
- Publisher : S.H. Shivarudrappa  
Registrar, Karnataka Tulu Sahithya Academy
- © Copy right : Karnataka Tulu Sahithya Academy
- Printed at : Aakrithi Computers  
Mangalore - 575 001  
© : 2443002

## ಕಾರಂತೆರೆ ಬದ್‌ಕ್ ಬರವು

‘ಕಡಲಂತೆ ಕಾರಂತೆ’ ಪನ್ನಿನ ಪಾತೆರ ಕನ್ನಡದವು. ಕಾರಂತೆರ್ ಪಂಡ ಕಡಲ್‌ದಂಚೆ. ಆರೆನ ಗೇನ, ಅನುಭವ ಕಡಲ್‌ದಾತ್ ಗಾಂತದವು, ಕಡಲ್‌ದಾತ್ ವಿಸ್ತಾರವಾಯಿನವು. ಕಡಲ್‌ದ ಉಡಲ್‌ಡ್ ಎಂಚಿನ ಮಾತ ಉಂಡುಂದು ಏರೆಗ್‌ಲಾ ತೆರಿಯಂದ್. ಕಾರಂತೆರೆನ ಉಡಲ್‌ಡ್ ಎಂಚೆಂಚಿ ಲೋಕಜ್ಞಾನ, ಅನುಭವ ಇತ್ತ್ಂಡ್ ಪನ್ನಿನವು ಏರೆಗ್‌ಲ ತೆರಿಯಂದ್‌ನವು. ಅಂಚಾದ್ ಕಾರಂತೆರೆ ‘ಕೃತಿ ಕರಂಡೆ’ನೇ ಒಂಜಿ ಮಲ್ಲ ಕಡಲ್. ನಂಕ್ ಮಾತ ಕಡಲ್‌ದ ಧ್ಯಾನ ಬೋಡುಗೆ. ಕಡಲ್‌ದ ಗೇನ ಬೋಡುಗೆ. ಈ ಕಡಲ ಕರೆತ ಬದ್‌ಕೇ ಅಂಚೆನೆ. ಕಡಲ್‌ನ್ ನಿಚ್ಚ ತೂವೊಂದುಪ್ಪಿ ನಂಕ್ ಅಯಿತಾತೆ ಮಲ್ಲ ಬುಲೆಚ್ಚಿಲ್‌ದ, ಒಂಜಿ ಅಳತೆದ ಆದರ್ಶ ಬೋಡು. ಉಂದೆನ್ ಕಾರಂತೆರ್ ದುಂಬೇ ಮಸ್ತ್ ಪೂರ್ಣತೆ ತೆರಿನಾರ್. ಅಂಚಾದ್ ಆರ್ ಕಡಲ್‌ಗ್ ಮೋನೆ ಪಾಡ್ ಕಡಲ ಕರೆತ ಪೂಯ್ ಮಣ್ಣಾಡ್ ಉದ್ದೊಗುಲ ತನ್ನ ಕೈಟಿತ್ತಿ ಬೆತ್ತೊನು ಊರೊಂದು, ತೋಜಾವೊಂದು ಎಂಚೆಂಚಿನನೊ ತಿಕ್ಕಿನೆನ್ ಮಾತ ಪೆಜ್ಜೊಂದು, ತೂವೊಂದು ಐಕ್ ಅರ್ಥ ಕಟ್ಟೊಂದಿತ್ತೆರ್. ತಿಕ್ಕಂದಿನೆನ್ ಅಂಚೆನೆ ನಾಡೊಂದುಲಾ ಇತ್ತೆರ್. ಕಡಲ್‌ದ ಉಡಲ್‌ಡ್ ಎಂಚಿನ ಉಂಡು ಪನ್ನಿನೆನ್ ನಾಡ್ಯರೆ ಕಡಲ್, ನಂಕ್ ಮಾತ ಒಂಜಿ ಸವಾಲ್. ಕಡಲ್‌ದಂಚೆ ನಿಲೆದಾಂತಿ ಬದ್‌ಕ್‌ದ ಬುಲೆಚ್ಚಿಲ್ ಇತ್ತಿನ ಕಾರಂತೆರೆನ್ ‘ಕಡಲ ತೀರದ ಭಾರ್ಗವ’ ಪಂಡ್‌ದ್ ಕನ್ನಡ ನಾಡ್‌ದ ಜನೊಕುಲು ಮಾತ ಲೆತ್ತೊಂದಿತ್ತೆರ್.

ಕಾರಂತೆರ್ ಕರಾವಳಿ ಕರ್ನಾಟಕದ ತುಳುನಾಡ್‌ದ ಒಂಜಿ ಕೋಡಿಡ್ ಪುಟ್ಟುದು ಬೊಕ್ಕೊಂಜಿ ಕೋಡಿಡ್ ಬಲತ್ತಿನಾರ್. ಆರ್ ಪುಟ್ಟಿನ ಊರು ಕೋಟದ ಕೋಟೆನ್ ಬುಡ್ಡು ತೆನ್ನಾಯಿದ ಪುತ್ತೂರುಡು ಪತ್ತ್ ನಲ್ಪ ವರ್ಷ ಇತ್ತ್ದ್ ಬರವುದ ಕ್ರಿಸಿ ಮಲ್ತಿನಾರ್. ಪುತ್ತೂರುದ ಅಂಚೆಂಚಿ ಪಸೆರಿನ ಆರೆನ ಗೇನ ಬೊಕ್ಕ ಧ್ಯಾನೊಡ್ತಾದ್ ‘ಚೋಮನ ದುಡಿ’ ಕಾದಂಬರಿ ತುಳು ಸಾಮಾಜಿಕ ಬೊಕ್ಕ ಸಾಂಸ್ಕೃತಿಕ ಬದ್‌ಕ್‌ದ ಒಂಜಿ ಮಾಮಲ್ಲ ಸುರ್ಪೂ ಪಡೆಂಡ್.

ಇಂಚ ತನ್ನ ಅಪ್ಪೆಬಾಸೆ ತುಳು ಅತ್ತ್ಂಡಲ ಕಾರಂತೆರ್ ತಾನ್ ಪುಟ್ಟುದ್ ಬಲತ್ತ್ದ್ ತಿರ್ಗಾಟ ಮಲ್ತಿನ ಊರುದ ಬಾಸೆ ಸಂಸ್ಕೃತಿನ ಬೇತೆ ಬೇತೆ ಬರವುಲೆಡ್ ತೋಜಿಪಾದ್ ಕೊರೆರ್. ‘ಚೋಮನ ದುಡಿ’ನ್ ಬುಡ್‌ಂಡ ‘ಮರಳಿ ಮಣ್ಣಿಗೆ’ ‘ಕುಡಿಯರ ಕೂಸು’



ಇಂಚಿತ್ತಿ ಕಾದಂಬರಿಲೆಡ್ ಬೊಕ್ಕ 'ಸೋಮಿಯ ಸೌಭಾಗ್ಯ' ಇಂಚಿತ್ತಿ ನಾಟಕೊಲೆಡ್ ತುಳುಭಾಷೆ ಸಂಸ್ಕೃತಿ ನೆಗತ್ ತೋಜೊಂದುಂಡು. ತುಳುನಾಡ್ ಭೂತಾರಾಧನೆ, ನಾಗಾರಾಧನೆ, ತುಳುವೆರೆನ ಬದ್‌ಕ್, ಅಕುಲು ಬೆನ್ನಿ ಬೇಲೆದ ಪೋರ್ತು, ಕಂಡ ಸಾಗೋಳಿದ ಕಳೊಟು ಪನ್ನಿ ಸಂದಿ, ಪಾಡ್ಡನ, ಕಬಿತೆಲೆನ್ ನಾಡ್‌ದ್ ಪೆಜಿದ್ ಅರೆನವೇ ಆಯಿನ ಅರ್ಥ, ವಿಶ್ಲೇಷಣೆ ಕೊರ್ತೆರ್. ಅಂಚೆನೇ ಮುಲ್ಪದ ಜನಪದ ಕುಣಿತೊಳು, ಜನಪದ ಗೊಬ್ಬುಲು ಬೊಕ್ಕ ಕಣ್ಣ್‌ಗ್ ತೋಜುನ ತುಳು ಭೌತಿಕ ಜಾನಪದ ಬದ್‌ಕ್‌ನ್ ಪೊರ್ಲುಡು ತೋಜಿಪಾವು ಪ್ರಯತ್ನಲ ಅಲ್ಪಲ್ಪ ಮಲ್ತಿನವು ಉಂಡು. ಆರೆನ ಚಿತ್ರಮಯ ದಕ್ಷಿಣ ಕನ್ನಡ ಉಂದೆಕ್ ಎಡ್ಡೆ ಒಂಜಿ ಸಾಕ್ಷಿ.

ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಈತ್‌ನೆಟ್ಟ ಪತ್ತ್ ಇರ್ವ ಮದಪ್ಪಿಯೆರಾವಂದಿ ತುಳುವೆರೆನ್ ಪರಿಚಯ ಮಲ್ಪಿ ಗ್ರಂಥ ಪ್ರಕಟ ಮಲ್ತ್‌ದ್‌ಂಡ್. ಕರಿವರ್ಸೊ ಕಾರಂತೆರ್ ಪುಟ್ಟಿನ ನೂದನೇ ವರ್ಸೊನು ನಾಡೊರ್ಮೆ, ನಾಲೊರ್ಮೆ ಆಚರಣೆ ಮಲ್ತಿನ ಪೋರ್ತು ಕನ್ನಡ ಸಂಸ್ಕೃತಿ ಇಲಾಖೆದ ಒಟ್ಟುಡು ಕರ್ನಾಟಕದ ಮಾತ ಬೇತೆ ಬೇತೆ ಅಕಾಡೆಮಿಲು, ಕನ್ನಡ ಪುಸ್ತಕ ಪ್ರಾಧಿಕಾರ ಸೇರೊಂದು ಮಸ್ತ್ ಕಾರ್ಯ ಕಜ್ಜೊಲೆನ್ ನಡಪಾಂಡ್. ಐಟ್ ತುಳು ಸಾಹಿತ್ಯ ಅಕಾಡೆಮಿದ ಬೇಲೆ ಮಸ್ತ್ ನೆಗತ್ ತೋಜಿ ಬತ್ತ್‌ಂಡ್. ಕಾರಂತೆರ್ ಪುಟ್ಟಿ ಊರು ಕುಂದಾಪುರೊಡ್ ಸುರುವಾದ್, ಕಾರವಾರ, ಮುಂಬೈ ಇಂಚ ಅಕೆರಿಗ್ ಆರೆನ ಮಾಮಲ್ಲ ಬೆನ್ನಿದ ಕಳ ಆದಿತ್ತಿ ಪುತ್ತೂರ್ ಬಾಲವನೊಟ್ ರಡ್ ದಿನತ ಕಾರ್ಯ ಕಜ್ಜೊಲೆನ್ ನಡೆಪಯೆರೆ ತುಳು ಸಾಹಿತ್ಯ ಅಕಾಡೆಮಿ ಮುಂದಾಳುತ್ವ ವಹಿಸಾದ್ ಕೆಲಸ ಮಲ್ತಿನವು ಮಾತೆರೆಗ್ಲಾ ತೆರಿನವು ಬೊಕ್ಕ ಅವು ಪೊರ್ಲುಡು ನಡತ್ತಿನ ಒಂಜಿ ಸಂತೋಸು ಸಮಾದಾನೊಲಾ ಉಂಡು.

ಇನಿದಾನಿಗ್ 'ಕೋಟ ಶಿವರಾಮ ಕಾರಂತೆರ್' ಪನ್ನಿ 'ಮದಪ್ಪಿಯೆರಾವಂದಿ ತುಳುವೆರೆ' ಮಾಲಿಕೆಡ್ ಇರ್ವತ್ತೊಂಜನೆದ ಬೂಕು ಆದ್ ಉಂದು ಬರೊಂದುಂಡು. ಉಂದೆನ್ ಮಸ್ತ್ ಉಮೇದ್‌ಡ್, ಮಸ್ತ್ ಇಸೆಯೊಲೆನ್ ಸಂಗ್ರಹ ಮಲ್ತ್‌ದ್ ಪೊರ್ಲು ಪೊಲಿಕೆಡ್ ಕಟ್ವಾದ್ ಕೊರಿನ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದ ಹಿರಿಯ ಸದಸ್ಯರಾಯಿನ ಡಾ. ಪಾಲ್ತಾಡಿ ರಾಮಕೃಷ್ಣ ಆಚಾರ್ಯಗ್ ಯಾನ್ ಅಕಾಡೆಮಿದ ಪುದರ್ ಪಂಡ್‌ದ್ ಸೊಲ್ಮೆ ಸಂದಾವೊಂದುಲ್ಲೆ. ಉಂದೆನ್ ತನ್ನಲೆ ಮಟ್ಟೆಲ್‌ಗ್ ಪಾಡೊಂದು ಗೇನೊಡು ಮಾನಾವೊಡು ಪಂಡ್‌ದ್ ನಿಕ್‌ಲೆಡ ಕೇನೊಂದುಲ್ಲೆ.

ಡಾ. ವಾಮನ ನಂದಾವರ

ಪ್ರಧಾನ ಸಂಪಾದಕೆರ್



## ಬುಳೆ ಕಾಣಿಕೆ

ಜ್ಞಾನಪೀಠ ಪ್ರಶಸ್ತಿ ಪಡೆಯಿದ ಡಾ. ಕೋಟ ಶಿವರಾಮ ಕಾರಂತೆರ್ ನಮ್ಮ ತುಳು ನಾಡ್ ಪುಟ್ಟುದು ಬಳತಿನಾರ್ ಪನ್ನಿ ವಿಷಯೊ ಈ ಜಿಲ್ಲೆದಕುಲೆಗ್ ಮಾತ ಹೆಗ್ಗಲ್ಲೆದ ಸಂಗತಿ. ಆರೆನ ಜನ್ಮ ಶತಮಾನೊದ ಆಚರಣೆ 2002 - 03ನೇ ವರ್ಸೊ ಪೂರ್ತಿ ರಾಜ್ಯೊದ ಬೇತೆ ಬೇತೆ ಕೋಡಿಡ್ ನಡತ್ಂಡ್. ಅಯಿಟ್ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿಲಾ ಬಾರಿ ಶ್ರದ್ಧೆಡ್ ಪಾಲ್ ಪಡೆಂಡ್. ಕಾರಂತೆರೆನ ಬಗೆಟ್ ತುಳು ಬಾಸೆಡ್ ಈತ್ರಾಸಿ ಒಂಜಿ ಬೂಕುಲಾ ಬೈದ್ಜಿ. ಈ ವರ್ಸೊ ಡಾಂಡಲಾ ಆರೆನ ಬಗ್ಗೆ ತುಳುಟೊಂಜಿ ಬೂಕು ಬರೊಡು ಪನ್ನಿ ಆಸೆಡ್ ಅಕಾಡೆಮಿದ ಅಧ್ಯಕ್ಷರಾಯಿನ ಡಾ. ವಾಮನ ನಂದಾವರೆರ್ ಎಂಕ್ ಬೂಕು ಬರೆಯರೆ ಅಪ್ಪಣೆ ಕೊರ್ಯೆರ್.

ಕಾರಂತೆರೆಗ್ ತುಳುತ ಮಿತ್ತ್ ದಾಲ ಅಭಿಮಾನ ಇಜ್ಜಿ ಪನ್ನಿನವು ಈ ಬಗೆಟ್ ಆರೆನ್ ತೆರಿಯಂದಿನಕುಲೆನ ಸಾಮಾನ್ಯ ಅಭಿಪ್ರಾಯ. ಕಾರಂತೆರ್ ಅಚ್ಚ ತುಳುವೆದಿ ಪೊಣ್ಣನ್ ಮೆಚ್ಚಿದ್ ಮದಿಮೆ ಆಯಿನಾರ್. ತುಳುತ ನೆಲೆಯಾಯಿನ ಪುತ್ತೂರುಡು ಸುಮಾರ್ ನಲ್ವ ವರ್ಸೊ ಕಾಲ ಕಳೆಯಿನಾರ್, ಮುಲ್ಪದ ಹಳ್ಳಿ ಹಳ್ಳಿಗ್ ಪೋದು ಕನ್ನಡ ತೆರಿಯಂದಿ ತುಳುವೆರೆಡ ಪಾತೆರಕತೆ ನಡಪಾದ್ ಅಕುಲೆ ಏಳಿಗೇಗಾದ್ ಬೆಂದಿನಾರ್. ತುಳುವೆರೆನ ಒಡನಾಟೊಡಿತ್ತಾದ್, ತುಳುವೆರೆನ ಬಗ್ಗೆನೇ ಕೆಲವು ಕಾದಂಬರಿ ಬರೆಯಿನಾರ್. ತುಳು ಜಾನಪದ ಅಧ್ಯಯನ ಮಲ್ತಿನಾರ್. ಆರ್ ಬರೆಯಿನ 'ಚೋಮನ ದುಡಿ' ಕಾದಂಬರಿನ್ ಕೆದಂಬಾಡಿ ಜತ್ತಪ್ಪ ರೈಕುಲು ತುಳುಕು ತರ್ಜುಮೆ ಮಲ್ಪುನ ಪೂರ್ತುಗ್ ಕೆದಂಬಾಡಿದಾರೆಡನೇ ಅಯಿನ್ ಓದದ್



ಆ ಬಾಸೆನ್ ಮೆಚ್ಚಿದ್ ಆರೆಗ್ ಸಾಬಾಸ್‌ಗಿರಿ ಕೊರ್ರೆರ್. ತುಳುನು ಹಲ್ಕ್ ಮಲ್ತಿನ ವಿಚಾರೊ ಆರೆ ಬರವುಡು ಓಲ್ಲಾ ತೋಜಿದ್ ಬರ್ಪುಜಿ. ಇಂಚ ಉಪ್ಪುನಗ ಆರ್ ತುಳು ಅಭಿಮಾನಿ ಅತ್ತಂದ್ ಎಂಚ ಪನ್ಕರೆ ಸಾಧ್ಯ?

1993ಡ್ ಕುಡಲದ ಪುರಭವನೊಡು ಆರೆನ ಕೈಡ್ ಸಮ್ಮಾನ ಪಡೆವುನ ಭಾಗ್ಯೊ ಎಂಕ್ ತಿಕ್ಕಾದಿತ್ತಂಡ್. ಆರ್ ಸಾಲಿಗ್ರಾಮೊಡುಪ್ಪಿ ಪೂರ್ತುಗು ಆರೆನ್ ತೂದು ಪಾತೆರುನ ಅವಕಾಶ ರಡ್ಡ್ - ಮೂಜಿ ಸರ್ತಿ ಒದಗ್ ದಿತ್ತಂಡ್. ಆ ಒಂಜಿ ಧೈರ್ಯೊಡು ಯಾನ್ ತುಳುಟು ಆರೆನ ಬಗ್ಗೆ ಬೂಕು ಬರೆಯರೆಗ್ ಒತ್ತೊಂಡೆ. ಬೂಕು ಬರೆಯರೆ ಆಧಾರೊ ಕೊರ್ದ ಆರೆ ವಿಷಯೊಡು ಬರೆಯಿನ ಕನ್ನಡೊದ ಮಾತ ಸಾಹಿತಿನಕುಲೆಗ್ ಸೊಲ್ಮೆಲು. ಆರೆನ ಮಾತ ಬೂಕುಲುಲಾ ಓದ್ಯರೆಗ್ ತಿಕ್ಕಬಿಲೆಕ ಮರುಮುದ್ರಣೊಗು ಅವಕಾಶ ಮಲ್ತ್ ಕೊರಿನ ಶ್ರೀಮತಿ ಮಾಲಿನಿ ಮಲ್ಯೆರೆಗ್ ಸೊಲ್ಮೆಲು.

ಕಾರಂತೆರ್ ಜ್ಞಾನದ ಒಂಜಿ ಮಲ್ಲ ಕಡಲ್. ಸಾಹಿತ್ಯ, ಕಲೆ, ಸಮಾಜ ಸೇವೆದ ಮಾತ ಮಜಲ್‌ಡ್ಲಾ ಆರ್ ದತ್ತದ್ ಬೆನ್ನಿ ಮಲ್ತಿನಾರ್. ಆರೆನ ಸಾಧನೆದ ಮಾತ ಮರ್ಗಿಲ್ ತೂಯರೆಗ್ ಸಾಮಾನ್ಯೆರೆಗ್ ಸಾಧ್ಯ ಇಜ್ಜಿ. ಅಂಚಿ ಕರ್ಮಯೋಗಿನ ವಿಷಯೊನು ಎಂಕ್ ತೆರಿಲೆಕ, ಯಾನ್ ಓದಿಲೆಕ ಇಂಚ ಈ ಕಿನ್ಯ ಬೂಕುಡು ಬರೆತೆ. ಆರೆನ ಬದ್‌ಕ್ ಶತ - ಶತಮಾನ ಮುಟ್ಟಲಾ ಮಾತೆರೆಗ್ಲಾ ಆದರ್ಶ ಆದಿಪ್ಪಡ್ ಪಂಡ್‌ದ್ ಎನ್ನ ಬಯಕೆ.

ಈ ಬೂಕು ಬರೆಯರೆಗ್ ಅನು ಮಲ್ತ್ ಕೊರ್ದ ಅಕಾಡೆಮಿದ ಗುರ್ಕಾರ್ ಡಾ. ವಾಮನ ನಂದಾವರ ಮೇರೆಗ್, ಬೂಕುನು ಬೊಳ್ಳುಗು ಪಾಡ್ ರಿಜಿಸ್ಟ್ರಾರ್ ಶ್ರೀ ಎಸ್.ಎಚ್. ಶಿವರುದ್ರಪ್ಪೆರೆಗ್, ಓದೊಂದುಪ್ಪಿನ ನಿಕುಲೆಗ್ ಎನ್ನ ಉಡಲ್ ದಿಂಜಿನ ಸೊಲ್ಮೆಲು.

ಈ ಬೂಕುನು ಪೂರ್ಲು ಪೂಲಿಗೆಡ್ ಅಚ್ಚಿ ಮಲ್ತ್ ಕೊರ್ದ ಕುಡಲದ ಆಕೃತಿ ಕಂಪ್ಯೂಟರ್ಸ್‌ದ ಕಲ್ಲೂರು ನಾಗೇಶ್‌ರೆನ್ ಬೊಕ್ಕ ಸಿಬ್ಬಂದಿ ವರ್ಗದಕುಲೆನ್ ಅಂಚೆನೆ ಕಾರಂತೆರೆನ ಭಾವಚಿತ್ರ ಒದಗಾದ್ ಕೊರ್ದ ಯಜ್ಞ ಮೆರೆನ್ ನೆಂಪು ಮಲ್ತೊನುವೆ.

‘ನೆಲೆ’, ಪುತ್ತೂರು

ಡಾ. ಪಾಲ್ತಾಡಿ ರಾಮಕೃಷ್ಣ ಆಚಾರ್

10 ಸೆಪ್ಟೆಂಬರ್ 2003



## ತುಳುನಾಡ್ ಕಾರಂತೆರ್

ತುಳು ಚಳವಳಿದ ಸುರುತ ಮುಂದಾಳು ಪಣಿಯಾಡಿ ಶ್ರೀನಿವಾಸ ಉಪಾಧ್ಯೇನ ಪ್ರಕಾರೊಡು ತುಳುವೆರ್ ಪಂಡ “ತುಳು ಅಪ್ಪೆ ಬಾಸೆ ಆದಿತ್ತಿನಕುಲು ಮಾತ್ರ ಅತ್ತಾ ತುಳುನಾಡ್‌ಡುಪ್ಪಿನಕುಲು ಮಾತೆರ್ಲ ತುಳುವೆರ್. ತುಳು ತೆರಿನಕುಲು ಪೂರ ತುಳುವೆರ್. ಡಾ. ಕೋಟ ಶಿವರಾಮ ಕಾರಂತೆರ್ ಪುಟ್ಟಿನ ಕೋಟ ಒಂಜಿ ಕಾಲೊಡು ತುಳುನಾಡ್ ಕೇಂದ್ರೊ. ಅವುಲೇ ಕೈತಲ್ದ ಕೋಟೇಶ್ವರೊಡು ತುಳುಂಬ (ತುಳು ಬನ್) ಪೆರುಮಾಳ್ ಪನ್ನಿ ತುಳುವರಸೆ ಆಳೊಂದಿತ್ತೆ. ಆಯಡ್ತಾದೇ ಈ ಮಣ್ಣ್‌ಗ್ ತುಳುನಾಡ್ ಪನ್ನಿ ಪುದರ್ ಬತ್ತಂಡ್ ಪನ್ನಿ ಕತೆ ಮಲೆಯಾಲಂ ಸಾಹಿತ್ಯೊಡುಂಡು. ಅಂಚಾದ್ ಶಿವರಾಮ ಕಾರಂತೆರ್ ತುಳುವೆ.

ಡಾ. ಶಿವರಾಮ ಕಾರಂತೆರ್ ತುಳು ಅಭಿಮಾನಿ. ಆರ್ ತುಳು ಸಂಸ್ಕೃತಿ, ಜಾನಪದೊತ ಬಗ್ಗೆ ದಿಂಜ ಸಂಶೋಧನೆ ಮಲ್ತಾದೆರ್. ಆರ್ ಬರೆತಿನ ‘ಭೂತಾರಾಧನೆ’ ಬೊಕ್ಕ ‘ಜಾನಪದ ಗೀತೆಗಳು’ ಬೂಕುಲೆನ್ ಓದುಂಡ ಅವು ಗೊತ್ತಾಪುಂಡು. ಆರ್ ಮೊಳಹಳ್ಳಿ ಶಿವರಾಯೆರೆನ ಒಟ್ಟಿಗೆ ಸೇರ್ದ್ ಸಮಾಜ ಸೇವೆ ಮಲ್ತೊಂದಿತ್ತಿ ಪೂರ್ತುಗು ಪಣಿಯಾಡಿ ದಾರೆಗೊಂಜಿ ಕಾಕಜಿ (2-2-1929) ಬರೆದಿತ್ತೆರ್. ಆ ಕಾಕಜಿಡ್ ಒಂಜಿ ತುಳುನಾಟಕ ಬೋಡೊಂದ್ ಕೇಂಡ್‌ದಿತ್ತೆರ್. ಆ ಕಾಕಜಿಗ್ ಪೂರಕವಾದ್ ಮೊಳಹಳ್ಳಿದಾರ್ “ಕನ್ನಡ ನಾಟಕೊಡ್ ಪ್ರಯೋಜನ ಪಡೆಯರೆ ಆವಂದಿನ ಆದಿದ್ರಾವಿಡ ಸಮಾಜೊದ ಜನಕುಲೆ ಗೋಸ್ಕರ ಈ ನಾಟಕ ಬೋಡು. ಶಿವಳ್ಳಿ ಬ್ರಾಣೆರ್ ಪಾತೆರುನ ಪರಿಷ್ಕಾರವಾಯಿನ ತುಳು ನಾಟಕ ಬೊಡ್ಡಿ. ಸಾಮಾಜಿಕ, ಆರ್ಥಿಕ ವಿಷಯೊಲೆಡ್ ಪಿರ ಒರಿದಿನ ಜನೊಕುಲೆ ಗೋಸ್ಕರ ಮಿತ್ತ್ ದರ್ಪರೆ ತಾದಿ ತೋಜಾವುನ ನಾಟಕ ಬೋಡೊಂದು” (12-2-1929) ಕೇಂಡ್‌ದಿತ್ತೆರ್.



1993ನೇ ಎಪ್ರಿಲ್ ತಿಂಗೊಳ್ಳು ಕುಡಲಡ್ ಕರಾವಳಿ ಉತ್ಸವ ಆಚರಣೆ ಮಲ್ಪುನಗ ಉಚ್ಚಯೊದ ಪುದರ್ನೊಂಜಿ ನೆಂಪು ಸಂಚಿಲಾ ಆವೊಡೊಂದು ಅಪಗದ ಜಿಲ್ಲಾಧಿಕಾರಿ ಶ್ರೀ ವಿ. ಮಧು ಅಪ್ಪಣೆ ಕೊರೈರ್. ಅಪಗ ಕುಡಲಡ್ ವಯಸ್ಕರ ಶಿಕ್ಷಣಾಧಿಕಾರಿಯಾದಿತ್ತಿನ ಶ್ರೀ ಐ.ಎಸ್. ಕಾರಂತೆರ್ ಸಂಚಿದ ಸಂಪೊಲಿಗಿದಾರಾಯೆರ್. ಕರ್ನಾಟಕ ತುಳು ಸಾಹಿತ್ಯ



ಅಕಾಡೆಮಿದ ಇತ್ತೆದ ಅಧ್ಯಕ್ಷೆ ಡಾ. ವಾಮನ ನಂದಾವರ್ಲಾ ಯಾನ್ನಾ ಸಂಪೊಲಿಗೇದಾರೆಗ್ ಬೆರಿಸಾಯೊ ಕೊರೈರೆ ಜೊತೆಟ್ ಸೇರೊಂಡೊ.

ಕರಾವಳಿ ಉತ್ಸವದ ನೆಂಪು ಸಂಚಿ 'ಕರಾವಳಿ'ಗ್ ಒಂಜಿ ಲೇಖನೊ ಬರೆಪದ್ ಕನಯರೆಗಾದ್ ಯಾನ್ ಡಾ. ಶಿವರಾಮ ಕಾರಂತೆರೆನ ಸಾಲಿಗ್ರಾಮೊದ ಇಲ್ಲಡೆ ಪೋಯಿ. ಕಾರಂತೆರ್ ಒಂಜಾತ್ ಚಿತ್ರೋಲೆನ್ ತನ್ನದ್ರ ಬುಡ್ಡ ಪಾಡ್ ಕೈತಲ್ ಬಗೆಬಗೆತ ಬಣ್ಣೊಲೆನ್ ದೀವೊಂದು ಚಿತ್ರೊ ಬುಡ್ಡವೊಂದಿತ್ತೆರ್. ಕಾರಂತೆರ್ಗ್ ಕೈ ಮುಗಿದ್ ಎನ್ನ ಪೊಲಬು ಮಲ್ತೊಂಡೆ.

ಎನನ್ ಕುಲ್ಕರೆ ಪಂಡ್‌ದ್ ಕಾರಂತೆರ್ “ಸಾಹಿತಿ ಯಾಪಲಾ ಕಲಾವಿದೆಲಾ ಆದುಪ್ಪೊಡು. ಸಾಹಿತಿನ ಮನಸ್ಸಾದ್ ಎಂಚಿನ ಉಂಡುಂದು ಚಿತ್ರಗಾರಗ್ ಗೊತ್ತಾಪುಜಿ. ಆಯಗ್ ಅರ್ಥ ಮಲ್ತ್ ಕೊರೈರೆಗ್ ಸಾಹಿತಿಗ್ ಕಷ್ಟ ಆಪುಂಡು. ಅಂಚ ಕತೆ ಒಂಜಿ, ಚಿತ್ರೊ ಬೇತೊಂಜಿ ಆಪುಂಡು. ಬೊಕ್ಕ ಬೂಕು ಬುಡುಗಡೆದ ಬಗ್ಗೆ ಬರೆಯಿನಾಯಗಿತ್ತಿ ಎವುರೊ ಕಲಾವಿದಗುಪ್ಪುಜಿ. ಅಂಚ ಪಂಡಿ ಪೂರ್ತುಗು ಚಿತ್ರೊ ಬುಡ್ಡಾದ್ ಕೊರ್ಪುಜೆ. ಕಲಾವಿದೆರೆನ ಹಂಗ್ ಬೊಡ್ಚಿಂದ್ ಎನ್ನ ಕಾದಂಬರಿಲೆಗ್ ಯಾನೇ ಚಿತ್ರೊ ಬರೆವೊಂದುಲ್ಲೆ” ಪಂಡೆರ್.

ಆತ್ ಪಂಡ್‌ದ್ ಆರ್ ಉಂತಯಿಚೆರ್. “ಪ್ರಕೃತಿಡುಪ್ಪಿ ಜೀವಿಲೆನ್ ವಾ ಜಾತಿಂದ್ ವಿಂಗಡಣೆ ಮಲ್ಪುನ ಕಷ್ಟೊ. ಜೀವ ವಿಜ್ಞಾನಿಲು ಜೀವಿದ ಆಕಾರೊ, ಬೆರಿಮುಳ್ಳು, ಉಸುಲುದ ಅಂಗೊ, ಜೀರ್ಣಾಂಗ, ಸಂತಾನೋತ್ಪತ್ತಿ ವಿಧಾನ ಇಂಚ ಮಾತ ತೊದು ಒಪ್ಪಾಂಡಲಾ ಒಂಜಿ ಜಾತಿಗ್ ಸೇರವೆರ್. ಕೆಲವು ಸರ್ತಿ ಅಕುಲು ನೆಟ್ವ್ ತತ್ ಬೂರ್ವೆರ್. ಕರಿ ವಾರೊಡು ಕಡಲ ಬರಿಟೊಂಜಿ ಪೊಸ ಜೀವಿ ತೂಯರೆ ತಿಕ್ಕೊಂಡ್. ಅವು ಉಚ್ಚೋ, ಮೀನೊಂದು ಏರೆಗ್ಲಾ ಗೊತ್ತಾಯಿಜಿ. ಒರಿ ಜೀವ ವಿಜ್ಞಾನಿ ಅಯಿನ್ ಒಂಜಿ ಜಾತಿಗ್ ಸೇರಾದ್ ಪೇಪರ್ಡ್ ಕೊರ್ಯೆ. ಅವು ಎಂಕ್ ಸನ್ಮಂತೊ ಆಯಿಜಿ. ಅವು ಅಂಚತ್ ಇಂಚಂದ್ ಯಾನ್ ಮನದನಿದ ಪೇಪರ್ಡ್ ಕೊರ್ಯೆ. ವಿಜ್ಞಾನಿಲು ದಾದ ಪಂಡೆರ್‌ಂಡಲಾ ಅಯಿನ್ ಎಂಚಾಂದ್ ಕೇನುನಕುಲು ಇಜ್ಯಂಡ ಅಕುಲೇ ಉಸಾರಾಪೆರ್, ಅಕುಲು ಪಂಡಿನವೇ ನಡಪುಂಡು” ಅಡೆಗ್ ಕತೆ ಉಂತದ್, ಬತ್ತಿನಿ ದಾನೆಂದ್ ಎನಡ ಕೇಂಡೆರ್.

ಕಾರಂತೆರ್ ಬಜೀ ಸಾಹಿತಿ ಮಾತ್ರ ಅತ್ ಕಲಾವಿದೆ. ಅತೇ ಅತ್ ವಿಜ್ಞಾನಿಲಾ ಅಂದ್ ಪನ್ನಿ ವಿಚಾರೊ ಎನ್ನ ಮನಸ್ಸಗ್ ಪೋಂಡು. ಎನ್ನ ಆಲೋಚನೆನ್ ಆಡೆಗೆ ಉಂತದ್ ಕರಾವಳಿ ಉತ್ಸವೊದ ವಿಷಯೊನು ಆರೆಡ ಪಂಡೆ. ಒಂಜಿ ಲೇಖನೊ ಬರೆದ್ ಕೊರೊಡೊಂದು ಕೇಂಡೊಂಡೆ. ಅಪಗ ಕಾರಂತೆರ್ “ನಿಕುಲೆನ ಉತ್ಸವ ಕರಾವಳಿಗ್ ಮಾತ್ರೊನೊ? ಗುಡ್ಡೆದ ಪುಡೆಕಿಜ್ಜಿಯಾ? ಈರ್ ಒಲ್ಪದಾರ್? ಸವಾಲ್ ಪಾಡ್ಯೆರ್. ಆತ್ನೇಟ



ಕುಸಾಲ್‌ಡಿತ್ತಿ ಎಂಕ್ ಇತ್ತೆ ಒಂತೆ ಪೋಡಿಗೆ ಆಂಡ್. “ಯಾನ್ ಪುತ್ತುರುದಾಯಿ. ಕರಾವಳಿ ಉತ್ಸವ ಇಡೀ ಜಿಲ್ಲೆಗ್” ಪೋಡಿದ್ ಪೋಡಿದ್ ಪಂಡೆ. “ತೂಲೆ, ಈರೆನ ಪುತ್ತುರು ಕರಾವಳಿ ಅತ್. ಸಹ್ಯಾದ್ರಿದ ಪಡ್ಡಯಿ ಮೈಕ್ ಅರಬಿ ಕಡಲ ಬರಿಮುಟ್ಟು, ಕಾಸರಗೋಡುಡ್ಡು ಇಂಚಿ ಕುಂದಾಪುರ ಮುಟ್ಟು ತುಳುನಾಡ್, ಎನ್ನ ಕೋಟಡ್ ತುಳು ಬಾಸೆ ಇಜ್ಜಂಡಲಾ ತುಳು ಸಂಸ್ಕೃತಿ ಉಂಡು. ಅಂಚಾದ್ ಎಂಕ್ ದಕ್ಷಿಣ ಕನ್ನಡ ಜಿಲ್ಲೆನ್ ವಿಭಜನೆ ಮಲ್ಪುನ ಬಾರಿ ಬೇಜಾರೊದ ಸಂಗತಿಯಾದಿತ್ತಂಡ್, ನೆನ್ನ ಪೇಪರ್ಗಲಾ ಬರೆಯಿ. ಎನ್ನ ಈ ವಿರೋಧೊನು ತೂದು ಕೆಲವೆರ್ ಹಿಕ್ಕತ್ ಮಲ್ತೆರ್. ಎನನ್ ದುಂಬುದೀವೊಂದು ಎನಡ ಕೇನಂದೆನೇ ಕೋರ್ತುಗು ಪೋಯಿರ್. ಅವು ಎಂಕ್ ಆಯಿಜಿ. ಕೂಡ್ಲೆ ಎನ್ನ ವಿರೋಧೊನು ಪಿರ ದೆತೊಂಡೆ” ಪಂಡೆರ್.

ಆತ್ ಪಾತೆರೊ ಕೇಂಡ್‌ದಾಪುನೆನೆ ಎಂಕೊಂತೆ ಧೈರ್ಯೊ ಬತ್ತಂಡ್. ತುಳುನಾಡ್, ತುಳು ಬಾಸೆದ ಮಿತ್ತ್ ಆರೆಗಿತ್ತಿ ಅಭಿಮಾನೊ ತೆರಿಂಡ್. ಮೆಲ್ಲಡೆ ಈರ್ ತುಳು...

“ಯಾನ್ ತುಳುಲಾ ಪಾತೆರುಜಿ, ಕೋಟದ ಕನ್ನಡಲಾ ಪಾತೆರುಜಿ. ಯಾನ್ ಪಾತೆರುನೆ ಶುದ್ಧ ಕನ್ನಡ. ಅತ್ತಂಡ ಇಂಗ್ಲಿಷ್”. ಅಡೆಗೇ ಉಂತಯಿರ್. ಲೇಖನೊ ಒಂಜಿ ಬರೆದ್ ಕೊರೊಡುಂದು ಕೇಂಡೊಂಡೆ. “ನಿಕುಲೆನ ನೆಂಪು ಸಂಚಿಗ್ ಕರಾವಳಿಂದ್ ಪುದರ್ ದೀವೊಡ್ಲಿ. ‘ಸಹ್ಯಾದ್ರಿ ಸಂಪದ’ಂದ್ ದೀಲೆ” ಪಂಡ್‌ದ್ ಉಂತಯಿರ್. ಯಾನ್ ಬತ್ತದ್ ಅಂಚನೆ ಸಮಿತಿದಕುಲೆಡ ಪಂಡೆ. ಆಂಡ ಅಧಿಕಾರಿನಕುಲೆಗ್ ಸರಕಾರೊದ ಆದೇಶೊನೇ ಮಲ್ಲ ಅತ್ತೇ?

ಡಾ. ಶಿವರಾಮ ಕಾರಂತೆರ್ ನೆಂಪು ಸಂಚಿಗಾದ್ ಬರೆದ್ ಕೊರ್ತಿನ ಲೇಖನೊದ ತರ್ಜುಮೆನ್ ಮೂಲು ಕೊರೊಂದುಲ್ಲೆ.

“ದಕ್ಷಿಣ ಕನ್ನಡ ಜಿಲ್ಲೆನ್ ಕುಡ ಒಂಜಿ ಪುದರ್ ಲೆಪ್ಪುಂಡೊಂದಾಂಡ, ಅವು ಸಹ್ಯಾದ್ರಿ ಪರ್ವತ ಮಾಲೆ ಮುಲ್ಪದ ಜೀವಿಲೆಗ್ ಕೊರ್ತಿನ ನಿಸರ್ಗ ಸಂಪತ್ತೆಂದ್ ಪನೊಲಿ. ಹಿಂದೂ ಸಾಗರೊದ ಒಂಜಿ ಬರಿತ ಅರಬೀ ಕಡಲ್ ನೂದು ಮೈಲ್ ಉದ್ದೊಗ್ಲಾ ಪದಾರೊಂದುಪ್ಪಿ ನೀಲ ಮೈತ ಕಡಲ ಸೆರಂಗ್, ಅಲ್ಪಡ್ ಐನಾಜಿ ಸಾರೊ ಮೈಲ್ ದೂರ ಪಡ್ಡಯಿಗ್ ವಾ ಅಡೆತಡೆಲಾ ದಾಂತೆ ಕಡಲ ಪಯಣ ಮಲ್ಪೊಲಿ. ಇಂಚ ಪಯಣ ಮಲ್ತಾದೇ ಈಡೆಗ್ ಕ್ರಿಸ್ತಶಕ ಸುರು ಆಪಿ ಪೂರ್ತುಗು ರೋಮ್ ದೇಶೊದಕುಲೆನ ಕಪ್ಪಲುಲು ಬತ್ತೊ. ಆಫ್ರಿಕದ ನರಮಾನ್ಯ ಜಲ್ಮೊದ ತೊಟ್ಟಿಲ್‌ಂದ್ ಪುದರ್ ಪಡೆಯಿನ ಎಬಿಸೀನಿಯಾ, ಸೂಡಾನ್ ಪ್ರಾಂತ್ಯೊಲೆಡ್ ಅನಾದಿ ಕಾಲೊದ ನರಮಾನ್ಯೆರ್ ನಡತ್‌ಬರ್ಪಿ ಸಾದಿಡ್ ಏಷ್ಯಾ ಖಂಡೊದ ತೆನ್ನಾಯಿ ಪುಡೆಕ್ಕಾದ್ ಈ ಜಿಲ್ಲೆಗ್ ಕ್ರಿಸ್ತಶಕ ಸುರು ಆಪಿನೆಗ್ ದುಂಬೇ ಬತ್ತದೆರ್. ಕ್ರಿಸ್ತ ಶಕೊತ ಸುರುತ ಶತಮಾನೊಡು ಬರೆಯಿನ ಒಂಜಿ ಗ್ರೀಕ್ ಕಿನ್ಯ



ನಾಟಕೋಡು ಕಡಲ್ ಪಾಲಾಯಿನ ಗ್ರೀಕ್ ದೇಶೋದ ಒರಿ ರಾಜಕುಮಾರಿನ್ ಬದ್ಕವುನ ಕತೆ ಉಂಡು. ಅವು ತುಳು ಬಾಸೆಡುಂಡು. ಅಯಿಟ್ ಕುಡಲದ ಕೈತಲ್ ಪಣಂಬೂರುದ 'ಕಟ್ಟೆ ಅಮ್ಮ' ಬರ್ಪಲ್.

ಕ್ರಿಸ್ತಶಕ ಒಂಜಿ - ರಡ್ಡ್ ಶತಮಾನೊಡ್ ಬೊಕ್ಕ ರಡ್ಡ್ ಶತಮಾನೊ ಮುಟ್ಟು ಬತ್ತಿನ ಆದಿಕಾಲೊದ ನರಮಾನ್ಯರೆನ ದೂಪೆಲು ಈ ಜಿಲ್ಲೆಡ್ ಅಲ್ಪಲ್ಪ ತಿಕ್ಕುಬೊ.

ಅಯಿಡ್ಡ್ ಏತೋ ಕೋಟಿ ವರ್ಸೊಗು ದುಂಬು ಯೇಪ ಬೂಕಂಡೊಲು ಪೂರ ಒಂಜಾದಿತ್ತೊನೋ ಅಪಗ ಈ ಸಹ್ಯಾದ್ರಿದ ಸೆರಂಗ್ ಆಫ್ರಿಕದ ಮೂಡಯಿ ಸೆರಂಗ್ ತಾಗೊಂದಿತ್ತಂಡ್. ಇನಿ ಅಯಿಡ್ಡ್ ಬೇತೆನೇ ಆದ್ ಭರತಭೂಮಿದ ಪಡ್ಡಯಿ ಬರಿಟ್ ಅನಾದಿ ಬೂಗಬೊಡ್ಡು ಉರ್ಕರ್ಡ್ ಮೆಲ್ಲನೆ ಅರತ್ತಾದ್ ಆಜಿಮೈತ ಕಂಬ ಸಾಲ್ದೆಲಕ ತೋಜುನ ವಿಸ್ಮಯೊದ ಲಾವಾ ಕಂಬೊಲು ಮಲ್ಪೆದ ತೋನ್ನೆ ಪಾರ್ಡುಂಡು.

ಬೂಗಬೊಡ್ ಎಲ್ಯ ಕಣ್ಣ್ಡ್ ಉರ್ಕರ್ಡ್ ನೆಲತ ಮಿತ್ತ್ ಗುಮ್ಮ ಕಟ್ಟಾದ ಉಂತಿನ ಜಮಲಾಗಡ (ಗಡಾಯಿ ಕಲ್ಲ್) ಬೊಕ್ಕೊಂಜಿ ಅದ್ಭುತೊ. ಅಯಿತ ಮೂಡಯಿಗ್, ಜಿಲ್ಲೆಗ್ ಯೇಪಲಾ ಒಂಜಿ ಗೋಡೆದಲೆಕ ಉಂತಿನ ಪಡ್ಡಯಿ ಗಟ್ಟಿನೇ ಸಹ್ಯಾದ್ರಿ ಪರ್ವತ. ಅಯಿನ ಎತ್ತರೊ ಸಾಮಾನ್ಯವಾದ್ ರಡ್ಡ್ ಸಾರೊ ಫೀಟ್. ಆಂಡ ಕೆಲವು ಪರ್ವತ ಮಿರೆಕುಲು ಐನಾಜಿ ಸಾರೊ ಫೀಟ್‌ದಾತ್ ಎತ್ತರೊ ಮುಟ್ಟುಗ್ಲಾ ಉಲ್ಲೊ.

ಮುಲ್ಪದ ಕಾಡ್ ವರ್ಸೊದ ನಾಲ್ ತಿಂಗೊಲ್ ಕಾಲೊ ಬಾನೊದ ಮುಗಲ್ ಮುತ್ಸೊ ಕೊರ್ದು ಭೂಮಿಗ್ 200 - 300 ಇಂಚಿದಾತ್ ಬರ್ಪ ಕೊರ್ಪೊ. ಕಡಲ ಬರಿತ ಬೂಬಾಗೊಡು ಈ ಬರ್ಸೊ ವರ್ಸೊಗು ಸುಮಾರ್ 130 ಇಂಚಿ. ನೆಡ್ಡಾವರ ಗಟ್ಟಿಡ್ ನಲಿಕೆ ನಲಿತೊಂದು ಜತ್ ಬರ್ಪಿ ಎಲ್ಯ - ಮಲ್ಲ ನೀರಜರಿಕುಲೆಗ್ ಲೆಕ್ಕ ಮಿನಿ ಇಜ್ಜಿ.

ಈ ಮಲೆನಾಡ್ ಪರ್ವತ ಗುಡ್ಡೆಲೆನ ಸಾಲ್ ಕಡಲ್ ಮುಟ್ಟು ತನ್ನ ಕೈ ನೀರೊಂದಿತ್ತಂಡ್. ಆಡೆ ಮುಟ್ಟುಲ ಕಾಡ್ ದಿಂಜೊದಿತ್ತಂಡ್. ಲೆಕ್ಕೊದಾಂತಿನ ಜೂವೊ ಜಂತುಲೆಗ್ ಆಸರೆ ಕೊರೊಂದಿತ್ತಂಡ್.

ನೆನ್ನಾ ಕೇನ್ನಗ ನೆತ್ತ ದುಂಬು ನರಮಾನ್ಯನ ಸಾಧನೆ ಬಾರಿ ಎಲ್ಯವು. ನಿಜೊ. ಆ ನರಮಾನಿ ಕ್ರಿಸ್ತ ಪುಟ್ಟುನೆಗ್ ಸುಮಾರ್ ಐನಾಜಿ ಶತಮಾನೊಗು ದುಂಬೇ ಈಡೆ ಬತ್ತಾದ್ಪೊಡು.

ಆ ಪ್ರಾಕ್ದ ನರಮಾನ್ಯ ಜೋಕುಲೆಡ್ ಕೆಲವೆರ್ ಮಲ್ತಿ ಕೆಲಸೊ ಸಾಮಾನ್ಯ ಅತ್ತ್. ಕಾರ್ಲ, ಏಣೂರ್ಡ್ ಗುಮ್ಮಟ ಮೂರ್ತಿಲು ನಮನ್ ಈಲಾ ಎತ್ತರೊಗು ಬಳಪು - ಬಳಪುಂದು ಪಂಡ್‌ದ್ ಲೆತ್ತ್ ಪನ್ನೊ.

ಮುಲ್ಪ ನರಮಾನಿ ಕೆತ್ತಿನ ಕಲ್ಪರವುಲು ಐನಾಜಿ ಶತಮಾನೊದಾತೇ ಪಿರಾಕ್‌ದ. ಮುಲ್ಪದಕುಲು ಬರೆಪಯಿನ ಓಲೆ ಗ್ರಂತೊ 11 - 12 ಶತಮಾನೊದಾತೇ ದುಂಬುದ.



ಅಕುಲನ ಪರಾಕ್ರಮೋ, ಪೌರುಸೋಲೆನ್ ಯೇಪಲ ಪತ್ತ್ ಮಂದೆಗೆ ಪಂಡೊಂದುಪ್ಪಿನ ಪೆರ್ಮದ ದೇವಾಲಯೊ ಮೂಡುಬೆದ್ರದ ಸಾರೊಕಂಬೊದ ಬಸ್ತಿ. ಉಂದು ಪೂರಾ ಸಹ್ಯಾದ್ರಿ ಕೊರ್ತಿನ ಸಂಪೊತ್ತುದ ಉತ್ತೇಜನೊ. ಅಂಚಾದ್ ಉಂದು ಸಹ್ಯಾದ್ರಿ ಸಂಪೊತ್ತು” (ಕಾರಂತೆರ್ ಬರೆತಿನ ಕನ್ನಡ ಲೇಖನೊದ ತರ್ಜುಮೆ. ಕರಾವಳಿ - 1993).

ಇಂಚ ಕಾರಂತೆರ್ ಪ್ರಾಕ್ದ ತುಳುನಾಡ್ನ್ ಬಾರಿ ಪೊರ್ಲುಡು ವರ್ಣನೆ ಮಲ್ತಾದೆರ್. ಕಾರಂತೆರೆಗ್ ಈ ಮಣ್ಣೊದ ಮಿತ್ತ್ ಇತ್ತಿ ಅಭಿಮಾನೊ ಈ ಲೇಖನೊಡು ನೆಗತ್ ತೋಜುಂಡು. ಆರ್ ಪನ್ನಿ ಲೆಕ್ಕೊಡು ತುಳುನಾಡ್ನ್ ಸಹ್ಯಾದ್ರಿ ಪರ್ವತ ಸಾಲೇ ಮೂಲೊ. ತುಳುನಾಡ್ ಮೂಡಯಿಗಟ್ಟ ಕೊರ್ತಿನ ಸಂಪೊತ್ತು.

ತುಳುನಾಡ್ ಭೂತಾರಾಧನೆಗ್ ನೆಲೆ. ಮುಲ್ಪದ ಪ್ರತಿಯೊಂಜಿ ಭೂತೊಲೆಗ್ಲಾ ಅಯಿತನೇ ಆಯಿನ ಕತೆ, ಕಾರ್ನಿಕ ಉಂಡು. ಅಯಿನ್ ಪನ್ನಿನ ಪಾರ್ದನೊಲು ಉಲ್ಲೊ. ಹೆಚ್ಚಿನ ಪಾರ್ದನೊಲು ಸುರು ಆಪಿನನೇ ಸಹ್ಯಾದ್ರಿ (ಮೂಡಯಿಗಟ್ಟ)ಡ್. ಪಂಜುರ್ಲಿ, ಉಳ್ಳಾಗುಲು, ಬಚ್ಚನಾಯಕೆ ಇಂಚ ಗಟ್ಟದ ಕೊಡಿಡ್ ತಿರ್ತ್ ಜತ್ತೊಂದು ಬರ್ಪಿ ಭೂತೊಲು ಯೇತೋ ಉಲ್ಲೊ. ಉದಾರ್ಮೆಗ್ ಪಂಜುರ್ಲಿ ಪಾಡ್ಡನೊ ತೂಕೊ, “ಸತ್ತಿಗೆದಾತ್ ಮಲ್ಲೆ, ಅರಿವಾಣೊದಾತ್ ಉರುಟು, ಪಣವುದಾತ್ ಪೊರ್ಲು. ತಿರ್ತ್ ತುಳು ರಾಜ್ಯೊ - ಬಾರಿ ಪೊರ್ಲು ತೋಜುಂಡು”. ಪಾಡ್ಡನೊ ಸುರು ಆಪಿನನೇ ಇಂಚ. ಸತ್ತಿಗೆ ಪಂಡ ಅರಸುನ ಗದ್ದಿಗೆದ ಬೆತ್ತಡಿಡುಪ್ಪಿ ಬೆಳ್ಳೊಡೆ. ಆ ಬೆಳ್ಳೊಡೆತ್ತ ಮರ್ಯಾದಿ ಬಾರಿ ಮಲ್ಲೆ. ಅರಸು ಅಯಿತಡಿಟ್ ಕುಲ್ಲುಂಡನೇ ಆಯಗ್ಲಾ ಮರ್ಯಾದಿ. ರಾಜ್ಯೊದ ಜನೊಕುಲೆಗ್ ಸತ್ತಿಗೆಡ್ ಮಲ್ಲ ಮರ್ಯಾದಿದ ಸೊತ್ತು ಬೇತೊಂಜಿ ಇಜ್ಜಿ. ಸತ್ತಿಗೆದ ಮರ್ಯಾದಿ ತುಳುನಾಡ್ಗುಂಡು, ಗಟ್ಟದ ಕೊಡಿಟುಂತು ತೂನಗ ತಿರ್ತ್ ಕಣ್ಣೆತ್ತು ನಾತ್ ಜಾಗೆ ತುಳುನಾಡ್. ಕಣ್ಣೆತ್ತುನಾತ್ ಜಾಗೆ ನಂಕೇಪಲಾ ಉರುಟೇ ತೋಜುನೆ. ಅಂಚ ತುಳುನಾಡ್ ಅರಿವಾಣೊದಾತ್ ಉರುಟು. ಒರೊರೈಗ್ ಒಂಜೊಂಜಿ ವಿಸಯೊ ಪೊರ್ಲುತೋಜು. ಒರೈಗ್ ಪೊರ್ಲು ತೋಜುನ ಸೊತ್ತು ಕುಡೊರೈಗ್ ಪೊರ್ಲು ತೋಜುಂದ್. ಆಂಡ ಪಣವು ಮಾತ್ರೊ ಮಾತೆರೆಗ್ಲಾ ಪೊರ್ಲು. ಪಣವು ಪೊರ್ಲಿದ್ಲೀಂದ್ ದಕ್ಕುನಕುಲು ಏರ್ಲಾ ಇಜ್ಜಿ.

ಈ ಪಾಡ್ಡನೊದ ದುನಿಪುನು ಅರ್ಥೊ ಮಲ್ತೊನ್ನಗ ಅಯಿತ ಮಹತ್ವೊ ಏತ್ಂದ್ ಗೊತ್ತಾಪುಂಡು. ಪಾಡ್ಡನಕಾರೆ ಓಲು ಉಂತುದು ಈ ಪಾಡ್ಡನೊ ಪನ್ನೆಂದ್ ಎನ್ನಿನಗ ಆಯೆ ಸಹ್ಯಾದ್ರಿದ ಕೊಡಿಟುಂತುದು ಪನ್ನೆ ಪನ್ನಿ ಇಸಯೊ ಸ್ಪಷ್ಟ ಆಪುಂಡು. ಅಂಚಾದ್ ತುಳುನಾಡ್ನ್ ಸಹ್ಯಾದ್ರಿಯೇ ಮೂಲೊ. ಕಾರಂತೆರ್ ಪನ್ನಿನಲಾ ಅಯಿನೇ. ಕಾರಂತೆರೆ ಲೇಖನೊಗ್ಲಾ ಪಾಡ್ಡನೊದ ಆಶಯೊಗ್ಲಾ ಬಾರಿ ಎರಕ ಉಂಡು.



ಕಾರಂತೆರ್ ಈ ಲೇಖನೊಡು ಕ್ರಿಸ್ತ ಶಕೊತ ಸುರುತ ಶತಮಾನೊದ ಒಂಜಿ ತುಳು ಬಾಸೆದ ಗ್ರೀಕ್ ಪ್ರಹಸನೊದ ಪ್ರಸ್ತಾವ ಮಲ್ತಾದೆರ್. ಈಜಿಪ್ಟ್‌ದ ಆಕ್ಸಿರಿಂಕಸ್ ಪನ್ನಿನ ಊರುಡು ಒಂಜಿ ಗ್ರಂತೊ ತಿಹಂಡ್. ಆ ಗ್ರಂತೊ ಗ್ರೀಕ್ ಲಿಪಿಟಿತ್ತಂಡ್. ಆಂಡ ಅವು ವಾ ಬಾಸೆಡುಂಡುಂದು ಏರೆಗ್ಲಾ ಪನಿಯೆರೆಗಾಯಿಜಿ. ಯುರೋಪ್‌ದ ವಿದ್ವಾಂಸೆರ್ ಅವು ಒವ್ವೊ ಒಂಜಿ ಭಾರತೊದ ಬಾಸೆಂದ್ ಪಂಡೆರ್. ಅಯಿತ ಪ್ರತಿ ದೆಪ್ಪಾದ್ ತರ್ಪದ್ ಓದಿನ ರಾಷ್ಟ್ರಕವಿ ಗೋವಿಂದ ಪೈಕುಲು ಅವು ಕನ್ನಡೊನೇ ಆದಿಪ್ಪುಂದು ಪಂಡೆರ್. ಸ್ವಾಡ್ರನ್ ಲೀಡರ್ ಪಿ.ಎಸ್. ರೈ ಪನ್ನಿನಾರ್ ವಿಶ್ವಸಂಸ್ಥೆದ ಸೈನ್ಯಾಧಿಕಾರಿಯಾದ್ ಆಡೆಗ್ ಪೋದುಪ್ಪಿ ಪೂರ್ತುಗು ಅಯಿನ್ ಓದಿಯೆರ್. ಸೋದನೆ ಮಲ್ತ್ ತೂನಗ ಅವು ತುಳು ಬಾಸೆಡುಪ್ಪಿ ಚಾರಿಸನ್ ಪನ್ನಿ ಒಂಜಿ ಎಲ್ಯ ಪ್ರಸಂಗೊಂದು ಆರೆಗ್ ತೆರಿಂಡ್. ಬೊಕ್ಕ ಆರ್ ಅಯಿತ ಬಗ್ಗೆ ವಿವರ್ಣೆ ಕೊರಿಯೆರ್. ಆರ್ ಒರಿ ಸೈನ್ಯಾಧಿಕಾರಿಂದ್ ತೆರಿದ್ ಆರೆನ ಪಾತೆರೊಗು ಏರ್ಲಾ ಬಿಲೆ ಕೊರ್ಚೆರ್. ಕನ್ನಡೊದಕುಲು ಬುಡಿ ತುಳುತಕುಲೇ ಅಯಿನ್ ಒತ್ತೊನ್ನೆರೆ ತಯಾರಾಯಿಜೆರ್.

ಕಾರಂತೆರ್ ಅವು ತುಳು ಬಾಸೆಂದ್ ಬರೆತೆರ್. ಅಯಿಟ್ ಪಣಂಬೂರುದ ಅಮ್ಮನಕಟ್ಟೆದ ಪುದರುಂಡುಂದು ತೆರಿಪದೆರ್. ಒವ್ವೋ ಒಂಜಿ ಕಿನ್ಯ ಇಸಯೊ ಆಂಡಲಾ ಕಾರಂತೆರ್ ಅಯಿನ್ ಸೂಕ್ಷ್ಮತಿಸೂಕ್ಷ್ಮ ಪರೀಕ್ಷೆ ಮಲ್ಪಂದೆ ಒತ್ತೊನ್ನಾರತ್. ಪ್ರಾಕೃತ ತುಳುಲಾ ಕನ್ನಡೊಲಾ ಒಂಜೇ ರೀತಿ ಉಪ್ಪುನ ಸಾಧ್ಯತೆ ಉಂಡು. ಆಂಡ ತುಳು ಬೇತೆನೇ. ಕನ್ನಡೊ ಬೇತೆನೇ. ಕಡಲ ಬರಿಟ್ ಬೂದಿತ್ತಿ ಜೀವಿ ಉಚ್ಚುಲಾ ಆದಿಪ್ಪು. ಮೀನ್ಲಾ ಆದಿಪ್ಪು. ಆಂಡ ಕಾರಂತೆರ್ ಉಚ್ಚುನು ಮೀನ್‌ಂದ್ ಪನ್ನೆರೆ ತಯಾರಿಜೆರ್. ಕಾರಂತೆರ್ ಪಂಡಿ ಬೊಕ್ಕ ತುಳುಬಾಸೆ ಕ್ರಿಸ್ತಡ್ ಬೊಕ್ಕೊದ ಸುರುತ ಶತಮಾನೊಡೇ ಇತ್ತಂಡ್ ಪನ್ನಿನೆಗ್ ಅಪೀಲಿಜ್ಜಿ.

★

ಕಾರಂತೆರ್ ಪುತ್ತೂರುಡು ಸುಮಾರ್ 40 ವರ್ಸೊ ಕಾಲೊ ಮುಟ್ಟು ಇತ್ತೆರ್. ಅಪಗ ಆರ್ ಮೊಳಹಳ್ಳಿ ಶಿವರಾಯೆರೊಟ್ಟಿಗೆ ಸೇರೊಂದು ಹಳ್ಳಿ ಹಳ್ಳಿಗ್ ಪೋದು ಜನಸೇವೆ ಮಲ್ತಾದೆರ್. ಜನೊಕುಲೆಗ್ ತಿಳಿವಳಿಕೆ ಕೊರ್ದು ಅಕುಲೆನ ಸಂಪೊತ್ತು ಹೆಚ್ಚಿಸವುನವೇ ಆರೆನ ಉದ್ದೇಶೊ. ಆರ್ ಉಪ್ಪಿನಂಗಡಿ (ಉಬಾರ್), ಕಡಬ (ಕಡಮ್ಮ), ಸುಳ್ಳೊ ಇಂಚ ಬೇತೆ ಬೇತೆ ಕೋಡಿಡ್ ದಿನಗಟ್ಟೆ ಸಂಚಾರ ಮಲ್ತೊಂದಿತ್ತೆರ್.

ಅಪಗದ ಕಾಲೊಡು ಹಳ್ಳಿಡ್ ಮಾತೆರ್ಲಾ ಪಾತೆರೆದ್ನ ತುಳು. ಕನ್ನಡೊ ತೆರಿನಕುಲೆನ್

ಬಿರೆಳ್ಳಾ ಗೆಣಿಪೊಲಿತ್ತಾಂಡ್. ಅಂಚಾದ್ ಕಾರಂತೆರೆಗ್ ತುಳು ತೆರಿಯಂದೆ ಉಪ್ಪರೆ ಸಾಧ್ಯೋನೇ ಇಜ್ಜಿ. ಆಂಡ ಆರ್ ತುಳು ಬಾಸೆಡ್ ಪಾತೆರೊಂದಿತ್ತಿನ ಕಮ್ಮಿ. ಪುತ್ತೂರುಡು ಪುನಗ ಕನ್ನಡ ಬರಂದಿನ ಚಾಕಿರಿದಕುಲು ಬಾಲವನೊಟ್ಟಿತ್ತೆರ್. ಅಕುಲು ಪನ್ನಿ ಪಿರ್ಕಾರೊ ಆರ್ ತುಳುಟು ಪಾತೆರೊಂದಿದ್ದಾಂಡ್. ಆಂಡ ಅಕುಲೆಗ್ ಅರ್ಥೊ ಆಯೆರೆ ಬೋಡಾದ್ ಕೆಲವು ಸಬ್ಬೊಲೆನ್ ಪನ್ನೆದರ್. ಬಚ್ಚಿರೆನ್ ವೀಳ್ಯದೆಲೆ ಪನ್ನಿ ಬದಲ್ ಬಚ್ಚಿರೆಂದೇ ಪನ್ನೆದರ್. ಜಗಲಿದ ಬರಿಟಿತ್ತಿ ಚಿಟ್ಟೆನ್ (ತಿಟ್ಟೆ) ಅಂಚನೇ ಪನ್ನೆದರ್.

ಕಾರಂತೆರೆಗ್ ತುಳು ಬಾಸೆ, ಸಂಸ್ಕೃತಿದ ಬಗ್ಗೆ ಪ್ರೀತಿ ಉಂಡಾಯರೆಗ್ ಆರ್ ತುಳುವೆದಿ ಪೊಣ್ಣನ್ ಮದಿಮೆ ಆಯಿನಲಾ ಒಂಜಿ ಕಾರಣೊ. ಕಾರಂತೆರೆ ಬುಡೆದಿ ಲೀಲಮ್ಮ ಬಂಟ ಸಮಾಜೊಡ್ ಬತ್ತಿನಾರ್. ಆರೆನ ಅಮ್ಮರ್ ಕಾಮು ಡಿ. ಆಳ್ವೆರ್ ಮೂಲತ ತುಳುವೆ. ಆಂಡಲಾ ಬೊಂಬಾಯಿಗ್ ಪೋದು ಬೇರೊದ ಕಸುಬುಡು ಅಲ್ಪನೇ ಪ್ರಾಥಮಿಕ ಸಾಲೆಡ್ ಮರಾಠಿ ಓದಿಯೆರ್. ಆಂಡ ಆರ್ ಇಲ್ಲಲ್ ತುಳುವೇ ಪಾತೆರೊಂದಿತ್ತೆರ್. ಆಳ್ವೆರೆಗ್ ಐನ್ ಜನೊ ಪೊಣ್ಣು ಜೋಕುಲು, ಅಯಿಟ್, ಲೀಲಾ (1920 - 1986) ರಡ್ಡನೆದಾರ್, ಆಳ್ವೆರೆನ ಬುಡೆದಿ ತೀರೈರ್. ಕುಡ ಒಂಜಿ ಮದ್ಮೆ ಆಯೆರ್. ಬೇರೊಡು ಬಾರಿ ಸೋಲಾಂಡ್. ಬೊಂಬಾಯಿ ಬುಡ್ಡು ಕುಡಲಗ್ ಬತ್ತೆರ್. ಕುಡಲಡ್ ಲೀಲಮ್ಮನ್ ಬೆಸೆಂಟ್ ಬಾಲಿಕಾ ಪಾಠಶಾಲೆಗ್ ಸೇರ್ಪೆಯೆರ್. ಅಲ್ಪ ಲೀಲಮ್ಮ ಕನ್ನಡ, ಇಂಗ್ಲಿಷ್ ಕಲೆರ್. ಆರ್ ಹೈಸ್ಕೂಲುಡು ಇಂಗ್ಲಿಷ್ ಕಾದಂಬರಿಲೆನ್ ಓದುದು ಅರ್ಥೊ ಮಲ್ತೊನ್ನಾತ್, ಬೇತೆ ದೇಶೊದಕುಲೆಡ ಪೂರ್ಲ್ಡು ಪಾತೆರುನಾತ್ ಕಲೆರ್. ಸುರು ಕಲ್ತಿನ ಮರಾಠಿನ್ಲಾ ಮದತ್‌ಜೆರ್. ಮದ್ಮೆ ಆಯಿ ಬೊಕ್ಕ ಹರಿನಾರಾಯಣ ಆಪ್ಪೆನ “ಪಣೆ ಲಕ್ಷ್ಮಾಂತು ಕೋಣ್ ಘೆತೋ” ಪನ್ನಿ ಮರಾಠಿ ಪುಸ್ತಕೊನು “ಯಾರು ಲಕ್ಷಿಸುವವರು” ಪನ್ನಿ ಪುದರ್ಡ್ ಕನ್ನಡೊಗು ತರ್ಜುಮೆ ಮಲ್ತಾದ್ ಕಂಡನ್ಯಡ್ ಸಾಬಾಸಾಗಿರಿ ಪಡೆತೆರ್. ಅಂಚನೆ ಬಾಲವನೊಟ್ಟುಪುನಗಲಾ ಬತ್ತ್ ಪೋಪಿನ ಇಷ್ಟೆರೆಡ, ಬಂಧುಲೆಡ, ಬೇಲೆದಕುಲೆಡ ಪೂರ್ಲ್ಡ ಕುಡಲದ ತುಳುಟೇ ಪಾತೆರೊಂದಿತ್ತೆರ್.

ಲೀಲಾ ಒರ್ತಿ ಎಡ್ಡೆ ನೃತ್ಯ ಕಲಾವಿದೆ. ಆರ್ ಬೆಸೆಂಟ್ ಸಾಲೆಡ್ ಒರ್‌ಂಬ್ಲೇ ಕ್ಲಾಸ್‌ಡ್ ಕಲ್ತೊಂದುಪ್ಪುನಗ ಕಾರಂತೆರ್ ಆರೆಗ್ ನಾಟ್ಯ - ನಾಟಕ ಕಲ್ಪಯೆರೆ ಮಾಸ್ತಾದ್ ಬತ್ತೆರ್. ಲೀಲಾ ಕಾರಂತೆರೆನ ವಿದ್ವತ್, ಕಲಾವಂತಿಗೆ, ವ್ಯಕ್ತಿತ್ವೊಗು ಮರ್ಲಾಯೆರ್. ಯಾನ್ ಕಾಂತೆರೆನೇ ಮದಿಮೆ ಆಪುನೆಂದ್ ಅಮ್ಮೆರೆಡ ಪಂಡೆರ್. ಆಳ್ವೆರ್ ಪೊಸ ಮರ್ಜಿದಾರ್. ಆಂಡಲಾ ಸುರುಕೊಂತೆ ನರ್‌ಂಗೈರ್. ಅಕೇರಿಗ್ ಒತ್ತೊಂಡೆರ್. ಕಾರಂತೆರೆಡನೆ ಪೋದು ಲೀಲಾ “ಎನನ್ ಮದ್ಮೆ ಆಪರಾಂದ್” ಕೇಂಡೆರ್. ತನ್ನ ಒಟ್ಟುಗೆ ನಿಕ್ಕ ಜೀವನೊ ಮಲ್ಪರೆ ಬಂಜ ಆವುಂದು ಕಾರಂತೆರ್ ಪಂಡಲಾ ಕೇನಂದೆ ಲೀಲಾ ಕಾರಂತೆರೆನ್ ಮದಿಮೆ



ಆಯೆರ್. ರಿಜಿಸ್ಟ್ರಿ ಮದ್ಮೆ. ಕೆಲವೇ ಜನೊ ಮಾತ್ರೊ ಮದ್ಮೆಗ್ ಬತ್ತ್‌ದಿತ್ತೆರ್. ಬತ್ತಿನಕುಲೆಗ್ ಪೂರ ಕಾರಂತೆರೇ ಒಂಜೊಂಜಿ ಪೌಂಟನ್ ಪೆನ್ನ್ ಕೊರೈರ್. ಆ ಕಾಲೊಡು ಒಂಜಿ ಬ್ರಾಣೆ ಒಂಜಿ ಬಂಟೆದಿ ಪೊಣ್ಣನ್ ಮದ್ಮೆ ಆಪುನೆ ಪಂಡ ಬಾರಿ ಮಲ್ಲ ಸಂಗತಿ. ಒಂಜಿ ಕ್ರಾಂತಿ. ಜಾತೀಯತೆದ ಇಸೊಗಾಳಿ ರುಮು ರುಮೊಂದು ಬೀಜೊಂದಿತ್ತಿ ಕಾಲೊ. ಕಾರಂತೆರೆ ಜಾತಿ ಕಳೆವುನಕುಲು, ಡೋಂಗಿ ಮಲ್ಪುನಕುಲು ಯೇತೋ ಜನೊ ದುಂಬೊತ್ತುದು ಬತ್ತೆರ್. ಇಂಚ ಬತ್ತಿನ ಒರೈನ ಮಿತ್ತ್ ಕಾರಂತೆರ್ ಕೋಟುಡು ಕೇಸ್ ಪಾಡ್ ದಂಡಲಾ ಕಟ್ಟಯೆರ್. ಡೋಂಗಿ ಜನೊಕುಲೆನ ಬಾಯಿ ಮುಚ್ಚಯೆರ್. ಕಾರಂತೆರ್ ತುಳುವೆದಿ ಪೊಣ್ಣನ್ ಮದ್ಮೆ ಆದ್ ತುಳು ಬಾಸೆದೊಟ್ಟಿಗೆ ಒಡಂಬಡಿಕೆ ಮಲ್ತೊಂಡೆರ್. ಒಡಂಬಡಿಕೆ ಪಂಡ ಇಂಚ - ಬಾಲವನೊಟುಪುನಗ ಕಾರಂತೆರ್ ಪೇಂಟೆಗ್ ಪಿದಾಡ್ ಪೂರ್ತುಗು ಲೀಲಮ್ಮನ್ 'ಓಲ್ಲಾ' (ಎಲ್ಲಿರುವೆ?) ಪಂಡ್‌ದ್ ಲೆಪ್ಪೆದೆರ್‌ಗೆ. ಮದ್ಯಾನ ಉನಸ್‌ದ ಪೂರ್ತುಗು ಮಾಳಿಗೆಡ್ ಕುಲ್ಲೊಂದಿತ್ತಿ ಕಾರಂತೆರ್‌ನ್ ತಿರ್ತ್‌ಡ್ ಲೀಲಮ್ಮ "ಹೋಯ್ ಕಾರಂತ್ರೇ" ಪಂಡ್‌ದ್ ಕೋಟ ಕನ್ನಡೊಡು ಲೆಪ್ಪೆದೆರ್‌ಗೆ.

ಮದ್ಮೆ ಆಯಿ ಬೊಕ್ಕ ಕಂಡ್ಯನೊಟ್ಟಿಗೆ ಲೀಲಮ್ಮ ಪುತ್ತೂರ್ ಬಾಲವನೊಕು ಬತ್ತೆರ್. ಬಡವೆ - ಸಿರಿವಂತೆ ಪನ್ನಿ ಭೇದೊದಾಂತೆ ಆರ್ ಮಾತೆರೆಗ್ಲಾ ಬೋಡಿತ್ತಿನಾರಾಯೆರ್. ಬಡವೆರೆಗ್ ಆರ್ ಅಪ್ಪೆ ಸಮಾನೊ. ಆರೆನ್ ತುಳು ಪೊಂಜೆನಕುಲು ಪೂರಾ "ಬಾಲೊನತಮ್ಮ" ಪಂಡ್‌ದೇ ಲೆಪ್ಪೆದೆರ್. ಆಡೆ ಬರ್ಪೆದ್ ಓದು ಬರವು ತೆರಿಯಂದಿ ಪೊಂಜೆನಕುಲು ಆರೆಡ ತುಳುಟೇ ಪಾತೆರೆದೆರ್. ಬಯ್ಯದ ಪೂರ್ತುಗು ಲೀಲಮ್ಮ ತನ್ನ ಜೋಕುಲೆನ್ ಬೊಕ್ಕ ತಂಗಡಿಯಡಿಕುಲೆನ್ ಕೂಡೊಂದು ಜಗಲಿದ ಚಿಟ್ಟೆಡ್ ಕುಲ್ಲೊಂದು ಬತ್ತಿನ ಪೊಂಜೊವೆಡ ಸುಕೊದುಕ್ಕೊ ಪಾತೆರೆದೆರ್. ಬತ್ತಿನಕುಲು ಅಕುಲೆ ಬಂಜ - ಬಗಲೆ ಪಂಡೊನೆದೆರ್. ಲೀಲಮ್ಮ ಅಕುಲೆನ್ ಪೂರಾ ಸಾಂತ್ವನ ಮಲ್ಪೆದೆರ್. ಯೇಪಲ ಬರ್ಪುನಕುಲೆಡ್ ಒರ್ತಿ ಮುಸ್ಲಿಂ ಪೊಂಜೊವು. ಆಳ್ ಬಾರಿ ಬಡತನೊಟು ಇತ್ತಿನಾಲ್. ಅಯಿತ ಮಿತ್ತ್ ಆಳೆನ ಮಗಕ್ ಮರ್ಲ್. ಆಳೆನ್ ಲೀಲಮ್ಮ ಬ್ಯಾರ್ತಿಂದೇ ಲೆಪ್ಪೆದೆರ್. ಬ್ಯಾರ್ತಿ ಪಂಡ ಲೀಲಮ್ಮ ಗಾಂಡ್. ಪೇರೊ - ನೀರೊ ಇತ್ತಿಲೆಕ. ಬೊಕ್ಕೊರ್ತಿ ಕ್ರಿಶ್ಚನ್ ಪೊಂಜೊವು, ಆಳೆನ್ ಕಾರಂತೆರ್ ಗೋಳಿಕಟ್ಟೆ ಬಾಯಮ್ಮಾಂದ್ ಲೆಪ್ಪೆದೆರ್. ಇಲ್ಲಾದ ಚಾಕಿರಿಗ್ ಬತ್ತೊಂದಿತ್ತಿನಾಲ್ ಕಾರ್ಮಿನ್‌ಬಾಯಿ, ಅಪಗ ಪರ್ಲಡ್ಕೊಂಜಿ ಅಜ್ಜಿನ ಹೋಟೆಲ್ ಇತ್ತ್ಂಡ್. ಆ ಅಜ್ಜಿ ಕಾರಂತೆರೆನಾಡೆ ಬೊರೈರೆ ಬತ್ತೊಂದಿತ್ತಲ್. ಆಳೆಗ್ ತುಳುತ ಅಜ್ಜಿಕತೆ ದಿಂಜ ಬರ್ಪೆದ್‌ಂಡ್. ಪಾರ್ಡನೊ ಪನ್ನೆದಲ್, ಬಯ್ಯದ ಪೂರ್ತು ಲೀಲಮ್ಮ ಜೋಕುಲೆ ಒಟ್ಟುಗೆ ಆಳೆನ ಸುತ್ತ ಕುಲ್ಲುದು ಕತೆ, ಪಾರ್ಡನ ಕೇಂಡೊಂದಿತ್ತೆರ್.

ಒರೊರ ಕಾರಂತೆರಾ ಕುಲ್ಲು ದು ಕೆಬಿ ಕೊರ್ದು ಕೇನೆದೆರೆ. ಲೀಲಮ್ಮನ ತಂಗಡಿ ಅಹಲ್ಯಾ (ಗೀತಾ ಕುಲಕರ್ಣಿ) ಈ ಪಾಡ್ಡನೊ ಕೇಂಡ್‌ದೇ ಮದ್ಮೆ ಆಯಿ ಬೊಕ್ಕ 'ತುಳು ಪಾಡ್ಡನದ ಕತೆಗಳು' ಪನ್ನಿ ಬೂಕು ಬರೆಯೆರ್. ಅಜ್ಜಿಗ್ ಜೋಕುಲಿಜ್ಜಾಂಡ್. ಲೀಲಮ್ಮ ಆಳೆಗೊಂಜಿ ಬಾಲೆನ್ ಕುಡಲದ ಅನಾಥಾಶ್ರಮೊಡ್ಡು ಕನತ್ತ್‌ದ್ ಸಾಂಕ್ಯರೆ ಕೊರ್ದಿತ್ತೆರ್. ಕುದ್ಯಾಡಿದಾರೆನ ಅಪ್ಪೆ ಜಾಕಮ್ಮ ಒರ ಕಾರಂತೆರೆ ಶೀತೊಗೊಂಜಿ ಮರ್ದ್ ಪಂಡೆರ್. ಅಯಿಡ್ ಬೊಕ್ಕ ಕಾರಂತೆರ್ ಆರೆನ್ ಪಂಡಿತೆರ್‌ಂದೇ ಲೆತ್ತೊಂದಿತ್ತೆರ್. ಲೀಲಮ್ಮಗ್ ಆರೆಡ ಬಾರಿ ಎಡ್ಡೆ ಇತ್ತ್‌ಂಡ್. ಇಂಚ ಕಾರಂತೆರೆನ ಬಾಲವನೊಟು ಪೊಂಜೊವು ಜೋಕುಲೆನ ಸಬೆಟ್ ತುಳು ಬಾಸೆನೆ ಗಮೆಲೊಂದಿತ್ತ್‌ಂಡ್. ಅಕುಲೆ ನಡುಟು ಕಾರಂತೆರ್ ಒರಿ ತುಳುವನೇ ಆದಿತ್ತೆರ್.

ಬಾಸೆದ ಬಗ್ಗೆ ಕಾರಂತೆರೆನ ಅಭಿಪ್ರಾಯ ಇಂಚ - "ನರಮಾನಿ ಲೋಕೊನು ತೆರಿಯೊನುನೆ ಆಯಾಯನ ಬಾಸೆದ ಮೂಲಕೊ. 'ಬಾಸೆ' ಪನ್ನುನ ನಮ್ಮ ಮನಸ್‌ದ ಪ್ರತೀಕವಾದ್ ಪ್ರಾಕ್‌ಡ್ಲಿಂಚಿ ಬುಳೆದ್ ಬೈದಿನವು. ನಮ್ಮ ಮಾನಸಿಕ ಜೀವನದ ಕಸುಬು ಜೀವನದ ಕುಂದು ಕೊರತೆಲು, ಸತ್ಯ ಸೋಬೆಲು ಮಾತ ಪಾತೆರದ ಮೂಲಕನೇ ಪಿದಯಿ ನೆಗಪುಂಡು. ಸುತ್ತುದ ಜೀವನೊದ ಮಿತ್ತ್ ತನ್ನ ವರ್ಚಸ್ಸನ್ ತೋಜಾದ್ ಅಯಿತ ಪೆರ್ಮೆ, ಕೀಳ್ಮೆಲೆಗ್ ಕಾರಣ ಆಯೆರೆಗ್ ಸಾಧ್ಯತೆ ಉಂಡು. ಜನಜೀವನೊಗ್ಲಾ ಬಾಸೆಗ್ಲಾ ಕೈತಲ್ದ ಸಮ್ಮಂದ. ಊರು ಮಲ್ಲೆ ಆವೊಡು. ಊರ್ದ ಬಾಸೆ ಮೆರೆವೊಡು ಪನ್ನಿ ಸದ್ಭಾವನೆ ಪ್ರತಿಯೊರಿ ನರಮಾನ್ಯಡಲಾ ಉಪ್ಪೊಡು".

## ಪುಟ್ಟು - ಬಾಲ್ಯೊ

ಇತ್ತೆದ ಉಡುಪಿ (ಒಡಿಪು) ಜಿಲ್ಲೆದ ಕಡಲ ಬರಿತ ಒಂಜಿ ಊರು ಕೋಟ. ಕಡಲ ಬರಿತ ಊರೇಪಲಾ ತೆರೆಕುಲೆನ ಪೆಟ್ವ್ ತಿಂದ್‌ದ್ ಅಂಕು ಡೊಂಕಾದಿಪ್ಪುಂಡು. ಸುದೆಕುಲು ಕಡಲ್ ಸೇರುನ ಅರ್ವೆದ ಬಾಕಿಲ್‌ಲಾ ಅಂಕುಡೊಂಕು. ಇಂಚ ಓರೆ - ಕೋರೆ ಆದುಪ್ಪಿ ಊರುದ ಮೂಲೆನ್ ತುಳುವೆರ್ ಕೋಡಿ, ಕೋಂಟು ಪಂಡ್‌ದ್ ಪನ್ನೆರ್. ಕೋಂಟು ಪೋದು ಕಡೇಕ್ ಕೋಟ ಆತ್‌ಂಡ್.

ಕೋಟ ಉಡುಪಿ - ಕುಂದಾಪುರೊತ ನಡುಟುಪ್ಪಿ ಒಂಜಿ ಎಲ್ಯ ಹಳ್ಳಿ. ಅಲ್ಪ ಬ್ರಾಣೆರೆನ ಇಲ್ಲಾಲೇ ಎಚ್ಚೆ. ಅಕುಲೆನ್ ಕೋಟ ಬ್ರಾಹ್ಮಣರೊಂದೇ ಪನ್ನುನೆ. ಇಂಚಿನ ಸ್ಮಾರ್ತ ಬ್ರಾಹ್ಮಣೆರೆನ ಒಂಜಿ ತರವಾಡ್‌ಡ್ ಶಿವರಾಮ ಕಾರಂತೆರ್ 1902ನೇ ಅಕ್ಟೋಬರ್ 10ನಾನಿ ಪುಟ್ಟೆರ್. ಆರೆನ ಅಮ್ಮೆರ್ ಶೇಷ ಕಾರಂತೆರ್. ಅಪ್ಪೆ ಲಕ್ಷ್ಮಿಯಮ್ಮ. ಅಕುಲೆಗ್ ಪದ್ರಾಡ್ ಜೋಕುಲು. ಅಯಿಟ್ ಒರಿ ಎಲ್ಯೆಡೇ ತೀರ್ದಿತ್ತೆರ್. ಶಿವರಾಮ ಕಾರಂತೆರೆಗ್ ನಾಲ್ ಜನ



ಅಣ್ಣಡಿಕುಲು, ನಾಲ್ ಜನ ಮೆಗ್ಗಡಿಕುಲು ಬೊಕ್ಕ ಮೂಜಿ ಜನ ತಂಗಡಿಯಲ್ಲು. ಅರೆನ ಒರಿ ಪಲಯೆ ಕೆ. ರಾಮಕೃಷ್ಣ ಕಾರಂತೆರ್ ವಕೀಲ ವೃತ್ತಿಡಿತ್ತಾದ್ ಮದ್ರಾಸ್ ರಾಜ್ಯೊದ ಕಂದಾಯ ಮಂತ್ರಿಲಾಯೆರ್. ಕುಡ ಒರಿ ಕೆ. ಲಕ್ಷ್ಮೀನಾರಾಯಣ ಕಾರಂತೆರ್ ವಿಜ್ಞಾನ ವಿಷಯೊಡು ಬರಹಗಾರೆ. ಆರೆನ ಜನತಾ ಖಗೋಲ ಶಾಸ್ತ್ರ ಬೂಕುಗು 1953ಡ್ ಮದ್ರಾಸ್ ಸರಕಾರ ಇನಾಂ ಕೊರುಂಡು. ನನ ಒರಿ ಕೆ. ವಾಸುದೇವ ಕಾರಂತೆರ್ ಇಲೆಕ್ಟ್ರಿಕ್ ಇಂಜಿನಿಯೆ ರಾದ್ ಮದ್ರಾಸ್ ಸರಕಾರೊಡು ಕೆಲಸ ಮಲ್ತೆರ್. ಶಂಕರ ನಾರಾಯಣ ಕಾರಂತ (ವಕೀಲೆರ್), ನರಸಿಂಹ ಕಾರಂತ (ಮಾಸ್ಟ್), ಶಿವಯ್ಯ ಕಾರಂತ (ಇಲೆಕ್ಟ್ರಿಕ್ ಇಲಾಖೆದ ಮೇಲ್ವಿಚಾರಕೆರ್), ಡಾ. ಕೆ. ಪರಮೇಶ್ವರ ಕಾರಂತ (ಉದ್ಯಮಿ - ರಸಾಯನ ಶಾಸ್ತ್ರೊಡು ಡಾಕ್ಟರೇಟ್ ಪಡೆಯಿನಾರ್) ಇಂಚ ನಾಲ್ ಜನ ಮೆಗ್ಗಡಿಕುಲು. ಮಾತೆರ್ನಾ ಅಕುಲಕುಲೆನ ಕ್ಷೇತ್ರೊಡು ವಿದ್ವಾಂಸರಾದಿತ್ತೆರ್. ಶೇಷ ಕಾರಂತೆರ್ ಆಸ್ತಿವಂತೆ ಆಂಡಲಾ ಕಸುಬುಡು ಐಗುಳಾದಿತ್ತೆರ್. ಅಪಗ ಆರೆಗಿತ್ತಿ ಸಂಬಳೊ ತಿಂಗೊಳುಗು ಎಣ್ಣಾಣೆ. ಬೊಕ್ಕ ಆ ಕಸುಬು ಬುಡ್ಡು ಆರ್ ಜವುಳಿ ಅಂಗಡಿ ದೀಯೆರ್.

ಶೇಷ ಕಾರಂತೆರೆನ ಸಂಪ್ರದಾಯೊದ ಕುಟುಮೊ. ಸುರುಟೊಂತೆ ಆರೆಗ್ ಬಡಪೊತ್ತು ಇತ್ತಂಡ್. ಮದಿಮೆ ಆಯಿ ಬೊಕ್ಕ ಸಿರಿವಂತಿಕೆ ಹೆಚ್ಚೊಂದೇ ಪೋಂಡು. ಶಿವರಾಮ ಕಾರಂತೆರೆನ ಅಪ್ಪ, ಅಜ್ಜಿ ಮಾತ ಬಾರಿ ಮಡಿವಂತಿಕೆದಕುಲು, ಮೀಯಂದೆ ನೀರ್ ಪರ್ಪಿನ ಕುಲತ್. ದಿನೊಟು ಹೆಚ್ಚಿನ ಪೂರ್ತು ವ್ರತ, ಪೂಜೆ, ಜಪೊಂದು ಕಳೆವೊಂದಿತ್ತಿನಕುಲು.

### ಬರವು - ಸರವು

ಶಿವರಾಮ ಕಾರಂತೆರ್ ಆರೆನ ಓದು ಬರವುನು ಗಿಳಿಯಾರು ಸಾಲೆಡ್ ಸುರು ಮಲ್ತೆರ್. ತೋನ್ನೆದ ರಂಗರಾಯೆರ್ ಆರೆನ ಸುರುತ ಗುರುಕುಲು. ಸುರುಟು ಸಾಲೆ ದೇವಸ್ಥಾನೊದ ಪೌಳಿಡಿತ್ತಂಡ್. ಬೊಕ್ಕ ತಾಲೂಕು ಬೋರ್ಡುಡಕುಲು ಸಾಲೆಗೊಂಜಿ ಕಟ್ಟೊಣ ಕಟ್ಟಿದ್ ಕೊರೈರ್. ಪಾಠ ಪುಸ್ತಕೊಲೆಡ್ ಆ ಕಾಲೊಡು ವೇದ - ವೇದಾಂತ - ಪುರಾಣೊಲೇ ಎಚ್ಚ ಇತ್ತಿನಿ. ಜೊತೆಕ್ ಕೈಕಸುಬು ಕಲ್ಪುನ ಏರ್ಪಾಡ್‌ಲಾ ಇತ್ತಂಡ್. ಕಾರಂತೆರೆಗ್ ನಾಲ್‌ಗೋಡೆದ ನಡುಟು ಕುಲ್ಲುದು ಸುಲೇಕೊ ಬಾಯಿಪಾಠ ಮಲ್ಪುನೆಡ್ ದಾಲಾ ಮನಸಿಜ್ಯಾಂಡ್. ಆಂಡ ಆರೆಗ್ ಕೈ ಕಸುಬುಡು ಬಾರಿ ಆಸಕ್ತಿ ಇತ್ತಂಡ್. ಕಾಶಪೆ ಪನ್ನಿನಾರ್ ಕೈಕಸುಬುದ ಮಾಸ್ತಾದಿತ್ತೆರ್. ಆರೆಡ ಕಾರಂತೆರೆಗ್ ಬಾರಿ ಎಡ್ಡೆ. ಕಾರಂತೆರ್ ಆರ್ ಪಂಡಿ ಕೆಲಸೊನು ಪಂಡಿ ಸಾತ್‌ಗ್ ಮಲ್ತೊಂದಿತ್ತೆರ್.

ಕಾರಂತೆರೆಗ್ ಎಲೈ ಉಪ್ಪುನಗನೇ ಪ್ರಕೃತಿದ ಬಗ್ಗೆ ಬಾರಿ ಮೋಕೆ. ಕೈ ಕೆಲಸೊಡು ಆರೆಗ್ ದಾಲಾ ಉದಾಸೀನ ಇಜ್ಯಾಂಡ್. ಸಾಲೆ ಬುಡಿಸಾತ್‌ಗ್ ಆರ್ ಕಡಲ ಬರಿಕ್

ಪಾರ್ ಬತ್ತ್‌ದ್ ಕುಲ್ಲೆದರ್. ಕಂಡೊದ ಬರಿಟ್ ಕುಲ್ಲುದು ರಾಪಿ ಪಕ್ಕಿಲೆನ್ ತೂಪೆದರ್. ತೋಡುದ ಬರಿಟ್ ಕುಲ್ಲುದು ಮೀಂದುನ ಮೀನುಲೆನ್ ತೂಪೆದರ್. ಪೊಯ್ಯೆಡ್ ಕುಲ್ಲುದು ಲಕ್ಕುನ ತೆರೆಕುಲೆನ್ ತೂಪೆದರ್. ಇಂಚ ಆರೆಗ್ ಪಕ್ಕಿ, ಮೀನ್, ಮುರ್ಗೊ, ಕಪ್ಪೆ, ಅರಣೆ, ಓಂತಿ - ಇಂಚ ಜೀವಿಲು ಪಂಡ ಬಾರಿ ಇಷ್ಟ್. ನೀರ್ಡ್ ಮೀಂದುನೆ ಪಂಡ ಬಾರಿ ಕುಶಿ.

ಬೇಲೆದ ಪೂರ್ತುಗು ಆರ್ ಇಲ್ಲಲ್ಲಕುಲೆ ಜೊತೆಟ್ ಬೇಲೆ ಬೆನ್ನೆದರ್. ಕಂಡೊಡು ಧಾನ್ಯೊಲುಂಗುನಗ ಅಯಿನ್ ಪೂರ್ಪುನೆ. ಕೋಡುಡ್ ಬಿತ್ತ್ ಕಳೆಪುನೆ. ಎರ್ಲೆ ಮೇಪುನೆ, ನೆಲ ಪೂಜುನೆ, ಇಂಚ ವಾ ಕೈಕೆಲಸೊ ಆಂಡಲಾ ಸಯಿ, ಆರ್ ಮಲ್ಪೆದರ್. ಬೇಲೆದಾಂತಿ ಪೂರ್ತುಗು ಜೋಕುಲೆ ಒಟ್ಟಿಗೆ ಸೇರ್ಡ್ ಗೊಬ್ಬೆದರ್. ಮಣ್ಣ್ಡ್ ಸೊರ್ಕುನೆ ಪಂಡ ಆರೆಗ್ ಬಾರಿ ಇಷ್ಟ್. ಹೈಸ್ಕೂಲುಗು ಬನ್ನಗ ಆರ್ ಮಲ್ಲ ಗೊಬ್ಬುದಾರ್ಂದ್ ಪುದರ್ ದೆತ್ತ್‌ಜೆರ್ಂಡಲಾ ಆರೆನ ಕುಸೆಲ್ದ ಗೊಬ್ಬಾಟಿಕೆ ತೂದು ಜೋಕುಲು ಮಾತ ಆರೆನೇ ಲೀಡರ್ಂದ್ ಮಲ್ಪೆದರ್.

ಯಕ್ಷಗಾನೊ ಕಡಲ ಬರಿತ ಕರ್ನಾಟಕೊದ ಒಂಜಿ ಪುದರ್ ಪಡೆಯಿನ ರಂಗಕಲೆ. ಕೋಟ - ಕುಂದಾಪುರೊತ ಕಡೆಟ್ ದುಂಬುದ ಕಾಲೊಡು ಒಂಜತ್ತ್ಂಡ ಒಂಜಿ ಹಳ್ಳಿಡ್ ದಿನೋಲ ಆಟ ನಡತೊಂದಿತ್ತ್ಂಡ್. ಕುಂದಾಪುರೊ ಕಡೆತಕ್ಲೆಗ್ ಆಟೊದ ನಲಿಕೆ ಗೊತ್ತುಜ್ಜಿ ಪಂಡ ಎರ್ಲಾ ನಂಬುನ ಸಂಗತಿಯೆ ಅತ್ತ್. ಕಾರಂತೆರೆಗ್ ಎಲೈಡ್ಲಿಂಜಿ ಯಕ್ಷಗಾನೊದ ಮರ್ಲ್, ಆರೆನ ಬಾಲ್ಯೊದ ಕಾಲೊಡು ಮಂದಾರ್ತಿ, ಮಾರಣಕಟ್ಟೆ ರಡ್ಡ್ ಮೇಳೊದಕುಲು ಊರುಡು ಆಟೊ ಗೊಬ್ಬೆದರ್. ದಶಾವತಾರೊದ ಪ್ರಸಂಗೊ ಗೊಬ್ಬುನನೇ ಎಚ್ಚ. ಸುತ್ತುಮುತ್ತ ಓಲು ಚೆಂಡೆದ ಪೆಟ್ ಕೇಂಡಲಾ ಆಡೆಗ್ ಆಟೊ ತೂಯರೆ ಕಾರಂತೆರ್ ಬಲಿಪೆದರ್. ಪಾಂಡೇಶ್ವರ ಪುಟ್ಟಯ್ಯೆರೆನ (ಕಾಳಿಂಗರಾಯೆರೆನ ಅಮ್ಮೆರ್) ನಲಿಕೆ, ಉಪ್ರಳ್ಳಿ ಶೇಷನ ಬಣ್ಣೊದ ವೇಸೊ, ನೆನ್ನ್ ಎತ್ ತೂಂಡಲಾ ಕಾರಂತೆರೆಗ್ ಬೊಡ್ಯಂದ್.

ಕಾರಂತೆರೆ ಇಲ್ಲಲ್ ದಿನೋಲ ಭಾರತ - ರಾಮಾಯಣೊ ಭಾಗವತೊದ ಕಾವ್ಯವಾಚನ - ಪ್ರವಚನ ಆಪೆದ್ಂಡ್. ಆರೆನ ಅಪ್ಪೆಗ್ಲಾ, ಅಜ್ಜಿಗ್ಲಾ ಪುರಾಣೊದ ಕತೆ ಕೇನುನೆ ಪಂಡ ಬಾರಿ ಇಷ್ಟ್. ಈ ಕತೆಕುಲೆನ್ ಕಾರಂತೆರ್ಲಾ ಕೆಬಿಕೊರ್ದು ಕೇನೆದರ್. ಮರಿಯಲ ಇಡೀಯ ಪುರಾಣ ವಾಚನ. ಅರೆಗಲ ಮಾತ ಯಕ್ಷಗಾನೊ, ಕಾರಂತೆರ್ ಎಸ್.ಎಸ್.ಎಲ್.ಸಿ. ಡುಪ್ಪುನಗ ಪರೀಕ್ಷೆದ ದುಂಬುನಾನಿಲಾ ಯಕ್ಷಗಾನೊಗು ಪೋತೆರ್ಗೆ. ಎಲೈ ಉಪ್ಪುನಗ ಪುಟ್ಟಿನ ಆಟೊದ ಮರ್ಲ್ ಆರೆಡ ಬಲಿರೊಂದೇ ಪೋಂಡು. ಮಲ್ತೆ ಆನಗ ಆರ್ ಯಕ್ಷಗಾನೊಡು ಸೋದನೆ ಮಲ್ತೆರ್. ಕಾರ್ಗ್ ಗೆಜ್ಜೆ ಕಟ್ಟಾದ್ ನಲಿತೆರ್. ಯಕ್ಷಗಾನ



ಮೇಳೊ ಕಟ್ಟೆರ್.

1912ನೇ ಇಸ್ವಿಡ್ ಆರ್ ಕುಂದಾಪುರೊತ ಹೈಸ್ಕೂಲುಗು ಸೇರೈರ್. ಶೇಷ ಕಾರಂತೆರೆಗ್ ತನ್ನ ಜೋಕುಲು ಇಂಗ್ಲಿಸ್ ಕಲ್ಪೊಡು ಪನ್ನಿ ಅಬುಲಾಸೆ ಇತ್ತಂಡ್. ಹೈಸ್ಕೂಲುಗು ಪೋಪಿ ಬಾಲೆಲೆಗಾದ್ ಕುಂದಾಪುರೊಟೊಂಜಿ ಬುಡಾರ ಮಲ್ತೆರ್. ಒಂಜಿ ಅಡಿಗಿದಾಯನ್ ನೇಮಕ ಮಲ್ತೆರ್. ಕಾರಂತೆರ್ ಹೈಸ್ಕೂಲುಗು ಸೇರ್ದಗ ಅಲ್ಪ ಮಳಲಿ ಸುಬ್ಬರಾಯೆರ್ ಪನ್ನಿ ಮಾಸ್ತ್ರಿ ಇತ್ತೆರ್. ಆರ್ ನಂದಳಿಕೆ ಲಕ್ಷ್ಮೀನಾರಾಯಣಪ್ಪಗ್ ಪಾಠೊ ಪಂಡ್ ಕೊರ್ನಾರ್. ಐರೋಡಿ ಶಿವರಾಮಯ್ಯ ಪನ್ನಿ ಕನ್ನಡ ಪಂಡಿತೆರಿತ್ತೆರ್. ಆರ್ ಎಡ್ಡೆ ಪಾಠ ಮಲ್ಪೆದೆರ್. ಬೇತೆ ಬೇತೆ ಕವಿ, ಸಾಹಿತಿಲೆನ ಪೊಲಬು ಮಲ್ತ್ ಕೊರ್ಪೆದೆರ್. ಆರೆಡ್ಡಾವರ ಕಾರಂತೆರೆಗ್ ಕನ್ನಡ ಕಲ್ಪುರೆ ಉಮೇದ್ ಬತ್ತಂಡ್. ಬಂಕಿಮಚಂದ್ರ ಚಟರ್ಜಿನ ಬಂಗಾಳಿ ಕಾದಂಬರಿಲೆನ ಕನ್ನಡ ತರ್ಜುಮೆದ ಬೂಕುಲೆನ್ ಕಾರಂತೆರೆಗ್ ಐರೋಡಿದಾರ್ ಒದಗದ್ ಕೊರೈರ್. ಐರೋಡಿದಾರೆಗ್ ಸಂಸ್ಕೃತೊಡ್ಲಾ ಎಡ್ಡೆ ಪಾಂಡಿತ್ಯ ಇತ್ತಂಡ್. ಕಾರಂತೆರ್ ಸಂಸ್ಕೃತೊಲಾ ಕಲ್ತೆರ್. ಆಂಡ ಆರೆಗ್ ಬಾಯಿಪಾಠ ಮಲ್ಪುನ ಮಾತ್ರ ದಾಲ ಇಷ್ಟ ಇಜ್ಜಾಂಡ್. ಆ ಪೂರ್ತುಡು ಕೃಷ್ಣ ಸೂಕ್ತಿ ಬೊಕ್ಕ ಸತ್ಯವಾದಿ ಪನ್ನಿ ರಡ್ಡ್ ಪತ್ರಿಕೆಲಿತ್ತೊ. ಆ ಪತ್ರಿಕೆಲೆನ್ನಾ ಕಾರಂತೆರ್ ಓದೆದೆರ್. ಕಾರಂತೆರ್ ಹೈಸ್ಕೂಲುಡುಪ್ಪುನಗ ಒರಿ ಇಂಗ್ಲಿಷ್ ಪ್ರೀಮಿ ಹೆಡ್‌ಮಾಸ್ತ್ರಿ ಬತ್ತೆರ್. ಜೋಕುಲು ಪೂರ ಇಂಗ್ಲಿಸ್‌ಡೇ ಪಾತೆರೊಡೊಂದು ಆರ್ ಕಡ್ಡಾಯ ಮಲ್ತೆರ್. ನಿಯಮ ತತ್ತಿನಕುಲೆಗ್ ಪೆಟ್ಟಾದ ಶಿಕ್ಷೆಲಾ ಇತ್ತಂಡ್. ಒಂಜಿ ಸರ್ತಿ ಕಾರಂತೆರೆ ದೋಸ್ತಿ ತೆಲ್ಲೊಂದುಪ್ಪುನಗ “ಕತ್ತೆ... ಈ ಕನ್ನಡೊಡು ದಾಯೆ ತೆಲಿಪುನೆ? ಇಂಗ್ಲಿಸ್‌ಡ್ ತೆಲಿಪ್ಪರೆಗಾಪುಜಾ”ಂದ್ ಹೆಡ್‌ಮಾಸ್ತ್ರಿಗ್ ಕೇನುಲೆಕ ಇಂಗ್ಲಿಸ್‌ಡೇ ಪಂಡೆರ್. ಕಾರಂತೆರೆ ಈ ಪಾತೆರೊ ಕೇಂಡ್‌ದ್ ಇಂಗ್ಲಿಸ್ ಹೆಡ್‌ಮಾಸ್ತ್ರಿಗ್ ಬಾರಿ ನಾಕುಶಿಯಾಂಡ್‌ಗೆ.

ಕಾರಂತೆರ್ ಹೈಸ್ಕೂಲುಡು ಕಲ್ಪೊಂದುಪ್ಪುನಗ ಆರೆನ ಇಲ್ಲಡೆ ಥಿಯೋಸೊಫಿಕಲ್ ಸೊಸೈಟಿದ ಒರಿ ಪ್ರಚಾರಕೆ ಬತ್ತೆರ್. ಆರ್ ಆನಿ ಬೆಸೆಂಟ್‌ನ ಅನುಯಾಯಿ ನಾರಾಯಣ ಸ್ವಾಮಿ ಅಯ್ಯರ್. ಆರ್ ಕೆಲವು ದಿನ ಕಾರಂತೆರೆನ ಇಲ್ಲಾಲಿತ್ತೆರ್. ಕುಂದಾಪುರೊತ ಕೆಲವು ಕಡೆಟ್ ತತ್ವಪ್ರಚಾರ ಮಲ್ತೆರ್. ಆರೆನ ರೂಪೊ, ನಡೆವಳಿಕೆ, ಪಾತೆರೊ, ಆಚಾರ - ವಿಚಾರೊಲೆನ್ ತೂದು ಕಾರಂತೆರೆಗ್ ಬಾರಿ ಕುಶಿಯಾಂಡ್. ಥಿಯೋಸೊಫಿಕಲ್ ಸೊಸೈಟಿದ ತತ್ವಲೆನ್ ಓದಿಯೆರ್. ಅಯಿನ್ ಜೀವನೊಡು ಅನುಷ್ಠಾನೊಗು ಕನಯರೆ ಪ್ರಯತ್ನ ಮಲ್ತೆರ್. ಅಪಗ ಆರ್ ರೂಢಿ ಮಲ್ಪೊನ್ನ ಮಿತವಾಯಿನ ಸಸ್ಯಾಹಾರ ಪದ್ಧತಿನ ಜೀವಮಾನೊ ಇಡೀಕ ಒರಿತೊಂಡೆರ್. ಅವು ಆರೆನ ಆರೋಗ್ಯೊಗು ಬಾರಿ ಬಲ ಕೊರ್ಂಡ್. ಆನಿ ಬೆಸೆಂಟ್‌ನ ಹೋಮ್‌ರೂಲ್ ಚಳವಳಿ ಬ್ರಿಟಿಷೆರೆನ ವಿರುದ್ಧ ಆಯಿನೆಡ್ಡಾವರ ಆನಿ ಬೆಸೆಂಟೆರೆನ ತತ್ವ ಪ್ರತಿಪಾದನೆ ಮಲ್ಪುನ ಕಾರಂತೆರೆನ ಮಿತ್ತ್

ಹೆಡ್‌ಮಾಸ್ಟೆರ್ ಕಣ್ಣಾಂಡ್.

‘ಬೇಡನ್ ಪೌಲ್’ ಸಮಾಜ ಸೇವೆಗಾದ್ ಸ್ಕೌಟುದಳ ರಚನೆ ಮಲ್ತೆ. ಕುಡಲದ ಗಣಪತಿ ಹೈಸ್ಕೂಲುದ ಹೆಡ್ ಮಾಸ್ಟ್ ಉಮಾನಾಥ ರಾಯೆರ್ ಆರೆನ ಸಾಲೆಡ್ ಸ್ಕೌಟುದಳ ಕಟ್ಟೆರ್, ಅಯಿನ್ ತೂದು ತಾನ್‌ಲಾ ತನ್ನ ಸಾಲೆದ ಜೋಕುಲೆನ್ ಸೇರ್ಪೊಂದು ಕಾರಂತೆರ್ ಒಂಜಿ ಸ್ಕೌಟುದಳ ರಚನೆ ಮಲ್ತೆರ್. ತನ್ನ ದಳತಕುಲೆನ್ ಶಿರಾಲಿಗ್ ಲೆತೊನು ಪೋದು ಅಲ್ಪದ ಜಾತ್ರೆಡ್ ಸ್ವಯಂಸೇವಕೆರಾದ್ ಕೆಲಸ ಮಲ್ತೆರ್. ಪ್ರಾಕೃತಿಕ ಅನಾಹುತೊಲೆಗ್ ಬಲಿಯಾಯಿನ ಜನೊಕುಲೆನ ಸೇವೆ ಮಲ್ತೆರ್. ಈ ಪೂರ್ತುಗು ಬ್ರಿಟಿಷ್ ಸರಕಾರ ಸ್ಕೌಟುದ ರೂಲ್ಸ್‌ನೇ ಬದಲ್ ಮಲ್ತಾಂಡ್. ಸ್ಕೌಟುದಕುಲು ಮೂಜಿ ಬಿರೇಳ್‌ಡ್ ಸೆಲ್ಯೂಟ್ ಕೊರ್ಪೆರ್. ಅವು ದೇವರೆಗ್ - ಅರಸುಗು - ಬೊಕ್ಕ ದೇತೊಗುಂದು ಸರಕಾರ ಸಾರಾಂಡ್. ಅಯಿನ್ ತೆರಿನ ಕಾರಂತೆರ್ ಅರಸುಗು ಎನ್ನ ಸೆಲ್ಯೂಟ್ ಇಜ್ಜಿ ಪಂಡ್‌ದ್ ಸ್ಕೌಟುನೇ ಬುಡ್ಡೆರ್.

ಹೈಸ್ಕೂಲುಗು ರಘುನಾಥ ರಾವ್ ಪನ್ನಿ ಹೆಡ್‌ಮಾಸ್ಟ್ ಬತ್ತೆರ್. ಆರೆಗ್ ಕಾರಂತೆರೆನ ಕೆಲಸ ತೂದು ಬಾರಿ ಕುಶಿಯಾಂಡ್. ಅಪಗ ಊರುಗು ಬರಗಾಲ ಬತ್ತಿ ಪೂರ್ತು. ನುಪ್ಪುದ ಬಂಗಿರೊ, ಊರುದ ದಾನಿಲು ಬಡವರೆಗ್ ನುಪ್ಪು ದಾನ ಮಲ್ಪೆದೆರ್. ಕಾರಂತೆರ್ ತನ್ನ ಸಹಪಾಲೆನ ಮೂಲಕೊ ದುಡ್ಡು ಸಂಗ್ರಹ ಮಲ್ತಾದ್ ಬಡವರೆಗ್ ನುಪ್ಪು ದಾನ ಮಲ್ತೆರ್. ಈ ಕೆಲಸೊಡ್ಲಾವರ ಆರ್ ಹೆಡ್‌ಮಾಸ್ಟೆನ ಮೆಚ್ಚುಗೆ ಪಡೆಯೆರ್.

ರಾಮಯ್ಯ ಅಡಪೆರೆನ ಪೊಳಲಿ ಶ್ರೀ ರಾಜರಾಜೇಶ್ವರಿ ನಾಟಕ ಮಂಡಲಿದಕುಲು ಕುಂದಾಪುರೊಡು ಒಂತೆ ದಿನೊಕು ಡೇರೆ ಪಾಡ್ಲೆರ್. ಅಕುಲೆನ ನಾಟಕ ಕಾರಂತೆರ್ ತೂಯೆರ್. ಆ ನಾಟಕ ಕಾರಂತೆರೆನ್ ಮೋಡಿ ಮಲ್ತಾಂಡ್. ಅಯಿಡ್ ಬೊಕ್ಕ ಕಾರಂತೆರೆಗ್ ನಾಟಕೊದ ಮರ್ಲ್ ಸುರುವಾಂಡ್. ಗರುಡ ಸದಾಶಿವ ರಾಯೆರೆನ ದತ್ತಾತ್ರೇಯ, ಹಲಗೆರಿ ಜಟ್ಟಪ್ಪೆರೆನ ಶ್ರೀ ಹಾಲಸಿದ್ವೇಶ್ವರ ನಾಟಕ ಮಂಡಳಿ, ಗುರು ಸಮರ್ಥ ನಾಟಕ ಮಂಡಳಿ, ಕುಡಲದ ನಚ್ಚ ಪಾಲೆರೆ ಮನಮೋಹನ ನಾಟಕ ಮಂಡಳಿ, ಮಂಗಳೂರು ಶಾಬಾ ಸಾಹೇಬರೆನ ನಾಟಕ ಮಂಡಳಿ, ವರದಾಚಾರ್ಯರೆನ ರತ್ನಾವಳಿ ಥಿಯೇಟರ್, ಗುಬ್ಬಿ ವೀರಣ್ಣನ ಚನ್ನಬಸವೇಶ್ವರ ನಾಟಕ ಮಂಡಲಿ, ಶಿರಹಟ್ಟಿ ವೆಂಕೋಬರಾಯೆರೆನ ಮಹಾಲಕ್ಷ್ಮಿ ಪ್ರಸಾದಿತ ನಾಟಕ ಮಂಡಲಿ ಇಂಚ ಕೆಲವು ನಾಟಕ ಮಂಡಲಿದಕುಲೆನ ನಾಟಕೊ ತೂಯೆರ್. ನಾಟಕ ಪಂಡ ಅವೊಂಜಿ ಅದ್ಭುತೊಂದು ಆರೆನ ಮನಸ್‌ಗಾಂಡ್. ಅಯಿಟ್ ಬರ್ಪಿ ದೃಶ್ಯಾವಳಿ, ರಂಗಗೀತೆ, ಪಾತೆರಕತೆ, ಅಭಿನಯ, ತೂಪಿನಕುಲೆಗ್ ಕುಲ್ಲುನ ವ್ಯವಸ್ಥೆ ಉಂದು ಪೂರ ಯಕ್ಷಗಾನೊಡ್ಲ ಎಡ್ಲೆಂದ್ ಆರೆ ಮನಸ್‌ಗಾಂಡ್. ನಾಟಕೊ ತೂಯರೆಗಾದೇ ಆರ್ ಊರು, ಊರು ತಿರ್ಗೈರೆ ಸುರು ಮಲ್ತೆರ್. ನಾಟಕೊದಿಡೆಟೆ ಊರುಗು ಒಂಜೊಂಜಿ



ಸರ್ಕಸ್‌ಲಾ ಬರೊಂದಿತ್ತಂಡ್. ಕಾರಂತೆರ್ ಸರ್ಕಸ್ ತೂಯರೆಲಾ ಪೋವೊಂದಿತ್ತೆರ್. ಸರ್ಕಸ್‌ದಕುಲೆನ ಕಸರತ್ತ - ತಾಲಿಂಬು ತೂನಗ ಕಾರಂತೆರೆ ಮನಸ್‌ಗ್ ಉಲ್ಲಾಸೊ ಬರ್ಪೆದ್‌ಂಡ್. ಇಂಚ ಕಾರಂತೆರ್ ಹೈಸ್ಕೂಲುಡು ಕಲ್ತೊಂದುಪ್ಪಿನಗನೇ ಯಕ್ಷಗಾನ, ನಾಟಕ, ಸರ್ಕಸ್‌ದ ಬಗೆಟ್ ಎಡ್ಡೆ ಗೇನೊ ಪಡೆವೊಂಡೆರ್. ಕನ್ನಡ ನಾಟಕೊಲೆಡ್ ಮರಾಠಿ ನಾಟಕೊಲು ಎಡ್ಡೆ ಉಪ್ಪುವೊ ಪನ್ನಿ ಸುದ್ದಿ ಕೇಂಡ್‌ದ್ ಕಾರಂತೆರ್ ಮರಾಠಿ ನಾಟಕ ತೂಯರೆಗಾದೆ ಒರ ಮುಂಬಯಿಗ್ ಪೋಯೆರ್. ಅಲ್ಪ ಗಡ್ಡರಿದಾರೆನ ಮರಾಠಿ ನಾಟಕ 'ಏಕಚ್ ಪ್ಯಾಲಾ' ತೂದು ಅಯಿನ್ 'ನಿಷಾ ಮಹಿಮೆ' ಪನ್ನಿ ಪುದರ್‌ಡ್ ಕನ್ನಡೊಗು ತರ್ಜುಮೆ ಮಲ್ತ್‌ದ್ ಗೊಬೈರ್. ಅತೇ ಅತ್ತ್ ಮರಾಠಿ ಕಲ್ತ್‌ದ್ ದಿಂಜ ಮರಾಠಿ ನಾಟಕೊಲೆನ್ ಓದೈರ್.

### ಗಾಂಧಿಯೆರೆನ ಶಿಷ್ಯ

ಎಣ್ಮ ವರ್ಸೊ ಕುಂದಾಪುರೊಡಿತ್ತದ್ ಎಸ್.ಎಸ್.ಎಲ್.ಸಿ. ಪರೀಕ್ಷೆಗ್ ಕಟ್ಟ್‌ದ್ ಅಲ್ಪಡ್ಡಾಡೆ ಮಾರ್ಕ್ ಪಡೆದ್ ಎಂಚಾಂಡಲಾ ಪಾಸಾಯೆರ್. ಎಸ್.ಎಸ್.ಎಲ್.ಸಿ. ಆಯಿ ಬೊಕ್ಕ ಇಂಟರ್ ಮೀಡಿಯೆಟ್, ಡಿಗ್ರಿಗ್ ಅಪಗ ಕುಡಲಡ್ ಒಂಜೇ ಕಾಲೇಜಿ ಇತ್ತಿನೆ. ಕಾರಂತೆರ್ 1920ಡ್ ಕುಡಲದ ಸರ್ಕಾರಿ ಕಾಲೇಜಿಗ್ ಸೇರೈರ್. ಕಾಲೇಜಿಗ್ ಸೇರ್ನ್ ಕಾರಂತೆರೆಗ್ ಕುಡಲದ ಮಲ್ಲ ವಕೀಲೆರಾಯಿನ ಕಾರ್ನಾಡು ಸದಾಶಿವ ರಾಯೆರೆನ ಪೊಲಬಾಂಡ್. ಆರ್ ಅಪಗ ಕುಡಲಡ್ ರಾಜಾರಾಮ ಮೋಹನರಾಯೆರೆನ ಬ್ರಹ್ಮ ಸಮಾಜೊದ ಪ್ರಚಾರ ಮಲ್ತೊಂದಿತ್ತೆರ್. ಬಂಗಾಲಡ್ ಉದಿಪನ ಆದ್ ಕುಡಲಗ್ ಬತ್ತಿನ ಈ ಧಾರ್ಮಿಕ ಸಂಸ್ಥೆ ಬಾರಿ ಪೊಸತ್, ಸಂಪ್ರದಾಯಬದ್ಧವಾದಿತ್ತಿನ ಹಿಂದುಲೆಗ್ ಉಂದು ಒಂಜಿ ಸೋಜಿಗೊದ ಸಂಗತಿ. ಬ್ರಹ್ಮ ಸಮಾಜ ಹಿಂದೂ ಧರ್ಮೊದ ಜಾತಿ ಪದ್ಧತಿನ್ ವಿರೋಧಿಸವುಂಡು. ಮೂಢನಂಬಿಕೆದ ಅನೇಕ ಆಚಾರೊಲೆನ್ ಖಂಡನೆ ಮಲ್ಪುಂಡು. ಅವು ಅತ್ತಂದೆ ಹಿಂದೂ ಧರ್ಮೊಡ್ ಪಿದಯಿದ ಕ್ರೈಸ್ತ ಧರ್ಮೊದ ಕೆಲವು ಎಡ್ಡೆ ವಿಚಾರೊಲೆನ್ ಅನುಸರಣೆ ಮಲ್ಪುರೆ ಒಪ್ಪಿಗೆ ಕೊರ್ಪುಂಡುಂದು ಪನ್ನಿ ವಿಚಾರೊ ಕಾರಂತೆರೆಗ್ ತೆರಿಂಡ್. ಕಾರಂತೆರ್ ಹೈಸ್ಕೂಲುಗು ಪೋಪಿ ಪೂರ್ತುಗು ಥಿಯೋಸೊಫಿಕಲ್ ಸೊಸೈಟಿಡ ತತ್ವೊಲೆನ್ ಕೇಂಡ್‌ದಿತ್ತೆರ್. ಆ ತತ್ವೊಲೆಡ್ ಉಂದು ಒಂತೆ ಬೇತೆ ನಮೂನೆದವು. ನೆತ್ತ ವಿಚಾರೊಲಾ ತೆರಿಯೊನುಗ ಪಂಡ್‌ದ್ ಕಾರಂತೆರೆಗ್ ಮನಸಾಂಡ್. ಅಸ್ಪೃಶ್ಯತಾ ನಿವಾರಣೆಲಾ ಬ್ರಹ್ಮ ಸಮಾಜೊದ ಒಂಜಿ ಉದ್ದೇಶೊ ಆದಿತ್ತಿನೆಡ್ಲವರ ಮುಟ್ಟರಾವಂದ್ ಪನ್ನಿ ನಿರ್ಬಂದೊಲೆಗ್ ಬಲಿಯಾಯಿನ ದಿಂಜ ಜನೊಕುಲು, ಜನ ನಾಯಕೆರ್ ಬ್ರಹ್ಮ ಸಮಾಜೊನು ತೊಟ್ಟು ಪತ್ಯೆರ್. ಕಾರ್ನಾಡ್ ಸದಾಶಿವರಾಯೆರ್ಚಿತ್ತಿ

ಬ್ರಾಣೆರ್ ಬ್ರಹ್ಮ ಸಮಾಜೋಡು ಪಾಲ್ ಪಡೆಯಿನೆನ್ ತೂದು ಸಂಪ್ರದಾಯಸ್ಥ ಬ್ರಾಣೆರೆನ ಕಣ್ಣ್ ಕೆಂಪಾಂಡ್. ಕಾರಂತೆರೆಗ್ ಮಾತ್ರ ಕಾರ್ನಾಡ್‌ದಾರೆಡ ತನ್ನಾತೆಗೇ ಭಕ್ತಿ ಮೂಡ್‌ಂಡ್.

1920ನೇ ಅಗೋಸ್ತು ತಿಂಗೊಳ್ಳು ಮಹಾತ್ಮಾ ಗಾಂಧ್ಯೆರ್ ಆಲಿ ಸೋದರೆರೆನ ಜೊತೆಟ್ ಕುಡಲಗ್ ಬತ್ತೆರ್. ತನ್ನ ಭಾಷಣೋಡು ಜನೊಕುಲೆಗ್ ಸ್ವಾತಂತ್ರ್ಯದ ಪೊಲಬು ಮಲ್ತ್ ಕೊರೈರ್. ಅಖಿಲ ಭಾರತದ ಕಲ್ಪನೆ ಮಲ್ತ್ ಕೊರೈರ್. ಆ ಭಾಷಣ ಕೇಂಡ್‌ದ್ ಕಾರಂತೆರೆ ಮನಸ್‌ಡ್ ಸ್ವಾತಂತ್ರ್ಯದ ಉಮೇದ್ ಪುಟ್ಟುಂಡ್. ಕಾರ್ನಾಡ್‌ದಾರ್ ಗಾಂಧ್ಯೆರೆನ ಜೊತೆಟಿತ್ತೆರ್. ಆನಿ ಬೆಸೆಂಟ್‌ಡ್ವಾವರ ಕಾರಂತೆರೆಗ್ ದೇಶೊದ ಸ್ವಾತಂತ್ರ್ಯದ ಕಲ್ಪನೆ ಒಂತೆ ಒಂತೆ ಗೊತ್ತಾದಿತ್ತಂಡ್. ಗಾಂಧೆರ್ ಕುಡಲಗ್ ಬರ್ಪಿನೆಗ್ ಮೂಜಿ - ನಾಲ್ ವರ್ಸೊದುಂಬೇ ಕುಡಲಡ್ ನಡತಿನ ಹೋಂ ರೂಲ್ ಚಳವಳಿ ಕಾರಂತೆರ್ ಸ್ವಾತಂತ್ರ್ಯದಂಚಿ ದೃಷ್ಟಿ ಪಾಡ್ಯರೆ ಸಾದಿ ಮಲ್ತ್ ಕೊರ್ದಿತ್ತಂಡ್.

ನಾಗಪುರ ಕಾಂಗ್ರೆಸ್ ಅಧಿವೇಶನೊಡು “ಬ್ರಿಟಿಷ್ ಆಡಳಿತೊನು ಭಾರತೊಡ್ ಬೆರಿಪತ್ತಾದೇ ಸುದ್ದೊ” ಪನ್ನಿ ನಿರ್ಣಯ ಕೈಕೊಂಡೆರ್. ಆ ನಿರ್ಣಯೊನು ಸುರುಕು ಕುಡಲಡ್ ಜಾರಿಗ್ ಕನತಿನಾರ್ ಕಾರ್ನಾಡ್ ಸದಾಶಿವರಾಯೆರ್. ಆರ್ ವಕೀಲ ವೃತ್ತಿ ಬುಡ್ಡು ಚಳವಳಿಗ್ ಜತ್ತೆರ್. ವಕೀಲೆರಾದಿತ್ತಿನ ಕಾರಂತೆರೆನ ಅಣ್ಣೆ ರಾಮಕೃಷ್ಣ ಕಾರಂತೆರ್ಲಾ ತನ್ನ ವೃತ್ತಿ ಬುಡ್ಡು ಕಾರ್ನಾಡ್‌ದಾರೆನ ಬೆಂಬಲಿಗರಾಯೆರ್. ಶಿವರಾಮ ಕಾರಂತೆರೆನ ಉಮೇದ್ ಏರ್‌ಂಡ್. ತನ್ನ ಕಾಲೇಜಿದ ಪ್ರಿನ್ಸಿಪಾಲೆರೆಗೊಂಜಿ ಕಾಕಜಿ ಬರೆದ್ ಕಾಲೇಜಿ ಬುಡುದು ಆರ್ಲ್ಯಾ ಸ್ವಾತಂತ್ರ್ಯ ಚಳವಳಿದ ಕಳಕ್ ಜತ್ತೆರ್. ಕಾರಂತೆರಂಚನೆ ಹಿರಿಯಡ್ಕ ರಾಮರಾಯ ಮಲ್ಯೆರ್, ನಾರಾಯಣ ರಾಯೆರ್, ಶಾಂತಾರಾಮ ರಾಯೆರ್ ಇಂಚ ಕೆಲವು ಜವ್ವನೆರ್ ಕಾಲೇಜಿ ಬುಡುದು ಕಾರಂತೆರೆ ಸಾದಿ ಪತ್ಯೆರ್.

ಕಾರಂತೆರೇ ಪನ್ನಿಲೆಕ ಆರೆನ ನಿಜವಾಯಿನ ಬದ್ಕ ಸುರು ಆಯಿನೆನೇ ಕಾಲೇಜಿ ಬುಡ್ಡೆಡ್ ಬೊಕ್ಕ. ಸಮಾಜ ಪಂಡ ಅವೊಂಜಿ ಮುಕ್ತ ವಿಶ್ವವಿದ್ಯಾನಿಲಯೊ. ಅಲ್ಪ ಕಲ್ಪನನೇ ನಿಜವಾಯಿನ ಶಿಕ್ಷಣ ಪನ್ನಿ ಅಭಿಪ್ರಾಯ ಆರೆ ಮನಸ್‌ಡ್ ಉಂಡಾಂಡ್. ಕುಂದಾಪುರ ತಾಲೂಕುದ ಅಮಾಸೆಬೈಲ್‌ದ ಕೃಷ್ಣರಾಯ ಕೊಡ್ಲಿನ ಒಟ್ಟು ಸೇರೊಂದು ತಾಲೂಕುದ ಮೂಲೆ ಮೂಲೆ ಸಂಚಾರ ಮಲ್ತೆರ್. ರಾಟೆಡ್ ನೂಲು ದೆಪೈರೆ ಕಲ್ತ್‌ದ್ ಖಾದಿ ಪ್ರಚಾರ ಮಲ್ತೆರ್. ಹಿಂದಿ ಕಲ್ತ್‌ದ್ ಸ್ವದೇಶಿ ಚಳವಳಿ ಸುರು ಮಲ್ತೆರ್. ಕಳಿ ಗಂಗಸರ ಪರಡೇಂದ್ ಭಾಷಣ ಕೊರೈರ್. ಹರಿಜನೋದ್ಧಾರೊಗು ಬೋಡಾದ್ ಅಕುಲೆನ ಕೇರಿ ಕೇರಿಗ್ ಸಂಚಾರ ಮಲ್ತೆರ್. ಅಂತರ್ಜಾತಿದ ಮದಿಮೆ, ಸೊಳೆಯೆರೆನ ಜೋಕುಲೆ ಮದಿಮೆಗಾದ್ ಪ್ರಯತ್ನ ಮಲ್ತೆರ್. ಸಂತೆ - ಜಾತ್ರೆಲೆಗ್ ಪೋದು ಭಾಷಣ ಕೊರೈರ್.



ಅವ್ವೇ ಪೂರ್ತುಗು ಸ್ವಾತಂತ್ರ್ಯ ಹೋರಾಟಗಾರ್ತಿ ಸರೋಜಿನಿ ದೇವಿ ನಾಯ್ಡು ಕುಡಲಗ್ ಬತ್ತದೊಂಜಿ ಭಾಷಣ ಕೊರ್ತೆರ್. ಆ ಭಾಷಣ ಕೇಂಡ್‌ದ್ ಕಾರಂತೆರೆನ ರೋಮೊ ಕೊಕ್ಕೊಂಡ್. ರಾಷ್ಟ್ರಭಕ್ತಿದ ಸ್ಫೂರ್ತಿ ನರನಾಡಿಡ್ ದಿಂಜಿದ್ ಪೋಂಡು. ಕಾರಂತೆರ್ ತನ್ನ ಇಷ್ಟೆರೆನ ಒಟ್ಟು ಸೇರೊಂದು ಸ್ವದೇಶಿ ಚಳವಳಿ, ವಿದೇಶಿ ಸೊತ್ತು ಬಹಿಷ್ಕಾರ, ಅಸಹಕಾರ ಚಳವಳಿ, ಉಪ್ಪುದ ಸತ್ಯಾಗ್ರಹ ಇಂಚೆ ಬೇತೆ ಬೇತೆ ಚಳವಳಿಡ್ ಪಾಲ್ ಪಡೆಯೆರ್. ಬ್ರಿಟಿಷೆರೆ ಆಡಳಿತದ ವಿರುದ್ಧ ಪ್ರಚಾರ ಭಾಷಣ ಮಲ್ತೆರ್. ತನ್ನ ದುಸ್ತೆತೊಲೆನ ಬದಲಾವಣೆ ಮಲ್ತೆರ್. ಕಚ್ಚೆ, ಪೈರಾನ್ ಪೂರ ಖಾದಿ, ತರೆಕೊಂಜಿ ಖಾದಿ ಟೊಪ್ಪಿ, ಕೈಟ್ ಚರಕ, ಗಾಂಧೀಜಿನ ಅಪ್ಪಟ ಶಿಷ್ಯ ಆಯೆರ್.

1924ಡ್ ದಕ್ಷಿಣ ಕನ್ನಡ ಜಿಲ್ಲೆಡ್ ಬಾರಿ ಬೊಲ್ಲ ಬತ್ತಂಡ್. ಜನೊಕುಲೆಗ್ ಬಾರಿ ತೊಂದರೆ ಆಂಡ್. ಬುಳೆ-ಸಲೆ ಇಲ್ಲಾ-ಬಿತ್ತಿಲ್ ಪೂರಾ ಬೊಲ್ಲೊಗು ಪೋಂಡು. ಅಪಗ ಕುಂದಾಪುರೊಡು ಗತಿದಾಂತಿ ಜನೊಕುಲೆಗ್ ಸಹಾಯ ಮಲ್ಪುರೆ ಕಾರಂತೆರ್ ಪಿದಾಡ್ತೆರ್. ಸಿರಿವಂತೆರಾದಿತ್ತಿ ಕಾರ್ನಾಡ್ ಸದಾಶಿವರಾಯೆರ್ ಧರ್ಮರಾಯಲೆಕ ದಾನ ಮಲ್ತಾದ್ ಪೂರ ಕಳೆವೊಂದಿತ್ತೆರ್. ಆಂಡಲಾ ಆರ್ ಪೋಡ್ಕಂದೆ ಮುಂಬಾಯಿಗ್ ಪೋದು ರಮಣಲಾಲ್ ದಾತಾರ ಪನ್ನಿ ದಾನಿನ್ ತೊದು ದುಡ್ಡು ಪಡೆದ್ ಕುಂದಾಪುರೊದ ನಿರ್ಗತಿಕೆರೆಗ್ ಪಟ್ಟರೆಗಾದ್ ಕಾರಂತೆರೆಡ ಕನತ್ ಕೊರ್ತೆರ್. ಕಾರ್ನಾಡ್‌ದಾರೆನ ದೇಶಭಕ್ತಿ, ದಾನ ಗುಣ ಏಪಲಾ ಮದಪುನವತ್ತ್. ಆರೆಗ್ ಸಮಾನವಾಯಿನ ಸ್ವಾತಂತ್ರ್ಯ ಹೋರಾಟಗಾರೆರ್ ಚರಿತ್ರೆಡೇ ಇಜ್ಜೆರ್‌ಂದ್ ಕಾರಂತೆರ್ ಪಂಡೊಂದಿತ್ತೆರ್.

“ದಕ್ಷಿಣ ಕನ್ನಡ ಜಿಲ್ಲೆದ ನಂಕ್ ಕಾರ್ನಾಡ್ ಸದಾಶಿವ ರಾಯೆರೆನ ಜೀವನ ಏಪಲಾ ಮದಪುನವತ್ತ್. ಆರ್ ಎನಡ್ಡೇತೋ ಮಲ್ತೆ. ಎನ್ನ ಜವ್ವನೊಡೇ ಆರ್ ಹಿರಿಯಾರ್. ಆರೆನ ಪ್ರೀತಿ ವಿಶ್ವಾಸ ಎನ್ನ ಮಿತ್ತ್ ಇತ್ತಿನವು ಎಂಕೊಂಜಿ ಸಂತೋಸುದ ಸಂಗತಿ. ಆರೆನ ಆದರ್ಶ ಜೀವನ ಎನ್ನ ಬದ್‌ಕ್‌ಡ್ ಮಾಜಯರೆ ಸಾಧ್ಯ ಇಜ್ಜಂದಿನ ಗುರ್ತೊ ಮಲ್ತ್ ಬುಡ್ತುಂಡು. ಆರೆನ ತ್ಯಾಗೊಗು ಬೇತೆ ಇನೆ ಇಜ್ಜಿ” ಉಂದು ಕಾರ್ನಾಡೆರೆನ ಬಗ್ಗೆ ಕಾರಂತೆರ್ ಪಂಡಿನ ಉಡಲ್ ದಿಂಜಿದಿ ಪಾತೆರೊ.

## ಊರು ತಿರ್ಗಾಟೊ

ಕಾರಂತೆರ್ ಸಂಚಾರಪ್ರಿಯೆ. ತನ್ನ ಚಳವಳಿತ ಪೂರ್ತುಡು ಆರ್ ಉಡುಪಿ, ಕುಂದಾಪುರೊತ ಹಳ್ಳಿ ಹಳ್ಳಿ ನಡತೊಂದೇ ಸಂಚಾರ ಮಲ್ತೆರ್. ಅಯಿಡ್ ಬೊಕ್ಕ ರೈಲ್‌ಡ್ ದೇಶ ಸಂಚಾರ ಮಲ್ತಾದ್ ಕಾಶಿ, ಅಲಹಾಬಾದ್, ಕಲ್ಕತ್ತ, ಪ್ರಯಾಗ, ಗಯಾ, ತಿರುಪತಿ, ಮದ್ರಾಸ್ ಇಂಚೆ ಮಾತ ಊರು ತಿರ್ಗೊದ್ ಪೊಸ ಅನುಭವ ಪಡೆವೊಂದು ಬತ್ತೆರ್.

ಜೋಗ, ಬಾದಾಮಿ, ಐಹೊಳೆ, ಪಟ್ಟದಕಲ್ಲು, ಹಂಪೆ, ಅಜಂತ ಇಂಚೆ ಶಿಲ್ಪಕಲೆತ ಊರುಲೆಗ್ ಪೋಯೆರ್. ಗಾಂದ್ಯೆರೆನ ಅಪ್ಪಟ ಅನುಯಾಯಿಯಾಯಿನ ಆರ್ ಸಬರ್ಮತಿ ಆಶ್ರಮೊಗ್ಲಾ ಪೋದು ಅಲ್ಪ 10-15 ದಿನೊ ಉಂತುದು ಬತ್ತೆರ್. ಬಂಗಾಲಗ್ ಪೋದು ರಾಮಕೃಷ್ಣ ಮಠೊನು ತೂಯೆರ್. ಶಾಂತಿ ನಿಕೇತನೊಗು ಪೋದು ರವೀಂದ್ರನಾಥ ಠಾಗೋರೆರೆನ್ ಭೇಟಿ ಆಯೆರ್. ಒಟ್ಟು ಭಾರತೊದ ಪ್ರವಾಸೊಡು ಆರ್ ಪ್ರಕೃತಿ ಸೌಂದರ್ಯದ ತಾನೊಲು, ಪ್ರಾಕ್ದ ಗುಡಿ ಗೋಪುರೊಲು, ಶಿಲ್ಪಕಲೆ, ವಾಸ್ತು ವೈಭವ ಅರಮನೆ, ಕೋಟೆ, ಪಳ್ಳಿ, ಇಂಗ್ರೇಜಿ, ಸ್ಮಾರಕ - ಇಂಚೆ ಒಂಜೆನ್ನಾ ಬುಡಂದೆ ತೂಯೆರ್. ನೆನ್ನ ಮಾತ ತೂದಾಪಿನೆನೆ ಆರೆನ ಉಡಲ್ ಭಾರತೊದ ಭವ್ಯ ಸಂಸ್ಕೃತಿದ ಬಗ್ಗೆ ವಿಶೇಷ ಅಭಿಮಾನ ಪುಟ್ಟುಂಡು. ಪ್ರಕೃತಿದ ಬಗ್ಗೆ ಮೋಕೆ ಉಂಡಾಂಡ್. ಸುದೆ, ಕಡಲ್, ಗುಡ್ಡೆ, ಪರ್ವತೊ ಉಂದು ಮಾತ ನರಮಾನ್ಯನ ಮನಸ್ಗ್ ಶಾಂತಿ ಕೊರ್ಪಿನ ತಾನೊಲು ಪನ್ನಿ ಅಲೋಚನೆ ಪುಟ್ಟುಂಡು. ಗಾಂಧೀಜಿ, ರವೀಂದ್ರನಾಥ ಠಾಗೋರ್, ಸಾಧು ಮಸ್ತಾನಿ ಇಂಚೆ ಮಸ್ತ ಮಲ್ಲ ಜನೊಕುಲೆನ ನಿಕಟ ಸಂಪರ್ಕ ಆಂಡ್. ಗಾಂಧಿಯೆರೆನ ವಿಚಾರೊದ ವರ್ಚಸ್ ಆರೆನ ಮಿತ್ತ್ ಎಚ್ಚಾಂಡ್. ರಾಮಕೃಷ್ಣ ಪರಮ ಹಂಸೆರೆನ ಸಾಹಿತ್ಯೊ ಓದುದು ಆರೆಡ ಭಕ್ತಿಭಾವ ಎಚ್ಚಾಂಡ್. ಶಾಂತಿನಿಕೇತನೊನು ತೂದು ಶಿಕ್ಷಣದ ಬಗ್ಗೆ ವಿಶೇಷ ಗೇನೊ ಬತ್ತಂಡ್.

ಕಾರಂತೆರ್ ಊರು ತಿರ್ಗ್ಯರೆ ಕಾಸ್ ಇಜ್ಜಿಂದ್ ವಿಪಲಾ ಕುಲ್ಲಿನಾರತ್ತ್. ಇತ್ತಿ ದುಡ್ಡು, ಇತ್ತಿ ದುಸ್ತೈತೊಡೇ ಲಕ್ಕ್ದ್ ಪೋಪೆದೆರ್. ದುಡ್ಡಿತ್ತಿನಾಡೆ ಮುಟ್ಟ ರೈಲು, ಮೋಟಾರ್, ಕಮ್ಮಿ ಆಂಡ ಬೋರ್ಡ್ ಗಾಡಿ, ದುಡ್ಡು ಇಜ್ಜಿಂದಾನಗ ಬಜಿ ಕಾರ್ಡ್ ನಡತ್ದ್ ಬೆಟ್ಟ, ಗುಡ್ಡೆ ತಿರ್ಗ್ಯರ್. ಬಂಜಿದ ಬಡವುದ ಗೇನೊ ಬುಡ್ಯೆರ್, ಏಕಾಗ್ರತೆಗಾದ್ ಅಪಗಪಗ ಪ್ರಾಣಾಯಾಮ ಮಲ್ತ್ದ್ ಕಾಂಡೆ - ಬಯ್ಯ ಧ್ಯಾನ ಮಲ್ಪುನ ಅಭ್ಯಾಸೊ ಮಲ್ತೊಂಡೆರ್. ಸುಮಾರು 1930 ಮುಟ್ಟ ಆರ್ ತಿರ್ಗೊನನೇ ಎಚ್ಚೆ. ಈ ತಿರ್ಗಾಟೊಡು ಸಂಪಲ್ತಿ ಗೇನೊಡೇ ಆರ್ ಬೊಕ್ಕ ದಿಂಜ ಪ್ರವಾಸ ಕಥನ, ಬರೆಯರೆಗಾಂಡ್. ಪೋಯಿನ ಕೋಡಿದ ಜನಜೀವನ, ಜನೊಕುಲೆನ ಕಷ್ಟ-ಸುಖೊನು ತೆರಿಯೊನ್ನೆಡ್ವಾವರೊನೇ ಆರೆಗ್ ಉಡಲ್ ತಟ್ಟುನ ಕಾದಂಬರಿಲೆನ್ ಬರೆಯರೆಗಾಂಡ್. ಕಾರಂತೆರ್ ತನ್ನ ಜೀವಮಾನೊಡು ಭಾರತೊ ದುಲಯಿದ ಊರುಲೆನ್ ಮಾತ್ರ ಅತ್ತ್ ಏತೋ ಪಿದಯಿ ದೇಶೊಲೆಗ್ಲಾ ಪೋದು ಬತ್ತದೆರ್. ಯುರೋಪು ಖಂಡೊದ ಮಾತ ದೇಶೊಲು, ಉತ್ತರ ಅಮೇರಿಕಾ, ದಕ್ಷಿಣ ಅಮೇರಿಕಾದ ದೇಶೊಲು, ರಶ್ಯಾ, ನೇಪಾಳ, ಶ್ರೀಲಂಕಾ, ಇರಾನ್, ಅಫಘಾನಿಸ್ತಾನ, ಹಾಂಕಾಂಗ್, ಜಪಾನ್ - ಉಂದು ಪೂರ ಆರ್ ತೂದು ಬತ್ತಿನ ದೇಶೊಲು.

ಪ್ರವಾಸೊದ ಬಗ್ಗೆ ಕಾರಂತೆರೆನ ಅಭಿಪ್ರಾಯ ಇಂಚೆ “ತೂಯಿನಾತ್ ಕಣ್ಣ್ ಶುದ್ಧಿ



ಆಪುಂಡು. ತೂವೊಂದುಪ್ಪೊಡು, ಚಿಂತನೆ ಮಲ್ಪೊಡು, ತೆರಿಯೊನೊಡು, ಮನಸ್ಸಾನ್ ಸಂಸ್ಕಾರ ಮಲ್ಪೊನೊಡು, ಬಜೀ ತೀರ್ಥಯಾತ್ರ ಮಲ್ತಾಂಡ ಯಾವಂದ್, ಕಪ್ಪೆ ತಾಮರೆದ ಇರೆತ ಮಿತ್ತ್ ಕುಲ್ಪು ಪೂಕು ಬರ್ಪಿ ಕಿಲೆಂಜಿನ್ ತೂಯಿಲೆಕಾಂಡ ದಾಲಾ ಪ್ರಯೋಜನ ಇಜ್ಜಿ”.

ಕಾರಂತೆರೆನ ಹಿರಿಯಾಕುಲು ದೈವಭಕ್ತೆರ್. ಅಪ್ಪೆ- ಅಜ್ಜಿಯಡಿಕುಲು ಸಂಪ್ರದಾಯಸ್ಥೆರ್. ಕಾರಂತೆರ್ ಎಲ್ಯೆಡ್ ವೇದ-ವೇದಾಂತ, ಪುರಾಣೊ ಓದಿನಾರ್. ಭಗವದ್ಗೀತೆ ಬಾಯಿ ಪಾಠೊ ಮಲ್ತಿನಾರ್. ಆರ್ ಗಾಂಧ್ಯೆರೆನ ಅನುಯಾಯಿ ಬೊಕ್ಕ ದೇಶೊ ತಿರ್ಗೊದ್ ಬತ್ತಿ ಬೊಕ್ಕ ಆರೆನ ಮಡಿವಂತಿಕೆ ಪೂರ ದೂರ ಪೊಂಡು. ಬದ್ಕ ಕರ್ಮಬದ್ಧ ಪನ್ನಿ ಗೀತೆದ ಪಾತೆರೊ ಮಾತ್ರ ಆರೆನ ಮನಸ್ಸಾಡ್ ಒರಿಂಡ್. ಕಣ್ಣ್ಗ್ ತೋಜಂದಿ ದೇವೆರೆನ ಪೂಜೆಗಾದ್ ಖರ್ಚಿ ಮಲ್ಪುನೆಡ್ ತೋಜುನ ತನ್ನ ಬದ್ಕಗಾದ್ ಖರ್ಚಿ ಮಲ್ಪುನ ಎಡ್ಡೆಂದ್ ಆರೆನ ಮನಸ್ಸಾಗಾಂಡ್. ಮನಸ್ಸಾದ ಶಾಂತಿಗಾದ್ ದೇವೆರೆನ್ ನಮ ನೆನವರಿಕೆ ಮಲ್ಪುವ. ಆ ಶಾಂತಿನ್ ಯಾನ್ ಪ್ರಕೃತಿಡ್ ಪಡೆವೊಂದುಲ್ಲೆಂದ್ ಆರ್ ಪನ್ನೆದರ್. “ಜನೊಕುಲೆಗ್ ಆಚರಣೆ ಮುಖ್ಯೊ. ಶುದ್ಧ ಚಾರಿತ್ರ್ಯ ಮುಖ್ಯೊ. ಅವೆನ್ ಪನ್ನಿನೆನ್ ಬುಡುದು ಮಂತ್ರ, ಭಜನೆ, ಸ್ತೋತ್ರ ಇಂಚಿನ ಸುಲಭೋಪಾಯೊಲೆಡ್ ದೈವ ಸಿದ್ಧಿ ಆಪುಂಡು ಪನ್ನಿ ತಪ್ಪು ತಿಳುವಳಿಕೆಲೆನ್ ಹಿರಿಯಾಕುಲು ತೆರಿದೊ-ತೆರಿಯಂದೆನೋ ಕೊರೊಂದುಲ್ಲೆರ್”. ಉಂದು ಆರೆನ ಅಭಿಪ್ರಾಯ.

## ಪತ್ರಿಕೋದ್ಯಮ

ಕಾರಂತೆರ್ ಪತ್ರಿಕೋದ್ಯಮಿಯಾದ್ ಆರೆನ ಉದ್ಯೋಗ ಸುರು ಮಲ್ತೆರ್. ಕುಂದಾಪುರೊತ್ತ ಒರಿ ವಕೀಲೆರೆನ ಗುಮಾಸ್ತೆರಾದಿತ್ತಿನ ದೇವಣ್ಣ ಪೈ ಪನ್ನಿನಾರೆ ದುಡ್ಡುದ ಸಹಕಾರ ದೆತೊಂದು 1924ಡ್ ‘ವಸಂತ’ ಪನ್ನಿನ ಒಂಜಿ ತಿಂಗೊಳು ಪತ್ರಿಕೆ ಸುರು ಮಲ್ತೆರ್. ಬಿ. ಆನಂದ ಭಂಡಾರಿ ಪನ್ನಿನಾರೆನ್ ಪತ್ರಿಕೆದ ಮೆನೇಜರಾದ್ ನೇಮಕ ಮಲ್ತೆರ್. ತಾನ್ ಸಂಪಾದಕರಾದ್ ಕೆಲಸ ಮಲ್ತೆರ್. ವ್ಯಂಗ್ಯ ಚಿತ್ರಗಾರೆ ಆದ್ಲಾ ಆ ಪತ್ರಿಕೆನ್ ಪೂರ್ಣ ಮಲ್ಪುರೆ ತೂಯೆರ್. ತನ್ನ ಗುರುಕುಲಾಯಿನ ಐರೋಡಿ ಶಿವರಾಮಯ್ಯ, ಮಂಜೇಶ್ವರ ಗೋವಿಂದ ಪೈ ಇಂಚಿತ್ತಿ ಮಲ್ಲ ಲೇಖಕೆರೆಡ ಲೇಖನ ಬರೆಪಯೆರ್. ವಿಚಿತ್ರ ಕೂಟ, ಭೂತ ಇಂಚ ತನ್ನ ರಡ್ಡ್ ಕಾದಂಬರಿಲೆನ್ ಧಾರಾವಾಹಿಯಾದ್ ಅಯಿಟ್ ಪ್ರಕಟ ಮಲ್ತೆರ್. ಪತ್ರಿಕೆಡ್ ಪಾಡ್ಯರೆ ಎಡ್ಡೆ ಎಡ್ಡೆ ಚಿತ್ರ ಸಂಗ್ರಹೊಗಾದ್ ಕಲ್ಕತ್ತ ಮುಟ್ಟು ಪೋದು ಬತ್ತೆರ್. ಆಂಡ ಪತ್ರಿಕೆನ್ ಓದುನಕುಲೆ ಸಂಖ್ಯೆ ದಾಲ ಎಚ್ಚಾಯಿಜಿ. ಪತ್ರಿಕೆದ ಮಾರಾಟೊದ ಪ್ರಚಾರೊಗಾದ್ ಉತ್ತರ ಕರ್ನಾಟಕ, ಮದ್ರಾಸ್, ಬೊಂಬಾಯಿ ಮಾತ ತಿರ್ಗೊರ್. ಆಂಡ

ದಾಲಾ ಪ್ರಯೋಜನ ಆಯಿಜಿ. ಪತ್ರಿಕೆನ್ ಉಂತುವೊಡಾಂಡ್. ಒರ ಉಂತದ್ ಕುಡ ಮೂಜಿ ವರ್ಸೊ ಕರಿ ಬೊಕ್ಕ ಅವ್ವ ಪತ್ರಿಕೆನ್ ಕುಡಲಡ್ ಸುರು ಮಲ್ತೆರ್. ಅಲ್ಪಲಾ ಅಂಚನೆ ರಡ್ಡ್ ವರ್ಸೊ ನಡತ್ತ್ದ್ ಅವು ಉಂತುದೇ ಪೋಂಡು. ಸ್ವಂತ ಪತ್ರಿಕೆದ ಕೈಬುಡ್ಡು ಆರ್ ಕುಡಲದ 'ಸ್ವದೇಶಾಭಿಮಾನಿ' ಪನ್ನಿ ಪತ್ರಿಕೆಗ್ ಲೇಖನ ಬರೆಯರೆ ಸುರು ಮಲ್ತೆರ್. 'ಸತ್ಯಾಗ್ರಹಿ' ಪನ್ನಿ ಪತ್ರಿಕೆಗ್ ಬ್ರಿಟಿಷರನ ಆಡಳಿತ ವಿರೋಧವಾಯಿನ ಲೇಖನೊಲೆನ್ ಬರೆಯರೆ ಸುರು ಮಲ್ತೆರ್. 'ಕೌಶಿಕ' ಪನ್ನಿ ಕಾವ್ಯನಾಮ ದೀವೊಂದು ಬಾಗಲಕೋಟೆದ ಕನ್ನಡಿಗ ಪನ್ನಿ ಪತ್ರಿಕೆಗ್ ನಾಟಕದ ಬಗ್ಗೆ ವಿಮರ್ಶೆ ಬರೆವೊಂದಿತ್ತೆರ್. ಇಂಗ್ಲಿಸ್ ಪತ್ರಿಕೆಲೆಗ್ಲಾ ಆರ್ ಎಡ್ಡೆ ಎಡ್ಡೆ ವಿಮರ್ಶಾತ್ಮಕ ಲೇಖನ ಬರೆವೊಂದಿತ್ತೆರ್. ಕೆಲವು ವರ್ಸೊಡ್ಲ ಬೊಕ್ಕ 1950ಡ್ ಆರ್ ಪಿರ ಪತ್ರಿಕೆ ನಡಪುಡ್ಯರೆ ಪ್ರಯತ್ನ ಮಲ್ತೆರ್. 'ವಿಚಾರವಾಣಿ' ಪನ್ನಿ ಪತ್ರಿಕೆ ಸುರು ಮಲ್ತ್ದ್ ಅಯಿಟ್ಲಾ ಆರೆಗ್ ಸೋಲೆ ಆಂಡ್.

ಕಾರಂತೆರ್ ಊರುರು ತಿರ್ಗೈರ್, ನಾಟಕ ಗೊಬೈರ್, ಪತ್ರಿಕೆ ನಡಪಯಿರ್. ಗಾಂಧಿ ಮಾರ್ಗ ಪತ್ತ್ದ್ ಸ್ವಾತಂತ್ರ್ಯ ಚಳವಳಿಡ್ ಪಾಲ್ ಪಡೆಯಿರ್, ಸಮಾಜ ಸೇವೆ ಮಲ್ತೆರ್. ಗಡ್ಡ ಬುಡ್ಡು ಸನ್ಯಾಸಿ ಆಯರೆ ತೂಯಿರ್. ಕದ್ದರ್ ದುಸ್ಥಿತ ಪಾಡ್ಡ್ ಕಾಂಗ್ರೆಸ್ ಪ್ರಚಾರ ಮಲ್ತೆರ್. ಬಡವು - ಬಾಚೆಲ್ ಕಟ್ಟಿದ್ ಬ್ರಹ್ಮಚಾರಿಯಾಯರೆ ಪಿದಡೈರ್. ಆಂಡ ಆರ್ ಕೈಕೊನ್ನ ಯೋಜನೆಲು ಒವುಲಾ ಕೋಡಿ ಎತ್ತಿಜಿ. ನಿರಾಸೆ ಪನ್ನಿ ಶಬ್ದೊನೇ ಕಾರಂತೆರೆನ ಶಬ್ದಕೋಶೊಡಿಜ್ಜಿ. ಆರ್ ದುಡ್ಡುದ ಬೆರಿ ಪತೊಂದು ಪೋದು ಪೂಜೆ ಮಲ್ಪುನಾರತ್ತ್. ಕೀರ್ತಿದ ಬೋಂಟೆ ಮಲ್ಪುನಾರತ್ತ್. ಬದ್ಕಡ್ ಆರೆಗ್ ತಿಕ್ಕಿನ ಪೆಟ್ಟ್ ಆರೆನ ಪರನಂಬಿಕೆದ ಚೋಲಿ ಜಾರಂಡ್. ಪೊಸ ಬದ್ಕ ನಡಪವೊಡು ಪನ್ನಿ ಗೇನೊ ಆರೆಗ್ ಪುಟ್ಟುಂಡು. ಪೊಸ ಬದ್ಕಗ್ ಪೊಸ ಜಾಗೆನೇ ಆವೊಡು ಪಂಡ್‌ದ್ ಆರ್ ತೆನ್ನಾಯಿ ಮೋನೆ ಪಾಡೈರ್.

ಒಂಜಿ - ರಡ್ಡ್ ವರ್ಸೊ ಕುಡಲದ ಕೆನರಾ ಹೈಸ್ಕೂಲುಡು ಹಿಂದಿ ಮಾಸ್ತಾದ್ ಕೆಲಸ ಮಲ್ತೆರ್. ಆ ಪೂರ್ತುಗು ವೆಸ್ವಾನಿ ಸ್ಥಾಪನೆ ಮಲ್ತಿನ ಭಾರತ ಯುವಕ ಸಂಘದ ಕಾರ್ಯದರ್ಶಿಯಾದ್ ಕೆಲಸ ಮಲ್ತೆರ್. ಕರ್ನಾಟಕ ಸಂಘ ಉದಿಪನ ಮಲ್ತೆರ್.

ಅಪಗ ಪುತ್ತೂರು ಮೊಳಹಳ್ಳಿ ಶಿವರಾಯೆರೆನ ಕಜ್ಜೊದ ಕಳ ಆದಿತ್ತ್ಂಡ್. ಆರ್ 1880ಡ್ ಪುತ್ತೂರುಡು ಪುಟ್ಟಿನಾರ್. ಪುತ್ತೂರುಡು ಬಾಲ್ಯೊದ ಬರವು ಕಲ್ತ್ದ್ ಕುಡಲದ ಕಾಲೇಜಿಡ್ ಎಫ್.ಎ. ಮುಗಿತ್ದ್ ಪ್ಲೀಡರ್ ಪರೀಕ್ಷೆಡ್ ಪಾಸಾದ್ ವಕಾಲತ್ತಿಗೆ ಮಲ್ಪುರೆ ಸುರು ಮಲ್ತೆರ್. ವಕಾಲತ್ತಿಗೆಡ್ ಪುದರ್‌ದೆತ್ತಿನ ಆರ್ ಪುತ್ತೂರು ತಾಲೂಕು ಬೋರ್ಡ್‌ದ ಅಧ್ಯಕ್ಷರಾಯೆರ್. ಶಿವರಾಯೆರೆಗ್ ಸಹಕಾರಿ ಕ್ಷೇತ್ರ ಬೊಕ್ಕ ಶಿಕ್ಷಣ ಕ್ಷೇತ್ರೊಡು ಕೆಲಸ ಮಲ್ಪುನ ಮಲ್ಲ ಆಸಕ್ತಿ. ದಕ್ಷಿಣ ಕನ್ನಡೊದ ಜನೊಕುಲೆಗ್ ಸಹಕಾರ ಪನ್ನಿನ ಶಬ್ದೊದ ಅರ್ಥ ಮಲ್ತಿ ಕೊರಿನಾರೇ ಶಿವರಾಯೆರ್. ಪುತ್ತೂರುಡು ಇತ್ತೆ ಈತ್ ಸಾಲೆಲು



ಆವೊಡೂಂದಾಂಡ ಅಯಿತ ಸುರುತ ಬಿತ್ ಪಾಡಿನಾರ್ ಶಿವರಾಯೆರ್. ಶಿವರಾಯೆರೆನ ಸಮಾಜ ಸೇವೆದ ಪೊಲಬು ಕಾರಂತೆರೆಗಾಂಡ್. ಕಾರಂತೆರ್ ಶಿವರಾಯೆರೆನ ಸಹವರ್ತಿಯಾದ್ ಕೆಲಸ ಮಲ್ಪುರೆಗಾದೇ 1950ಡ್ ಪುತ್ತುರುಗು ಬತ್ತೆರ್.

### ಜೋಕ್ಕಿಗಾದ್ ಶಿಬಿರೊಲು

ಪುತ್ತುರುದ ಬೋರ್ಡ್ ಹೈಸ್ಕೂಲುಡು ಅಪಗ ರಾಮನ್ ನಂಬಿಯಾರ್ ಪನ್ನಿನಾರ್ ಹೆಡ್‌ಮಾಸ್ತಾದಿತ್ತೆರ್. ಬ್ರಹ್ಮಚಾರಿ ಕಾರಂತೆರೆಗ್ ರಾಮನ್ ನಂಬಿಯಾರ್ ತನ್ನ ಇಲ್ಲಾಲ್ಲೇ ಇಂಬು ಕೊರ್ಚೆರ್. ನಂಬಿಯಾರ್‌ರೆನ ಇಲ್ಲಾಲ್ ಇತ್ತೊಂದೇ ಕಾರಂತೆರ್ ಶಿವರಾಯೆರೆನ ಬೆರಿಸಾಯೊ ಪಡೆವೊಂದು ಗಾಂಧಿ ತತ್ವೊನು ತರೆಟ್ ದಿಂಜವೊಂದು ಬ್ರಿಟಿಷ್ ಸರಕಾರ ಮಲ್ಪೆದಿನ ಕಳಿತ ಗುತ್ತಿಗೆ ಏಲಮುನು ಉಂತಯೆರೆ ತೂಯೆರ್. ಸಬರ್ಮತಿ ಆಶ್ರಮೊಗು ಪೋದು ಬತ್ತಿನ ಆರ್ ಅವ್ವೇ ಮಾದರಿಡ್ ಪುತ್ತುರುಡು ಜೋಕುಲೆಗಾದ್ ಅರೆಗಾಲದ ರಜೆಟೊಂಜಿ ಶಿಬಿರ ಮಲ್ತೆರ್.

ಹಳ್ಳಿಲೆಡ್ ಈ ಶಿಬಿರ ನಡಪೆದ್‌ಂಡ್. ಕಾಂಡೆ ನಾಲ್ ಗಂಟೆಗ್ ಲಕ್ಕಾದ್ ಒಂಜಿ ಗಂಟೆದ ಪ್ರಾರ್ಥನೆ, ವ್ಯಾಯಾಮ. ಕಾಂಡೆದ ತಿನಸ್ ಕರಿಬೊಕ್ಕ ಕೊಟ್ಟು-ಪಿಕ್ಕಾಸ್ ಪತ್ತಾದ್ ಗುಡ್ಡೆ ಗರ್ತದ್ ಸಮತಟ್ಟ್ ಮಲ್ಪಯೆರ್. ಊರುದಕುಲೆಗಾದ್ ಗುವೆಲ್ ತೋಡಯೆರ್. ಪಾಯಿಖಾನೆ ಕಟ್ಟಯೆರ್. ಊರುದಕುಲೆಗ್ ಕೈಗಾರಿಕೆ, ಕೃಷಿ, ಪಶುಪಾಲನೆ, ಕೋರಿ ಸಾಂಕನ, ಪರ್‌ಂದ್‌ದ ತೋಟ ಬುಳೆಪವುನೆ ಇಂಚಿನ ವಿಷಯೊಡು ಭಾಷಣ ಕೊರ್ಚೆರ್. ಹಳ್ಳಿದಕುಲೆಗ್ ಆಟ-ನಾಟಕ ಗೊಬ್ಬುದು ತೋಜಯೆರ್. ಪೂರ್ತುಕಂತ್‌ನಗ ಉನಸ್ ಬೊಕ್ಕ ಪ್ರಾರ್ಥನೆ ಮಲ್ತಾದ್ ನಿದ್ರೆ. ಕಾರಂತೆರ್ ಶಿಬಿರೊದ ದಿನೊನಿತ್ತೊದ ಕಾರ್ಯಕ್ರಮೊ ಇಂಚೆ ನಡಪಯೆರ್. ಸುರುತ ಏಳ್ ದಿನೊತ ಶಿಬಿರೊ 1930ಡ್ ಉಬಾರ್ಡ್ ನೇತ್ರಾವತಿ ಸುದೆ ಬರಿಟ್ ನಡತ್‌ಂಡ್. ನಂಬಿಯಾರ್ ಬೊಕ್ಕ ಶಿವರಾಯೆರೆನ ಬೆರಿ ಸಾಯೊಡು ನಾಲ್ಕೆನ್ ವರ್ಸೊ ಮುಟ್ಟು ಇಂಚಿನ ಶಾಂತಿ ಶಿಬಿರೊಲೆನ್ ನಡಪಾಯೆರ್. 1931ಡ್ ಗುರುವಾಯನಕೆರೆಟ್ ನಡತಿ ಶಿಬಿರೊಡು ಊರುಗು ರಡ್ಡ್ ಪಾಯಿಖಾನೆ ಕಟ್ಟಯೆರ್. ಸಂತೆ ನಡಪುರೆಗೊಂಜಿ ಜಾಗೆ ಮೈದಾನ್ ಮಲ್ಪಯೆರ್. ಬೆಳ್ಳಾರೆದ ಶಿಬಿರೊಡು ಪರಿಶಿಷ್ಟ ಜಾತಿದಕುಲೆಗೊಂಜಿ ಗುವೆಲ್ ತೋಡಯೆರ್.

ಸುಳ್ಳೊಡು ಒಂಜಿ ಜೋಕುಲೆ ಕೂಟೊದ ವ್ಯವಸ್ಥೆ ಸುರು ಮಲ್ತೆರ್. ಒಂಜಿ ಶಾಂತಿ ಶಿಬಿರ ಮಲ್ಪಯೆರ್. ಸುಳ್ಳೊದ ಜನೊಕ್ಲು ಆರೆಗ್ ಬಾರಿ ಸಹಕಾರೊ ಕೊರ್ಚೆರ್. ಶಿವರಾಯೆರೆನ ಮುಂದಾಳ್ತನೊಡು ಜನೊ ಸೇರ್ಡ್ ಮಲ್ಲ ಗುಡ್ಡೆನೇ ಜರಿತ್‌ದ್ ಸಮತಟ್ಟ್ ಮಲ್ತೆರ್. ಚಪ್ಪರ ಪಾಡ್ಯೆರ್. ಊರ್ಡಕುಲೆನ ಪುದೆ ಪುದೆ ತರ್ಕಾರಿ, ಅರಿ, ತಾರಯಿ, ಕನಕ್

ಬತ್ತಂಡ್. ಏಳ್ ದಿನೊತ ಶಿಬಿರೊಡ್ ಮಲ್ಲ ಮಲ್ಲ ಶ್ರೀಮಂತೆರ್ನಕುಲು ಕಚ್ಚೆ ಕಟ್ಟಾದ್ ಬೆಂದೆರ್. 'ಉಂದು ಪೂರ ಶಿವರಾಯೆರೆನ ಸಾಮರ್ಥ್ಯ. ಆರೆನ ಯೋಜನೆ ಏಪಲಾ ಅಡಿಕ್ ಬೂಕುರೆ ಸಾಧ್ಯನೇ ಇಜ್ಜಿ. ಅಂಚಿತ್ತಿ ಪ್ರಭಾವಶಾಲಿ ವ್ಯಕ್ತಿತ್ವದಾರ್ ಆರ್' ಪಂಡ್‌ದ್ ಶಿವರಾಮ ಕಾರಂತೆರ್ ಆರೆನ್ ನೆನೆತೊಂದಿತ್ತೆರ್. ವಿಟ್ಲ, ಕನ್ಯಾನ್ ಇಂಚ ಬೇತೆ ಕೆಲವು ಕೋಡಿಡ್ಲಾ ಈ ಶಿಬಿರೊಲು ಎಡ್ಲೆ ಪೂರ್ಣುಡು ನಡತ್‌ಂಡ್.

ಶಾಲೆಲೆನ ಆಡಳಿತ ತಾಲುಕು ಬೋರ್ಡುಡ್ಲ ಜಿಲ್ಲಾ ಬೋರ್ಡುಗು ಪೋಂಡು. ಅಪಗ ಬತ್ತಿನ ಒರಿ ಜಿಲ್ಲಾ ಶಿಕ್ಷಣಾಧಿಕಾರಿ ಕಾರಂತೆರೆ ಶಿಬಿರೊಡು ಮಾಸ್ಪಾನಕುಲು ಪಾಲ್ ಪಡೆಯರೆ ಬಲ್ಲಿಂದ್ ಆದೇಶೊ ಕೊರ್ಚೆ. ಅಂಚಾದ್ ಕಾರಂತೆರೆಗ್ ಈ ಶಿಬಿರೊ ಮಲ್ಪುನ ಮನಸ್ಸು ಆಡೆಗೇ ಜಗ್ಗಂಡ್. ಬೊಕ್ಕ ಒರ ಪಂಜೆ ಮಂಗಳೇಶರಾಯೆರೆನ ಒತ್ತಾಯೊಗಾದ್ 1932ಡ್ ಕುಡಲಡೊಂಜಿ ಶಿಬಿರ ಮಲ್ತೆರ್. ಆ ಶಿಬಿರ ದಾಲಾ ಫಲಕಾರಿಯಾಯಿಜಿ. ಕಾರಂತೆರೆಗ್ ಕೈಡ್ಲೇ ಖರ್ಚಾಂಡ್.

ಕಾರಂತೆರ್ ಈ ಪೂರ್ತುಡು ಪುತ್ತೂರು, ಸುಳ್ಯೊ, ಬೆಳ್ತಂಗಡಿದ ಮಾತಾ ಹಳ್ಳಿಲೆಗ್ಲಾ ಸಂಚಾರ ಮಲ್ತೆರ್. ಬಡವೆ, ಬಲ್ಲಿದೆ ಪನ್ನಿ ಭೇದದಾಂತೆ ಮಾತೆರೆ ಇಲ್ಲಡೆಗ್ಲಾ ಪೋಯೆರ್. ಜನೊಕುಲೆ ಕಷ್ಟ ಸುಖ ತೆರಿಯೊಂಡೆರ್. ಅಯಿತ ಜೊತೆಟ್ ಪ್ರಕೃತಿ ವೀಕ್ಷಣೆ ಮಲ್ತೆರ್. ಪ್ರಕೃತಿನ ಅರ್ಥ ಮಲ್ತೊಂಡೆರ್. ಗರ್ಭಗುಡಿ, ರಕ್ತಕಾಣಿಕೆ, ಬೌದ್ಧ ಯಾತ್ರೆ ಮುಕ್ತದ್ವಾರ, ನಾಟಕವೆಂಬ ನಾಟಕ, ತಿಮ್ಮಪ್ಪನ ಒಗ್ಗರಣೆ ಇಂಚ ಕೆಲವು ನಾಟಕೊಲೆನ್ ಬರೆಯೆರ್. ಆರ್ ತುಳುನಾಡ್ಲ ಸಂಸ್ಕೃತಿನ ಅಧ್ಯಯನ ಮಲ್ತಿನ ಕಾರಣೊಡ್ಲಾವರೊನೇ ಎಡ್ಲೆಂತಿನ ಕಾದಂಬರಿ 'ಜೋಮನ ದುಡಿ' ಬರೆವರೆಗ್ ಆರೆಡ್ಲ ಸಾಧ್ಯ ಆಂಡ್.

### ಜೋಕ್ಲೆ ಸಾಹಿತ್ಯೊ

ಮಲ್ಲಸಾಹಿತಿನ್‌ಕುಲು ಜೋಕ್ಲೆಗಾದ್ ಸಾಹಿತ್ಯ ಬರೆಯರೆ ಪಿರ ಜಾರುನನೇ ಎಚ್ಚೆ. ಕಾರಂತೆರ್ ಏತ್ ಮಲ್ಲ ಸಾಹಿತಿಯಾಂಡಲಾ ಜೋಕ್ಲೆನ್ ಮದತಿನಾರತ್. ಜೋಕ್ಲೆಗಾದ್ ಆರ್ ಸುಮಾರ್ 213 ಬೂಕುಲೆನ್ ಬರೆತೆರ್ ಪನ್ನಗ ಎರೆಗ್ಲಾ ಸೋಜಿಗ ಆವು. ಆ ಬೂಕುಲೆನ್ ಓದುನಗ ಅಯಿಟ್ ಕಾರಂತೆರೆನ ಪ್ರೌಢಭಾಷೆ ಓಲ್ಲಾ ತೋಜಿದ್ ಬರ್ಪುಜಿ. ಆ ಭಾಷೆ ಜೋಕಲೆನ ಮಟ್ಟೊಡುಂಡು. ಜೋಕ್ಲೆಗ್ ಅರ್ಥ ಆಪಿಲೆಕ ಉಂಡು. ಇಲಿಗಳ ಮದುವೆ, ಕಥೆಗಳ ಕೊಪ್ಪರಿಗೆ, ತೆನಾಲಿ ರಾಮ, ಜಾತಕ ಕತೆಗಳು - ಇಂಚ 10 - 15 ಕತೆ ಬೂಕುಲೆನ್ ಆರೇ ಬರೆತೆರ್. ಬೆಂಗಳೂರು ಐ.ಬಿ.ಎಚ್. ಪ್ರಕಾಶನೊದ ಅಮರ ಚಿತ್ರಕಥಾ ಮಾಲಿಕೆದ 119 ಬೂಕುಲೆನ್ ಕನ್ನಡೊಗು ಅನುವಾದ ಮಲ್ತಾದೆರ್. ಇಕೋ ಪುಸ್ತಕ ಮಾಲೆ ಗ್ರಂಥ 40 ಬೂಕುಲೆನ್ ಸಂಪಾದನೆ ಮಲ್ತಾದೆರ್. ಉಂದು ಪೂರ ಕಿನ್ಯ ಜೋಕ್ಲೆಗಾದೇ



ಬರೆಯಿನವು. ಜೋಕ್ಕೆಗ್ ವಿಷಯೊ ತೆರಿಯೊನ್ನರೆ ಅವಕಾಶ ಮಲ್ತ್ ಕೊರೊಡು. ಸಂಸ್ಕೃತಿನ ತೆರಿಪದ್ ಕೊರೊಡು, ದುಂಬುದ ಬದ್ ನಡಪವುನ ಬಗ್ಗೆ ಆಲೋಚನೆ ಮಲ್ಪುರೆ ಸ್ವಾತಂತ್ರ್ಯ ಕೊರೊಡು ಪನ್ನಿನ ಕಾರಂತೆರೆ ಅಭಿಪ್ರಾಯೊ.

### ಸಿನಿಮಾ ತಯಾರಿ

ಕಾರಂತೆರ್ ಶಿಬಿರ ಉಂತಯೆರ್. ಕಾರಂತೆರೆಗ್ ಮನಿಪಂದೆ ಕುಲ್ಕರೆಗ್ ಸಾಧ್ಯೊನೇ ಇಜ್ಜಿ. ಹಳ್ಳಿದ ಜನೊಕುಲು ಓದು ಬರವು ಕಲ್ತಿನಕುಲತ್ ಬಜೀ ಹೆಡ್ಡೆರ್. ಅಕುಲೆನ್ ಎಂಚೆ ಎಚ್ಚರಿಕೆ ಮಲ್ಪುನೆ ಪಂಡ್‌ದ್ ಕಾರಂತೆರ್ ಯೋಚನೆಡ್ ಬೂರೈರ್. ಸಿನಿಮಾ ತೋಜದ್ ಅಕುಲೆನ್ ಉದ್ಧಾರ ಮಲ್ಪೊಲಿಂದ್ ಆಲೋಚನೆ ಮಲ್ತೆರ್. ಅಸ್ಪೃಶ್ಯತೆದ ವಿರುದ್ಧೊ 'ಡೊಮಿಂಗೋ' ಪಂಡ್‌ದೊಂಜಿ ಕತೆ ಬರೆಯೆರ್. ಸಿನಿಮೊದ ಬಗ್ಗೆ ರಶ್ಮಿ ದೇಶೊಡ್ತು ವಿಶೇಷ ಮಾಹಿತಿ ತರ್ಪದ್ ಓದಿಯೆರ್.

ಶಿವರಾಯೆರೆನ ಅಪ್ಪಣೆ ಪಡೆಯೆರ್. ಸಾಲ ಮಲ್ತ್‌ದೊಂಜಿ ಕ್ಯಾಮರಾ ದೆತೊಂಡೆರ್. 'ಡೊಮಿಂಗೋ' ಚಿತ್ರೀಕರಣ ಮಲ್ತೆರ್. ಫಿಲ್ಮ್ ದೆಕ್ಕರೆಗಾದ್ ಮುಂಬಯಿಗ್ ಕಡಪುಡೈರ್. ಆಂಡ ದಾನೆ ದೆಕ್ಕನಗ ಫಿಲ್ಮ್ ಪೂರ ಹಾಳಾಂಡ್. ಹಟ ಬುಡ್ಜೆರ್. ಪಿರ ಒರ ಶೂಟಿಂಗ್ ಮಲ್ತೆರ್. ತಾನೇ ಮುಂಬಯಿಗ್ ಫಿಲ್ಮ್ ಪತೊಂದು ಪೋದು ಕ್ಲೀನ್ ಮಲ್ತೊಂದು ಬತ್ತೆರ್. ಸಿನೆಮಾ ತೋಜವೊಡೊಂದಾಂಡ ಪ್ರೊಜೆಕ್ಟರ್ ಬೋಡೆ. ಶಿವರಾಯೆರೆಡ ಪಂಡ್‌ದ್ ಜಿಲ್ಲಾ ಬೋರ್ಡ್‌ದ ಬೆರಿಸಾಯೊ ಪಡೆದೊಂಜಿ ಪ್ರೊಜೆಕ್ಟರ್ ದೆತೊಂಡೆರ್. ಬೆಳ್ತಂಗಡಿದ ಜೋಕ್ಕೆ ಕೂಟೊಡು ಸಿನೆಮಾ ಪ್ರದರ್ಶನೊಂದು ನಿಗಂಟಾಂಡ್. ಅಲ್ಪಲಾ ಗ್ರಾಚಾರ ಬುಡ್ಜಿ. ಫಿಲ್ಮ್ ಡಬ್ಬಿನ್ ದೀನ ಕೋಣೆಗೇ ಸೂಪರ್‌ತ್‌ದ್ ಫಿಲ್ಮ್ ಪೊತ್ತುದು ಪೋಂಡು.

ಕಾರಂತೆರ್ ಹಟ ಬುಡಂದಿ ತ್ರಿವಿಕ್ರಮೆ. ಸೋಲು ಗೆಲ್ಮೆಗೊಂಜಿ ಮೊಟ್ಟಿಕಲ್ಲ್‌ಂದ್ ಎನ್ನುನಾರ್. ಕುಡ ಚಲನಚಿತ್ರ ಮಲ್ಪುರೆ ಪಿದಾಡೈರ್. 'ಭೂತರಾಜ್ಯ' ಪನ್ನಿ ಕತೆ ಬರೆಯೆರ್. ಕಡಿಮೆ ಖರ್ಚಿಡಾವೊಡುಂದು ತನ್ನನೇ ಕತೆ, ತನ್ನನೇ ನಿರ್ದೇಶನ, ತಾನೇ ಕ್ಯಾಮರಾಮೆನ್ ಆದ್ ಹಳ್ಳಿ ಹಳ್ಳಿಗ್ ಪೋದು ಫಿಲ್ಮ್ ಶೂಟಿಂಗ್ ಮಲ್ತೆರ್. ಒಂಜಿ ತಿಂಗೊಳ್ಳು ಚಿತ್ರೀಕರಣ ಮುಗೀದ್ ಸುಮಾರ್ 8 ಸಾವಿರ ಅಡಿ ರೀಲ್ ತಯಾರಾಂಡ್. ಅಯಿನ್ ಪತೊಂದು ತಾನೇ ಬೊಂಬಾಯಿಗ್ ಪೋದು ದೆಕ್ಕದ್ ಪತೊಂದು ಬತ್ತೆರ್. ಕುಡಲಡ್ ಸುರುತ ಪ್ರದರ್ಶನ ಮಲ್ತೆರ್. ಉಂದು ಮಾತ್ರೊ ಪಾತೆರದಾಂತಿನ ಮೂಕಿ ಚಿತ್ರ. ಈ ಸಿನಿಮಾ ಪ್ರದರ್ಶನೊಗು ಬರ್ಪಿ ಪೂರ್ತುಗೇ 'ಆಲಂ ಆರ' ಪನ್ನಿ ವಾಕ್ಚಿತ್ರ ಬುಡುಗಡೆ ಆಂಡ್. 'ಭೂತ ರಾಜ್ಯೊ'ಗು ಗಿರಾಕಿದಾಂತೆ ಪೋಂಡು. ಪಿದಯಿ ಊರುಗು ಆ ಸಿನಿಮಾ

ರೀಲ್‌ನ್ ಕಡಪುಡ್‌ಂಡ ದಾಲ ಪ್ರಯೋಜನ ಆವೂಂದು ಎನ್ನೆರ್, ಒರಿ ಡಿಲ್ಲಿದಾಯೆ ತಿಕ್ಕೆ. ಆಯೆ ಬಾಡಿಗೆ ಕೊರ್ಪೆಂದ್ ಒತ್ತೊಂದು ಡಿಲ್ಲಿಗ್ ಫಿಲ್ಮ್ ಪತ್ತೊಂದು ಪೋಯೆ. ವರ್ಸೊ ಕರಿಂಡಲಾ ಫಿಲ್ಮ್ ಪಿರ ಬತ್ತಜಿ. ಕಾರಂತೆರ್ ಆಯನ್ ನಾಡೊಂದು ಡೆಲ್ಲಿಗ್ ಪೋಯೆರ್. ಆಡೆ ಪೋನಗ ಕತೆನೇ ಬೇತೆ. ಆಯೆ ಫಿಲ್ಮ್‌ನ್ ಅಡವುದೀತೆ. ದುಡ್ಡು ಕೊರ್ದು ಫಿಲ್ಮ್ ಬುಡ್ಬವೊಂದು ಬತ್ತೆರ್. ಬತ್ತದ್ಲಾ ದಾಲಾ ಸುಖೊ ಇಜ್ಜಿ. ವಾಕ್ಚಿತ್ತೊ ಉಪ್ಪುನಗ ಮೂಕಿ ಚಿತ್ತೊನೇರ್ ತೂಪೆರ್.

ಕಾರಂತೆರೆನ 'ಕುಡಿಯರ ಕೂಸು' ಪನ್ನಿ ಕಾದಂಬರಿ 1977ಡ್ 'ಮಲೆಯ ಮಕ್ಕಳು' ಪನ್ನಿ ಪುದರ್ಡ್ ಸಿನಿಮಾ ಆಂಡ್. ಕಲ್ಪನಾ ನಾಯಕಿನ ಪಾತ್ರೊ ಮಲ್ತೆರ್. ಕಾರಂತೆರೇ ನಿರ್ದೇಶನ ಮಲ್ತೆರ್. ಆಂಡ ಆ ಚಿತ್ರೊ ಕುಡಲಡ್ ಒಂಜಿ ವಾರೊಲಾ ನಡತ್‌ಜಿ. ಕಾರಂತೆರೆ ಪುದರ್‌ನ್ ಮಿತ್ತ್ ಕನತಿನ ಸಿನಿಮಾ ಪಂಡ 'ಚೋಮನ ದುಡಿ'. ಕಾರಂತೆರ್ ಬರೆಯಿ ಚೋಮನ ದುಡಿನ ಪುದರ್ ಪಡೆಯಿ ನಿರ್ದೇಶಕೆ ಬಿ. ವಿ. ಕಾರಂತೆರ್ ನಿರ್ದೇಶನ ಮಲ್ತೆರ್. ವಾಸುದೇವರಾಯೆರ್ ಚೋಮನ ಪಾತ್ರೊ ಮಲ್ತೆರ್. ಈ ಸಿನಿಮಾ ರಾಷ್ಟ್ರಮಟ್ಟ ಜಾಗತಿಕ ಮಟ್ಟೊಡ್ಲಾ ಪ್ರದರ್ಶನ ಆಂಡ್, ಪ್ರಶಸ್ತಿ ಪಡೆಂಡ್. ಚಿತ್ರ ಸಾಹಿತ್ಯೊಗಾದ್ ಕಾರಂತೆರ್ ಪ್ರಶಸ್ತಿ ಪಡೆಯೆರ್. ನಟನೆಗಾದ್ ವಾಸುದೇವರಾಯೆರ್ ಪ್ರಶಸ್ತಿ ಪಡೆಯೆರ್.

ಕಾರಂತೆರ್ ತನ್ನ 92ನೆ ವರ್ಸೊ ಪ್ರಾಯೊಡ್ಲಾ ಒಂಜಿ ಸಿನಿಮೊಡು ಪಾಲ್ ಪಡೆಯೆರ್. 'ಸಪ್ತಂಬರ್ 8' ಪನ್ನಿ ಆ ಸಿನಿಮೊ ಒಂಜೇ ದಿನೊಟು ಶೂಟಿಂಗ್ ಮುಗಿಪಯಿನ ದಾಖಲೆ ಮಲ್ತಿ ಸಿನಿಮಾ. ಅಯಿಟ್ ಕಾರಂತೆರ್ ನಟನೆ ಮಲ್ತೆರ್. ಇಂಚ ಸಿನಿಮಾ ರಂಗೊಡ್ಲಾ ಕಥಾ ಸಾಹಿತಿ, ಸಂಭಾಷಣೆಗಾರ, ನಟ, ನಿರ್ದೇಶಕೆ, ಚಿತ್ರ ತಯಾರಕೆ ಆದ್ ಕಾರಂತೆರ್ ಕೆಲಸೊ ಮಲ್ತಿನಾರ್.

## ಬಾಲವನೊಟು ಜೋಕ್ ಸಾಲೆ

ಕಾರಂತೆರ್ ಪುತ್ತೂರು ಪೇಂಟೆಡ್ ರಡ್ಡ್ ಕಿಲೋ ಮೀಟರ್ ದುಂಬು ಪಾಣಾಜೆಗ್ ಪೋಪಿ ಮಾರ್ಗೊದ ಬರಿ ಗುಡ್ಡೆದ ಪುಡೆಟೊಂಜಿ ಆಜಿ ಎಕ್ರೆ ಜಾಗೆ ಮಲ್ತ್‌ದ್ ಇಲ್ಲ್ ಕಟ್ಪಾದ್ ಕುಲೈರ್. ಆ ಜಾಗೆನ್ ಅರೆಗ್ ಕೊರ್ಪಯಿನಾರ್ ಶಿವರಾಯೆರ್. ಆರೆ ಇಲ್ಲ್‌ದ ಪರಿಸರೊಗು ಬಾಲವನೊಂದು ಪುದರ್ ದೀಯೆರ್. ಆರೆ ಆಲೋಚನೆದಂಚನೆ ಪೊಸ ಶಿಕ್ಷಣ ಪದ್ಧತಿನ ಜಿಲ್ಲೆಡ್ ಪೂರ ಪ್ರಚಾರೊ ಮಲ್ಪೊಡುಂದು ಮಲ್ತಿ ಪ್ರಯತ್ನೊ ದಾಲ ಕೋಡಿ ಎತ್ತಜಿ. ನಾಲ್ಕೆನ್ ವರ್ಸೊ ಊರೂರು ತಿರ್ಗೊದ್ ಅರೆಗಾಲದ ಶಿಬಿರ ನಡಪದ್ ಜೋಕುಲೆ ಕೂಟೊ ಕಟ್ಪಂಡಲಾ ಮಾತ ಮಾಸ್ತ್ರಿನಕುಲು ಆ ಕಲ್ಪಾಟಿಗೆನ್ ದುಂಬೊತ್ತುದು ಕೊನೊಯರೆ ಕೇನ್‌ಜೆರ್. ಇಲಾಖೆದ ಅಧಿಕಾರಿನಕುಲು ಆ ಪದ್ಧತಿಡ್ ದಾಲ ಉಮೇದ್



ದೆತೊಂಜೆರ್. ಆತೆ ಅತ್ತ್ ಅಯಿನ್ ಉಂತಯರೆಗ್ ಬೋಡಾದ್ ಪೇಚಾಡ್ಯೆರ್. ಮಸ್ತ್ ಪೊಣೆದ್ ಕಾರಂತೆರ್ ಸೋತು ಪೋಯೆರ್.

ಶಿಕ್ಷಣತಜ್ಞ ಮಾಂಟೆಸೊರಿನ 'ಕಿಂಡರ್ ಗಾರ್ಟನ್' ಶಿಕ್ಷಣ ಪದ್ಧತಿ ಆರೆಗ್ ಬಾರಿ ಒಪ್ಪಿಗೆ ಆಂಡ್. ಪ್ರತಿಯೊಂಜಿ ಪಾಠೋನ್ನಾ ಗೊಬ್ಬು ಗೊಬ್ಬುದೆ ಜೋಕುಲು ಕಲ್ಪೊಡು ಪನ್ನಿನ ಕಾರಂತೆರೆನ ತತ್ವೊ. 1935ಡ್ ತನ್ನ ಬಾಲವನೊಟೊಂಜಿ ಮಾದರಿ ಶಾಲೆ ಸುರು ಮಲ್ತೆರ್. ಬಾಲವನ ಸುತ್ತ ಕಾಡ್ ದಿಂಜಿದುಪ್ಪಿ ಒಂಜಿ ಪ್ರಕೃತಿರಮ್ಯ ಜಾಗೆ. ಅಲ್ಪ ಶಾಲೆಗೊಂಜಿ ಕಟ್ಟೋಣ, ತನ್‌ಕ್ ಉಂತ್ಯರೊಂಜಿ ಇಲ್ಲಾ ಮಾತ ಕಟ್ಟಯೆರ್. ಜೋಕ್ಲೆಗ್ ಗೊಬ್ಬರೆಗಾದ್ ಜಾಲ್ ಮಲ್ಪಯೆರ್. ಅಯಿಟ್ 200 ಅಡಿ ಉದ್ದೊಗು ಪಟ್ಟೆ ಪಾಡ್ವದ್ ಜೋಕುಲೆ ರೈಲ್‌ತಿರ್ಗಯರೆ ಸುರು ಮಲ್ತೆರ್. ಜಾರುಬಂಡಿ, ಉಜ್ಜಾಲ್ ಪಾಡ್ವಯೆರ್. ಗಿಳಿ, ಮಂಗೆ, ನಾಯಿ, ಮಯಿರ್, ಉರೆ, ಉಚ್ಚುಲೆನ್ ಜೋಕ್ಲೆಗ್ ತೋಜಯೆರೆಗೊಂಜಿ ಮೃಗಾಲಯ ಮಲ್ತೆರ್. ಜೋಕುಲೆಗ್ ಬೂಕು ಓದ್ಯರೆಗಾದ್ ಒಂಜಿ ಗ್ರಂಥ ಭಂಡಾರ ಮಲ್ತೆರ್. ಕಾರಂತೆರೆ ಮದಿಮೆ 1936 ಮೇ 6ನಾನಿ ನಡತ್‌ಂಡ್. ಮದಿಮೆ ಆಯಿಬೊಕ್ಕ ಬೊಡೆದಿನ್ನಾ ಬಾಲವನೊಕು ಲೆತೊನು ಬತ್ತೆರ್. ಆರ್ ಎಡ್ಡೆ ನೃತ್ಯಗಾರ್ತಿ. ಜೋಕ್ಲೆನ್ ಗೊಬ್ಬಯೆರೆ, ಪಾಠ ಕಲ್ಪಯೆರೆ ಬುಡೆದಿ ಲೀಲಕ್ಕಳ ಜೊತೆ ಸೇರೈರ್.

ಜೋಕುಲೆಗ್ ಪಾಠ ಕಲ್ಪವುನೆ ಪಂಡ ಬೂಕುಡಿತ್ತಿ ಬರವುನು ಬಾಯಿಪಾಠ ಕಲ್ಪವುನೆ ಅತ್ತ್. ಓದು, ಬರವು, ಲೆಕ್ಕ - ಉಂದು ಮೂಜೆನ್ ನಾಲ್ ಗೋಡೆದ ನಡುಟು ಕುಲ್ಲದ್ ಬಲಾತ್ಕೊರೊಡು ಕಲ್ಪಯಿ ಸಾತ್‌ಗ್ ಜೋಕುಲು ವಿದ್ಯಾವಂತೆರಾಪುಜೆರ್. ಜೋಕುಲು ಅಕುಲಾದೆ ಕಲ್ಪೊಡು. ಕಲ್ಪುನ ಆಸಕ್ತಿ ಪುಟ್ಟವುನ ಕೆಲಸೊ ಮಾಸ್ತ್ರಿನಕುಲೆನ. ಪತ್ತ್ ಜನ ಸೇರ್ಡ್ ಒಂಜಿ ಕುದುರೆನ್ ನೀರ್ಡ್ ಕೈತಡೆ ಕೊನೊವೊಲಿ. ಆಂಡ ನೂದು ಜನೊ ಸೇರ್‌ಂಡಲಾ ಅಯಿಕ್ ನೀರ್ ಪರ್ಪಯೆರೆ ಸಾಧ್ಯ ಇಜ್ಜಿ. ಕುದುರೆ ಅಯಿನಾತೆಗೇ ಮನಸ್ ತೋಜಿದ್ ನೀರ್ ಪರೊಡಾತೆ. ಮಾಸ್ತ್ರಿನಕುಲೆಗ್ ಬಜೀ ವಿಷಯಜ್ಞಾನ ಮಾತ್ರ ಇತ್ತಂಡ ಯಾವಂದ್ ಅಕುಲೆಗ್ ಮನಃಶಾಸ್ತ್ರಲಾ ಗೊತ್ತು ಬೋಡು. ರೂಸೊ 'ಬೂಕುಲೆನ್ ಸುಡ್ಲೆ, ಗೋಡೆಲೆನ್‌ದರ್ಪುಲೆ'. ಬಾಲೆನ್ ಪ್ರಕೃತಿದ ಮಟ್ಟೆಲ್‌ಗ್ ದಕ್ಕಾದ್ ಬುಡ್ಲೆ, ಬಾಲೆ ಅಯಿನಾತೆಗೇ ಅಲ್ಪ ಕಲ್ಪೊನುಂಡು, ಪನ್ನೆ. ಈ ಶಿಕ್ಷಣತಜ್ಞನ ಪಾತೆರೊನು ಕಾಡ್‌ದನಡುಟಿತ್ತಿ ತನ್ನ ಬಾಲವನೊಟು ಸಾಬೀತಿ ಮಲ್ಪೊಲಿಂದ್ ಕಾರಂತೆರ್ ಎನ್ನಿಯೆರ್. ಆಂಡ ಅವು ಫಲಕಾರಿ ಆಯಿಜಿ. ಅಪ್ಪೆ-ಅಮ್ಮೆ ತನ್ನ ಜೋಕ್ಲೆಗ್ ಇಂಚಿನ ಶಿಕ್ಷಣೊನು ಬಯಕ್‌ಜೆರ್. ಪತ್ತ್ ಜೋಕ್ಲೆಡ್ಲೆಚ್ಚ ಸಾಲೆಗ್ ಸೇರೈರ್. ಆಂಡ ಗೊಬ್ಬೆರೆ ಮಾತ್ರ ಊರ್ಡ್ ಮಾತ ಜೋಕುಲುಲಾ ಬತ್ತೊಂದಿತ್ತೆರ್.

ಮಾಸ್ತ್ರಿನಕುಲು ಆಸಕ್ತಿ ತೋಜವಂದೆ ಉಪ್ಪರೆ ಸರಿಯಾಯಿನ ಪಾಠ ಪುಸ್ತಕೊ

ಇದ್ಯಂದಿನವೇ ಕಾರಣ ಪಂಡಾಡ್ ಕಾರಂತೆರ್ ಒಂಜಿನೆಡ್ ಏಳ್ಳೇ ಮುಟ್ಟು ಪಾರಪುಸ್ತಕ ಬರೆಯೆರ್. ನೆಟ್ವಾ ಭಾಷೆ, ವಿಜ್ಞಾನ, ಭೂಗೋಳ ವಿಷಯೊಲೆಗ್ ಹೆಚ್ಚ ಒತ್ತು ಕೊರ್ಪೆರ್. ಬರವು ಕಲ್ಪಯರೆ ಸುರು ಮಲ್ಪುನೆ ಅಕ್ಷರೊಡ್ಡತ್ ಶಬ್ದೊಡ್ಡು. ಅರ್ಥದಾಂತಿ ಅಕ್ಷರೊ ಕಲ್ಪರೆ ಜೋಕುಲೆಗ್ ಆಸಕ್ತಿ ಇಜ್ಜಿಂದ್ ಪಂಡಾಡ್ ಈ ಬುಕುಲೆಡ್ ಚಿತ್ರೊ ಬೊಕ್ಕ ಶಬ್ದೊಲೆನ್ ಕೊರ್ಪು ಪಾರ ಸುರು ಮಲ್ತೆರ್. 1935-36ಡ್ 'ಹೂಗನ್ನಡ ಪಾರಮಾಲೆ' ಪನ್ನಿ ಪುದರ್ಡ್ ಒಂಜಿನೆಡ್ ಏಳ್ಳೇ ಮುಟ್ಟು ಪಾರ ಪುಸ್ತಕ ಬರೆಯೆರ್. ಪಿರ 1941ಡ್ ಸಿರಿಗನ್ನಡ ಪಾರಮಾಲೆ ಪನ್ನಿ ಪುದರ್ಡ್ ಒಂಜಿನೆಡ್ ಏಳ್ಳೇ ಮುಟ್ಟು ಪಾರಪುಸ್ತಕ ಬರೆಯೆರ್. ಶಿಕ್ಷಣದ ಬಗ್ಗೆ ಆರ್ ಕೆಲವು ಬುಕುಲೆನ್ ಬರೆತೆರ್. 'ಶಿಕ್ಷಣ ಪದ್ಧತಿ ಸಾರ್ಥಕವಾಗಲು' ಪನ್ನಿ ಬುಕು 1967ಡ್ ಉಡುಪಿಡ್ ಪ್ರಕಟ ಆಂಡ್. ಜೋಕುಲು ಆಟೊ, ಪಾರೊದೊಟ್ಟಿಗೆ ಕೆಲಸೊನ್ನಾ ಕಲ್ಪೊನೊಡು ಪಂಡಾಡ್ ಕೋರಿ ಸಾಂಕಣೆ ಸುರು ಮಲ್ತೆರ್. 'ಕೋಳಿ ಸಾಕಣೆ' (1950) ಒಂಜಿ ಬುಕುಲಾ ಬರೆಯೆರ್. ಜೋಕ್ಲೆಗಾದ್ ಕೆಲವು ಕತೆ, ಕವನಲೆನ್ ಬರೆಯೆರ್. 'ಸಿರಿಗನ್ನಡ ಅರ್ಥಕೋಶ' ಪನ್ನಿ ಒಂಜಿ ಅರ್ಥ ಕೋಶೊ ತಯಾರ್ ಮಲ್ತೆರ್. ಜಿಲ್ಲೆದ ಗುಡ್ಡೆ, ಪರ್ವತ, ಸುದೆ, ಪ್ರಾಣಿ, ಮರಮಟ್ಟು, ಧರ್ಮ, ದೇವಾಲಯ, ವಾಹನ, ವ್ಯಾಪಾರ, ಉದ್ಯೋಗ, ಕೈಗಾರಿಕೆ ಇಂಚ ಮಾತ ವಿಷಯೊಲೆಗ್ ಸಂಬಂಧಪಟ್ಟಾನ ಚಿತ್ರೊಲೆನ್ ದಕ್ಷಿಣ ಭಾರತ ಪೂರಾ ತಿರ್ಗೊದ್ ಸಂಗ್ರಹೊ ಮಲ್ತಾದ್ ಚಿತ್ರಮಯ ದಕ್ಷಿಣ ಹಿಂದೂಸ್ಥಾನ ಪನ್ನಿ ಬುಕು ತಯಾರ್ ಮಲ್ತೆರ್. ಏತ್ ಸಾಧನೆ ಮಲ್ತಂಡಲಾ ಅವು ಪ್ರಯೋಜನೊಗು ಬೂರ್ಜಿ.

## ನಾಟಕೊದ ಮಲ್ತ್

ಎಲ್ಯೆಡ್ಲಿಂಚಿ ಕಾರಂತೆರೆಗ್ ನಾಟಕೊದ ಮಲ್ತ್. ಬಾಲ್ಯೊಡು ಆರ್ ಕಂಪೆನಿ ನಾಟಕೊಲೆನೇ ಹೆಚ್ಚ ತೂವೊಂದಿತ್ತೆರ್. ಅಂಚನೆ ನಾಟಕ ಬರೆಯೆರ್. 'ಸೇವಾಸದನ', 'ಸುಖವೆಲ್ಲಿ?', 'ಹೊಣೆ ಯಾರು?' ಉಂದು ಪೂರಾ ಆರ್ ಬರೆಯಿನ ಸುರುತ ನಾಟಕೊಲು. ಜೋಕ್ಲೆಗಾದ್ 'ಗೆದ್ದವರ ಸತ್ಯ', 'ಅಜ್ಜಿಮಾಣಿ', 'ಮಂಗನ ಮದುವೆ' ಇಂಚ ಕೆಲವು ನಾಟಕೊ ಬರೆಯೆರ್. ಎಲ್ಯೆ ಉಪ್ಪುನಗ ಆರ್ ತೂವೊಂದಿತ್ತಿ ನಾಟಕದ ದೃಶ್ಯವಳಿ ಆರೆಗ್ ಬಾರಿ ಸೋಕು ತೋಜೆದಾಂಡ್. ಕಂಪೆನಿ ನಾಟಕೊಲೆಡ್ ತತ್ತ್ವ ಪ್ರತಿಪಾದನೆ ಇತ್ತ್ಂಡ್. ಎಡ್ಡೆ ತತ್ತ್ವ - ನೀತಿಲೆನ್ ಉದಾತ್ತೀಕರಣ ಮಲ್ಪುನೆ, ಹಾಳಾನ್ ದೂರೊ ನೂಕುನೆ ಉಂದುವೇ ನಾಟಕೊದ ಉದ್ದೇಶೊ ಆದಿತ್ತ್ಂಡ್. ಮಲ್ತೆ ಆಯಿ ಬೊಕ್ಕ ಕಾರಂತೆರೆಗ್ ನೆಟ್ವಾ ಬದಲಾವಣೆ ಆವೊಡುಂದು ತೋಜಿಂಡ್. ಆರ್ ಭಾಸನ ನಾಟಕೊಲೆನ್ ಓದ್ಪೆರ್. ಇಂಗ್ಲಿಷ್ ನಾಟಕೊಲೆನ್ ಓದ್ಪೆರ್. ಚೀನೀ ನಾಟಕೊಲೆನ್ ಇಂಗ್ಲಿಷ್ ತರ್ಜುಮೆಡ್



ಓದ್ಯೆರ್. ಮುಂಬಯಿಗ್ ಪೋದು ಮರಾರಿ ನಾಟಕೋಲೆನ್ ತೂಯೆರ್. ಮರಾರಿ ನಾಟಕೋಲು ಆರೆಗ್ ಬಾರಿ ಇಷ್ಟ ಆಂಡ್. 'ಎಕ್‌ಚಾ ಪ್ಯಾಲಾ' ಪನ್ನಿ ನಾಟಕೋನು ಆರೆನ ಬುಡೆದಿ ಲೀಲಾ ಕಾರಂತೆರ್ ಕನ್ನಡೊಗು ತರ್ಜುಮೆ ಮಲ್ತ್ ಕೊರ್ಯೆರ್.

ನಾಟಕೊಡು ಭಾವಾತಿರೇಕ ಬೊಡ್ವಿಂಡ್ ಆರೆಗ್ ಬೊಕ್ಕ ತೋಜಿಂಡ್. ಭಾವಾತಿರೇಕತೆ ಭಾವನೆಡ್ ಅಭಿನಯೊಡು ತೋಜಿದ್ ಬರೊಡು. ಪಾತೆರೊಡತ್ತ್ಂಡ್ ಆರ್ ಬೊಕ್ಕ ಅರ್ಥ ಮಲ್ತೊಂಡೆರ್. ನೆನ್ನ್ ಪ್ರತಿಪಾದನೆ ಮಲ್ಪುರೆಗಾದ್ ಆರ್ ಗೀತ ನಾಟಕೋಲೆನ್ ಬರೆದ್ ಗೊಬ್ಬಯರೆ ಸುರು ಮಲ್ತೆರ್. ರಕ್ತ ಕಾಣಿಕೆ, ದೇವ - ದೇಹಿ, ಹಿರಿಯ ದೇವರು ಇಂಚ ಸುರು ಮಲ್ತಿನಾರ್ ದಿಂಜ ಗೀತ ನಾಟಕೋಲೆನ್ ಬರೆಯೆರ್. ಶೇಕ್ಸ್‌ಪಿಯರನ 'ಹೇಮ್ಲೆಟ್' ನಾಟಕೋನು ಕನ್ನಡೊಡು ಬರೆಯೆರ್. ನಾಟಕ ತೂಪಿನ, ಕೇನುನ, ಮಿಶಿ ಪಡೆವುನ ಒಂಜಿ ಕಲಾ ಮಾಧ್ಯಮ. ಅಂಚಾದ್ ಅಯಿಟ್ ಸಂಗೀತ, ಅಭಿನಯ, ಸಾಹಿತ್ಯ ಮೂಜಿಲಾ ಮುಖ್ಯ ಆದುವೊಡು ಪಂಡೆರ್. ಕನ್ನಡೊದ ಗೀತನಾಟಕೋಲೆಗ್ ಕಾರಂತೆರ್ ಆಚಾರ್ಯ ಪುರುಷರಾಯೆರ್. ಪೌರಾಣಿಕ, ಚಾರಿತ್ರಿಕ, ಜಾನಪದ ಗೀತ ನಾಟಕೋಲೆನ್ ಬರೆಯೆರ್. ಕಾರಂತೆರ್ ನಿರೆಲ್ ನಾಟಕೊಂದು ನಾಟಕೊದ ಉಲಯಿಡ್ಲೊಂಜಿ ಪ್ರಯೋಗ ಮಲ್ತೆರ್. ನೆಟ್ವಾ ನಾಟಕೊದ ಪಾತ್ರಧಾರಿಲು ಪ್ರತ್ಯಕ್ಷೊಗು ತೋಜುಜೆರ್. ಪರದೆಡ್ ಅಕುಲೆ ನಿರೆಲ್ ಮಾತ್ರ ತೋಜುಂಡು. 'ಗರ್ಭಗುಡಿ', 'ಬಿತ್ತಿದ ಬೆಳೆ', 'ಮಂಗಳಾರತಿ' ಇಂಚಿನ ಸಾಮಾಜಿಕ ನಾಟಕೋಲೆನ್ ಅಯಿಕಾದ್ ತಯಾರ್ ಮಲ್ತೆರ್. ರಗಳೆ ಛಂದಸ್ಸೆಡ್ ಗೀತನಾಟಕ ಬರೆಯೆರ್. ವ್ಯಂಗ್ಯ ನಾಟಕೋಲೆನ್ ಬರೆಯೆರ್. 'ನಿಮ್ಮ ಓಟು ಯಾರಿಗ್', 'ಬದುಕಬಹುದು', 'ಗೆದ್ದವರ ಸತ್ಯ' ಉಂದು ಪೂರಾ ವ್ಯಂಗ್ಯ ನಾಟಕೋಲು. ಕನ್ನಡ ನಾಟಕೊದ ಕಳಕ್ ಪೊಸ ಮರ್ಗಿಲ್ ತೋಜಾಯಿನಾರ್ ಕಾರಂತೆರ್.

ಕನ್ನಡ ನಾಟಕ ಪ್ರಪಂಚೊಗು ಕಾರಂತೆರ್ ಸಂದಾಯಿನ ಸೇವೆ ಮಲ್ತವು. ಗೀತಾ ನಾಟಕೋಲೆನ ಕನ್ನಡೊಡು ಸುರು ಮಲ್ತಿನಿ ಆರ್‌ಂದ್ ಪನೊಲಿ. ಗೀತ ನಾಟಕ ಬರೆನಗ ಬಾರಿ ಜಾಗ್ರತೆ ಬೋಡಾಪುಂಡು. ಅಯಿಟ್ ಬರೆಪುನ ಪದೊ, ಅಯಿನ್ ಪನ್ನಗ ತೋಜವುನ ಅಭಿನಯ, ಭಾವೊ ಅಯಿಕ್ ಜೋಡಣೆಯಾಪುನ ರಾಗೊ, ಬೋಡಿತ್ತಿನವುಲು ಹಿಮ್ಮೇಳ - ಉಂದೆನ್ ಮಾತ ಅಭ್ಯಾಸ ಮಲ್ತೊಂದೇ ಗೀತನಾಟಕ ಬರೆವೊಡಾಪುಂಡು. ಇಜ್ಜಿಂದಾಂಡ ಅವು ತೂಪಿನಕುಲೆ ಮಿತ್ತ್ ದಾಲ ಪರಿಣಾಮ ಮಲ್ಪುಜಿ. ಕಾರಂತೆರ್ ಗೀತನಾಟಕ ಬರೆನಗ ನೆನ್ನ್ ಮಾತ ಆಲೋಚನೆ ಮಲ್ತೊಂದೇ ಬರೆವೊಂದಿತ್ತೆರ್.

ಗೀತ ನಾಟಕೊಡು ದೆತೊನುನ ಕತೆಲಾ ಮುಖ್ಯ ಆದುವುಂಡು. ಅವು ಪುರಾಣೊದ ಅತ್ತಂಡ ಜನಪದ ಕತೆ ಆಂಡ ಎಡ್ಲೆ. ಅತ್ತಂಡ ಸುತ್ತು ಮುತ್ತಡ್ ನಡಪುನ ಸಂಗತಿ ಯಾಂಡಲಾ ತೂಪಿನಕುಲೆಗ್ ಅರ್ಥ ಆಪುಂಡು. ಈ ದೃಷ್ಟಿ ದೀವೊಂದೇ ಆರ್ 'ಲವಕುಶ'

‘ಸಾವಿತ್ರಿ-ಸತ್ಯವಾನ್’, ‘ಕಿಸಾಗೌತಮಿ’, ‘ಬುದ್ಧೋದಯ’ ಇಂಚಿನ ಪೌರಾಣಿಕ - ಚಾರಿತ್ರಿಕ ನಾಟಕ ಬರೆಯಿರ್. 1961ಡ್ ಆರೆನ ಮಲ್ಲ ಮಗೆ ಹರ್ಷ ತೀರ್ ಪೋನಗ ಆರೆಗಾಯಿನ ಬೇಜಾರ್ ಆರೆನ ಉಡಲ್ ದಿಂಜ ಸಮಯ ಒರಿದಿತ್ತಂಡ್. ಅಪಗ ಆರ್ ಬುದ್ಧಲೆಕ ಮನಸ್‌ನ್ ಹಿಡಿತೊಡು ದೀವೊಂದು ಕುಲ್ದಿತ್ತೆರ್. ಅಪಗದ ಆರೆನ ಮನಸ್‌ದ ತೃಪ್ತಿಗಾದೇ ‘ಕಿಸಾಗೌತಮಿ’ ನಾಟಕ ಬರೆಯಿಲೆಕ ತೋಜುಂಡು.

‘ಬದುಕಬಹುದು’, ‘ಸುಲಿಗೆಗೆ ಇಲ್ಲ ಸಾವು’, ‘ಯಾರೋ ಬಂದರು’, ‘ಸೋಮಿಯ ಸೌಭಾಗ್ಯ’ ಉಂದು ಪೂರಾ ಸಾಮಾಜಿಕ ನಾಟಕೊಲು. ಅಯಿಟ್ ಸೋಮಿನ ಸೌಭಾಗ್ಯ ಪೂರ್ತಿ ತುಳು ದಾಟಿದವು. ಅಯಿತ ಕತೆ ಮಾತ್ರ ಅತ್ ಪದೊಕುಲು ಕೂಡಾ ತುಳು ಪಾಡ್ಲನೊದ ಶೈಲಿಡ್ ಮುಡೆಯಿನವು. ಚನಿಯನ್ ಮೆಚ್ಚಿನ ಸೋಮಿ ಐತ್ತನ್ ಮದಿಮೆ ಆದ್ ಕೊರಗೊಂದು ಪುವಳ್. ಜೂವೊನೇ ದೆತ್ತೊನ್ನೆ ಎನ್ನೊಂದಿತ್ತಿ ಆಳ್ ಪೆದ್ದಾದ್ ಸಯಿಪಲ್. ಸಯಿಪಿ ಪೂರ್ತುಗು ಆಳ್ ಬಾಲೆನ್ ಐತ್ತಗ್ ಒಪ್ಪನಗ ಆಳೆಗ್ ಚನಿಯನ ಮಿತ್ತ್ ಇತ್ತಿ ಇನೆಮೋಕೆನ್ ಬಾಯಿ ಬುಡ್ಡು ಪನ್ನಳ್. ಅಯಿನ್ ಕೇಂಡಿನ ಚನಿಯೆಲಾ ಉಡಲ್‌ದರಿದ್ ಸಯಿಪೆ. ಈ ನಾಟಕೊನು ಕುದ್ಯಾಡಿ ವಿಶ್ವನಾಥ ರೈಕುಲು ತುಳುಕು ತರ್ಜುಮೆ ಮಲ್ತಾದ್ ‘ತುಳ್ಳೆಲ್-ಚುಲ್ಲೆಲ್’ಂದ್ ಪುದರ್ ದೀದ್ ಇತ್ತೆ ಗೊಬ್ಬವೊಂದುಲ್ಲೆರ್. ದುಡಿ ಅತ್ಂಡ ತೆಂಬರೆದ ಹಿಮ್ಮೇಳೊಡು ಬಾರಿ ಸೋಕುಡು ನಾಟಕ ನಡಪುಂಡು. ನಡತ್ ಪೋಪಿನವೇ ತೂಪಿನಕುಲೆಗ್ ಗೊತ್ತಾಪುಜಿ.

‘ಋತುಯಾತ್ರ’ ಋತು ಬದಲಾವಣೆದ ಒಂಜಿ ಚಿತ್ರಣ. ಮುಕ್ತದ್ವಾರ ನಾಟಕೊ ರಂಗಸ್ಥಳೊಟು ಸೈ ಸೈ ಪನ್ನಯಿನ ನಾಟಕೊ. ನಲಿಕೆ-ಸಂಗೀತೊ ರಡ್ಡೆನ್ನಾ ಜೊತೆ ಸೇರದ್ ಈ ನಾಟಕ ರಂಗಸ್ಥಳೊಟು ಪ್ರದರ್ಶನ ಆನಗ ಯುಗ ಮಗ್ಗರ್ವೇ ಗೊತ್ತಾಪುಜಿ. ಉಂದು ಒಂಜಿ ಕಲಾ ಸಿದ್ಧಿ. ಇಂಚಿನ ನೃತ್ಯ ರೂಪಕ ಕನ್ನಡೊಡು ಬೇತೆ ಬತ್ತಿನ್ನೇ ಕಡಿಮೆ.

## ದಸರಾ

1926ಡ್ ಕಾರಂತೆರ್ ಊರು ತಿರ್ಗರೆ ಸುರು ಮಲ್ತಾದಿತ್ತೆರ್. ಆರ್ ಊರು ತಿರ್ಗನಗ ಕರ್ನಾಟಕೊದ ವಾ ವಾ ಊರುಡು ಎಂಚಿನೆಂಚಿನ ಪ್ರಾಕೃತಿಕ ವಿಶೇಷತೆಲು ಉಲ್ಲೊನೋ ಐನ್ ತೂಯಿರ್. ಆತ್ ಮಾತ್ರ ಅತ್ ಸಾಂಸ್ಕೃತಿಕ ವಿಶೇಷತೆಲು ಎಂಚಿನ ಉಲ್ಲೊಂದ್ಲಾ ತೂಪೆದರ್. ಇಂಚ ಮಾತ ಕೋಡಿಡ್ಲಾ ತೂದು ಬತ್ತಾದ್ ಪುತ್ತೂರುಡು ದಸರಾ ಉತ್ಸವೊನು ನಡಪಯರೆ ಸುರು ಮಲ್ತೆರ್. ಕಾರಂತೆರೆ ಲೆಕ್ಕೊಡು ದಸರಾ ಪಂಡ ದೇವಿನ ಪೂಜೆ ಅತ್. ಅವು ನಾಡಹಬ್ಬ. ಸಾಹಿತ್ಯ, ಕಲೆ, ಸಂಸ್ಕೃತಿದ ವಿಚಾರೊಲೆನ್ ತೋಜವುನ, ಪ್ರಚಾರ ಮಲ್ಪುನ ಒಂಜಿ ಪರ್ಯಾಯ. ಈ ಸಂದರ್ಭೊಡು ಆರ್ ಕರ್ನಾಟಕೊದ ಬೇತೆ ಬೇತೆ ಕೋಡಿಡ್ಲಾ



ಸಾಹಿತಿ, ಕಲಾವಿದರೆನ್ ಲೆಪ್ಪುಡ್ಡು ಉಪನ್ಯಾಸ ಕೊರ್ಪಯಿರ್. ಸಾಹಿತ್ಯ, ಸಂಗೀತ, ಕಲೆ, ರಾಜಕೀಯ, ವಿಜ್ಞಾನ, ಧರ್ಮ - ಇಂಚ ಪ್ರತಿಯೊಂಜಿ ವಿಷಯೊಡ್ಲಾ ದಿನೋಲ ಬಯ್ಯದ ಪೊರ್ತುಗು ಭಾಷಣ, ಕಾಂಡೆದ ಪೊರ್ತುಗು ದಿನೋಲ ಪಂತೊದ ಗೊಬ್ಬುಲು, ಬಯ್ಯಗ್ ಕಸರತ್ತ, ತಾಲೀಮು, ನಾಟಕೊಲು ಇಂಚ 1931ಡ್ ಸುರು ಮಲ್ತಿನ ಈ ದಸರಾ ಉತ್ಸವ 12 ವರ್ಸೊ ಮುಟ್ಟು ನಡತ್ಂಡ್. ಪ್ರತಿ ವರ್ಸೊ ವರ್ಸೊಗು 10 ದಿನೊತ ಲೇಸ್ ನಡಪೆದ್ಂಡ್. ದಸರಾ ಉತ್ಸವೊದ ಕಾರಣೊಡ್ಲಾವರೊ ಕರ್ನಾಟಕದೊ ಮಾತ ಮಲ್ಲ ಮಲ್ಲ ಸಾಹಿತಿನಕುಲೆಗ್ ಪುತ್ನುರ್ ಪೊಲಬಾಂಡ್. ಪುತ್ನುರು ಕರ್ನಾಟಕೊದ ಒಂಜಿ ಸಾಹಿತ್ಯ ಕೇಂದ್ರ ಆಂಡ್.

ಒರ ದಸರಾ ಕಾರ್ಯಕ್ರಮೊಗು ಬರೊಡುಂದು ಕನ್ನಡೊದ ಕಣ್ಣೆ ಪನ್ನಿ ಬಿರ್ದ್ ಪಡೆಯಿನ ಆಚಾರ್ಯ ಪುರುಷ ಬಿ.ಎಂ. ಶ್ರೀಕಂಠಯ್ಯರೆನ್ ಲೆಪ್ಪುನಗ ಆರ್ ಪುತ್ನುರುಡು ಆಪಿನ ಸಾಹಿತ್ಯೊದ ಬುಳೆಚಿಲ್ಗ್ ಕುಶಿ ಪಡೆದ್ “ಪುತ್ನುರು ಕನ್ನಡೊದ ಸೇವಕೆರೆನ್ ಉದ್ಯ ಬೆಂದಿನ ಊರಾದ್ ಕನ್ನಡೊದ ಬುಳೆಚಿಲ್ಗ್ ಪುಣೆವುನ ಸಂತೋಸುದ ಸಂಗತಿ. ಅಂಚಾದ್ ಆ ಪುಣ್ಯಕ್ಷೇತ್ರೊನ್ನಾ ತೂಯರೆಗೆಂಕ್ ಬಾರಿ ದಿನೊಡ್ಲಾ ಆಸೆ ಆವೊಂದುಂಡು” ಪಂಡ್‌ದ್ ಸಾಹಿತಿ ಬಿ.ಎನ್. ಲಕ್ಷ್ಮಣ ಪೈಕುಲೆಗ್ ಕಾಕಜಿ ಬರೆಯಿರ್ಗೆ. ಪುತ್ನುರುನು ಸಾಹಿತಿಲೆನ ನೆಲೆ ಆದ್ ಮಲ್ತಿನಾರ್ ಕಾರಂತೆರ್. ಮೊಳಹಳ್ಳಿ ಶಿವರಾಯೆರ್ ಕಾರಂತೆರೆಗ್ ದಸರಾ ಉತ್ಸವೊಗು ಬೆರಿಸಾಯೊ ಕೊರೊಂದಿತ್ತೆರ್. ಪದ್ರಾಡ್ ಒರ್ಸ ನಡತಿನ ದಸರಾ ತಕ್ಷಣೊ ಉಂತುದೇ ಪೊಂಡು. ದಸರಾ ಸಮಿತಿದ ಸದಸ್ಯೆರ್ ಕುಲೆ ಉಳ ಜಗಲೊನೇ ನೆಕ್ ಕಾರಣೊ. ಕಾರಂತೆರೆಗ್ ಬಾರಿ ಬೇಜಾರ್ ಆಂಡ್.

## ಸಂಸಾರೊ

ಕಾರಂತೆರ್ ಮದಿಮೆ ಆಯಿ ಬೊಕ್ಕ ಪುತ್ನುರುದ ಬಾಲವನೊಟು ಬತ್ತದ್ ಇಲ್ಲ್ ಕಟ್ಟದ್ ಕುಲೈರ್. ಈ ಬಾಲವನೊಟು ಆರ್ ಸುಮಾರ್ 40 ವರ್ಸೊ ಕಾಲ ಕಳೆಯಿರ್. ಸಾಹಿತ್ಯ ಸೇವೆ, ಕಲಾ ಸೇವೆ, ಸಮಾಜ ಸೇವೆ ಉಂದು ಮಾತ ಆರ್ ಬಾಲವನೊಟಿತ್ತೊಂದು ನಡಪದ್ ಕೊರೈರ್. ಅಪಗ ಆರೆಗ್ ದುಡ್ಡು ದ ಮಲ್ಲ ಬಂಜ ಇತ್ಂಡ್. ಆರ್ ಇಲ್ಲ್ ಬುಡುದಿತ್ತೆರ್. ಅಂಚಾದ್ ಪಿತ್ರಾರ್ಜಿತ ಆಸ್ತಿದ ಸಂಪೊತ್ತುಗು ಆರ್ ಬಯಕ್‌ಜೆರ್. ಪುತ್ನುರುಡು ಆರೆಗ್ ಮೊಳಹಳ್ಳಿ ಶಿವರಾಯೆರ್ ರಂಚಿನ ಧೀಮಂತ ವ್ಯಕ್ತಿಲೆನ ಬೆರಿಸಾಯೊ ತಿಕ್ಕಂಡ್.

ಒಂಜಿ ಕಡೆಟ್ ಸಂಪಾದನೆ ಇಜ್ಜಿ. ಕುಡೊಂಜಿ ಕಡೆಟ್ ಬೊಡೆದಿ ಕೋಡಿದ ಬಂಜ. ಆರೆನ ಬುಡೆದಿ ಲೀಲಮ್ಮಗ್ ಒರ್ತಿ ಅಕ್ಕ, ಮೂಜಿ ಜನ ತಂಗಡಿಯಲ್ಲ. ಮೂಜಿ ಜನ

ತಂಗಡಿಯಲ್ಲುಲಾ ಪುತ್ನೂರುಡೇ ಬತ್ತಾದಿತ್ತೆರ್. ಅಕುಲೆಗ್ ಮದಿಮೆ ಮಲ್ತ್ ಕೊರ್ಪಿನ ಜವಾಬ್ದಾರಿ ಕಾರಂತೆರೆ ಮಿತ್ ಬೂರ್ಂಡ್. ಪುತ್ನೂರುಡುಪ್ಪುನಗ ಕಾರಂತೆರೆನಾಡೆ ಬತ್ತ ಪೋಪಿನ ಜನೊಕುಲೆಗ್ ದಾಲ ಕಮ್ಮಿ ಇಜ್ಯಾಂಡ್. ಬತ್ತ ಪೋಪಿನಕುಲೆಗ್ ಉನಸ್, ಬಾಜೆಲ್ ಕೊರ್ಪಿನವು ಕಾರಂತೆರೆನ ಒಂಜಿ ಮಲ್ಲ ಗುಣೊ. ಆರ್ ಸಿಡುಕು ಸ್ವಭಾವದಾರ್. ನಿಷ್ಕರವಾದಿ, ಮುಂಗೋಪಿ ಪನ್ನಿ ವಿಚಾರ ಮಾತೆರೆಗ್ಲಾ ತೆರಿವು. ಮೇಲ್ವೈಡ್ ಆ ಸೊಬಾವೊ ಕಾರಂತೆರೆಗ್ ಇತ್ತಂಡಲಾ ಉಳಮೈ ಬಾರಿ ಮೆದುವಾದಿತ್ತಂಡ್. ಶ್ರೀಮಂತೆ ಬಡವೆ ಪನ್ನಿ ಭೇದೊ ಇಜ್ಯಾಂಡ್. ಸೋತಿನಕುಲೆ ಮಿತ್ ಕನಿಕರೊ ಇತ್ತಂಡ್. ಜೋಕುಲೆನ ಮಿತ್ ಮೋಕೆ ಇತ್ತಂಡ್. ಆರ್ ಮಲ್ಲ ಧರ್ಮಿಷ್ಟೆ ಆದಿತ್ತೆರ್.

ಲೀಲಾ ಕಾರಂತೆರ್ ಕಂಡನ್ಯನ ದಾನ ಗುಣೊಕು ಸರಿಯಾಯಿನ ಬುಡದಿ ಆದಿತ್ತೆರ್. ಬತ್ತಿನಕುಲೆನ್ ಸತ್ಕಾರ ಮಲ್ಪುನ ಮಲ್ಲ ಗುಣ ಆರೆನ. ಅಯಿಟ್ ಆರೆಗ್ ಸಂತೋಸೇ ಆಪೆದ್ಂಡ್. ಅತ್ತಂದೆ ಬೇಜಾರೊ ಆಪೆದಿಜಿ. ಕಾರಂತೆರೇ ಒರ ಒರೊ ಪುರ್ಸೊತ್ತು ಉಪ್ಪುನಗ ಬೊಡೆದಿಗ್ ಅಟಿಲ್ ಮಲ್ಪುರೆ ಕೂಡೆದರ್. ಕಾರಂತೆರ್ ಅಡಿಗಡ್ಲಾ ನಿಪುಣೆ ಆದಿತ್ತೆರ್. ವಾ ಕೆಲಸ ಕಲ್ಪುನೆಡ್ಲಾಲಾ ದುಂಬು ಆಂಜೆನಕುಲು ಅಡಿಗಡೆ ಕೆಲಸೊ ಕಲ್ಪೊನೊಡು ಪನ್ನೆದರ್. ಕಾರಂತೆರ್ ಒಂಜಿ ಸಾರ್ ಮಲ್ತೆರ್ಂದಾಂಡ ಅವು ಗಮಗಮ ಕಮ್ಮೆನೊ. ಆ ಸಾರ್ ಕಮ್ಮೆನೊಡೇ ಒಂಜಿ ಸೇರರಿತ ಉನುಪು ಉಣೊಲಿಂದ್ ಉಂಡಿನಕುಲು ಪನ್ನೆದರ್. ಲೀಲಮ್ಮ ಉದಾರ ಮನಸ್ಸಾದ ಪೊಂಜೊವು. ಕಪಟ ಪನ್ನಿ ಶಬ್ದೊನೇ ಆರೆಗ್ ತೆರಿಯಂದ್. ಒರಿ ಬತ್ತದ್ ಬುಲಿತ್ದ್ ಎಂಕ್ ದಾಲ ಇಜ್ಜಿ ಕೊರ್ಲೆ ಪಂಡ ತಾನ್ ತುತ್ತುದಿನ ಕುಂಟುನು, ಕೈಟಿತ್ತಿ ಉನುಪುನು ಕೊರ್ಪಿನ ನರಮಾನ್ನಿ ಆರ್. ಪಾಪೊದಕುಲು ಪಂಡ ಆರೆಗ್ ಬಾರಿ ಮೋಕೆ. ಕಾರಂತೆರೊಟ್ಟಿಗೆ ನೃತ್ಯಗಾರ್ತಿಯಾದ್ ಬತ್ತಿನ ಆರ್ ಬುಡದಿಯಾದ್, ನಾಟಕಗಾರ್ತಿಯಾದ್, ಜೋಕ್ಲೆಗ್ ಪಾಠ ಪಂಡ್ಕೊರ್ಪಿನ ಟೀಚರ್ ಆದ್ ಸಾಹಿತಿಯಾದ್ ಎಡ್ಡೆ ಪೊರ್ಲುಡು ಕಾರಂತೆರೊಟ್ಟಿಗೆ ಜೀವನ ನಿರ್ವಹಣೆ ಮಲ್ತೆರ್.

ಕಾರಂತೆರೆಗ್ ನಾಲ್ ಜೋಕುಲು. ಮಲ್ಲ ಮಗೆ ಹರ್ಷ. ಆಯಡ ಅಪ್ಪೆ - ಅಮ್ಮಗ್ ಬಾರಿ ಮೋಕೆ ಇತ್ತಂಡ್. ಆಯನ ಪುದರ್ಲೇ ಕಾರಂತೆರ್ ಹರ್ಷ ಪ್ರಕಟಣಾಲಯ, ಹರ್ಷ ಮುದ್ರಣಾಲಯ ಪನ್ನಿ ಸಂಸ್ಥೆಲೆನ್ ಸ್ಥಾಪನೆ ಮಲ್ತೆರ್. ಕಾರಂತೆರೆಗ್ ತೆರಿಯಂದಿ ಕೆಲಸೊ ಇಜ್ಜಿ. ಮರತ ಕೆಲಸೊಡ್ಲ ಬತ್ತಿನ ಮುದ್ರಣೊದ ಕೆಲಸೊ ಮುಟ್ಟು ಮಾತಲ ಆರೆಗ್ ತೆರಿದಿತ್ತಂಡ್. ಹರ್ಷಗ್ ಕ್ಯಾನ್ಸರ್ ರೋಗೊ ಸುರು ಆಂಡ್. ಅಯಿನ್ ಗುಣ ಮಲ್ಪುರೆ ಬೋಡಾದ್ ಬೊಂಬಾಯಿ ಮುಟ್ಟು ಕೊಂಡೊದು ಪೋಯೆರ್. ಆಂಡ ವಾ ಮರ್ದೊಡ್ಲಾ ಆಯನ್ ಒರಿಪಯರೆ ಆಯಿಜಿ. 1938ಡ್ ಪುಟ್ಟಿನ ಹರ್ಷ 1961ಡ್ ತೀರ್ತ್ ಪೋಯೆ.



ಕಾರಂತೆರೆನ ಮಲ್ಲ ಮಗಳ್ ಮಾಲವಿಕಾ. ಕಲ್ತಾದ್ ಮನಃಶಾಸ್ತ್ರ ಸ್ನಾತಕೋತ್ತರ ಪದವೀಧರೆ ಆಯೆರ್. ಮನಃಶಾಸ್ತ್ರಜ್ಞೆಯಾಯಿನ ಒರಿ ಪಂಜಾಬಿ ಆಣನ್ 1965ಡ್ ಅಮೃತಸರೋಟು ಮದಿಮೆ ಆದ್ ಮಾಲವಿಕಾ ಕಪೂರ್ ಆಯೆರ್. ಬೊಕ್ಕ ಮಗೆ ಉಲ್ಲಾಸ್ ಕಾರಂತೆರ್ ಇಂಜಿನಿಯರಿಂಗ್ ಕಲ್ತೆರ್. ಪ್ರಾಣಿಲೆನ ಮಿತ್ತ್ ಸಂಶೋಧನೆ ಮಲ್ತಾದ್ ಪುದರ್ ಪಡೆಯಿನ ಪ್ರಾಣಿಶಾಸ್ತ್ರಜ್ಞ ಆದ್ ಅಯಿಟೇ ಡಾಕ್ಟರೇಟ್ ಪಡೆತೆರ್. ಆರೆಗ್ ಪಕ್ಕಿ - ಮುರ್ಗೊಲೆನ ಬಗ್ಗೆ ದಿಂಜ ಆಸಕ್ತಿ. ಪೆರಿಯಾಪಟ್ಟಣೊಡು ನೆಲೆಯಾದ್ ಪುಗೆರೆದ ಕೃಷಿ ಮಲ್ತೊಂದು ನಾಗರಹೊಳೆ ಅಭಯಾರಣ್ಯೊಡು ಆರ್ ಸಂಶೋಧನೆ ಮಲ್ತೆರ್. ಮಗಳ್ ಕ್ಷಮಾರಾವ್. ನೃತ್ಯಕಲೆ ಅಭ್ಯಾಸ ಮಲ್ತಾದ್ ಪರಿಣತೆ ಪಡೆಯಿನಾರ್. ಕೇಳು ಚರಣ ಮಹಾ ಪಾತ್ರ ಮೆರೆನ ಶಿಷ್ಯೆ ಆದ್ ಒಡಿಸ್ಸಿ ನೃತ್ಯ ಕಲ್ತಿನಾರ್. ಆರೆನ ಮದಿಮೆ ಉಡುಪಿದ ಪದ್ಮನಾಭ ರಾವ್‌ನೊಟ್ಟಿಗೆ ನಡತಾಂಡ್. ಅಕುಲು ಚೆನ್ನೈಡುಲ್ಲೆರ್.

ಕಾರಂತೆರೆನ ಮಗೆ ತೀರ್‌ಪೋಯಿ ಬೊಕ್ಕ ಲೀಲಾ ಕಾರಂತೆರೆಗ್ ಮಾನಸಿಕ ವ್ಯಾಧಿ ಸುರು ಆಂಡ್. ಅಯಿಡ್ ಬೊಕ್ಕ ಆರ್ ಸುದಾರ್ಶನೇ ಆಯಿಚೆರ್. ಅಯಿತ ಒಟ್ಟಿಗೆ ಆರೆಗ್ ಸಕ್ಕರೆ ಕಾಯಿಲೆಲಾ ಸುರು ಆಂಡ್. ದೇವೆರೆನ ಬಗ್ಗೆ ನಂಬಿಕೆನೇದಾಂತಿನ ಆರ್ ನಿಧಾನೊ ಆದ್ ದೇವೆರೆನಂಚಿ ತಿರ್ಗೊರ್. ಪುಟಪರ್ತಿದ ಭಗವಾನ್ ಸತ್ಯಸಾಯಿ ಸ್ವಾಮಿನ್ ದೂರೊಂದಿತ್ತಿನ ಆರ್ ಕಡೆಕ್ ಸ್ವಾಮಿನ ಭಕ್ತಿ ಆಯೆರ್. ಆಡೆಗ್ ಪೋವೊಂದು ಬತ್ತೊಂದು ಇತ್ತೆರ್. ಸ್ವಾಮಿನ ಸಾನಿಧ್ಯೊಡ್ತಾಂಡ ಎಂಕ್ ದುಃಖೊ ಪೂರ ಮದಪ್ಯರೆ ಆಪುಂಡು ಪನ್ನಿ ನಂಬಿಕೆ ಆರೆಗಿತ್ತಾಂಡ್.

“ಸತ್ಯ-ಧರ್ಮ-ಪ್ರೇಮ”ನೆಡ್ಲೇ ಮನಸ್‌ಗ್ ಶಾಂತಿ. ನಮ ಪುಟ್ಟುದಿನಿ ಭೋಗ ಜೀವನೊಗಾದ್ ಅತ್ತ್. ಮಾತೆನ್ನಾ ತೆರಿಯೊಂದು ಪೋಯರೆ. ತ್ಯಾಗೊಡು ಸಂತೋಸು ಉಂಡು. ಏರೆ ಬೆರಿಸಾಯೊ ಇಜ್ಯಂಡಲಾ ಸತ್ಯ-ಧರ್ಮ - ಪ್ರೇಮ ಇತ್ತಾಂಡ ಯಾವು. ಅವು ಪರಮಾತ್ಮನ ದಿವ್ಯ ದೀಕ್ಷೆ. ಎಲೈ - ಮಲ್ಲೆ ಪನ್ನಿ ಬೇದೊ ಪರಮಾತ್ಮಗಿಜ್ಜಿ. ನಮಡ ಪುಣ್ಯೊದ ಗಂಟ್ ಇತ್ತಾಂಡ ಮಾತೆರ್ಲಾ ನಮ್ಮಕುಲೇ. ನಂಕ್ ಏರ್ಲಾ ಇಜ್ಜಿ. ಅಂಚಾದ್ ನಮ್ಮ ಕಷ್ಟ ಸುಖೊಕು ನಮೊನೇ ಕಾರಣ. ಬಿತ್ತನ ಬಿದೆನ್ ಉನ್ನಿನಕುಲು ನಮೊನೇ” ಉಂದು ಲೀಲಾ ಕಾರಂತೆರೆನ ಚಿಂತನೆ. ಆರ್ ಭಗವಾನ್ ಸಾಯಿಬಾಬೆರೆನಾಡೆ ಪೋದು ಬರ್ಯರೆ ಸುರು ಮಲ್ತಿ ಬೊಕ್ಕ “ಸಾಯಿನಾಥೆನೇ ಎನ್ನ ಗುರು. ಇಹ - ಪರ ಪೂರ ಆಯೆನೇ. ಆ ಮಹಾಶಕ್ತಿಗ್ ಯಾನ್ ರುಣಿ. ಆಯನ ಪಾದೊಗೇನ್ ಅಡ್ಡ ಬೂರ್ವೆ. ಎನ್ನ ಭಕ್ತಿಗ್ ಆಯೆ ಒಲಿಯೆಂದಾಂಡ ಎಂಕ್ ಆಯೆ ಮುಕ್ತಿ ತೋಜವಡ್” ಪಂಡ್‌ದ್ ಪಂಡೊದಿತ್ತೆರ್.

ಕಾರಂತೆರ್ ತನ್ನ ಬುಡೆದಿನ್ ಮೋಕೆಡ್ ತೂಯೆರ್. ತಾನ್ ಪ್ರವಾಸೊ ಮಲ್ಪುನಗ

ಏತೋ ಕಡೆಕ್ ಲೆತೊನು ಪೋಯೆರ್. ಬುಡೆದಿ ದೇವರೆ ಭಕ್ತಿ ಆಯಿ ಬೊಕ್ಕಲಾ ಬುಡೆದಿನ ಭಕ್ತಿಗ್ ದಾಲ ವಿರೋಧೊ ಮಲ್ತ್‌ಜೆರ್. “ಆಳೆನ ನಂಬಿಕೆನ್ ಯಾನ್ ಭಂಗ ಮಲ್ಪುಜಿಂದ್” ಪಂಡೊದಿತ್ತೆರ್. ಬುಡೆದಿ ಪುಟಪರ್ತಿಗ್ ಪೋವೊಡುಂದು ಪಂಡಿವೆಟ್ವೆಗ್ ಕಾರ್ ಮಲ್ತ್‌ದ್ ಕಡಪುಡುದು ಕೊರ್ಪೆದೆರ್. ಒರ ಲೀಲಾ ಕಾರಂತೆರ್ ಭಗವಾನ್ ಸಾಯಿಬಾಬೆರೆಡ ತನ್ನ ಕಂಡನ್ಯನ ಬಗ್ಗೆ ಕೇಂಡೆರ್‌ಗೆ. ಅಪಗ ಸ್ವಾಮಿ “ನಿನ್ನ ಕಂಡನ್ಯಗ್ ದೇವರೆನ ಬಗ್ಗೆ ಭಕ್ತಿ ಇಜ್ಜಿಂದ್ ದಾಲ ಪೋಡ್ಯಡ. ಆರ್ ಆರೆನ ಕರ್ತವ್ಯ ಮಲ್ತೊಂದುಲ್ಲೆರ್. ಆರ್ ತನ್ನ ಕರ್ತವ್ಯೊಡು ದೇವರೆನ್ ತೂಪೆರ್. ಪ್ರಕೃತಿಡ್ ತೂಪೆರ್. ಅವ್ವೇ ಆರೆನ ಪೂಜೆ” ಪಂಡೆರ್. ಈ ಪಾತೆರ ಕೇಂಡ್‌ದ್ ಲೀಲಮ್ಮಗ್ ಬಾರಿ ಸಂತೋಸಾಂಡ್. ಲೀಲಾ ಕಾರಂತೆರ್ ಸ್ವತಹ ಕವಿಯಾದ್ ಕೆಲವು ಗೀತೆಲೆನ್ ಬರೆತೆರ್. ಸಾಹಿತ್ಯೊಗು ತನಡ್ವಾಪುನ ಸೇವೆ ಸಂದಾದೆರ್.

ಕಾರಂತೆರ್ ಬಾಲವನೊಟು ಜೋಕುಲೆ ಸಾಲೆ ಮಲ್ತೆರ್. ಪುತ್ತೂರು - ಸುಳ್ಳೆ ತಾಲೂಕು ಇಡೀಕ ಸಂಚಾರ ಮಲ್ತ್‌ದ್ ಜನಸೇವೆ ಮಲ್ತೆರ್. ಜೋಕ್ಕಿಗಾದ್ ತರಬೇತಿ ಶಿಬಿರ ಮಲ್ತೆರ್. ದೇಶ - ವಿದೇಶ ಸಂಚಾರ ಮಲ್ತೆರ್. ಸಿನಿಮಾ ತಯಾರ್ ಮಲ್ತೆರ್. ಪುತ್ತೂರುಡು ದಸರಾ ಮಲ್ಪಯೆರ್. ಏತೋ ಕಾದಂಬರಿ, ನಾಟಕ, ಪಾಠಪುಸ್ತಕ, ವಿಜ್ಞಾನ ಪುಸ್ತಕೊಲೆನ್ ಬರೆಯೆರ್. 1955ಡ್ ಮೈಸೂರುಡು ನಡತಿನ ಅಖಿಲ ಭಾರತ ಕನ್ನಡ ಸಾಹಿತ್ಯ ಸಮ್ಮೇಳನೊದ ಅಧ್ಯಕ್ಷೆ ಆಯೆರ್.

## ವಿಜ್ಞಾನ ಗ್ರಂಥೊಲು

ಕಾರಂತೆರ್ ಸಾಲೆಡ್ ಕಲ್ತ್‌ದ್ ವಿಜ್ಞಾನೊದ ಪದವಿ ಪಡೆಯಿನಾರ್ ಅತ್ತ್. ಆಂಡ ಆರ್ ಮಲ್ತ ಸಂಶೋಧಕೆ. ಪ್ರತಿಯೊಂಜೆನ್ನಾ ಸಂಶೋಧನೆ ಮಲ್ತ್‌ದ್ ಪ್ರಕೃತಿ ವಿಚಿತ್ರೊದ ಗುಟ್ಟುನು ತೆರಿಯೊನ್ನಾರ್. ಆರ್ ಜೋಕ್ಕಿಗಾದ್ ಬರೆಯಿನ ಬಾಲ ಪ್ರಪಂಚ ಬೊಕ್ಕ ವಿಜ್ಞಾನ ಪ್ರಪಂಚ ಗ್ರಂಥೊಲು ಲೋಕ ಪ್ರಸಿದ್ಧಿ ಪಡೆಯಿನ ಗ್ರಂಥೊಲು. ‘ಬಾಲ ಪ್ರಪಂಚ’ ಮೂಜಿ ಸಂಚಿಡ್ 1938ಡ್ ಬುಡುಗಡೆ ಆಂಡ್. ‘ವಿಜ್ಞಾನ ಪ್ರಪಂಚ’ ನಾಲ್ ಸಂಚಿಲೆನ್ 1959ಡ್ 1964 ಮುಟ್ಟು ಪ್ರತಿ ವರ್ಸೊಲಾ ಬೊಲ್ಪುಗು ಪಾಡೊಂದು ಬತ್ತೆರ್. ಈ ಕೆಲಸೊ ಒಂಜಿ ಸರಕಾರ ಅತ್ತ್‌ಂಡ ಒಂಜಿ ಸಂಸ್ಥೆ ಮಲ್ಪೊಡಾಯಿನ ಕೆಲಸೊ. ಉಂದು ಒಪ್ಪೇ ಬಾಸೆಡ್ ತರ್ಜುಮೆ ಮಲ್ತಿನ ಗ್ರಂಥೊಲತ್ತ್. ದೇಶ-ವಿದೇಶ ತಿರ್ಗಾಟೊಡು, ಓಲೆ ಬರವಣಿಗೆಡ್, ಚಿತ್ರ ಮಾಹಿತಿಡ್ ಸಂಗ್ರಹ ಮಲ್ತ್‌ದ್ ನಿರ್ಣಯೊಗು ಬತ್ತಿ ವಿಷಯೊಲೆನ್ ನೆಟ್ವ ದಿಂಜದೆರ್. ಏಕಾಕಿಯಾದ್ ಸಂಗ್ರಹ ಮಲ್ತ್ ಕೊರ್ನ್ ಈ ಬುಕು ವಿಜ್ಞಾನ ಲೋಕೊಗೊಂಜಿ ಮಲ್ತ ಕಾಣಿಕೆ. ಉಂದು ಅತ್ತಂದೆ ಉಷ್ಣವಲಯದ ಆಗ್ನೇಯ



(1983), 'ಪ್ರಾಣಿ ಪ್ರಪಂಚ' (1990), 'ಪ್ರಾಣಿ ಪ್ರಪಂಚದ ವಿಸ್ಮಯಗಳು' (1984), 'ನಮ್ಮ ಭೂಖಂಡಗಳು' (1967), 'ವಿಚಿತ್ರ ಖಗೋಲ' (1965), 'ವಿಶಾಲ ಸಾಗರಗಳು' (1984) ಇಂಚೆ ಕೆಲವು ಬುಕುಲೆನ್ ಬರೆತೆರ್. 1936ಡ್ ಸಾಮಾನ್ಯ ವಿಜ್ಞಾನ ಪನ್ನಿ ಪುದರ್ಡ್ ಬೊಕ್ಕ 'ಗೃಹವಿಜ್ಞಾನ' ಪನ್ನಿ ಪುದರ್ಡ್ ಮೂಜಿ - ಮೂಜಿ ಪಾಠ ಪುಸ್ತಕೊಲೆನ್ ಬರೆಯೆರ್. ಕಾರಂತೆರ್ ಒರಿ ಮಲ್ತ ವಿಜ್ಞಾನಿ. ಪ್ರಕೃತಿಯೇ ಆರೆನ ಪ್ರಯೋಗಶಾಲೆ.

## ಯಕ್ಷಗಾನ

ಶಿವರಾಮ ಕಾರಂತೆರ್ ಯಕ್ಷಗಾನ ಪುನಃರುತ್ಥಾನೊದ ಕುಲಗುರು. ಸುಮಾರು ಐವ ವರ್ಷೊ ಮುಟ್ಟು ಯಕ್ಷಗಾನೊದ ಕಳೆಟ್ ಬೆಂದ್‌ದ್ ಯಕ್ಷಗಾನೊಗು ಒಂಜಿ ಪೊಸ ಒರು ಕನತಿನಾರ್. ಕಾರಂತೆರ್ ನಾಟಕೊದ ಕಳೆಡ್ ಯಕ್ಷಗಾನೊದಂಚಿ ತಿರ್ಗ್ಗೆ 1935ಡ್ ಬೊಕ್ಕ. ಎಲೈಪ್ಪುನಗನೇ ಆರೆಗ್ ನಾಟಕೊದ ಮರ್ಲ್‌ದೊಟ್ಟಿಗೆ ಯಕ್ಷಗಾನೊದ ಮರ್ಲ್‌ಲಾ ಇತ್ತ್ಂಡ್. ಆಂಡ ಆರ್ ಯಕ್ಷಗಾನೊ ಕಲೆತ ಉಳಯಿ ಪೊಗ್ಗುದು ತೂದಿತ್ತಿಜೆರ್. ಡಾ. ಆರ್ನಾಲ್ಡ್ ಬಾಕೆ ಭಾರತೊಗು ಬತ್ತ್‌ದ್ 1934ಡ್ 1936 ಮುಟ್ಟು ಮುಲ್ಪದ ರಂಗ ಸಂಪ್ರದಾಯೊದ ಚಿತ್ರೀಕರಣ ಮಲ್ತೆರ್. ಆರೆನ ಒಟ್ಟಿಗೆ ಆಟ ತೂಯರೆ ಪೋಯಿನ ಕಾರಂತೆರೆಗ್ ಅಪಗದ ಆಟ ತೂದು ತರೆಕ್ ಹಾಕಿಲೆಕ ಆಂಡ್. ಆ ಅನುಭವೊನು ಕಾರಂತೆರ್ ಇಂಚ ಬರೆತೆರ್. "ಬಾಕೆ ಆರೆನ ಉತ್ತೇಜನೊಡು ಯಾನ್ ಯಕ್ಷಗಾನ ಪ್ರಸಂಗೊಲೆನ ಧಾಟಿದ ಬಗ್ಗೆ ಹೆಚ್ಚಿಗೆ ಆಸಕ್ತಿ ತೊಜವೊಡಾಂಡ್. ಯಕ್ಷಗಾನೊದ ದುಸ್ತೆತೊದ ಪೊಟೋ ಸಂಗ್ರಹ ಮಲ್ತೆ. ಆ ಪೂರ್ತುಗೇ ನಮ್ಮೂರ್ ಯಕ್ಷಗಾನೊಡು ನಾಟಕೊದ ವೇಸೊ ಸೇರ್ಪ್ ಪೋದಿತ್ತ್ಂಡ್. ನಾಟಕೊದ ವೇಸೊ ಪಾಡ್ ಅಕುಲು ಆಟೊದ ನಲಿಕೆ ಮದತ್‌ದಿತ್ತೆರ್. 1938ಡ್ ಯಾನ್ ಎನ್ನ ಸಾಹಿತಿ ಇಷ್ಟೆರಾಯಿನ ದ.ರಾ. ಬೇಂದ್ರೆನ್ಲಾ ಹಿರಿಯೆರಾಯಿನ ಮಾಸ್ತಿದಾರೆನ್ಲಾ ಬಾರ್ಕೂರುಗು ಆಟ ತೊಜಯರೆ ಲೆತೊನು ಪೋಯಿನ ನಿನೆಪು. ಅಕುಲೆಗ್ ತೂಯರೆಗ್‌ಂದೇ ಅಲ್ಪದ ಮೂಡಲಗಿರಿ ಕಾಮತ್ ಸೋದರೆರ್ ಒಂಜಿ ಆಟೊದ ಏರ್ಪಾಡ್ ಮಲ್ತದಿತ್ತೆರ್. ಅಯಿಟ್ ಕೀರ್ತಿಶೇಷ ಹಾರಾಡಿ ರಾಮೆರ್ಗ್ಲಾ ಒಂಜಿ ಪಾತ್ರೊ ಇತ್ತ್ಂಡ್. ಆರ್ಲಾ ನಾಟಕೊದ ವೇಸೊ ಪಾಡೊಂದು ಬತ್ತಿನ ತೂದು ಎಂಕ್ ಸೋಜಿಗೊನೇ ಆಂಡ್. 1958ಡ್ ವೀರಭದ್ರ ನಾಯಕೆರ್ ಬ್ರಹ್ಮಾವರೊಡೊಂಜಿ ಡೇರೆದ ಆಟ ಗೊಬ್ಬಯೆರ್. ಅಯಿಟ್ಲಾ ಕೆಲವು ವೇಷಧಾರಿಲು ದುಂಬುದ ನಾಟಕೊದ ದುಸ್ತೆತೊಡು ತೋಜಿಯೆರ್. ಅಯಿನ್ ತೂದು ಸ್ವೀಡನ್‌ದ ಬೆಂಟ್ ಹೇಗರ್ ಈ ಕೊರತೆದ ಬಗ್ಗೆ ಕೇಂಡೆರ್. ಈ ಅನುಭವೊ ಪೊಸತತ್ತ್. 1936-37ಡ್ ಬತ್ತಿನ ಡಾ. ಬಾಕೆ, ಕಂಡನಿ-ಬುಡೆದಿ ಪುತ್ತೂರುಡು ನಡತಿನ ಕಾಸರಗೋಡುದಕ್ಕೆನ ಒಂಜಿ

ಒವ್ವೇ ಕಲೆ ಒರಿದ್, ಬುಳಿದ್, ಸಂಸ್ಕಾರ ಪಡೆವುದೊಂದಾಂಡ ಆಯಾಯ ಕಲೆಕುಲೆಗ್ ಸಂಬಂಧಪಟ್ಟಾನ ಮೂಲತತ್ವ ಒವು ಪನ್ನಿ ವಿಚಾರ ತೆರಿದುಪ್ಪೊಡು. ಅವೆನ ಬಲಾಬಲೊತ ಜ್ಞಾನ ಬೋಡು. ನೆಕ್ಕ್ ಸಮಾನವಾಯಿನ ಬಾಕಿ ಕಲೆಕುಲೆನ ಬಗ್ಗೆ ಗೊತ್ತು ಬೋಡು. ನಮ್ಮ ಬುದ್ಧಿ ಬಲಿದುಪ್ಪೊಡು. ಪ್ರತಿಯೊಂಜಿ ಕಲೆಲಾ ಬೊಳ್ಳುಗು ಬೂರುನೆ ಕೆಲವೇ ಕೆಲವು ಪ್ರತಿಭಾವಂತ ಕಲಾವಿದರೆನ ಸೃಷ್ಟಿಡ್ಲಾವರ. ಸೃಷ್ಟಿದ ಸ್ಫೂರ್ತಿಡ್ಲ ಪುಟ್ಟಿನ ನಾದ, ನೃತ್ಯ, ವರ್ಣ ನೆನ್ನ್ ಸಾಂಪ್ರದಾಯಿಕ ಅನುಸರಣೆಡ್ ನಮ ಒರಿತೊನೊಲಿ. ಅಯಿನ್ ಬುಳೆಪಯರೆಗ್, ಸುದಾರ್ನೆ ಮಲ್ಪುರೆಗ್ ಆ ಕಳತ ಪೂರ್ತಿ ಜ್ಞಾನ ಇತ್ತಿನ ಪ್ರತಿಭಾವಂತ ಸೃಷ್ಟಿಕಾರೆರೇ ಬೋಡು. ಬಜೀ ಪದ ಪನ್ಯರೆಗೊತ್ತಿತ್ತಿನಕುಲು, ನಲಿಪ್ಯರೆ ಮಾತ್ರ ಗೊತ್ತಿತ್ತಿನಕುಲು ಬಜೀ ವಾಚಾಳಿತನ ಮಾತ್ರ ತೆರಿನಕುಲು ಅತ್ತಂಡ ಬಜೀ ಬಣ್ಣ ಪಾಡ್ಯರೆ ಮಾತ್ರ ಗೊತ್ತಿತ್ತಿನಕುಲು ಯಾನ್ ಯಕ್ಷಗಾನೊನು ಸುದಾರ್ನೆ ಮಲ್ಪುವೆಂದ್ ಪನ್ನಿನಾತ್ ಎಲ್ಯಕಲೆ ಯಕ್ಷಗಾನ ಅತ್ತ್. ಇತ್ತೆ ಈ ಕಳಟ್ ನಡತೊಂದುಪ್ಪಿ ಕೆಲಸೊ ಅಂಚಿನ. ಶಿಲ್ಪದ ಜ್ಞಾನದಾಂತಿನಾಯೆ ಗಣಪತಿ ಮಲ್ಪುರೆ ಪೋದು ಮಂಗನ ಮುಸುಂಟು ಮಲ್ತಿಲೆಕ ಇಂಚಿತ್ತಿ ಮಹಾನುಭಾವರೆನ ಉಪದ್ರೊಡ್ಲ ಯಕ್ಷಗಾನ ಕಲೆ ತನನ್ ಒರಿತೊನುನ ಕಾಲ ಇತ್ತ್ ಬತ್ತ್ದಾಂಡ್.

ಸಂಗೀತ, ನಾಟಕ, ದುಸ್ತೆತೊ, ನಲಿಕೆ ಇಂಚ ನಾಲ್ ಕಲಾ ಪ್ರಕಾರೊಲು ಒಟ್ಟು ಸೇರ್ದ್ ಯಕ್ಷಗಾನೊ ಪುಟ್ಟುದುಂಡು. ಉಂದು ಒಂಜಿ ಸಮಷ್ಟಿ ಕಲೆ. ಒರೊರಿ ಉದ್ಯ ಬೆಂದಿನ ಕಲೆ ಅತ್ತ್. ಅಪ್ಪೆ - ಅಮ್ಮನೇ ಮದತ್ದ್ ದೂರೊ ಪೋವೊಂದಿಪ್ಪುನ ಚಿತ್ರಕಲೆನೋ, ಸಿನಿಮಾ ಕಲೆನೋ ಬೇತೆ ಪದೊಕುಲೆನೋ ಅನುಕರಣೆ ಮಲ್ಪುನೆಡ್ಲ ನಮೊ ಯಕ್ಷಗಾನೊಡು ಇತ್ತಿ ಸಂಪೊತ್ತುನು ಕಳೆವೊನುಬೊ. ನನ ನಿತ್ಯ ನಡಪುನ ಯಕ್ಷಗಾನ ಕೂಟೊ (ತಾಳಮದ್ದಲೆ)ಲೆನ ಕತೆ ಪಂಡ್‌ದ್ ಸುಖೊ ಇಜ್ಜಿ. ಅರ್ಥಧಾರಿನಕುಲು ಮಾತ ಮೂಲ ಕವಿಕುಲೆನ್ ಮೀರವುನಕುಲು. ಅರ್ಥಧಾರಿಲೆನ ಪಾತೆರಕತೆ ಅಕುಲೆನ ವ್ಯಕ್ತಿ ಪ್ರತಿಷ್ಠೆ, ಅಹಂಕಾರೊಡ್ಲಾವರ ಕೆಟ್ವದ್ ಪೋತುಂಡು. ನೆನ್ನ್ ತೂನಗ ಉಂದು ರಂಗಭೂಮಿಯೋ ವಾದ ಭೂಮಿಯೋ ಪನ್ನಿ ಸಂಶಯ ಬರ್ಪುಂಡು. ಸೀತೆ, ರಾಮ, ಕೌರವೆ, ಅರ್ಜುನೆ ಇಂಚಿನ ಪುರಾಣ ಪಾತ್ರೊಲೆನ ಶೀಲ ಎಂಚಿನವು ಪನ್ನಿನೆನ್ ತೆರಿಪವುನ ಬುಡ್ಡು ಅವ್ವೇ ಪಾತ್ರೊಲೆಡ್ಲ ವಕಾಲತ್ ಮಲ್ಪದ್ ಲಡಾಯಿಗ್ ಪಿದಾಡ್ಬೆರ್. ಉಂದು ಇತ್ತೆದ ಯಕ್ಷಗಾನ ಕೂಟೊ, ನೆಡ್ಲಾವರ ರಾಮ ಸೀತೆನೊಟ್ಟಿಗೆ ಜೀವನ ಕರಿಪುನ ಬುಡ್ಡು ಇನೆಮೋಕೆ ಕಳೆದ್ ಬರ ಪನ್ನಿನಾಡೆ ಮುಟ್ಟಿ ಎತ್ತ್‌ಬೆರ್. ನಾಲ್ ದೋಸ್ತಿಲೆಡ್ಲ ಸಾಬಾಸಾಗಿರಿ ಪಡೆಪುನ ಸಲುವಾದ್, ವೈಯಕ್ತಿಕ ಕೊಪೊತಾಪೊ ತೀರ್ಪೊನ್ಯರೆಗಾದ್ ಯಕ್ಷಗಾನ ಕಲಾವಿದರ್ ಪಿದಾಡ್ಬೆರ್‌ಂದಾಂಡ ಏರೆಡ್ಲಲಾ ಯಕ್ಷಗಾನ ಕಲೆನ್ ಒರಿತೊನ್ಯರೆ ಸಾಧ್ಯ ಆವಂದ್.

ನಮ್ಮ ಮಲೆನಾಡ್‌ಡ್ (ಕಾರಂತೆರ್ ತುಳುನಾಡ್‌ನ್ ಮಲೆನಾಡ್‌ಂದೇ ಪನ್ನೆರ್) ಯಕ್ಷಗಾನ ಕಲೆ ಜೀವಂತವಾದ್ ಒರಿದ್‌ಂಡ್. ಜನೊಕುಲೆಗ್ ಅಯಿತ ಮಿತ್ತ್‌ದ ಅಭಿಮಾನ ಪೋತುಜಿ. ಏತೇ ಬಂಜ ಆಂಡಲಾ ಅರೆಗಲೊಡು 10-15 ದಶಾವತಾರ ಮೇಳೊಲು ಊರೂರು ತಿರ್ಗುಬೊ. ಮರೆಯಲೊಡು ತಾಳಮದ್ದಲೆ ನಡಪುಂಡು. ಸಾರೊ ವರ್ಸೊಡ್ಲಿಂಚಿ ಯಕ್ಷಗಾನ ಮೂಲು ಜೂವೊಡೊರಿತ್‌ಂಡ್. ಯಕ್ಷಗಾನೊ ಪದೊತ ದಾಟಿ ದೇವಸ್ಥಾನೊಡು, ಮದಿಮಲೆಡ್, ಉದಯರಾಗೊಡು ದೇವರೆ ಸುಗಿಪುಡು ನೆಗತ್ತ್ ತೋಜುಂಡು. ಗುಡಿಗಾರೆರೆನ ಚಿತ್ರ, ಶಿಲ್ಪ, ದುಸ್ತೆತೊಲೆಗ್ ರೂಪೊ ಕೊರ್ತುಂಡು. ಯಕ್ಷಗಾನ ನಾಟ್ಯೊಗು ನಮ್ಮಕುಲು ಭರತ ನಾಟ್ಯೊನು ಅನುಕರಣೆ ಮಲ್ತ್‌ಜೆರ್. ಕಥಕ್ಕಳಿನ್ಲಾ ಅನುಕರಣೆ ಮಲ್ತ್‌ಜೆರ್. ಕಥಕ್ಕಳಿ ಪುಟ್ಟರೆದುಂಬೇ ಈ ನಾಗರಖಂಡ ಪನ್ನಿ ಜಾಗೆಡ್ ನಡತೊಂದಿತ್ತಿ ಪೂಜೆಡ್ ನಲಿತೊಂದಿತ್ತಿ ನಲಿಕೆನೇ ಯಕ್ಷಗಾನೊದ ನಲಿಕೆಗ್ ಬಳಸವೊಂಡೆರ್. ಉಡುಪಿ - ಗೋಕರ್ಣಡ್ಲಿಂಚಿದ ಮಲೆನಾಡ ಸೆರಂಗ್‌ದ ಊರುಲೆಡ್ ನಾಗಗ್ ಬಾರಿ ಮನ್ನಣೆ. ನಾಗಾರಾಧನೆ ಮುಲ್ಪದ ಮೂಲ ಮತ. ಮುಲ್ಪ ಸ್ಕಂದೆಲಾ ನಾಗೆನೇ, ಅವು ಎಂಚ ಆಂಡೋ ತೆರಿಪುಜಿ. ಆಟೊಡು ಲೆಪ್ಪುನ “ಓ ಸುಬ್ಬರಾಯೆ” ಮೂಲತಃ ನಾಗೆನೇ.

ನಾಗಮಂಡಲೊಡು ನಲಿಪಿ ನಲಿಕೆ ತೂಯಿನಕುಲೆಗ್ ಅವು ಎಂಚಿನ ನಲಿಕೆ ಪಂಡ್‌ದ್ ತೆರಿವು. ಆ ಪೂಜಾ ವಿಧಾನೊಡು ತರೆಡ್ ಕಾರ್‌ಮುಟ್ಟಿ ತರಂಗಬದ್ಧವಾದ್, ನಲಿಪಿ ಸರ್ವಾಂಗ ಸುಂದರ ನಲಿಕೆ ದೇಶೀ ನಲಿಕೆ. ಇಂಚಿನ ಮತೀಯ ನಲಿಕೆಡ್ ಅತ್ತಂಡ ತಾಂತ್ರಿಕ ನಲಿಕೆಡ್ ಯಕ್ಷಗಾನ ನಲಿಕೆಗ್ ಶಕ್ತಿ ಒದಗ್‌ಂಡ್. ಮಲೆನಾಡ್‌ಡ್ ಪ್ರಚಾರೊಡುಪ್ಪಿ ಯಕ್ಷಗಾನೊಡು ದುಸ್ತೆತೊ ನಲಿಕೆಡ್ ರಾತ್ರಿ ಗೊಬ್ಬುನ ಆಟೊದ ಸಂಪ್ರದಾಯೊ ಒಂಜಾಂಡ ಅಯಿಕ್ ಅನುಕೂಲದಾಂತಿ ಪೂರ್ತುಗು ಚಾವಡಿಡ್ ಕುಲೊಂದು ನಡಪವುನ ತಾಳಮದ್ದಲೆದ ಸಂಪ್ರದಾಯೊ ಕುಡೊಂಜಿ. ನೆನ್ನ್ ಯಕ್ಷಗಾನ ಕೂಟೊಂದ್ಲಾ ಪನ್ನೆರ್. ನೆಟ್ ವೇಸೊ ಇಜ್ಜಿ. ನಲಿಕೆ ಇಜ್ಜಿ. ಭಾಗೋತೆರ್ ಹಿಮ್ಮೇಳದೊಟ್ಟಿಗೆ ಕುಲ್ಲುದು ಪದ ಪನ್ನೆರ್. ಅರ್ಥದಾರಿಲು ಕುಲೊಂದು ಪದೊಕು ಸರಿಯಾದ್ ತನ್ನುಲೆನ ಪಾತ್ರ ಪ್ರತಿಪಾದನೆ ಮಲ್ಪುವೆರ್. ಆಟೊಡು ಹಾಸ್ಯಗಾರಗ್, ಭಾಗೋತೆರೆಗ್ ಹೆಚ್ಚಿನ ಕೆಲಸೊ ಉಂಡು. ಆಟೊಡ್ಲಿಲೆಕ ಕೂಟೊಡು ಸಭಾಲಕ್ಷಣ ಪೂರ್ವ ಪೀಠಿಕೆ ಇಜ್ಜಿ. ತಾಳಮದ್ದಲೆ ಆಟೊದಲೆಕ ಮನೋರಂಜನೆ ಕೊರ್ಪುಜಿ.

ಕಾರಂತೆರೆಗ್ ತಿಕ್ಕಿ ಆಧಾರೊದ ಪಿರ್ಕಾರೊ ಯಕ್ಷಗಾನ ಉದಿಪನ ಆತಿನೆನೇ ಮಲೆನಾಡ್ ಪ್ರದೇಶೊಡ್ಲಾ. ಯಕ್ಷಗಾನೊಡು ಮೂಡಲಪಾಯ, ಪಡುವಲಪಾಯ, ತೆಂಕುತಿಟ್ಟು, ಬಡಗುತಿಟ್ಟು ಇಂಚ ಕೆಲವು ವಿಭಾಗೊಲುಲ್ಲೊ. ಒಂಜೊಡ್ಲೊಂಚೆಗ್ ಒಂತೆ ಒಂತೆ



ವ್ಯತ್ಯಾಸ ಉಂಡು. ಮಲೆನಾಡ್‌ದ ಮೂಡಯಿ ಪುಡೆಕ್ ಮೂಡಲಪಾಯ, ಪಡ್ಡಯಿ ಕಡಲಬರಿಟ್ ಪಡುವಲಪಾಯ, ಅಯಿಟ್ ಉಡುಪಿಡ್ ಬಡಕ್ಕಯಿಗ್ ಬಡಗುತಿಟ್ಟು ತೆನ್ನಾಯಿಗ್ ತೆಂಕುತಿಟ್ಟು. ಒಂತೆ ಮಟ್ವಾಗ್ ಕಥಕ್ಕಳಿದ ಪ್ರಭಾವ ತೆಂಕ್‌ತಿಟ್ಟಾದ ಮಿತ್ತ್ ಆದುಪ್ಪು. ಇತ್ತೆದ ಮಟ್ವಾಗ್ ತೂನಗ ತೆನ್ನಾಯಿದಕುಲು ಬಡಕ್ಕಯಿದಕುಲೆಡ್ ಆಟೊಡು ಒಂಜಿ ಕೈ ಮಿತ್ತ್ ಉಪ್ಪಿಲೆಕ ತೋಜುಂಡು. ಅಕುಲು ದುಸ್ತೆತೊಡು, ಪದೊ ಪನ್ನಿನೆಟ್, ನಲಿಕೆಡ್ ಸಂಪ್ರದಾಯೊನು ಬಾರಿ ತುರ್ತುಡು ಬುಡೊಂದುಲ್ಲೆರ್. ಬಡಕಯಿದಕುಲು ಒಂತೆ ನಿದಾನೊಡು ಬುಡೊಂದುಲ್ಲೆರ್.

ಇಂಚ ಕಾರಂತೆರ್ ಯಕ್ಷಗಾನೊದ ಬಗ್ಗೆ 'ಯಕ್ಷಗಾನ ಬಯಲಾಟ' ಬೂಕುಡು ಆರೆನ ಅಭಿಪ್ರಾಯೊನು ತೆರಿಪದೆರ್. ಈ ಬೂಕು ಇಂಗ್ಲಿಷ್ ಬೊಕ್ಕ ಹಿಂದಿಗ್ ತರ್ಜುಮೆ ಆತ್ಂಡ್. ಸ್ವೀಡನ್ ದೇಶೊದ ಸ್ವೀಡಿಶ್ ಅಕಾಡೆಮಿ ನೆಕ್ಕ್ 1967ಡ್ ಇನಾಂ ಕೊರ್ತುಂಡ್. ಕೇಂದ್ರ ಸಾಹಿತ್ಯ ಅಕಾಡೆಮಿ ಪ್ರಶಸ್ತಿಲಾ ನೆಕ್ಕ್ ತಿಕ್ಕಂಡ್.

ಕಾರಂತೆರೆಗ್ ಎಲೈ ಉಪ್ಪುನಗ ಸುರುವಾಯಿನ ಯಕ್ಷಗಾನೊದ ಆಸಕ್ತಿ ಆರೆನ ಜೀವನ ಪರಿಯಂತರ ಒರಿದಿತ್ತಂಡ್. ಆರ್ ಯಕ್ಷಗಾನೊಡು ಕೆಲವು ಪರಿವರ್ತನೆ ಮಲ್ಪೊಡುಂದು ಎನ್ನೆರ್. ಸುರುಕು ಆರ್ ಯಕ್ಷಗಾನೊದ ನಲಿಕೆ, ಅಭಿನಯ, ಬಣ್ಣಗಾರಿಕೆ, ಬಾಗೊತಿಕೆ, ರಾಗ, ಲಯ - ತಾಳ ಪೂರ ಕಲ್ತೆರ್. ಒಂಜಿ ಪ್ರಸಂಗೊನು ರಡ್ಡ್ ಗಂಟೆದುಲಯಿ ಎಂಚ ಮಲ್ತ್ ಮುಗಿಪೊಲಿಂದ್ ಆಲೋಚನೆ ಮಲ್ತೆರ್. ಸಂಪ್ರದಾಯ ಬದ್ಲವಾದಿತ್ತಿನ ಹಿಮ್ಮೇಳೊನು ಬದಲಾವಣೆ ಮಲ್ತಂಡ ಎಂಚಂದ್ ತೂಯೆರ್. ಕ್ಲೆರೊನೆಟ್, ಸ್ಯಾಕ್ಸೊಫೋನ್ ಬಳಕೆ ಮಲ್ತೆರ್. ಭಾವುಕತೆ ಹೆಚ್ಚ ಉಪ್ಪುನ ಕಡೆಟ್ ಪಿಟಿಲ್ ಬಳಕೆ ಮಲ್ತೆರ್. ಉಡುಪಿದ ಕು.ಶಿ. ಹರಿದಾಸ ಭಟ್ಟೆನ ಬೆರಿಸಾಯಿ ಪಡೆವೊಂಡೆರ್. ನಾಲ್ ಪ್ರಸಂಗೊಲೆನ್ ಅಜತೊಂದು ಅಯಿಕ್ ಸರಿಯಾದ್ ದುಸ್ತೆತ, ಅಲಂಕಾರೊ, ಪದ್ದಯಿ, ಅಭಿನಯ, ಪಜ್ಜೆಗಾರಿಕೆ ಕಲ್ಪದ್ ಒಂಜಿ ಮೇಳ ಕಟ್ಟಾದ್ ಮುಂಬಯಿ, ಡೆಲ್ಲಿ, ಹುಬ್ಬಳ್ಳಿ, ಧಾರವಾಡ, ಬೆಂಗಳೂರು, ಪುತ್ತೂರು, ಕುಂದಾಪುರ ಇಂಚ ಕೆಲವು ಕೋಡಿಡ್ ಆಟ ಗೊಬ್ಬಯೆರ್. ಮುಂಬಯಿಡ್ ಈ ಯಕ್ಷಗಾನ ಪ್ರಯೋಗ ನಡಪಯರೆಗ್ ಬೆರಿಸಾಯಿ ಕೊರಿನಕುಲು ಮುಂಬಯಿದ ಮಿತ್ರ ಕೂಟೊದ ಸದಸ್ಯರಾಯಿನ ಕೃಷ್ಣ ಹೆಬ್ಬಾರ್, ಮೂಡಬೆದ್ರ ಸಂಜೀವ ರಾಯೆರ್, ವ್ಯಾಸರಾಯ ಬಲ್ಲಾಳ್ ಇಂಚ ಕೆಲವೆರ್ ಆರೆನ ದೋಸ್ತಿಲು. ಅಭಿಮನ್ಯು ವಧೆ, ಭೀಷ್ಮ ವಿಜಯ ಈ ರಡ್ಡ್ ಯಕ್ಷಗಾನ ಬ್ಯಾಲೆ ಮುಂಬಯಿಡ್ ನಡತ್ಂಡ್. ಡೆಲ್ಲಿಡ್ ಯಕ್ಷಗಾನೊ ಪ್ರಸಂಗೊನು ಹಿಂದಿಗ್ ತರ್ಜುಮೆ ಮಲ್ತದ್ ಗೊಬ್ಬಯೆರ್.

ಜಾನಪದ ಕಲೆಯಾಯಿನ ಯಕ್ಷಗಾನೊನು ಶಾಸ್ತ್ರೀಯ ಕಲೆಯಾದ್ ಮಲ್ಪೊಡುಂದು

ಕಾರಂತೆರೆಗ್ ಮನಸಾಂಡ್. ಕೆಲವು ಇಷ್ಟೆರೆನ ಬೆರಿಸಾಯೊ ಪಡೆವೊಂದು ಬ್ರಹ್ಮಾವರೊ ಡೊಂಜಿ ಯಕ್ಷಗಾನ ಶಾಲೆ ಸುರು ಮಲ್ತೆರ್. ಆಂಡ ಆರೆಗ್ ಈ ಜಾನಪದಕಲೆನ್ ಶಿಷ್ಟ ಸಂಪ್ರದಾಯೊದ ಚೌಕಟ್ಟ್ ಬಂಧನೊಡು ದೀಪುನ ಎಡ್ಡೆ ಅತ್ತಂದ್ ತೋಜಿಂಡ್. ಆ ಸಾಲೆನ್ ಮೂಜೇ ವರ್ಸೊಡು ಮುಚ್ಚೆರ್. 1956ಡ್ ಕೇಂದ್ರ ಸಂಗೀತ ನಾಟಕ ಅಕಾಡೆಮಿ ಒಡಿಸ್ಸಿ, ಕೂಚುಪುಡಿಗಿತ್ತಿನಂಚನೆ ಯಕ್ಷಗಾನೊಗ್ಲಾ ಮಾನ್ಯತೆ ಕೊರ್ಂಡ್. ನೆನ್ನ್ ತೆರಿನ ಕಾರಂತೆರ್ ಉಡುಪಿದ ಎಂ.ಜಿ.ಎಂ. ಕಾಲೇಜಿದ ಅಂಗಸಂಸ್ಥೆಯಾದ್ ಒಂಜಿ ವಸತಿ ಯಕ್ಷಗಾನ ಶಿಕ್ಷಣ ಶಾಲೆ (ಯಕ್ಷಗಾನ ಕೇಂದ್ರ) ಸುರು ಮಲ್ತೆರ್. ಅಲ್ಪ ಯಕ್ಷರಂಗ (ಯಕ್ಷಗಾನ ಬ್ಯಾಲೆ) ಪನ್ನಿ ಪೊಸ ನಮುನೆದ ಒಂಜಿ ಆಟೊನು ರೂಢಿಗ್ ಕನತೆರ್. ರಾಷ್ಟ್ರೀಯ, ಅಂತಾರಾಷ್ಟ್ರೀಯ ಮನ್ನಣೆ ಯಕ್ಷಗಾನೊಗ್ಲಾ ತಿಕ್ಕೊಡು ಪನ್ನಿನನೇ ನೆತ್ತ ಉದ್ದೇಶೊ. ನೆಟ್ವರ್ಕ್ ಸಂಗೀತ, ನೃತ್ಯ, ಅಭಿನಯೊನೇ ಮುಖ್ಯೊ. ಪಾತೆರಕತೆಗ್ ಪ್ರಾಮುಖ್ಯತೆನೇ ಇಜ್ಜಿ. ಅಂಚಾದ್ ಕನ್ನಡ ಬಾಸೆ ಬರಂದಿನಾಯೆಲಾ ನೆನ್ನ್ ತೂದು ಸಂತೋಸು ಪಡೆವೊಲಿ. ಕು.ಶಿ. ಹರಿದಾಸ ಭಟ್ ಈ ತಂಡೊನು ತಮಿಳುನಾಡು, ಕೇರಳ, ಆಂಧ್ರ, ಮಧ್ಯಪ್ರದೇಶ, ಮುಂಬಯಿ, ಪೂನಾ, ಅಸ್ಸಾಂ, ಪಂಜಾಬು - ಇಂಚ ದೇಶೊದ ಬೇತೆ ಬೇತೆ ಕೋಡಿಲೆಗ್ ಕೊಂಡೊಡು ಪೋದು ಪ್ರದರ್ಶನ ಕೊರ್ಪಯೆರ್. ಈತಾನಗ ಹಾಂಕಾಂಗ್ಡ್ ಒಂಜಿ ಕಲಾ ಸಂಸ್ಥೆ ಅಕುಲೆ ದೇಶೊಗ್ಲಾ ಯಕ್ಷಗಾನ ತಂಡೊನು ಲೆತೊಂದು ಬರೊಡುಂದು ಕಾರಂತೆರೆಗೊಂಜಿ ಓಲೆ ಕಡಪುಡ್ಡು ಕೊರ್ಂಡ್. ಚೀನೀಯೆರ್ ಕರ್ನಾಟಕೊದ ಯಕ್ಷಗಾನ ತೂದು ಸಂತೋಸು ಪಡೆಯೆರ್. 1981ಡ್ ಕಾರಂತೆರ್ ಪದ್ಮೆನ್ ಜನೋತ ಒಂಜಿ ತಂಡ ದೆತೊಂದು ಜಪಾನ್‌ಗ್ ಪೋಯೆರ್. ಜಪಾನ್‌ದ ವಿಶ್ವವಿದ್ಯಾಲಯೊಲೆಡ್ ಕಾರಂತೆರೆಗ್ ಕಲೆತ ಬಗ್ಗೆ ಪಾತೆರುನ ಅವಕಾಶ ತಿಕ್ಕಂಡ್. ಜಪಾನೀ ಜನೊಕುಲೆನ ಕಲಾವಂತಿಕೆ, ಪರಿಸರಪ್ರೇಮ, ಒಪ್ಪ - ಓರಣ ತೂದು ಕಾರಂತೆರೆಗ್ ಬಾರಿ ಕುಶಿಯಾಂಡ್. ಅಲ್ತ್ ಬತ್ತದ್ ಆರ್ 'ಪೂರ್ವದಿಂದ ಅತ್ಯಪೂರ್ವಕ್ಕೆ' ಪಂಡ್‌ದ್ ಒಂಜಿ ಪ್ರವಾಸ ಕಥನ ಬರೆಯೆರ್. 1987ಡ್ ರಶ್ಯಾಡ್ ನಡತಿನ ಭಾರತ ಉತ್ಸವ ಸಮಾರಂಭೊಗ್ಲಾ ಯಕ್ಷರಂಗೊನು ಕೊನೊಡು ಪೋಯೆರ್. ಅಯಿಡ್ ಬೊಕ್ಕ 1988ಡ್ ಅಬುದಾಬಿ, ದುಬಾಯಿಗ್ ಪೋಯೆರ್. ಮೆಂಚಸ್ಪರ್ಡ್ ನಡತಿ ವಿಶ್ವಕನ್ನಡ ಸಮ್ಮೇಳನೊಗ್ಲಾ ಯಕ್ಷರಂಗದ ಯಕ್ಷಗಾನ ಬ್ಯಾಲೆ ಪೋದು ಮಾನಾದಿಗೆ ಪಡೆಂಡ್. ಆತೇ ಅತ್ತ್ ಇಂಗ್ಲೆಂಡ್‌ದ ಲಂಡನ್, ಪೆರು ದೇಶೊದ ಲೀಮಾ, ಬ್ರೆಜಿಲ್‌ದ ಲಾಂಡ್ರಿನಾ, ಸಾಪಾವೊ ಊರುಲೆಗ್ ಯಕ್ಷರಂಗ ಪೋದು ಭಾರತೊದ ಕಲೆ ಸಂಸ್ಕೃತಿದ ಒರುನು ಅಕುಲೆಗ್ ತೋಜದ್ ಬತ್ತಂಡ್. ಕಾರಂತೆರ್ ಯಕ್ಷಗಾನೊಗ್ಲಾ ಅಂತಾರಾಷ್ಟ್ರೀಯ ಮಟ್ಟದ ಮರ್ಯಾದಿ ಕೊರ್ಪಯೆರ್. ಯಕ್ಷಗಾನ ರಂಗೊಡು ಆರೆ ಸಾಧನೆ ಮೇರು

ಪರ್ವತೋಗು ಸಮಾನ.

“ಯಕ್ಷಗಾನೋದ ಭವಿಷ್ಯೋ ನನಲಾ ಕತ್ತಲೆಡೇ ಉಂಡು. ಉಂದು ಒಂಜಿ ಸಂಧಿ ಕಾಲೊ. ಇತ್ತೆದ ಕಾಲೊದ ಪೊಸ ಒರು ಸಂಪ್ರದಾಯೊನು ನಾಶ ಮಲ್ತೊಂದುಂಡು. ಕೀಳ್ ಮಟ್ಟೊದ ಕಳೆಕೆಟ್ಟ್ತಾನ ಪ್ರಯೋಗೊಲು ಕಲೆತ ಪುದರ್ಡ್ ಮೆರೆವೊಂದುಂಡು. ಜನೊಕ್ಕೆ ಉಮೇದ್ ಯಕ್ಷಗಾನೋಗು ಕಮ್ಮಿ ಆವೊಂದುಂಡುಂದು ಪನ್ನಿನೆಡ್ಲಾಲಾ ಈ ಕಲೆತ ಶಕ್ತಿ, ಅಂತರಾಳ ತೆರಿಯಂದೆ ಜನೊಕುಲು ಅಪಚಾರ ಮಲ್ತೊಂದುಲ್ಲೆರ್ ಪನ್ನಿನ ಬೇಜಾರ್ಡ್ ವಿಚಾರೊ. ನೆನ್ನ್ ತಡೆಕಟ್ಟುನ ಸಾದಿ ದಾದ? ಪನ್ನಿ ವಿಷಯೊಡು ನಮ ಯೋಚನೆ ಮಲ್ಪಿ ಕಾಲ ಇತ್ತೆ ಒದಗ್ಗದಾಂಡ್. ಪೊಸ ಒರುತ ಮೋಹೊ ಈ ದೇಶೀಯ ಕಲೆಕ್ ಮೃತ್ಯು ಆವು ಪನ್ನಿ ಎಚ್ಚರಿಕೆ ನಂಕುಪ್ಪೊಡು.” ಯಕ್ಷಗಾನೋದ ಭವಿಷ್ಯೊದ ಬಗೆಟ್ ಕಾರಂತೆರ್ ಇಂಚ ಅಭಿಪ್ರಾಯ ಪಡೆದಿತ್ತೆರ್.

“ಶಿವರಾಮ ಕಾರಂತೆರ್ ಯಕ್ಷಗಾನದ ಕಳಕ್ ಸಂದಯಿನ ಸೇವೆಗ್ ಬಿಲೆ ಕಟ್ಟರೆ ಸಾಧ್ಯನೇ ಇಜ್ಜಿ. ಯಕ್ಷಗಾನೊನು ಒಂಜಿ ಕಲೆತ ಒರುಟು ಪೊಸ ದಿಟ್ಟಿಡ್ ತೂಯಿನಕುಲೆಡ್ ಸುರುತಾರ್ ಕಾರಂತೆರ್ಂದ್ ಧಾರಾಳ ಪನೊಲಿ. ತನ್ನ ಲೇಖನ, ಗ್ರಂಥ ರಚನೆ ಬೊಕ್ಕ ಭಾಷಣೊಲೆಡ್ ವಿದ್ಯಾವಂತೆರ್ ಯಕ್ಷಗಾನೋದ ಕಡೆಕ್ ಗಮನ ಕೊರ್ಪಿಲೆಕ ಮಲ್ತೆರ್. ಆರೆನ ಪಾತೆರೊದ ಪೆಟ್ಟಾಡ್ ಯಕ್ಷಗಾನೊಡು ನಡತೊಂದಿತ್ತಿನ ಕೆಲವು ಪೊಸ ನಮುನೆದ ವಿಸಂಗತಿಲು ಉಂತದೇ ಪೋಯೊ. ಕಾರಂತೆರ್ ನಡಪಯಿನ ಬೇತೆ ಬೇತೆ ಗೋಷ್ಠಿಲು, ತರಬೇತಿ ಶಿಬಿರೊಲು, ಪ್ರದರ್ಶನೊಲೆಡ್ಲಾವರ ಯಕ್ಷಗಾನೊನು ಜನೊಕುಲು ತೂಪಿನ ದಿಟ್ಟಿಯೇ ಬದಲಾದ್ ಪೋಂಡು. 1958ಡ್ ಬ್ರಹ್ಮಾವರೊಡು ಆರ್ ಸುರು ಮಲ್ತಿನ ಯಕ್ಷಗಾನ ಅಧ್ಯಯನ ಶಿಬಿರೊಡ್ಲ ಸುರುವಾದ್ 1972ಡ್ ಆರ್ ಯಕ್ಷರಂಗ ಸಂಸ್ಥೆ ಕಟ್ಟುನಾಡೆ ಮುಟ್ಟಿ ಆರ್ ಕೈಕೊನ್ನ ಅಧ್ಯಯನ ಕಾರ್ಯಕ್ರಮೊಕುಲೆಗ್ ಮೌಲ್ಯ ಏತ್ಂದ್ ಪನ್ಯರೆ ಸಾಧ್ಯ ಇಜ್ಜಿ. ಮಣ್ಣ್ ಮುಕ್ಕರೆ ತಯಾರಾಯಿನ ಬ್ರಹ್ಮರಥೊನು ಅಲೆಗಾದ್ ಏಕಾಏಕಿಯಾದ್ ತೇರೊಯಿತ್ತಿನ ಸಾಹಸಿ ಕಾರಂತೆರ್”. ಇಂಚ ಪಂಡಿನಾರ್ ಆರೆನ ಜೊತೆಟಿತ್ತಿ ಯಕ್ಷಗಾನೋದ ಹಿರಿಯ ಮದ್ದಲೆಗಾರ ಹಿರಿಯಡಕ ಗೋಪಾಲ ರಾಯೆರ್.

ಕಾರಂತೆರ್ ಯಕ್ಷಗಾನೊನು ಎಲೈಡ್ಲಿಂಚಿ ತೂಯೆರ್. ಅಯಿತ ಬಗ್ಗೆ ಅಡಿಮುಟ್ಟು ಸೋದನೆ ಮಲ್ತೆರ್. ಎಡ್ಲೆ, ಹಾಳನ್ ಪೊಲಬು ಮಲ್ತೊಂದು ಸುದಾರ್ಶೆಗ್ ಪಿದಾಡ್ಯೆರ್. ಯಕ್ಷರಂಗೊ ಕಟ್ಟೆರ್. ಊರೂರು ತಿರ್ಗ್ಯೆರ್. ಆರ್ ಏತೇ ಒರು ಮಗ್ಗರೆಂದಾಂಡಲಾ ಪೊಸ ದೇಖಿದ ಆಟೊ ಜನೊಕುಲೆಗ್ ಇಷ್ಟ ಆಯಿಜಿ. ಜನೊಕುಲು ಅಯಿಕ್ ಒಂಜೊಂಜಿ ಕೋಂಗಿ - ಕೊರತೆ ಪನ್ಯರೆ ಸುರು ಮಲ್ತೆರ್. ಯಕ್ಷರಂಗ ಶಾಸ್ತ್ರತವಾದ್ ಒರಿಜಿ. ಆರೆಡ್ಲ ದುಂಬೇ ಅವು ಮಾಯಕಾದ್ ಪೋಂಡು.



ಯಕ್ಷಗಾನೋ ನಮ್ಮ ತುಳುನಾಡ್ ಒಂಜಿ ಮಲ್ತ ರಂಗಕಲೆ. ಬಾರಿ ಪಿರಾಕ್‌ಡ್ಲಿಂಚಿ ಬುಳೆದ್ ಬತ್ತಿನ ಈ ಕಲೆನ್ ಜನೊಕುಲು ಒಂಜಿ ಆಚರಣೆ, ಆರಾಧನೆಂದೇ ಸ್ವೀಕಾರ ಮಲ್ತದೆರ್. ಅವು ಒಂಜಿ ಜಾನಪದ ಮೂಲೊದ ಕಲೆ. ಓಡೆಮುಟ್ಟು ಪಂಡ ಇತ್ತೆ ಈ ಕಾಲೊಡ್ಲಾ ಆಟೊ ಗೊಬ್ಬವೆಂದ್ ಪರಕೆ ಪಂಡೊನುನಕುಲು ಏತೋ ಜನೊ ಉಂಡು. ವರ್ಸೊಯಿಡೀ ಪರಕೆದ ಆಟೊನೇ ಗೊಬ್ಬುದು ತಿರ್ಗಾಟೊ ಮುಗಿಪುನ ರಡ್ಡ್ ಮೂಜಿ ಮೇಳೊಲು ಉಲ್ಲೊ. ಇಂಚ ಉಪ್ಪುನಗ ಜನೊಕುಲೆನ ನಂಬಿಕೆನ್ ಒಂಜೇ ಪೆಟ್ವಾಗ್ ಬದಲಾವಣೆ ಕನಯರೆ ಸಾಧ್ಯನೇ ಇಜ್ಜಿ.

ಯಕ್ಷರಂಗೊಡು ಕಾರಂತೆರ್ ಏಕಾ ಏಕಿ ಅರ್ಥಗಾರಿಕೆನ್ ದೆತ್ತ್ ಬುಡ್ಯೆರ್. ವೇಸೊ, ನಲಿಕೆದಾಂತಿನ ತಾಳಮದ್ದಲೆಗ್ ಸೋತು ಪೋಪಿನ ನಮ್ಮ ಜನೊಕುಲು ನೆನ್ನ ಒಪ್ಪರೆ ಖಂಡಿತ ತಯಾರಿಜ್ಯೆರ್.

ಕುಡ ಒಂಜಿ ಜನೊಕುಲೆಗ್ ಬೇನೆ ಮಲ್ತಿ ವಿಷಯೊ ಪಂಡ ಹಿಮ್ಮೇಳೊದ ಬದಲಾವಣೆ. ಪಿರಾಕ್‌ಡ್ಲಿಂಚಿ ಯಕ್ಷಗಾನೊದ ಹಿಮ್ಮೇಳ ಪಂಡ ತಾಳ, ಜಾಗಟೆ, ಚೆಂಡೆ, ಮದ್ದಲೆ, ಹಾರ್ಮೋನಿಯಂ. ಕಾರಂತೆರ್ ಕ್ಲೇರ್‌ನೆಟ್, ಸೆಕ್ಸೋಪೋನ್, ಪಿಟೀಲ್ - ಇಂಚ ಪೊಸ ನಮೂನೆದ ದೇಶೀಯ ಅತ್ತಂದಿ ವಾದನ ಸಾಮಗ್ರಿಲೆನ್ ಹಿಮ್ಮೇಳೊಡು ಬಳಸಯೆರ್. ಜನೊಕುಲು ನೆನ್ನ ಒಪ್ಪರೆ ತಯಾರಾಯಿಜೆರ್. ದುಸ್ತೆತೊಡು ಬದಲಾವಣೆ ಮಲ್ತೆರ್. ಜಾನಪದ ರೂಪೊದ ಯಕ್ಷಗಾನೊಡು ಇಂಚಿನ ಪಾತ್ರೊಗು ಇಂಚಿನ ವೇಸೊಂದು ನಿಗಂಟಾದ್ ಪೋತುಂಡು. ಕೃಷ್ಣ, ಭೀಮ, ಅರ್ಜುನ, ರಕ್ಕಸರೆಗ್ ರಂಗಸ್ಥಳೊಗು ಬನ್ನಗನೆ ತೂಯಿನ ಜನೊಕುಲು ಅವು ಇಂಚಿನ ವೇಸೊಂದು ನಿಗಂಟ್ ಪನ್ನೆದರ್. ಕಾರಂತೆರ್ ಮಾತ ಪಾತ್ರೊಲೆಗ್ಲಾ ಒಂಜೇ ರೀತಿದ ವೇಸೊ ಪಾಡ್ಯರೆ ಪೋದು ಸೋತೆರ್. ಅಂಚನೆ ಬಾಗೊತಿಕೆಡ್ಲಾ ಬದಲಾವಣೆ ಮಲ್ತೆರ್. ಇಂಚಾದ್ ಜನೊಕ್ಲ ಬದಲಾವಣೆಗ್ ಒಪ್ಪಂದಿನೆಡ್ಲಾವರ ಕಾರಂತೆರೆ ಯಕ್ಷರಂಗ ದುಂಬೊತ್ತುದು ಪೋಯಿಜಿ. ಆಂಡ ಯಕ್ಷಗಾನೊದ ಚರಿತ್ರೆಡ್ ಮಾತ್ರ ಆರೆನ ಪುದರ್ ಶಾಶ್ವತವಾದ್ ಒರಿಂಡ್.

## ಕಿನ್ಯ ಕತೆಕುಲು

ಕಾರಂತೆರ್ ಕೆಲವು ಕಿನ್ಯ ಕತೆಕುಲೆನ್, ದಿಂಜ ಲೇಖನೊಲೆನ್ ಬರೆತೆರ್. ಕೆಲವು ಪತ್ರಿಕೆಲೆಡ್ ಅಚ್ಚಾತಿನವು ಬೊಕ್ಕ ಬೂಕುದ ಒರುಟು ಬತ್ತೆನವು. 'ಹಾವು', 'ಹಸಿವು', 'ಕವಿಕರ್ಮ', 'ಗ್ಲಾನ', 'ಚಿಕ್ಕ ದೊಡ್ಡವರು', 'ಹಳ್ಳಿಯ ಹತ್ತು ಸಮಸ್ತರು', 'ಮೈಲಿಕಲ್ಲಿ ನೊಡನೆ ಮಾತುಕತೆ', 'ಮೈಗಳ್ಳಿನ ದಿನಚರಿಯಿಂದ', 'ದೇಹಜ್ಯೋತಿಗಳು ಮತ್ತು ಪ್ರಾಣಿ ಪ್ರಬಂಧಗಳು', 'ತೆರೆಯ ಮರೆಯಲ್ಲಿ' ಇಂಚ ಕೆಲವು ಕತೆಕುಲೆನ ಕೋಪೆ ಬೊಳ್ಳುಗು

ಬತ್ತದ. ನರಮಾನಿ ನರಮನ್ಯುಗ್ ಪಗೆಮಾನಿಯಾದ್ ಬದ್ಕಬೆ. ಸ್ವಾರ್ಥೋಗು ಬೋಡಾದ್, ಲಾಭೋಗಾದ್ ತನಡ ಇತ್ತಿನ ಎಡ್ಡೆ ಗುಣೋಕುಲೆನ್ ಮದತ್ದಾದ್ ಬೊಡ್ಡಂದಿ ಗುಣೋಕುಲೆನೇ ತೋಜವೆ ಪನ್ನಿನೆನ್ ಆರ್ ಕತೆಕುಲೆಡ್ ಪನ್ನೆರ್. ಬಡಪತ್ತಾದ ಕರ್ಮೊ, ದುಡ್ಡು ಇತ್ತಿನುಕಲೆ ದರ್ಪೊ, ಸಾಮಾನ್ಯ ಜನೋಕುಲೆ ಅಜ್ಞಾನ, ಜಾತಿ ಪ್ರತಿಷ್ಠೆ, ತಿರ್ತ ಜಾತಿದಕುಲು ಬಂಜ ಬರ್ಪಿನ ರೀತಿ, ತನ್ನ ಯಜಮಾನನ ಮೆಚ್ಚಿಗೆಗಾದ್ ತನ್ನ ಮಗಕೇ ನೋತುದು ಕೆರ್ಪಿ ಅಮ್ಮೆ - ಇಂಚಿನ ಮಾತ ಕರ್ಲ್ ಕತ್ತೆರ್ಯುನಂಚಿನ ದುಃಖದ ಸಂಗತಿಲು ಈ ಕತೆಕುಲೆಡ್ ಮೂಡ್ತು ಬತ್ತದೊ.

‘ಮೈಲಿಗಲ್ಲಿನೊಡನೆ ಮಾತುಕತೆ’, ‘ಹಳ್ಳಿಯ ಹತ್ತು ಸಮಸ್ತರು’, ‘ಮೈಗಳ್ಳಿನ ದಿನಚರಿಯಿಂದ’ ಉಂದು ಮೂಜಿ ಪ್ರಬಂಧೋಲೆನ ಗೊಂಚಿಲ್. ಕಾರಂತೆರ್ ಬರೆಯಿನ ಪ್ರಬಂಧೋಲು ಕತೆಕುಲೆಡ್ ಬೇತೆನೇ ರೀತಿ. ಸಮಾಜೊಡು ತೋಜಿದ್ ಬರ್ಪಿ ಹಾಳ್ ಸಂಗತಿಲೆನ್ ಖಂಡನೆ ಮಲ್ಪಿನ ಬದಲ್ ಅವೆನ್ ಕಾರಂತೆರ್ ಮನೋವೈಜ್ಞಾನಿಕ ರೀತಿಡ್ ತೂತೆರ್. ಮೈಲಿಗಲ್ಲಿನೊಡನೆ ಮಾತುಕತೆಟ್ ಊರುದ ಮೈಲ್ಕಲ್, ಅತ್ತೋಸುದ ಮರ, ಕೆರೆ, ಶಿವಲಿಂಗ, ಉಂದು ಪೂರ ಅವೆನ ಕತೆಕುಲೆನ್ ಪನ್ನ. ವ್ಯಕ್ತಿ ವಿಶೇಷತೆದ ಚಿತ್ರಣೊದ ಮೂಲಕ ಹಳ್ಳಿಯ ಹತ್ತು ಸಮಸ್ತರು ಗೊಂಚಿಲ್ ಒಂಜಿ ಹಳ್ಳಿದ ಪೂರ್ತಿ ನಡಪಿ ಸಂಗತಿಲೆನ್ ಕೊರ್ತೆರ್. ನಮ್ಮ ಸಾಮಾಜಿಕ ಜೀವನೊಡು ನಡಪುನ ಬೇತೆ ಬೇತೆ ರೀತಿದ ಜಾತಿ ಸಂಬಂಧ, ಘರ್ಷಣೆ, ಕಸುಬು, ವ್ಯಕ್ತಿತ್ವೊಲೆನ ಚಿತ್ರಣ ಕೊರ್ಪುನನೇ ನೆನ್ ಬರೆತಿನ ಉದ್ದೇಶೊಂದು ಕಾರಂತೆರ್ ಪನ್ನೆರ್.

## ಕಾದಂಬರಿ

ಕಾರಂತೆರ್ ಯಕ್ಷಗಾನ ಕಲಾವಿದೆ, ಸಿನಿಮಾ ನಿರ್ದೇಶಕೆ, ನಾಟಕಕಾರ, ಪ್ರವಾಸ ಕಥನಕಾರ, ವಿಜ್ಞಾನಿ, ನೃತ್ಯಪಟು, ಕಲಾ ವಿಮರ್ಶಕೆ, ಶಿಕ್ಷಣ ತಜ್ಞ, ಜಾನಪದ ವಿದ್ವಾಂಸ - ಇಂಚ ಆರೆನ ಕಜ್ಜೊದ ಕಳ ಮಲ್ಲ ಮೈದಾನ್. ಮಾತಕಳಟ್ಪಲಾ ಆರ್ ಜತ್ತಾದ್ ಕೆಲಸ ಮಲ್ತಿನಾರ್. ಜೀವನಾನುಭವ ಪಡೆಯಿನಾರ್. ಈತ್ ಮಾತ ಕೆಲಸೊ ಮಲ್ತಿನ ಆರೆನ್ ಸಾಹಿತ್ಯಲೋಕದ ಜನೋಕುಲು ನಿನೆತಿಸಾತ್ ಗ್ ಪನ್ನಿನಿ ಆರ್ ಒರಿ ಕಾದಂಬರಿಕಾರೆಂದ್. ದಾಯೆ ಪಂಡ ಆರ್ ಸುಮಾರ್ 45 ಕಾದಂಬರಿಲೆನ್ ಬರೆತೆರ್. ‘ವಿಚಿತ್ರಕೂಟ’ (1924) ಪನ್ನಿ ಕಾದಂಬರಿಡ್ ಬರೆಯರೆ ಸುರು ಮಲ್ತಿನ ಆರ್ ‘ಅಂಟಿದ ಅಪರಂಜಿ’ ಮುಟ್ಟು ಬರೆವೊಂದೇ ಪೋಯೆರ್.

ಆರೆನ ಕಾದಂಬರಿಲೆಡ್ ಬರ್ಪಿನ ಪಾತ್ರೋಲು ಒಂಜೆದಲೆಕ ಕುಡೊಂಜಿ ಇದ್ಲಿ. ನಮುನೆ ನಮುನೆದ ವೇಸೊಲು. ಕತೆತ ಆಶಯೊಲಾ ಅಂಚನೆ ಒಂಜೊಡ್ಲೊಂಜಿ ಬೇತೆನೆ. ತನ್ನ

ಬದ್‌ಕ್‌ದ ಅನುಭವೋದ ಗುಂಡಿಡ್ಡ್ ಉದಿಯ ಬೆಂದಿನ ಮೂರ್ತಿಲು. ಅಂಚಾದ್ ಕಾದಂಬರಿಲೆಡ್ ವಾಸ್ತವಿಕತೆ ಉಂಡು. ಕಾದಂಬರಿದ ಕತೆ ಮೂಲೇ ನಮ್ಮ ನೆರೆಕರೆಟೇ ಓಲೋ ಕೋಡೆ ಮುರಾನಿಡ್ ನಡತಿಲೆಕ ತೋಜುಂಡು. ಕಾದಂಬರಿಗ್ ಓಟೊ ಬರ್ಪುಂಡು. ಭಾವನೆಲೆನ್ ದೆಂಗ ದೀಪುನ ಕಳುವಾಟಿಗೆ ಕಾರಂತೆರೆಗಿಜ್ಜಿ. ಆರೆನ ಕೊಪೊ, ತಾಪೊ, ಮೋಕೆ, ಸೂಕೆ, ದುಃಖೊ, ದುಗುಡೊ ಒವ್ವೆ ಉಪ್ಪಡ್ ಅವು ಕೂಡ್ಲೆ ಆರೆನ ಪಾತೆರೊಡು, ಮೋನೆಡ್ ತೋಜಿದ್ ಬರ್ಪೆದ್‌ಂಡ್. ಅವ್ವೇ ಚಿತ್ರಣ ಆರೆನ ಕಾದಂಬರಿಲೆಡ್ಲಾ ನೆಗತ್ ತೋಜುಂಡು. ಆರೆಗ್ ಎಡ್ಲೆ ಕೆಲಸೊದ ಮಿತ್ತ್ ನಂಜಿ ಇಜ್ಜಾಂಡ್, ಕ್ರೌರ್ಯೊ ಇಜ್ಜಾಂಡ್, ಕಪಟತನ ಇಜ್ಜಾಂಡ್, ಸೂಕ್ಷ್ಮ ಬುದ್ಧಿ, ತೀಕ್ಷ್ಣ ಬುದ್ಧಿವಂತಿಕೆ ಇತ್ತ್‌ಂಡ್. ಈ ಗುಣೊಡ್ಲಾವರೊನೇ ಕಾದಂಬರಿಲು ಮಾತೆರೆಗ್ಲಾ ಮೆಚ್ಚುಗೆ ಆಪೆದ್‌ಂಡ್. ನರಮಾನ್ಯನ ಬದ್‌ಕ್‌ದ ಓರೆ - ಕೋರೆ, ಉಳ ಮನಸ್ಸಾದ ಗುಂಡಿ - ಎತ್ತರೊನು ಗುರ್ತೊ ಮಲ್ತ್ ಕೊರ್ಪಿನ ಕೆಲಸೊನು ಆರ್ ಕಾದಂಬರಿದ ಮೂಲಕೊ ಮಲ್ತೆರ್. ಕಾರಂತೆರ್ ಒರಿ ವಿಚಾರವಾದಿ. ಪರಂಪರಾಗತವಾದ್ ಬತ್ತಿನ ನಂಬಿಕೆ ಸಂಕೋಲೆದ ಕೊಂಡಿಲು ಬೆಸಿಗೆ ಬುಡೊಂದು ಬರ್ಪಿನ ಕಾಲೊಡು ಪೊಸ ವೈಜ್ಞಾನಿಕತೆದ ಕೊಂಡಿಲು ನನಲಾ ತಯಾರಾದಿಜ್ಯಂದಿನ ಕಾಲೊಡು ಕಾರಂತೆರೆ ಜೀವನ ಕರಿಂಡ್. ಗೋಪಾಲಕೃಷ್ಣ ಅಡಿಗೇರ್ ಪನ್ನಿಲೆಕ “ಶಾಸ್ತ್ರ, ಉಪದೇಶ, ಸಂಪ್ರದಾಯ, ಭಯ-ಭಕ್ತಿ ಇಂಚಿನ ಮಾತ ಅಜ್ಜೆರೆನ ದೊಣ್ಣೆಲು ದಾಂತೆನೆ ಒರಿ ನರಮಾನಿ ಧರ್ಮೊದ ಸಾರೊನು ತೆರಿಯೊಂದು ನೀತಿದ ಅನುಸರಣೆನ್ ಮಲ್ತೊಂದು ಪಿದಯಿದ ಮಾತ ಎಡ್ಲೆಂತಿನ ವಿಚಾರೊಲು ತನ್ನ ಉಲಯೇ ಉಂಡುಂದು ತೆರಿಯೊಂದು ಜೀವನ ಮಲ್ಪೊಲಿ ಪನ್ನಿನೆನ್ ಕಾರಂತೆರ್ ತೋಜದೆರ್. ಬಲಕೆಡ್ ಆವೊಡೊಂದಾಂಡ ನರಮಾನಿ ಆಯ ಉಲಯಿ ಉಲ್ಲಯಿನ ಮಾತ ಶಕ್ತಿಲೆನ್ಲಾ ಬಳಪವೊನೊಡು ಪನ್ನಿ ವಿಚಾರೊನು ನಮ ಕಾರಂತೆರೆಡ್ಲಾ ತೆರಿಯೊನೊಡು. ಕಾರಂತೆರೆ ಕಾದಂಬರಿಲೆಡ್ಲಾ ತೆರಿಯೊನೊಡು”.

“ಯಾನ್ ಎಲ್ಲೆದ ಬದ್‌ಕ್‌ದ ಬಗ್ಗೆ ಚಿಂತೆ ಮಲ್ತಿನಾಯೆ ಅತ್ತ್. ಪ್ರಾರಬ್ಧ ಕರ್ಮ. ಪರಲೋಕೊದ ನಂಬಿಕೆಲೆನ್ ಬುಳೆಪವೊಂದು ಇನಿತ ಬಗ್ಗೆ ತಾತ್ಪಾರ ಮಲ್ತಿನಾಯೆಲಾ ಅತ್ತ್. ಅಂಚಾದ್ ಈ ಲೋಕೊನೇ ಎನ್ನ ರಂಗಸ್ಥಳೊ”ಂದ್ ಪಂಡಿನಾರ್ ಕಾರಂತೆರ್.

ಕಾರಂತೆರ್ ಬರೆತಿನ ‘ನಿರ್ಭಾಗ್ಯ ಜನ್ಮ’, ‘ಸೂಳೆಯ ಸಂಸಾರ’ ಕಾದಂಬರಿಲೆಡ್ ಸಮಾಜೊದ ಬಡಪತ್ತ್ ನೆಗತ್ ತೋಜುಂಡು. ಬೇತೆ ಬೇತೆ ಕಾರಣೊಲೆಡ್ಲಾವರ ಜನೊಕುಲೆಗ್ ಬರ್ಪಿ ದುಃಖೊ, ಮನಸ್ಸಾದ ಚಿಂತೆ, ಪರಿಹಾರ ತೋಜಂದಿ ಸಮಸ್ಯೆಲು - ನೆನ್ನ ಪೂರ ಬಾರಿ ಸೋಕುಡು ಚಿತ್ರಣ ಮಲ್ತ್ ಕೊರೆರ್. ‘ದೇವದೂತರು’ ಡಂಬಾಚಾರೊಡು ಡೋಂಗಿ ಮಲ್ಪುನ ಒಂಜಿ ಕಾದಂಬರಿ. ಸಂಪ್ರದಾಯ ನಿಷ್ಠೆದ ಬಗ್ಗೆ ಕಾರಂತೆರ್ ಈ ಪುಸ್ತಕೊಡು ಗೇಲಿ ಮಲ್ತದೆರ್. ಪುರಾಣೊ ವ್ಯಕ್ತಿಲೆನ್ ಭೂಲೋಕೊಗು



ಕನತ್‌ದೇರ್. ಇತ್ತೆದ ಕಾಲೊದ ಪೊಸ ಪೊಸ ರಾಸಾಯನಿಕ ಅಸ್ತ್ರಲೆನ ಎದ್ರಾಡ್ ಇಂದ್ರನ ವಜ್ರಾಯುಧ, ವಿಷ್ಣುನ ಚಕ್ರ, ಈಶ್ವರನ ತ್ರಿಶೂಲ ದಾಲ ಪ್ರಯೋಜನ ಇದ್ದಿಂದ್ ಪನ್ನೆರ್.

ಕಾರಂತೆರೆ ಕಾದಂಬರಿಲೆಡ್ ವಿಷಯ ವೈವಿಧ್ಯತೆ ಉಂಡು. ಚೋಮನ ದುಡಿ, ಮುಗಿದ ಯುದ್ಧ, ಬೆಟ್ಟದ ಜೀವ, ಕುಡಿಯರ ಕೂಸು ಉಂದು ಮಾತ ಈ ಊರುದ ಬೇತೆ ಬೇತೆ ಜಾತಿ - ವರ್ಗದೊ ಜನೊಕುಲೆನ ಜೀವನ ಚಿತ್ರಣ. ಬೆಟ್ಟದ ಜೀವ ತುಳುನಾಡ್‌ಡುಪ್ಪಿ ಹವ್ಯಕ ಬ್ರಾಣೆರೆನ ಜೀವನ ಹಿನ್ನೆಲೆಡ್ ಬರೆಯಿನ ಕಾದಂಬರಿಯಾಂಡ, ಕುಡಿಯರ ಕೂಸು ನಮ್ಮ ತುಳುನಾಡ್ ಬೆಳ್ತಂಗಡಿ, ಚಾರ್ಮಾಡಿ, ಸುಬ್ರಹ್ಮಣ್ಯ ಪ್ರದೇಶೊದ ಕಾಡ ಬರಿಟ್ ನೆಲೆ ಊರೊಂದುಪ್ಪಿ ಮಲೆ ಕುಡಿಯೆರೆನ ಬಗ್ಗೆ ಬರೆಯಿನ ಕತೆ. ಈ ಕಾದಂಬರಿ ಬೊಕ್ಕ ಮಲೆಯ ಮಕ್ಕಳು ಪನ್ನಿ ಪುದರ್ಡ್ ಸಿನಿಮೊಲ ಆಂಡ್. ಕಾರಂತೆರ್ ತನ್ನ ಮಾತ ಕಾದಂಬರಿಲೆಡ್ಲಾ ತುಳುನಾಡ್ ಸಾಂಪ್ರದಾಯಿಕ ಸಂಸ್ಕೃತಿನ ದೆರ್ತ್ ತೋಜದೆರ್. ಎಡ್ಡೆಂದಿನ ಒವು ಹಾಳ್ ಒವು ಪನ್ನಿನೆನ್ ವಿಂಗಡಣೆ ಮಲ್ತಾದೆರ್. ಚೋಮನ ದುಡಿ ಒಂಜಿ ಕಾದಂಬರಿನ್ ಪತೊಂಡನೆ ಯಾವು ಅವು ಸ್ವಾತಂತ್ರ್ಯಗು ದುಂಬುದ ತುಳುನಾಡ್ ಸಾಮಾಜಿಕ ಪರಿಸ್ಥಿತಿ ಎಂಚ ಇತ್ತ್ಂಡ್ ಪನ್ನಿನೆನ್ ಪಂಡೊಂದೇ ಪೋಪುಂಡು.

ಚೋಮನ ದುಡಿ ಚೋಮ ಒರೈನ ಕತೆ ಅತ್ತ್. ಅಂಚಿನ ಚೋಮನಕುಲು ಈ ನಾಡ್‌ಡ್ ಏತೋ ಜನ ಇತ್ತೆರ್. ಪ್ರತಿ ಹಳ್ಳಿಡ್ಲಾ ಅಂಚಿನ ಏತೋ ಕುಟುಮೊಲಿತ್ತೊ. ಪರಂಪರಾಗತ ಸಾಮಾಜಿಕ ವ್ಯವಸ್ಥೆದ ಒಯ್ಯಾಟೊಡು ತಿಕ್ಕೊದ್ ಇಂಚಿನ ಏತೋ ಕುಟುಮೊಲು ನಾಶವಾದ್ ಪೋತೊ. ಏತೋ ಕುಟುಮೊಲು ಬೇನೆ ತಡೆಯರಾವಂದೆ ಊರು ಬುಡ್ಡು ಪೋತೊ. ಬ್ರಿಟಿಷರ್ ಭಾರತೊಗು ಬತ್ತದ್ ಆಳೊಂದುಪ್ಪಿನ ಪೊರ್ತುಗು ಕೊಡಗು, ಚಿಕ್ಕಮಗಳೂರು ಜಿಲ್ಲೆಲೆಡಿತ್ತಿ ಕಾಫಿ ತೋಟೊ ಕಳಸೊದ ಚಾ ತೋಟೊ ಪೂರಾ ಅಕುಲೆ ಕೈಟಿತ್ತ್ಂಡ್. ಈ ತೋಟೊದ ಕೆಲಸೊಗು ಜನೊಕುಲೆನ್ ಅಕುಲೆಗ್ ಕಮಿಷನ್‌ದ ಮಿತ್ತ್ ಒದಗಿಸದ್ ಕೊರೈರೆ ಮುಲ್ಪದ ಏಜಂಟ್‌ನಕುಲಿತ್ತೆರ್. ಮುಕುಲೆನ್ ಸೇರೆಗಾರ್, ಮೇಸ್ತ್ರಿಲುಂದು ಪನ್ನೆದೆರ್. ಮರಿಯಲೊದ ಪೂರ್ತು ತುಳುನಾಡ್ ಜನೊಕುಲೆಗ್ ಬಾರಿ ಬಡಪತ್ತದ ಕಾಲೊ. ಆ ಕಾಲೊ ತೂದು ಈ ಏಜಂಟ್‌ನಕುಲು ಹಳ್ಳಿ ಹಳ್ಳಿಗ್ ಬತ್ತದ್ ಮುಲ್ಪದ ಪರಿಶಿಷ್ಟ ಜಾತಿದ, ದಲಿತರೆಗ್ ಗಟ್ಟಿಗ್ ಬರೈರೆಗಾದ್ ಎಡ್ವಾನ್ಸ್ ಪಂಡ ಸಾಲ ಕೊರ್ದು ಪೋಪೆದೆರ್. ಆ ಸಾಲ ತೀರ್ಪಯರೆಗಾದ್ ಈ ಜನೊಕುಲು ಆಟಿ ತಿಂಗೊಳು ಕರಿವೆಟಿಗೆ ಗಟ್ಟಿದ ಮಿತ್ತ್ದ ತೋಟೊಲೆಗ್ ಪೋಪೆದೆರ್. ಇಂಚ ಪೋಯಿ ಜನೊಕುಲೆಡ್ ಏತೋ ಜನ ಸಾಲ ತೀರ್ಪಯರೆ ಸಾಧ್ಯ ಆವಂದೆ ಅಲ್ಪನೇ ಶಾಶ್ವತವಾದ್ ಉಂತಿನಕುಲುಲಾ ಉಂಡು. ಮತಾಂತರ ಆಯಿನಲಾ ಉಂಡು. ಈ ಕಾದಂಬರಿಡ್ ಕೂಲಿ ಕೆಲಸೊಗು ಗಟ್ಟಿದ ಮಿತ್ತ್ ಲೆತೊನು ಪೋಪಿನ ಸೇರೆಗಾರೆ ಮನ್ನೇಲೆ, ತೋಟೊದ ಯಜಮಾನಿ ಮಿಂಗೇಲೆ,

ಮುಕುಲೆಡ್ಲಾದ್ ಚೋಮನ ಕುಟುಮೊ ಎಂಚ ದಿಕ್ ಪಾಲಾಂಡ್ ಪನ್ನಿನ ಕತೆ ತೋಜಿದ್ ಬರ್ಪುಂಡು. ಈ ವಿಷಮ ಸಂಬಂದೊದ ಕತೆತ ಮೂಲಕ ಕಾರಂತೆರ್ ಪಾಶ್ಚಾತ್ಯ ಸಂಸ್ಕೃತಿ ಈ ತುಳುನಾಡ್ ಸಂಸ್ಕೃತಿನ ಎಂಚ ಮೆಲ್ಲ ಮೆಲ್ಲನೆ ಕೂಲಿ ಮುಟ್ಟಂದೆ ನಿಂಗೊಂದು ಬತ್ತಂಡ್ ಪನ್ನಿನೆನ್ ತೋಜದೆರ್.

ಚೋಮನ ದುಡ್ಡ್ ನನ ಒಂಜಿ ವಿಚಾರ ಪಂಡ ದಣಿ ಬ್ರಾಣೆ ಸಂಕಪ್ಪಯ್ಯನ ಕುಟುಮೊಗ್ಲಾ ಚೋಮನ ಕುಟುಮೊಗ್ಲಾ ಬರ್ಪಿ ಒಮ್ಮತ ಬೊಕ್ಕ ಸಂಘರ್ಷ. ಕಾಡ್ಡ್ ತಿಕ್ಕುನ ಜೊತೆ ಕಂಜಿಲೆನ್ ಕನತ್‌ದ್ ಚೋಮೆ ಸಾಂಕ್‌ದ್ ಮಲ್ಲೆ ಮಲ್ಪುವೆ. ಆಯಗ್ ಗೇಣಿಗೊಂಜಿ ಮುಡಿ ಕಂಡ ಬೆನೊಡು, ತನ್ನ ಎರ್ಲೆನ್ ಕಟ್ಟಾದ್ ಬೆನ್ನಿ ಮಲ್ಪೊಡು ಪನ್ನಿ ಆಸೆ ಉಪ್ಪುಂಡು. ಆಂಡ ಆನಿದ ಕಾಲೊಡು ಅಸ್ಪೃಶ್ಯ ಜಾತಿದಕುಲು ಸ್ವಂತ ಕಂಡ ಬೇಸಾಯೊ ಮಲ್ಪಿ ಪದ್ಧತಿ ಇಜ್ಜಾಂಡ್. ದನಿಟ ಬೆನ್ನಿಗಾದ್ ಕಂಡೊ ಗೇಣಿಗ್ ಕೊರ್ಲೆಂದ್ ಕೇನುನ ಧೈರ್ಯೊಲಾ ಅಕುಲೆಗಿಜ್ಜಾಂಡ್. ಆಂಡಲಾ ಚೋಮೆ ಧೈರ್ಯ ಮಲ್ತ್ ಕೇಂಡೆ, ಸಂಕಪ್ಪಯ್ಯ ಉಳ ಮನಸ್ಸೊಡ್ ಕೊರ್ಕರೆ ತಯಾರಿಜ್ಜೆರಂದಾಂಡಲಾ ಕೊರ್ಪುಜಿ ಪನ್ನಿ ನಿಷ್ಕರ ಪಾತೆರ ಪನ್ಕರೆ ತಯಾರಾವಂದೆ ಅಪ್ಪೆಡ ಕೇನೊಡು ಪಂಡೆರ್. ಅಪಗ ಅಪ್ಪೆ ಪನ್ನಿ ಪಾತೆರ “ಅಬ್ಬಾ... ಈ ಕರ್ವದಿಗ್ ಬತ್ತಿ ಸೊರ್ಕೇ” ಇಂಚ ಈ ಕಾದಂಬರಿಡ್ ಪರಂಪರೆ ಬೊಕ್ಕ ಪೊಸ ಮರ್ಜಿ ರಡ್ಡ್ಲಾ ಎದ್ರೆದ್ರ್ ಆಪಿ ಪ್ರಸಂಗ ಬರ್ಪುಂಡು. ತುಳುನಾಡ್ಡ್ ಅಸ್ಪೃಶ್ಯರ್ ದುಂಬುದ ಕಾಲೊಡ್ಚಿತ್ತಿ ಮೂಲೊದಕುಲಾದ್ ದನಿನ ಸರ್ವಸ್ವ ಉದ್ಧಾರೊಗಾದ್ ತನ್ನ ನೆತ್ತರ್ ಕುಂದವುನ ಸಂಗತಿನ ಕಾರಂತೆರ್ ತೆರಿಪದ್ ಕೊರ್ಪೆರ್. ಜಾತೀಯತೆ ಮೂಲು ಏತ್ ಗಟ್ಟಿಯಾದಿತ್ತಂಡ್ ಪಂಡ್‌ದ್, ತುದೆಕ್ ಮೀಯರೆ ಪೋಯಿನ ಚೋಮನ ಮಗೆ ನೀಲೆ ಕಯೊಕು ಬೂರ್ದು ಅಡಿಕ್ ಪೋಪಿನೆನ್ ತೂದು ಮೀಂದ್ಯರೆ ತೆರಿನ ಬ್ರಾಣೆರೆ ಜವ್ವನೆ ಒರಿ ಆಯನ್ ಒರಿಪಯರೆಗ್‌ಂದ್ ನೀರ್‌ಗ್ ಜಪ್ಪುನಗ ಬಾಕಿ ಬ್ರಾಣೆರ್ ಆಯನ್ ತಡೆಪುನ ಸಂಗತಿಡ್ ತೆರಿಯುಂಡು. ಬ್ರಾಣೆರ್ ಮಾತ ಮುಟ್ಟಡಾಂಡ್ ಪಂಡಿಲೆಕನೆ ಆ ಬ್ರಾಣಜವ್ವನೆ ನೀರ್‌ಗ್ ಲಾಗಿಡ್ ನೀಲನ ಪುನನ್ ಮಿತ್ತ್ ಕನತ್‌ದ್ ಪಾಡ್ಡ್ ಮಾಯ ಆದ್ ಪೋಪೆ. ಈ ಸಂಗತಿಲು ಪೂರ ಪರಂಪರೆ ಬೊಕ್ಕ ಪೊಸ ಮರ್ಜಿದ ಷರ್ಫಣೆ ಆಪಿನ ಕಾಲೊದ ಪರಿಸ್ಥಿತಿನ ತೋಜವುಂಡು.

ತುಳುನಾಡ್‌ಡಿತ್ತಿ ಕೆಲವು ಜಾನಪದ ನಂಬಿಕೆಲೆನ್ ಈ ಕಾದಂಬರಿಡ್ ಅಲ್ಪಲ್ಪ ದರ್ಶ್ ಪತ್ತದೆರ್. ಪಿದಯಿ ಪಿದಾಡ್ ಪೋನಗ ಓಡೆ ಪೋಪರ್‌ಂದ್ ಕೇನ್ಯರೆ ಬಲ್ಲಿ. ಒಂಜೇ ರೀತಿದ ರಡ್ಡ್ ಸಂಗತಿಲು ನಡತ್‌ಂಡ ಮೂಜನೇ ಸಂಗತಿಲಾ ನಡಪುಂಡು. ಪಟ್ಟ ಸೈಪುನೆ ಪಂಡ ಭೂತೊದ ಪೆಟ್ಟ್ ತಿಕ್ಕಾದ್ ಸೈಪುನೆ ಇಂಚಿನ ಪೂರ ನಂಬಿಕೆಲೆನ್ ಕಾರಂತೆರ್ ತೋಜದೆರ್. ಗುಳಿಗೆ, ಪಂಜುರ್ಲಿ ಬೂತೆಲೆನ ಸಂಗತಿನ ಪನ್ತೆರ್. ಗುರುವನಡೆ ಪಿದಾಡ್

ಪೋಪಿ ಚೋಮ ಪಂಜುರ್ಲಿಗ್ ಅಡ್ಡ ಬೂರಂದೆ ಪೋದು ಮನಸಾಡೇ ಪೋಡಿದ್ ಪಿರಬರ್ಪುನೆ, ಉಂದು ಪೂರ - ಬೂತ ನಂಬಿಕೆ ಮುಲ್ಪದ ಜನೊಕುಲೆನ ನೆತ್ತೆರ್ದೇ ಸೇರ್ದುಂಡು ಪನ್ನಿನೆನ್ ತೆರಿಪವುನ ವಿಷಯೊಲು. ಆತೇ ಅತ್ತ್ ಕಾರಂತೆರೆನ ಮಾತ ಕಾದಂಬರಿದ ಬಾಸೆಲಾ ಕನ್ನಡೊನೇ ಆಂಡಲಾ ಅವು ಮಂಗ್ಲೂರು ಕನ್ನಡ. ತುಳುವೆರ್ ಕನ್ನಡ ಪಾತೆರ್ನಗ ಅಕುಲೆನ ಬಾಸೆದ ದಾಟಿ ಇಂಚ ಉಪ್ಪುಂಡು ಪನ್ನಿನೆನ್ ಕಾರಂತೆರೆ ಕಾದಂಬರಿದ ಬಾಸೆಡ್ ತೆರಿಯೊನೊಲಿ.

ಒಂಜಿ ಹಳ್ಳಿದ ಸಂಪ್ರದಾಯಸ್ಥ ಬ್ರಾಹ್ಮಣ ಕುಟುಮೊದ ಮೂಜಿ ತಲೆಮಾರ್ಡ್ ಕತೆ ಮರಳಿ ಮಣ್ಣೆಗೆ. ಈ ಮೂಜಿ ತಲೆಮಾರ್ಡ್ ಪ್ರತಿನಿಧಿಲಾದ್ ರಾಮ ಐತಾಳೆರ್, ಲಚ್ಚಿ, ರಾಮೆ ಬರ್ಪೆರ್. ಈ ಕಾದಂಬರಿಡ್ ಸಂಸ್ಕೃತ್ಯನುಕರಣ ಬೊಕ್ಕ ಪಾಶ್ಚಾತ್ಯೀಕರಣ ಇಂಚ ರಡ್ಡ್ ಮರ್ಜಿದ ನಡುವೆ ತಿಕ್ಕಾಟ ನಡಪುಂಡು. ನಿಧಾನೊಡು ಪರಂಪರಾಗತವಾದ್ ಬತ್ತಿ ಮರ್ಜಿ ಪಾಶ್ಚಾತ್ಯ ಮರ್ಜಿದಂಚಿ ತಿರುಗುಂಡು. ಪ್ರತಿ ಪಾತ್ರೊಲೆಡ್ಲಾ ದ್ವಂದ್ವ ವ್ಯಕ್ತಿತ್ವ ತೋಜಿದ್ ಬರ್ಪುಂಡು. ಒಟ್ರಾಸಿ ಪನ್ನುನೂಂದಾಂಡ ಈ ಕಾದಂಬರಿಡ್ ನರಮಾನಿ ಪ್ರಕೃತಿದೊಟ್ಟಿಗೆ ಹೋರಾಟ ಮಲ್ತ್ದ್ ಅಕೇರಿಗ್ ಪ್ರಕೃತಿಗೇ ಅಡ್ಡಬೂರ್ದ ಪನ್ನಿನೆನ್ ಮುಖ್ಯ ವಿಚಾರೊ. ಮರಳಿ ಮಣ್ಣೆಗೆ ಕಾದಂಬರಿ ಕಾರಂತೆರೆ ಕಾದಂಬರಿಲೆಡ್ ಹೆಚ್ಚಿ ಪ್ರಸಿದ್ಧಿ ಪಡೆಯಿನ ಕಾದಂಬರಿ. ಉಂದು ಹಿಂದಿ ಇಂಗ್ಲಿಷ್ ಬೊಕ್ಕ ತಮಿಳು ಬಾಸೆಲೆಗ್ ತರ್ಜುಮೆ ಆತ್ಂಡ್.

ಚೋಮನ ದುಡಿ ಅಸ್ಪೃಶ್ಯತಾ ಸಮಸ್ಯೆನ್ ಭೂಮಿ ಸಮ್ಮಂದೊದ ನೆಲೆಟ್ ದೆರ್ತ್ ತೋಜಯಿಲೆಕ ಅಳಿದ ಮೇಲೆ ಕಾದಂಬರಿ ಅರ್ಥ-ಆಧ್ಯಾತ್ಮ-ಪಂಡ ದುಡ್ಡುಲಾ ಪರಲೋಕೊದಾಸೆಲಾ ಎಂಚ ಒಂಚೆಕೊಂಜಿ ವಿರುದ್ಧ ಪನ್ನಿನೆನ್ ತೋಜದ್ ಕೊರ್ಪುಂಡು. ದುಡ್ಡುದ ವಿಲೆವಾರಿಡ್ ನೆರಮನ್ಯನ ಸಮ್ಮಂದೊದ ನೈಜತೆ ದೂರ ಆಪಿನ ಚಿತ್ರಣ ತೋಜಿದ್ ಬರ್ಪುಂಡು. ಈ ಕಾದಂಬರಿಡ್ ವಿಷಮ ದಾಂಪತ್ಯದ ಫಲವಂತಿಕೆ ಎಂಚ ವಿಚ್ಚಿದ್ರ ಶಕ್ತಿಯಾಪುಂಡು ಪನ್ನಿನೆನ್ ತೆರಿಪದೆರ್. ನಮ್ಮ ಬದ್ಕಡ್ ನಮ ದೆತೊನುನವು ಪೂರ ಕಡ. ಕಡಕಟ್ಕಡ್ ದೆತೊನ್ನೆಡ್ ಕೊರ್ನವು ಏಪಲಾ ಕಡಿಮೆ ಆಯರೆ ಬಲ್ಲಿ ಪನ್ನಿ ಭಾವನೆನ್ ಕಾರಂತೆರ್ ಈ ಕಾದಂಬರಿಡ್ ಪನ್ನೆರ್.

ಕನ್ಯಾಬಲಿ, ಮೈಮನಗಳ ಸುಳಿಯಲ್ಲಿ ಬೊಕ್ಕ ಸರಸಮ್ಮ ನ ಸಮಾಧಿ - ಉಂದು ಲೈಂಗಿಕ ಸಮಸ್ಯೆದ ಬೇತೆ ಬೇತೆ ಒರುಲೆನ್ ಪೊಲಬು ಮಲ್ತ್ ಕೊರ್ಪಿ ಕಾದಂಬರಿಲು. ಅವೆನ್ ಇತ್ತಿನೆನ್ ಇತ್ತಿಲೆಕ ಪಂಡ್‌ದ್ ಅಯಿತ ಉಳಮವೊರ್ನು ಶೋಧನೆ ಮಲ್ತಿನ ಕಾದಂಬರಿಲು. ಕಾರಂತೆರ್ ಆರೆನ ಜವ್ವನೊಡು ಸಮಾಜ ಸುಧಾರ್ಥೆಗ್ ಪಿದಾಡ್ಕಗ ಸೊಳೆಲೆಗ್ ಪುಟ್ಟಿ ಜೋಕುಲೆನ್ ಎಡ್ಡೆ ಸಾದಿಗ್ ಕನಯರೆ ಪೊಣ್ಣು ಜೋಕುಲೆಗ್



ಕ್ರಮಬದ್ಧವಾದ ಮದಿಮೆ ಮಲ್ತ್ ಕೊರ್ಯರೆ ಪ್ರಯತ್ನ ಮಲ್ತೆರ್. 'ಕನ್ಯಾಬಲಿ' ಕಾದಂಬರಿಡ್ ವೇಶ್ಯಾ ಸಮಸ್ಯೆದ ಮೂಲೊ - ಅಯಿಕ್ ಉಮೇದ್ ಕೊರ್ಪಿನ ಪರಿಸರ ಸಮಾಜ - ಅರ್ಥದಾಂತಿನ ಕಟ್ಟಾಕಟ್ಟುಳೆ ನೆನ್ನ ಪೂರಾ ಖಂಡನೆ ಮಲ್ತದೆರ್. ಕಂಡನಿ ಸೈತಿನ ಒರ್ತಿ ಪೊಣ್ಣು ಸೂಳೆಯಾದ್ ಎಂಚ ಬದಲಾವಣೆ ಆಯಳ್ ಪನ್ನಿನೆನ್ ಒಂಜಿ ಸಮಾಜ ಸುಧಾರಕನ ದೃಷ್ಟಿಡ್ ತೂತೆರ್. 'ಮೈಮನಗಳ ಸುಳಿಯಲ್ಲಿ' ಕಾದಂಬರಿಡ್ ಒಂಜಿ ವೇಶ್ಯೆನ ಒಡಲ್ ಪೊಗ್ಗುದು ಅಲ್ಪ ಕೆದಕ್ ತೂಪಿನ ಪ್ರಯತ್ನ ಮಲ್ತದೆರ್. ಸೂಳೆಲಾ ಒರ್ತಿ ಪೊಣ್ಣು, ಆಳೆಗ್ಲಾ ಮೈ ಇತ್ತಿಲೆಕ ಮನಸ್‌ಲಾ ಉಂಡು. ಮೈಯೇ ಮನಸತ್ತಾ ಪನ್ನಿನೆನ್ ಸೂಳೆನ ಪಾತ್ರೊದ ಮೂಲಕ ತೆರಿಪದೆರ್. ಈ ಸಮಾಜ ಸೂಳೆನ್ ತೂಪಿನ ರೀತಿ, ಕಪಟ - ಕೊಂಕು, ಸಾಚಾ - ಸಜ್ಜನಿಕೆಲೆನ್ ವಿಮರ್ಶೆ ಮಲ್ತದೆರ್. ಆರೆನ ಕಾದಂಬರಿದ ನಾಯಕಿ ಕೆಸರ್ಡ್ ಪುಟ್ಟಿ ತಾಮರೆ, ಮಣ್ಣಾದುಳೆಯಿದ ಬಂಗಾರ್ ಪಂಡ್‌ದ್ ಪನ್ನಯರೆ ಪ್ರಯತ್ನ ಮಲ್ತದೆರ್. ನರಮಾನ್ಯನ ಲೈಂಗಿಕ ಸಮ್ಮಂದ ಒಂಜಿ ವಿಶೇಷವಾಯಿನ ಶಕ್ತಿ. ನರಮಾನಿ ಬಜಿ ಪಶು ಅತ್. ಆಯನ ಮನಸ್ ಸರೋದೊಟ್ಟಿಗೆ ಏಪಲಾ ಬೆಸೆವೊಂದುಪ್ಪುಂಡು ಪಂಡ್‌ದ್ ಕಾರಂತೆರ್ ಅಭಿಪ್ರಾಯ ಕೊರ್ತೆರ್.

ಹುಚ್ಚು ಮನಸ್ಸಿನ ಹತ್ತು ಮುಖಗಳು ಆರೆನ ಜೀವನ ಚರಿತ್ರದ ಒಂಜಿ ಮೇಲ್ನೋಟ. ಬೊಕ್ಕ ಆರ್ ಸ್ತ್ರೀ ಪಟಲದಿಂದ ಪಂಡ್‌ದ್ ಉಂದುವೇ ರೀತಿದ ಬೂಕು ಬರೆಯೆರ್. ಹುಚ್ಚು ಪನ್ನಿ ಪದೊಕು ಮೂಲು ತುಳುತ ಮರ್ಲ್ ಪನ್ನಿ ಅರ್ಥ ಮಲ್ತೊನೊಡು. ಆಯಗ್ ಆಟದ ಮರ್ಲ್, ಆಯಗ್ ಚಾ ಪರ್ಪಿ ಮರ್ಲ್ ಪಂಡ ಅಯಿಟೇ ಆಯೆ ತಲ್ಲಿನ ಆದ್ ಉಪ್ಪುವೆ ಪನ್ನಿ ಅರ್ಥೊ ಅತ್ತಂದೆ ಆಯೆ ಮರ್ಲ್ ಪತ್ತಾದ್ ಊರೂರು ತಿರ್ಗುವೆ ಪನ್ನಿ ಅರ್ಥ ಅತ್. ಕಾರಂತೆರೆಗ್ ಒಯಿಟ್ ಮಾತ ಮರ್ಲ್ ಇತ್ತಂಡ್ ಪನ್ನರೆ ಸಾಧ್ಯ ಇಜ್ಜಿ. ಆಟ, ನಾಟಕ, ಸಿನಿಮಾ, ದೇಶಸೇವೆ, ಸಾಹಿತ್ಯ, ಕಲೆ, ನಲಿಕೆ, ಚಿತ್ರ, ಶಿಕ್ಷಣ - ಮಾತ ಮರ್ಲ್‌ಲಾ ಕಾರಂತೆರೆಗಿತ್ತಂಡ್. ನಮ್ಮ ಮರ್ಲ್ ನಂಕ್ ಗೊತ್ತಾಪುಜಿ, ಮೂಜೆನೆ ದಾಯಗ್ ಗೊತ್ತಾಪುಂಡು. ಎನ್ನ ಬದ್‌ಕೊಡ್ ಪಿದಯಿ ಉಂತುದು ಯಾನ್ ಎನನ್ ತೂವೊಡು ಪನ್ನಿ ದೃಷ್ಟಿಡ್ ಈ ಕಾದಂಬರಿ ಬರೆಯೆ ಪಂಡ್‌ದ್ ಕಾರಂತೆರ್ ಪನ್ನೆರ್. ಈ ಕಾದಂಬರಿ ಆರೆನ ನಡುಪ್ರಾಯೊಡು ಬರೆಯಿನವು. ಉಂದು ಪರಿಪೂರ್ಣ ಆತ್ಮಜಿ ಪನ್ನಿ ದೃಷ್ಟಿಡ್ ಆರ್ ಬಾಳ್ವೆಯೆ ಬೆಳಕು ಬರೆಯೆರ್. ಈ ಬೂಕುಡು ಆರ್ ಆರೆನ ತಾತ್ವಿಕ ವಿಚಾರೊಲೆನ್ ಚಿಂತನೆ ಮಲ್ತದೆರ್.

ಕನ್ನಡಿಯಲ್ಲಿ ಕಂಡಾತ ವಿಷಮ ದಾಂಪತ್ಯದ ಸಂಗತಿನ ತೋಜವುನ ನನ ಒಂಜಿ ಕಾದಂಬರಿ. ಕಂಡನಿ - ಬೊಡೆದಿ ರಡ್ಡ್ ಜನೊಲಾ ಪಗೆಲಿಡೀ ಬೆನ್ನೆರ್. ರಡ್ಡ್ ಜನೊಟಲಾ ಕರುಣೆ, ಕೋಪ, ದುಃಖೊ ಮಾತ ಗುಣೊಕುಲು ಒಲ್ಲೊ. ಕಂಡನ್ಯನ ಮಿತ್ ಬುಡೆದಿಗ್

ಭಕ್ತಿ ಉಂಡು ಅಂಚನೆ ಪೋಡಿಗಲಾ ಉಂಡು. ಆಂಡ ಮೋಕೆ ಮಾತ್ರ ಇಜ್ಜಿ. ಸಂಪ್ರದಾಯೊದ ನೀತಿಗ್ ಸರಿಯಾದ್ ಅಕುಲು ಬದ್ಕಾಬೆರ್. ಜೋಕುಲು ಆಪ. ಈತೆ ಯಾವೇ? ಬದ್ಕಾದ ಸಂತೋಸು ಅಕುಲೆಗ್ ಓಲುಂಡು? ಉಂದು ಕಾರಂತೆರೆನ ಪ್ರಶ್ನೆ.

ನಂಬಿದವರ ನಾಕ ನರಕ ಕಾದಂಬರಿಡ್ ಅಂತರ್ಜಾತಿ ಮದಿಮೆ ನಡಪುಂಡು. ಆಂಡ ಪೊಣ್ಣುಗ್ ಆಣನ ಬಗ್ಗೆ ಪೂರ್ತಿ ಮಾಹಿತಿ ಗೊತ್ತುದಾಂತೆ ನಡಪುನ ಮದಿಮೆ. ತೂಯಿನ ಪುರ್ಪೊಲೆಡ್ ಪೂರ ಕುಲ್ಯರೆ ಪೋಪಿನ ದುಂಬಿ ತನ್ನ ಕಂಡನಿಂದ್ ಬುಡೆದಿಗ್ ಗೊತ್ತಾನಗ ಆಳಿನ ಉಡಲ್‌ಗಾಪಿನ ಬೇನೆ ಏತ್ ಪನ್ನಿನೆನ್ ಈ ಕಾದಂಬರಿ ತೋಜವುಂಡು. ಕರುಳಿನ ಕರೆ, ಹೆತ್ತಳಾತಾಯಿ, ಒಡಹುಟ್ಟಿದವರು, ಸನ್ಯಾಸಿಯ ಬದುಕು ಉಂದು ಪೂರ ಸಂಸಾರೊಗು ಸಮ್ಮಂದಪಟ್ಟಿನ ಕಾದಂಬರಿಲು. ಕಾರಂತೆರೆನ ಕಾದಂಬರಿಲೆಡ್ ಪೂರ ಸಾಂಚತೆ ಉಂಡು. ದಾಯೆ ಪಂಡ ಆ ಕಾದಂಬರಿಲೆಡ್ ಬರ್ಪಿ ಆಣ್ ಪೊಣ್ಣುಲಾಯಿನ ಪಾರೊತಿ, ಸರಸೋತಿ, ಸರಸಮ್ಮ, ನಾಗವೇಣಿ, ಬೆಳ್ಳಿ, ಕಾವೇರಿ, ಸಾವಿತ್ರಿ, ಲಚ್ಚೆ, ಐತಾಳ್, ಚೋಮೆ, ನರಸಿಂಹ, ಶಿವಪ್ಪೆ, ಶೀನಪ್ಪೆ ಪೂರ ಸುಳ್ಳೊಡ್ಡು ಕುಂದಾಪುರೊ ಮುಟ್ಟದ ಊರುಲೆಡ್ ಪುಟ್ಟು ಬಳತಿನಕುಲು. ಅಂಚಾದ್ ಈ ಮಣ್ಣೊದ ಕಮ್ಮೆನ ಓದುನಕುಲೆ ಮೂಂಕುಗು ಎಡ್ಪುಂಡು. ತುಳುನಾಡ್ ಸಿರಿಕುಲೆನ ನಾಡ್. ಅಂಚಾದ್ ದುಂಬುಡ್ಡಿಂಚಿ ಮೂಲು ಆಣ್ ಪೊಣ್ಣು ಪನ್ನಿ ಭೇದ ಬಾಕಿಕೋಡಿಡ್ ಕಮ್ಮಿ. ಕಾರಂತೆರ್ದಾ ಕಾದಂಬರಿಲೆಡ್ ಆಣ್ - ಪೊಣ್ಣು ನಡುಟೆ ಭೇದ ತೋಜದ್‌ಜೆರ್. ಆಣ್‌ಲೆಡ್ಲಾ ಎಡ್ಡೆಂದಿನಕುಲು ಉಲ್ಲೆರ್. ಪೊಂಜೆವೆಡ್ಲಾ ಉಲ್ಲೆರ್. ಅಂಚನೆ ಹಾಳ್ ಜನೊಕುಲುಲಾ ಉಲ್ಲೆರ್. ಸಂಸಾರೊ ಹಾಳಾಯರೆ ರಡ್ಡ್ ಜನೊಲಾ ಕಾರಣ ಆಪೆರ್ ಪನ್ನಿನೆನ್ ತೋಜದ್ ಕೊರ್ತೆರ್. ಕಂಡನಿ - ಬುಡೆದಿ ರಡ್ಡ್ ಜನೊಲಾ ಮನ ಪಿಂದ್‌ದ್ ನಡತೆರ್‌ಂಡ ಮಾತ್ರ ಎಡ್ಡೆ ಸಂಸಾರ. ಪರಂಪರೆ - ಪೊಸ ಮರ್ಜಿದ ನಡುವೆ ತಿಕ್ಕಾಟ, ಅಹಂಕಾರ, ದುಡ್ಡು, ಅಧಿಕಾರೊ, ಬೇಜವಾಬ್ದಾರಿ, ವಂಚನೆ, ಕೀಳ್‌ಭಾವನೆ, ನಂಬಿಕೆ ಇಂಚ ಒಂಜೊಂಜಿ ಭಾವನೆಲು ಕಂಡನ್ಯ - ಬುಡೆದಿ ನಡುಟು ಬತ್ತಂಡ ಯಾವು ಸಂಸಾರೊದ ಚಕ್ರೊ ಗುಂಡಿಗ್ ಬೂರುಂಡು, ತೇರ್ ಅಡಿ ಮೇಲಾಪುಂಡು.

1978ಡ್ 'ಮೂಕಜ್ಜಿಯ ಕನಸುಗಳು' ಕಾರಂತೆರೆಗ್ ಜ್ಞಾನಪೀಠ ಪ್ರಶಸ್ತಿ ದೆತ್ತ್‌ಕೊರ್ನ್ ಕಾದಂಬರಿ. ಮೂಕಜ್ಜಿನ ಕತೆ ಪಂಡ ಅವು ಆಳಿನ ಒರ್ತಿನ ಕತೆ ಅತ್ತ್. ಅವು ಇಡೀ ಜಗತ್ತ್‌ದ ಕತೆ. ನರಮಾನ್ಯನ ನಂಬಿಕೆ, ನಾಗರಿಕತೆ, ಸಂಸ್ಕೃತಿದ ಪುಟ್ಟು, ಬಳಕೆ, ನಾಶ. ಉಂದೆನ್ ಮಾತ ಈ ಕಾದಂಬರಿಡ್ ತೂವೊಲಿ. ಈ ಕಾದಂಬರಿನ್ ಕಾರಂತೆರ್ ಮುಡೆಯಿನ ವಿಧಾನೊನೇ ಬೇತೆ. ಮೂಕಜ್ಜಿ ವಾಸ್ತವವಾದ್ ಒಂಜಿ ಪೊಂಜೊವು ಅತ್ತ್ ಆಳ್ ಮೂರ್ತಿ ರೂಪೊಡುಪ್ಪಿ ನೆಂಪು. ಆಳೆಗ್ ಮೋನೆಡಿತ್ತಿ ಕಣ್ಣ್ ಮಾತ್ರ ತೋಜುನೆ

ಅತ್ತ್, ಉಲಯಿಡ್ಲಿತ್ತಿ ಕಣ್ಣಾಲಾ ತೋಜುಂಡು. ನಡಪಿ ಸಂಗತಿ ಮಾತ್ರ ತೆರಿಪುನೆ ಅತ್ತ್ ದುಂಬುದ ಪಿರವುದ ಮಾತ ಸಂಗತಿಲಾ ತೆರಿವುಂಡು. ನಮ್ಮ ಜನೊಕುಲು ಪರಂಪರಾಗತ ವಾದ್ ಬುಳೆಪವೊಂದು ಬತ್ತಿ ಕಲ್ಪನೆಲೆನ್ ಕೆದಕ್ದ್ ತೂಪಿನೆ ಮಾತ್ರ ಅತ್ತ್, ಮೂಕಜ್ಜಿನ ವಿಚಾರವಂತಿಕೆ ಆ ಕಲ್ಪನೆಲೆನ್ ಕುತ್ತಕಂಡೆ ಮಲ್ಪುಂಡು. ಅವೆನ್ ಏರ್ಲಾ ಮೆಚ್ಚೊಡಾತೆ. ಈ ಕಾದಂಬರಿಡ್ ನಮ್ಮ ನಾಡ್‌ದ ನಾಲ್ಕೆನ್ ಸಾರೊ ವರ್ಸೊ ಪಿರಾಕ್‌ದ ಧಾರ್ಮಿಕ ನಂಬಿಕೆದ ಕಲ್ಪನೆಲೆನ್ ಆರೆನ ಉಡಲ್‌ಗ್ ತೋಜುಲೆಕ ಮುಡೆತೆರ್. ನರಮಾನ್ಯಗ್ ಜೀವನೋನೇ ಮುಖ್ಯ. ಈ ನಿಲತ ಬದ್ಕ್ ಮಾತ್ರ ಸತ್ಯ. ಈ ಬದ್ಕ್‌ದ ಸುಖೊ - ದುಃಖೊ ಮುಖ್ಯ. ತಾಳ್ಕೆ, ಬದ್ಕೊಡು ಪನ್ನಿ ಚಲೊ, ಈ ಪ್ರಕೃತಿದ ಗುಟ್ಟುನು ಒಪ್ಪೊಂದು ಅಯಿತ ಬೊಲ್ಪುಡೇ ಪೊರ್ಲುಡು ಬದ್ಕುನ ನರಮಾನ್ಯನ ಧೈಯೊ ಆದಿಪ್ಪೊಡು. ಅವು ಮಾನವೀಯತೆದ ಪರಮ ಮೌಲ್ಯ ಪಂಡ್‌ದ್ ಕಾರಂತೆರ್ ಈ ಕಾದಂಬರಿಡ್ ತೆರಿಪದೆರ್. ಅವ್ವೇ ವರ್ಸೊ ಕಾರಂತೆರೆನ ಕಲಾ ಪ್ರಪಂಚಪ್ರಕಟ ಆಂಡ್. ವಾ ಭಾರತೀಯ ಸಾಹಿತ್ಯೊಡ್ಲಾ ಆತ್ಮೇಟ ಅಂಚಿನ ಒಂಜಿ ಗ್ರಂಥ ಬೈದಿಜಿ. ಭಾರತೊದ ಮಹಾಕಲಾವಿದೆ ಕೆ.ಕೆ. ಹೆಬ್ಬಾರ್, ಕನ್ನಡೊಡು ಇಂಚಿನ ಒಂಜಿ ಅಪರೂಪದ ಗ್ರಂಥ ಕೊರಿನ ಕಾರಂತೆರೆನ್ ಅಭಿನಂದನೆ ಮಲ್ತ್‌ದ್ ಉಂದೆನ್ ಓದುನ ಕನ್ನಡಿಗರ್ ಭಾಗ್ಯವಂತೆರ್‌ಂದ್ ಪಂಡೆರ್.

ಧರ್ಮರಾಯನ ಸಂಸಾರ, ಬತ್ತದ ತೊರೆ, ನಿರ್ಭಾಗ್ಯ ಜನ್ಮ, ಇಳೆಯೆಂಬ, ಕನ್ನಡಿಯಲ್ಲಿ ಕಂಡಾತ, ಕೇವಲ ಮನುಷ್ಯರು, ಇದ್ದರೂ ಚಿಂತೆ, ಚಿಗುರಿದ ಕನಸು, ಒಂಟಿ ಧ್ವನಿ ಇಂಚಿನ ಕೆಲವು ಸಂಸಾರೊದ ಚಿತ್ತಾರ ತೋಜವುನ ಕಾದಂಬರಿಲು. ಕೆಲವೆಡ್ ಕಂಡನಿ - ಬುಡೆದಿನ ಮೈಮನಸ್, ಕೆಲವೆಡ್ ಪೊಸ ಮರ್ಜಿ - ಪರ ಮರ್ಜಿದ ತಿಕ್ಕಾಟೊ ನನ ಕೆಲವೆಡ್ ಹಳ್ಳಿದ ಮರ್ಜಿನ್ ಅಡಿಕ್ ಪಾಡುನ ಪೇಂಟೆದ ಬಂಡವಾಳಶಾಹೀ ಮರ್ಜಿದ ಉತ್ಪಾದನೆಲು ಹೆಚ್ಚಾದ್ ತೋಜಿದ್ ಬರ್ಪ.

ಕಾರಂತೆರ್ ಊರು ತಿರ್ಗುನೆಡ್ ಉಸಾರ್. ಊರು ತಿರ್ಗ್‌ದ್ ಬತ್ತಿಸಾತ್‌ಗೊಂಜಿ ಕಾದಂಬರಿ ಬರೆವೊಂದಿತ್ತೆರ್. ಅಪೂರ್ವ ಪಶ್ಚಿಮ, ಅಬೂವಿಂದ ಬರಾಮಕ್ಕೆ, ಪಾತಾಳಕ್ಕೆ ಪಯಣ ಪೂರ್ವದಿಂದ ಅತ್ಯಪೂರ್ವಕ್ಕೆ ಇಂಚಿನ ಕಾದಂಬರಿಲು ಆರೆನ ಪ್ರವಾಸ ಕಥನ ಕಾದಂಬರಿಲು.

ಕಾರಂತೆರ್ ಗಾಂಧ್ಯೆರೆನ ಅನುಯಾಯಿ. ಸ್ವಾತಂತ್ರ್ಯ ಹೋರಾಟ, ಗಾಂಧಿ ತತ್ವ ಪ್ರತಿಪಾದನೆಲಾ ಆರೆನ ಕೆಲವು ಕಾದಂಬರಿಲೆಗ್ ವಸ್ತು ಆತ್‌ಂಡ್. ಔದಾರ್ಯದ ಉರುಳಲ್ಲಿ ನೆಕ್ಕೊಂಜಿ ಎಡ್ಲೆ ಉದಾರ್ಮ. ಕಾರಂತೆರೆನ ಅಭಿಪ್ರಾಯೊಡು ಸ್ವಾತಂತ್ರ್ಯ ಹೋರಾಟ ಪಂಡ ಬಜೀ ಸೈದ್ಧಾಂತಿಕ ಹೋರಾಟ ಅತ್ತ್. ಕ್ರಿಯಾತ್ಮಕ ಹೋರಾಟ. ತಂತಿ ಕತ್ತೆರ್ಯನ, ಪೊಲಿಸ್ ಸ್ಪೇಶನ್‌ಗ್ ಸೂ ಕೊರ್ಪಿನ, ಟಪ್ಪಾಲ್ ಚೀಲೊ ಒಯಿತ್ ಕೊನೊಪುನವತ್ತ್,



ಗಾಂಧ್ಯೆರೆ ಧೈಯ, ಆದರ್ಶೋಲೆನ್ ಪಾಲಿಪೈರೆಗಾದ್ ಸಾಮಾಜಿಕ ಸಂಘರ್ಷ ಮಲ್ಪುನವೇ ಆರೆನ ಉದ್ದೇಶ. ಜೀದಾರ್ಯದ ಉರುಳಲ್ಲಿ ಕಾದಂಬರಿಡ್ ಆಶ್ರಮೊದ ಪುದರ್ಡ್ ವಂಚನೆ, ಸುಲಿಗೆ ಮಲ್ಪಿ ಜನೊಕುಲುಲಾ ಬರ್ಪೆರ್. ಪೊಳ್ಳು ರಾಷ್ಟ್ರೀಯ ವಾದೊದಕುಲುಲಾ ಉಲ್ಲೆರ್. ಪಾರ್ಟಿಗ್ ತಿಕುನ ದುಡ್ಡುಡು ದುಸ್ತೆತೊ ದೆತೊನುನಕುಲು, ಗಂಗಸರ ಪರ್ಪುಜಿಂದ್ ಬಾಸೆ ಪಾಡ್ಡ್ ಗಡಂಗ್ಡ್ ಕುಲ್ಲುನಕುಲುಲಾ ಉಲ್ಲೆರ್.

ಕಾರಂತೆರೆ ಕಾದಂಬರಿಲೆಡ್ ವಾಸ್ತವಿಕತೆ ಉಪ್ಪುನೆಡ್ವಾವರ ಅವು ಸರ್ವಕಾಲಿಕ ಸತ್ಯ ಆದ್ ಒರಿಪಿನವು. ಅವು ಒಂಜಿ ಕಾಲೊಗು ಒಂಜಿ ಊರುಗು ಮಾತ್ರ ಅತ್ತ್ ಮಾತ ಕಾಲೊಡ್ಲಾ ಮಾತ ಕಡೆತ ಜನಜೀವನೊಗ್ಲಾ ಸಮಸ್ಯೆ ನಿವಾರಣೆಗ್ಲಾ ಸಾದಿ ತೋಜವುನವು. ಕಾರಂತೆರ್ ಕಾದಂಬರಿಲೆನ್ ಮನೋವೈಜ್ಞಾನಿಕ ನಿಲೆಟ್ ಮುಡೆದ್ ಸಮಸ್ಯೆ ದಾಯೆ ಪುಟ್ಟುಂಡು ಪನ್ನಿನೆಗ್ ಅಲ್ಪಲ್ಪ ಕಾರಣೊಲಾ ಕೊರೊಂದು ಪೋತೆರ್.

ಜನೊಕುಲೆನ ನಂಬಿಕೆ ಬೊಕ್ಕ ಸ್ವಾರ್ಥೊ ಒಂಜಿ ಊರುನೇ ಎಂಚ ಹಾಳ್ ಮಲ್ಪುಂಡುಂದು ಪನ್ನಿನೆನ್ ಶನೀಶ್ವರನ ನೆರಳಲ್ಲಿ ಕಾದಂಬರಿಡ್ ತೂವೊಲಿ. ಗ್ರಾಮ ದೇವತೆ ಶನೀಶ್ವರೆ ಗ್ರಾಮೊದ ಹಿತರಕ್ಷಣೆ ಮಲ್ಪುಜೆಂದ್ ಗೊತ್ತಾನಗ ಇಡೀ ಗ್ರಾಮೊನೇ ಎಸಳೆಸಲಾದ್ ಪುಡವುನ ಸಂಗತಿ ಈ ಕಾದಂಬರಿಡುಂಡು. ಸಮೀಕ್ಷೆ ಬೊಕ್ಕ ಅಳಿದ ಮೇಲೆ ಕಾದಂಬರಿಲೆಡ್ ಆರ್ ಕೆಲವು ವ್ಯಕ್ತಿಲೆನ್ ದುಂಬು ದೀವೊಂದು ಅಕುಲೆನ ಬದ್‌ಕಾದ ಸಮೀಕ್ಷೆ ಮಲ್ಪುರೆ ತೂತೆರ್. ನರಮಾನಿ ಮಲ್ಪುನ ವಾ ಕೆಲಸೊ ಸಾರ್ಥಕ ಒವು ನಿರರ್ಥಕೊಂದು ದುಡ್ಡುದ ದೃಷ್ಟಿಡ್ ತೂಯರೆ ಬಲ್ಲಿ. ಜೀವನ ಸಾರ್ಥಕ ತೋಜುನ ದೃಷ್ಟಿಡ್ ತೂವೊಡುಂದು ಪನ್ನಿ ಆರೆನ ಅಭಿಪ್ರಾಯೊನು ಈ ಕಾದಂಬರಿಲೆಡ್ ತೋಜದೆರ್. ಇದ್ದರೂ ಚಿಂತೆ ಕಾದಂಬರಿಡ್ ರಡ್ಡ್ ನಮೂನೆದ ಬದ್‌ಕ್ ತೋಜದೆರ್. ಒಂಜಿ ಬೆಂದ್‌ದ್ ಸಾಂಚಾತನ ತೋಜದ್ ನಡಪುನ ಬದ್‌ಕ್. ಕುಡ ಒಂಜಿ ಡೋಂಗಿ ಮಲ್ತಾದ್ ದುಡ್ಡು ಸಂಪಾದನೆ ಮಲ್ಪಿ ಬದ್‌ಕ್. ರಡ್ಡ್ ಬದ್‌ಕ್‌ದ ನಡುವೆ ನಡಪಿನ ತಿಕ್ಕಾಟೊನೇ ಕಾದಂಬರಿದ ಸಾರ. ಪ್ರಸಾರ ಮಾಧ್ಯಮೊಲೆಡ್ ಕೆಲಸ ಮಲ್ಪಿನ ನರಮಾನಿ ಸರಿಯಾಯಿನ ಸಾದಿಡ್ ನಡತ್‌ಚೆರ್‌ಂದಾಂಡ ಅವು ಸಮಾಜೊಗೇ ಕೇಡ್ ಕೊರ್ಪುಂಡು ಪನ್ನಿ ವಿಚಾರೊನು ಆರ್ ಒಂಟಿದನಿ ಕಾದಂಬರಿಡ್ ತೋಜದೆರ್. ಬದ್‌ಕ್‌ಡ್ ತೋಜುನ ನಿಷ್ಠೆ ನಂಬಿಕೆಲು ನಿಧಾನವಾದ್ ಎಂಚ ಬುಳೆವೊಂದು ಪೋಪುಂಡು. ವಿಚಾರವಾದ ಎಂಚ ತರೆ ದೆರ್ಪುಂಡು ಪನ್ನಿ ವಿಚಾರ ಇನ್ನೊಂದೇ ದಾರಿ ಕಾದಂಬರಿಡುಂಡು. ಆರೆನ ಮರಳಿ ಮಣ್ಣೆಗೆ, ಚೋಮನ ದುಡಿ, ಮೂಕಜ್ಜಿಯ ಕನಸುಗಳು, ಸರಸಮ್ಮನ ಸಮಾಧಿ, ಕುಡಿಯರ ಕೂಸು, ಅಳಿದ ಮೇಲೆ, ಮೈಮನಗಳ ಸುಳಿಯಲ್ಲಿ, ಬೆಟ್ಟದ ಜೀವ, ಹುಚ್ಚು ಮನಸ್ಸಿನ ಹತ್ತು ಮುಖಗಳು - ಈ ಕಾದಂಬರಿಲು ಇಂಗ್ಲಿಷ್, ಹಿಂದಿ, ಮರಾಠಿ, ತಮಿಳು, ಮಲೆಯಾಳಂ, ತೆಲುಗು

ಭಾಷೆಲೆಗ್ ತರ್ಜುಮೆ ಆತ್ಂಡ್. ಕೆಲವು ತುಳು, ಒಡಿಯಾ, ಗುಜರಾತಿ, ಬಂಗಾಲಿ ಭಾಷೆಲೆಗ್ಲಾ ತರ್ಜುಮೆ ಆತೊ.

ಕಾರಂತೆರ್ ಒವ್ವೇ ಒಂಜಿ ವಿಷಯೊದ ಪ್ರಚಾರೊಗಾದ್, ಧೋರಣೆ ಪ್ರತಿಪಾದನೆ ಮಲ್ಪಿ ಸಲುವಾದ್ ಕಾದಂಬರಿ ಬರೆಪುಜೆರ್. ಉಕ್ಕಿದ ನೊರೆ, ಮೈಮನಗಳ ಸುಳಿಯಲ್ಲಿ, ಕೇವಲ ಮನುಷ್ಯರು, ಧರ್ಮರಾಯನ ಸಂಸಾರ - ಈ ಕಾದಂಬರಿಲೆನ್ ಓದುನಗ ಅವು ಗೊತ್ತಾಪುಂಡು. ರಡ್ಡನೇ ಮಹಾಯುದ್ಧೊಡ್ಲಾವರ ತೋಜಿನ ದುಡ್ಡು ಬಂಜ ನೈತಿಕ ಪತನದ ಒಂಜಿ ಒರುನು ತೋಜವುನ ಕಾದಂಬರಿ ಜಾರುವ ದಾರಿಯಲ್ಲಿ. ಉಕ್ಕಿದ ನೊರೆ ಕಾದಂಬರಿಡ್ಲಾ ಅವೇ ಕತೆ. ಮೂಜನ್ಮ ಒಂಜಿ ರಾಜಕೀಯ ಕಾದಂಬರಿ. ಕಾರಂತೆರ್ ಜ್ಞಾನಪೀಠ ಪ್ರಶಸ್ತಿ ಪಡೆಯಿನೆಡ್ಲಾ ಬೊಕ್ಕಲಾ ಕೆಲವು ಕಾದಂಬರಿ ಬರೆತೆರ್. ಅದೇ ಊರು ಅದೇ ಮರ, ಗೆದ್ದ ದೊಡ್ಡಸ್ತಿಗೆ, ನಾವು ಕಟ್ಟಿದ ಸ್ವರ್ಗ, ಕಣ್ಣಿದ್ದೂ ಕಾಣರು ಉಂದು ನಾಲ್ ಕಾದಂಬರಿಲೆಡ್ ಆರ್ ವ್ಯಕ್ತಿಚಿತ್ರಣ ಕೊರಂದೆ ಒಂಜಿ ಸಮುದಾಯೊದ ವಿವರಣೆ ಕೊರೊಂದು ಪೋಯೆರ್. ನರಮಾನ್ಯನ್ ಬುಡ್ಡು ಸಮಾಜ ಇಜ್ಜಿ. ಅಂಚ ಸಮಾಜ ಪಂಡಲಾ ನರಮಾನ್ಯರೆನ ಕೂಟ. ಆ ಕೂಟೊ ಸೇರ್ದುಗ ಎಂಚ ಮಾನವೀಯ ಮೌಲ್ಯ ಅಪಮೌಲ್ಯ ಆಪುಂಡು ಪನ್ನಿನೆನ್ ಈ ಕಾದಂಬರಿಲೆಡ್ ತೋಜದೆರ್. ಇಂಚ ಕನ್ನಡ ಸಾಹಿತ್ಯೊಗು ಎಡ್ಡೆ ಎಡ್ಡೆ ಕಾದಂಬರಿಲೆನ್ ಕೊರ್ದು ಕನ್ನಡೊದ ಮಟ್ಟೊನು ದೆರ್ತ್ ಪತ್ತಿನಾರ್ ಕಾರಂತೆರ್.

## ಜಾನಪದೊ

ತುಳುನಾಡ್ ಸಂಸ್ಕೃತಿ, ಜಾನಪದೊತ ಬಗೆಟ್ ದಿಂಜ ಅಧ್ಯಯನ, ಸಂಶೋಧನೆ ಮಲ್ತಿನಾರ್ ಕಾರಂತೆರ್. ಆರ್ ಬರೆತಿನ ಜಾನಪದ ಗೀತೆಗಳು (1966), ಭೂತಾರಾಧನೆ (1976) ಪನ್ನಿ ಬೂಕುಲೆಡ್ ಈ ಸಂಗತಿ ತೆರಿದ್ ಬರ್ಪುಂಡು.

ಜಾನಪದ ಗೀತೆಗಳು ಬೂಕುದ ಪ್ರಸ್ತಾವನೆಡ್ ಆರ್ ಇಂಚ ಬರೆತೆರ್. “ಜಾನಪದ ಗೀತೊಲೆನ್ ಅಭ್ಯಾಸ ಮಲ್ಪೊಡು, ಅನುಕೂಲ ಆನಗ ಬರೆವೊಡು ಪನ್ನಿ ಅಬುಲಾಸೆ ಎಂಕ್ 20-30 ವರ್ಸೊಡ್ಲಾ ದುಂಬೇ ಇತ್ತ್ಂಡ್. ಒರೊ ಯಾನ್ ಬಿಜಾಪುರೊತ ಹಲಸಂಗಿ ಪನ್ನಿ ಊರುಗು ಪೋದಿಪ್ಪುನಗ ಆ ಊರ್ ರಾಮಚಂದ್ರ ಪನ್ನಿ ಒರಿ ಆಣನ ಬಾಯಿಡ್ಲಾ ಕೆಲವು ಲಾವಣಿಲೆನ್ ಕೇಂಡೆ. ಅಯಿಡ್ಲಾ ಬೊಕ್ಕ ಪುತ್ತೂರುಗು ಬತ್ತದ್ ನೆಲೆಯಾಯಿ ಪೂರ್ತುಗು ಈ ಊರುಡು ರೂಢಿಡುಪ್ಪಿನ ಕೆಲವು ಜಾನಪದ ಗೀತೊಲೆನ್ ಮುಲ್ಪದ ಸಾಲೆದ ಜೋಕುಲೆಡ ಪನ್ನಯರೆ ಪ್ರಯತ್ನ ಮಲ್ತೆ. ಮೂಲು ಜೋಕುಲೆ ಕೂಟೊ ನಡತೊಂದಿತ್ತಿ ಸಂದರ್ಬೊಡು ಜೋಕುಲೆಡ್ಲೇ ಕೆಲವು ಕಬಿತೊಲು ಬಂಜ ಇಜ್ಜಂದೆನೇ

ಎಂಕ್ ತಿಕ್ಕಿಯೊ. ಅವೆನ್ ಜೋಕುಲು ಕಲ್ತೊನ್ನರೆಗ್ ಉಮೇದ್ ಕೊರೈ. ಅಯಿಡ್ ಬೊಕ್ಕ ಡಚ್ ಪಂಡಿತೆರೊರಿ ಡಾಕ್ಟರ್ ಅರ್ನಾಲ್ಡ್ ಬಾಕೆಪನ್ನಿನಾರ್ ಈಡೆ ಬತ್ತೆರ್. ಆರ್ ಭಾರತೊದ ಮಾತ ಕೋಡಿದ ಜಾನಪದ ಗೀತೊಲೆನ್ನಾ ಸಂಪೊಲಿತೊಂದು ಬತ್ತಿನಾರ್. ಆರೆನ ಜೊತೆ ಸೇರೊಂದು ಕೆಲವು ಕಡೆಕ್ ಪೋದು ಕನ್ನಡ ಬೊಕ್ಕ ತುಳುತ ಗೀತೊಲೆನ್ ಸಂಗ್ರಹೊ ಮಲ್ಪಿ ಅವಕಾಶ ಎಂಕ್ಲಾ ತಿಕ್ಕೊಂಡ್. ಎನ್ನ ದೋಸ್ತಿ ಮಾಸ್ತಾನಕುಲು ದಿಂಜ ಜನೊ ಎಂಕ್ ಜಾನಪದ ಗೀತೊಲೆನ್ ಸಂಗ್ರಹ ಮಲ್ತ್ ಕೊರೈರ್. ಈ ಸಂಗ್ರಹೊದ ಆಧಾರೊಡೇ ಯಾನ್ ಜಾನಪದ ಗೀತೊಲೆನ ಅಧ್ಯಯನೊ ಮಲ್ತ್. ಗೀತೊ ಬೊಕ್ಕ ಜಾನಪದ ಸಾಹಿತ್ಯೊ ಉದಿಪನ ಪಡೆಯಿನ ರೀತಿ ಎಂಚೆಂದ್ ಎಂಕ್ ಗೊತ್ತಾಂಡ್. ಆಂಡ ಎನ್ನ ಸಂಗ್ರಹೊಡ್ತಿ ಜನಪದ ಗೀತೊಲು ಬಾಯಿ ಮುಚ್ಚಿದೇ ಕುಲ್ಲಿಯೊ. ಅಲ್ಪ - ಮುಲ್ಪ ಕೆಲವು ಕಡೆಟ್ ಭಾಷಣ ಮಲ್ಪುನಗ ಯಾನ್ ಅವೆನ್ ಉಪಯೋಗ ಮಲ್ತೊಂದೆ. ಮಾನವ ಶಾಸ್ತ್ರೊದ ಅಧ್ಯಯನ ಮಲ್ಪೊಡುಂದು ಯಾನ್ ಎನ್ನಿನಗ ಎನ್ನ ಮನಸ್ ಪಾಡ್ತೊದಂಚಿ ತಿರ್ಗೊಂಡ್. ದಿಂಜ ಪಾಡ್ತೊನೊಲು ಎಂಕ್ ಗೋವಿಂದ ಪೈಕುಲೆಡ ತಿಕ್ಕೊಂಡ್. ಆಂಡ ಅವೆನ ಬಗ್ಗೆ ದಿಂಜ ಅಧ್ಯಯನ ಮಲ್ಪಿಯರೆ ಕೆಲವು ಕಾಲೊ ಮುಟ್ಟು ಪುರ್ಸೊತ್ತೇ ಆಯಿಜಿ''. ಉಂದು ತುಳು ಜಾನಪದೊತ ಬಗ್ಗೆ ಆರೆನ ಅಭಿಪ್ರಾಯೊ.

ಜಾನಪದ ಗೀತೆಗಳು ಬೂಕುಡು ತುಳು ಜಾನಪದೊತ ಬಗ್ಗೆ ಆರ್ ಬರೆಯಿನ ವಿಚಾರೊಲು ಇಂಚ ಉಂಡು.

ಸಂಗೀತ, ಶಿಲ್ಪೊ, ಚಿತ್ರಕಲೆ ಕೆಲವೆರೆನ ಪಾಲ್ಗ್ ಕಸುಬು ಆದಿಪ್ಪುನಲಾ ಉಂಡು. ಅವು ಪರಂಪರೆಡ್ ಬತ್ತಿ ಕುಲಕಸುಬು. ತುಳುನಾಡ್ ನಿದರ್ಶನೊಡು ಪನ್ನುಂಡ - ದೈವೊಲೆನ ಪಾಡ್ತೊನೊ ಪನ್ನುನ ಕೆಲವು ಜನೊಕುಲೆನ ಕಸುಬು. ಆ ಕುಸುಬುಡು ನಲಿಕೆಲಾ ಸೇರ್ಪುಂಡು. ನಾಗಾರಾಧನೆಡ್ ಪಾಲ್ ಪಡೆವುನ ವೈದ್ಯರ್ ಕೂಡ ಈ ಕಸುಬುದಕುಲೆ. ದಾಸಯೆರ್ ಕುಲುಲಾ ಅವ್ವೇ ಸಾಲ್ಗ್ ಸೇರ್ಪೆರ್. ಸಾಮ ವೇದ ಪಠನ ನೂದಿರ್ದೊದು ವರ್ಸೊ ದುಂಬುಡ್ಲೇ ಕೆಲವು ಬ್ರಾಹ್ಮಣ ಕುಟುಮೊಲೆಗ್ ಪರಂಪರೆಡ್ ಬತ್ತಿನವು. ಅಕುಲೆನ್ನಾ ಈ ಜಾನಪದ ಕಲಾವಿದೆರ್ ಸಾಲ್ಗ್ ಸೇರ್ಪೊಲಿ.

ಜಾನಪದ ಪಂಡ ಅಯಿಟ್ ಪಾಠಾಂತರ ಉಂಡೇ ಉಂಡು. ಶ್ರದ್ಧೆ, ಅಭ್ಯಾಸೊ, ಬೆನ್ನಾಟೊಡು ಒರಿತೊಂದು ಬತ್ತಿನ ವೈದಿಕ ಸಾಹಿತ್ಯೊದ ಪರಿಶುದ್ಧತೆನೇ ಇತ್ತೆ ಒರಿತಿಜಿಂದ್ ಪನ್ನಗ ಲಂಗು - ಲಗಾಮುದಾಂತೆ ತಲೆ ತಲಾಂತರೊಡ್ ಪರಿತೊಂದು ಬತ್ತಿ ಜಾನಪದ ಗೀತೊಲೆಡ್ ಲೋಪ - ದೋಸೊಲು, ಅಸಬಂದೊಲು ಸೇರ್ಪುಪ್ಪಿನ ಮಲ್ಪ ಸಂಗತಿಯೇ ಅತ್ತ್. ಈ ಕೊರತೆಲೆನ್ ನಮೊ ಅವೆಟ್ ತೂಯೊಂದಾಂಡಲಾ, ನಮ ಕಲ್ಲ್ಡ್ ವಜ್ರ, ಅದಿರ್ಡ್ ಬಂಗಾರ್ ಎಂಚ ಉಂಡುಂದು ನಾಡ್‌ಪತ್ ಬೊನೋ ಅಂಚನೆ ಮೂಲ



ಭಾವನೆನ್ ಸುಲಬೊಡು ಗುರ್ತೊ ಪತ್ಯರೆಗಾಪುಂಡು.

ಉದಾರ್ಮೆಗ್ ಪನ್ನುನೊಂದಾಂಡ ಪಡ್ಡಯಿ ಕಡಲ ಬರಿತ ಕುಂದಾಪುರೊತ ಊರುಲೆಡ್ ದೇವಸ್ಥಾನೊಡು ಜಾತ್ರೆ ಆನಗ ಒಂಜಿ ಓಕುಳಿಗೊಬ್ಬನ ರಿವಾಜಿ ಉಂಡು. ಉತ್ಸವ ಮೂರ್ತಿನ್ ತುಂಬೊಂದು ಪೂಜೆದಾರ್ ಬಲಿ ಬರ್ಪೆರ್. ಬಲಿ ಮುಗಿ ಬೊಕ್ಕ ಓಲೆಗೊ ಸಾಲೆಡ್ ದೇವರೆನ್ ಒಂಜಿ ಎತ್ತರೊದ ಕಟ್ಟೆಡ್ ದೀಪೆರ್. ಅಯಿತ ಎದ್ರೊಂಜಿ ಮಲ್ಲ ಗುಂಡಿ ಉಪ್ಪುಂಡು. ಆ ಗುಂಡಿಗ್ ನೀರ್ ದಿಂಜದುಪ್ಪುವೆರ್. ಆ ಗುಂಡಿಗ್ ಲಾಗ್ಯರೆಗೆಂದೇ ಲೆಪ್ಪುದಿನ ನಾಡವೆರ್ದಕುಲು ಒರಿಯೊರೈ ಗುಂಡಿಗ್ ಲಾಗಿವೆರ್. ಉಂದು ಒಂಜಿ ಕುಸಾಲು, ಮೆರಣಿಗೇಡ್ ಬತ್ತಿನಕುಲು ಭಕ್ತಿರ್ ಮಾತ ಅಪಗ 'ಹೌಂದ್ರಾಯನ ಓಲಗವೋ?' ಪಂಡ್‌ದ್ ಬೊಬ್ಬೆ ಪಾಡುವೆರ್.

ಈ ಹೌಂದ್ರಾಯೆ ಏರ್? ಮೂಲೊಡು ಉಂದು ಸಮುದ್ರರಾಯೆಂದ್ ಇತ್ತಿಪ್ಪೊಡು. ಅವು ಬೊಕ್ಕ ಸೌಂದ್ರ ಆಂಡ್. ಅಕೇರಿಗ್ ಹೌಂದ್ರ ಆಂಡ್, ಉಂದು ವರುಣನ ಪೂಜೆದ ರೂಪಾಂತರ. ಇತ್ತೆ ಅವು ಜಲಕ್ರೀಡೆದ ರೂಪೊಗು ತಿರ್ಗೊಂಡ್. ಈ ಹೌಂದ್ರಾಯನ ನಲಿಕೆಗ್ ಒಂಜಿ ಪದೊ ಉಂಡು. ಆ ಪದೊ ಇತ್ತೆ ಬದಲಾದ್ ಹೌದೇ ರಾಯಾಂದ್ ಆತ್ಂಡ್. ಅಯಿಟ್ ಬೋಂಟೆದ ಕತೆಲಾ ಬರ್ಪುಂಡು. ಒರಿ ಅರಸು ಕೃಷಿನ್ ಹಾಳ್ ಮಲ್ಪಿ ಕಾಡ ಮುರ್ಗೊಲಾಯಿನ ಪಂಜಿಲೆನ್ ಬೋಂಟೆ ಮಲ್ತೆ ಪನ್ನಿನವೇ ಕತೆತ ವಿಷಯೊ.

ಈ ಪ್ರಾಂತದ ಕೈತಲ್ದ ಊರುಡು (ತುಳುನಾಡು) ಕೃಷಿತ ಕೆಲಸೊಗು ತೊಂದರೆ ಕೊರ್ಪಿ 'ಪಂಜಿ' ಒಂಜಿ ದೈವ. ಅಯಿನ್ ಒಲಿಪವೊನುಡು. ಆ ಪಂಜುರ್ಲಿ ಬೂತೊದ ಕತೆಲಾ ಹೌಂದ್ರಾಯನ ಕತೆಟಿತ್ತಿಲೆಕ, ಬೋಂಟೆಡೇ ಮುಕ್ತಾಯ ಆಪುಂಡು. ಹೌಂದ್ರಾಯನ ಓಲಗ ಪದ ಪಂಡ್‌ದ್ ಕೆಲವು ಜಾತಿದಕುಲು ತುಳಸಿ ಪೂಜೆಗ್ಲಾ ನಲಿಪುವೆರ್. ಇಂಚ ವರುಣನ ಆರಾಧನೆನೇ ಮಾಯಕ ಆದ್, ನನ ದಾನೆನೋ ಸೇರೊಂದು ಪೋಂಡು. ಅಕೇರಿಗ್ ಈ ಪದ ಪನ್ನಿ ಸಂದರ್ಬೊಲಾ ಬದಲಾಂಡ್. ಒಂಜಿ ಊರುದ ಸಾಮಾಜಿಕ ಬೊಕ್ಕ ನಿತ್ಯ ಕರ್ಮೋಲೆನ ರೀತಿ ಬದಲಾವಣೆನೇ ನೆಕ್ಕ್ ಮಾತ ಕಾರಣ.

ಪಾಡ್ಡನ ಪಂಡ ದೈವೋಲೆನ ಆರಾಧನೆದ ಪೂರ್ತು ಪನ್ನಿ ಸುಲೇಕೊಲು. ಬಾರಿ ಪಿರಾಕ್‌ಡ್ ನಡತ್‌ಬತ್ತಿನ ಸಂಸ್ಕಾರ. ದೈವೋಲೆನ್ ನಂಬುನ ಜನ ತುಳುನಾಡ್‌ಡ್ ಬೊಕ್ಕ ಕೇರಳಡ್ ಮಸ್ತ್ ಉಲ್ಲೆರ್. ಪಾಡ್ಡನೊಲು ಒಂಜಿ ಬಗೆತ ಗೀತೊಲು. ಈ ಪಾಡ್ಡನೊಲೆನ್ ಅಭ್ಯಾಸ ಮಲ್ತೊಂಡ ಮಾನವ ಶಾಸ್ತ್ರ ಅಧ್ಯಯನ ಮಲ್ಪುರೆ ದಿಂಜ ಮಾಹಿತಿ ಒದಗ್‌ದ್ ಬರು.

ಕಡಲಬರಿತ ಜನ ದೇವರೆನ ಸಂಖ್ಯೆಡ್ ಎಚ್ಚ ಬೂತೊಲೆನೇ ಆರಾಧನೆ ಮಲ್ಪುವೆರ್. ಕನ್ನಡ ಪಾತೆರ್ನಕುಲು ಆರಾಧನೆ ಮಲ್ಪುನ ಬೂತೊಲು ಪಂಡ ಜಟ್ಟುಗ, ಬೊಬ್ಬರ್ಯ, ಮಾಣಿ, ಉಂಬಲ್ಲಿ, ಹಾಯ್ಲುಳಿ, ಚಿಕ್ಕು, ದೊಡ್ಡ ಚಿಕ್ಕು - ಉಂದು ಪೂರ. ತುಳು ಪಾತೆರುನ

ಜನೊಕುಲೆನ ಆರಾಧ್ಯ ದೈವೊಲು ಪಂಡ ಪಂಜುರ್ಲಿ, ಕಲ್ಲುರ್ತಿ, ದುಗ್ಗಿಲ್ಲಾಯ, ಧೂಮಾವತಿ, ಕಲ್ಲುಡೆ, ಜುಮಾದಿ, ಬೊಬ್ಬರ್ಯೆ, ಕೊಡಮಂತಾಯೆ, ಲೆಕ್ಕಿಸಿರಿ - ಇಂಚೆ ಏತೇತೋ ಭೂತೊಲುಲ್ಲ. ತುಳುನಾಡ್‌ದ ದೈವೊಲೆನ ಸ್ಪಷ್ಟವಾಯಿನ ಕತೆ ಉಪ್ಪಿನ ಪಾಡ್ಡನೊಲೆನ್ ದೈವೊದ ಅರಾಧನೆದ ಪೂರ್ತುಡ್ ಪನ್ನೆರ್. ಒಂಜಿ ಪಾಡ್ಡನ ಪಂಡ ಅವು ಸುಮಾರ್ ರಡ್ಡ್ - ಮೂಜಿ ಗಂಟೆ ಪಂಡೊಂದು ಪೋಪಿನಾತ್ ಉದ್ದೊ ಉಪ್ಪುಂಡು. ಉದಾರ್ಮೆಗ್ ಕಾಂತು ನೆಕ್ರಿ ಭೂತೊದ ಪಾಡ್ಡನ ಇಂಚೆ ಸುರು ಆಪುಂಡು.

ಮಾಯೆಡ್ ಪಡಾವು ಬತ್ತಂಡ್  
 ಪಣಂಬೂರು ತಾನೊದ ಒತ್ತಗ್  
 ಮಾಯದ ಪಡಾವು ಒಂದಂಡ್ ||  
 ಪಣಂಬೂರು ಸಾರಾಳ್ ಕೂಡಿಯೆರ್  
 ಪಣಂಬೂರು ಬೂಡುಡು ಕೂಡಿಯೆರ್  
 ಇಂದೊಂಜಿ ಪಡಾವು ಬತ್ತಂಡ್ ಪಂಡ್‌ದ್  
 ಸೋದನೆ ತೂಯೆರ್  
 ಸೋದನೆ ಮಲ್ಪುನಗ ಮಾಯದ ಪೆಟ್ಟಿಗೆ  
 ಮಾಯದ ಪಡಾವುಡು ತೋಜಿಂಡ್  
 ಮಾಯದ ಪೆಟ್ಟಿಗೆ ತುಂಬಯೆರ್  
 ಪಣಂಬೂರು ಬೂಡುಗು ತುಂಬಯೆರ್  
 ಚಾವಡಿ ನಡುಟು ದೀಯೆರ್  
 ಪೆಟ್ಟಿಗೆದ ಬಾಯಿ ದೆತ್ತೆರ್  
 ತೂಯಿನ ಆಯನ ಕಣ್ಣ್ ಪುಡಾಂಡ್  
 ಕೇಂಡಿನ ಆಯನ ಕೆಬಿ ಪುಡಾಂಡ್  
 ಪಣಂಬೂರ ಕಾವೇರಪ್ಪೆ  
 ಯೆಚ್ಚಿದ ಬಂಟೆ ಬತ್ತೆ  
 ಉಂದು ದಾನೆ ಚೋದಿಗ ಅಂದ್‌ದ್  
 ಅಳವಳಿ ಪಂಚಾಂಗೊಡ್ ಕೇಂಡೆರ್  
 ಮಾಯದ ಪಡಾವುಡು ಬತ್ತಿಂಚಿ ಬೂತ  
 ಪಣಂಬೂರು ಬೂಡುಡ್  
 ಗೊಜ್ಜರ ಬನೊಕುಲೆ ಬರಿಕ್  
 ಬಂಗಾರ ಕಲೊಕು ಸಿಂಗಾರ ಬತ್ತಿಂಚಿ ಬೂತೊ

ಉಂದು ಪಣಂಬೂರು ಪನ್ನಿ ಕಡಲಬರಿತ ಊರುದ ದೈವೊದ ಕತೆ. ಆಡೆಗ್ ಬತ್ತಿ ಒಂಜಿ ಪೊಸ ದೈವೊ ಕಾಂತು ನೆಕ್ರಿ ಪನ್ನಿ ಆಣ್ ಬೂತೊ. ಅವು ಪಡಾವು (ಹಡಗ್)ಡು ಎಂಚೆ ಬತ್ತಂಡ್‌ಂದ್ ಈ ಪಾಡ್ಡನೊಡು ತೆರಿದ್ ಬರ್ಪುಂಡು. ಬೂತೊದ ಕಾರಣಿಕೊದ ಕತೆ ದುಂಬುದ ಭಾಗೊಡುಂಡು.

ತುಳುನಾಡ್ ಪಾಡ್ಡನೊಲು ಮತೀಯ ಆಚರಣೆಲೆನ ಅಂಗ ಭಾಗ ಆದ್ ಪುಟ್ಟಿನ ಕತೆಕುಲು. ನೆನ್ನ್ ಸಂಧಿಂದ್ಲಾ ಪನ್ನೆರ್. ಇಂಚ ರೂಢಿಡ್ ಏತೋ ಕಬಿತೆಲುಲ್ಲೊ. ಮತ ಸಂಬಂಧದಾಂತಿನ ಪದೊಕುಲುಲಾ ಉಲ್ಲೊ. ಭೂತಾರಾಧನೆದ ಪೂರ್ತುಗತ್ತಂದೆ ಬಜೀ ಕತೆ ಕೇನ್ಯರೆಗ್‌ಂದೇ ಅವೆನ್ ಪನ್ನುನೆಂದ್ಲಾ ಉಂಡು. ದನಿಕೆದ ಕೆಲಸ ಮಲ್ಪುನಗ ಮೆಯಿತ ದನಿಕೆ ಕಳೆಯರೆಗಾದ್, ಉಡಲ್ದ ಬೇಜಾರೊ ಕಳೆಯರೆಗಾದ್ ಈ ಪದೊಕುಲೆನ್ ಪನ್ನುನೆಂದ್ಲಾ ಉಂಡು. ಇಂಚಿನ ಕಬಿತೆಲೆಡ್ ಅಯಿತ ಗೀತ - ಶರೀರೊ ಕೆಲಸೊದ ಲಕ್ಷಣೊಗು ಸರಿಯಾದ್ ರೂಪೊ ತಾಳುಂಡು. ಮುಖ್ಯವಾದ್ ಪದೊತ ಸಾಲ್ - ಸಾಲ್‌ದ ರಾಗೊದ ತೆರೆ - ಉಂದು ಮಾತ ಮಲ್ಪಿ ಕೆಲಸೊದ ಲಯೊಕು ಸರಿಯಾದ್ ಸೃಷ್ಟಿ ಆದುವುಂಡು.

ಕೆಲಸೊದ ಪದೊಕುಲೆನ ಮುಖ್ಯ ಲಕ್ಷಣ ಪಂಡ ಅವು ರಾಗ ಲಯೊಕುಲಾ ಕೆಲಸೊದ ಪೂರ್ತುಗು ಸರೊಡು ಆಪಿನ ಒಂಜೇ ಪಿರ್ಕಾರೊದ ಕುರ್ಕಾಟೊಗ್ಲಾ ಸಮ ಪೋಪಿನವು. ಒಂಜೇ ಸಾಲ್‌ದ ಪಲ್ಲವಿ. ಅಯಿಕ್ ಮಾತ್ರ ಪ್ರತ್ಯೇಕ ಅರ್ತೊ ಉಪ್ಪುಜಿ. ಕಂಡೊಡು ನೇಜಿ ನಡ್ಕಗ ಈ ನಾಟಿ ಪದೊಕುಲೆನ್ ಪನ್ನೆರ್. ಒರಿ ಪದ ಪನ್ನಗ ಬಾಕಿದಕುಲು ಪಲ್ಲವಿನ್ ಪ್ರತಿ ಸರ್ತಿ ಒಟ್ಟಿಗೆ ಪಂಡ್‌ದ್ ಸೊರ ಸೇರವೆರ್.

ಹೋಯಿಯಾ ||

ಮಾತೆರ್ಲಾ ಪನಿ || ಹೋಯಿಯಾ

ಗಟ್ಟದ ಮಿತ್ತ್ || ಹೋಯಿಯಾ

ಈ ಊರ ಬಾಲೆ || ಹೋಯಿಯಾ

ಅಟ್ಟದ ಮಿತ್ತ್ || ಹೋಯಿಯಾ

ಬಂಗಾರ್ಡ್ ಓಲೆ || ಹೋಯಿಯಾ

ಬೀರ ಸಾಲೆ || ಹೋಯಿಯಾ

ಗಂಧ್ ಸಾಲೆ || ಹೋಯಿಯಾ

ಓ ಬೀರ ಸಾಲೆ || ಹೋಯಿಯಾ

ಓ ಗಂಧ ಸಾಲೆ || ಹೋಯಿಯಾ

ಓ ರಾಜ ಕಯಮೆ || ಹೋಯಿಯಾ



ಓ ದಕ್ಕಯ್ಯ ಬಲಯೆ || ಹೋಯಿಯಾ

ಓ ದಮ್ಮಯ್ಯ ಬಲಯೆ || ಹೋಯಿಯಾ

ಓ ನಾಟಿದ ಕೆಲಸ || ಹೋಯಿಯಾ

- ಇಂಚ ದುಂಬು ಪೋಪುಂಡು.

ನಮ್ಮ ಕಡಲ ಬರಿಟ್ ಓಡೊದಕುಲು ಉಪ್ಪುವೆರ್. ದೇಶ - ಪರದೇಶೊಲೆಗ್ ಕಪ್ಪಲ್ ಕೊಂಡೊದು ಪೋಪೆರ್. ಈ ಕಪ್ಪಲ್ ನೀರ್ಗ್ ನೂಕ್ಕರೆ ಕೆಲವೆರ್ ಬೆರಿಕೊರೊಡಾಪುಂಡು. ಒಂಜೊಂಜೇ ಉಸುಲುಗು ಕಪ್ಪಲ್ ನೂಕುದು ನೀರ್ಗ್ ಒಪ್ಪವೊಡು. ಇಂಚ ನೂಕುನಗ ಒಂಜಿ ಗುಂಪುದಕುಲು 'ಯಾರೆಬೀ' ಪನ್ನೆರ್. ಈ ಪದೊ ಮುಸಲ್ಮಾನೆರೆನ ಪದೊ. ಅಂಚಾದ್ ಬಾಕಿದಕುಲು ಸೊರೊ ಸೇರ್ದ್ 'ಯಾ ಅಲ್ಲಾ' ಪಂಡ್‌ದ್ ಪನ್ನೆರ್.

ಯಾ ಅಲ್ಲಾ ಯಾರೆ ಬೀ

ಯಾ ರಬೀ ಬ್ಯಾರಿಡೋ

ಒಂಜಿ ನಾನ ಅಪ್ಪೆಗ್

ಅಪ್ಪೆ ನಾನ ಉಲ್ಲೆರೆಡೋ

ಒಂಜಿ ಮಗೆ ಉಲ್ಲೆರೆಡೋ

ಸೇಕುಲ್ಲ ಸೈಯದು

ಅಮ್ಮೆನಾನ ಉಲ್ಲೆರೆಡೋ

ಸೇಕು ಸಯ್ಯದ್ ಅರಬೀ ಬ್ಯಾರಿನ ಮಗೆ. ಆ ಮಗನ ವಿದ್ಯಾಭ್ಯಾಸ, ವ್ಯಾಪಾರೊ, ವ್ಯಾಪಾರೊಗಾದ್ ಕಪ್ಪಲ್ ಕಟ್ಟುವನೆ ಪರವೂರುಗು ಪೋಪಿನೆ. ಅಲ್ಪಡ್ಲೊರ್ತಿ ಬೀಬಿನ್ ಮದ್ಮೆ ಆದ್ ಕನಪುನೆ - ಇಂಚ ಕತೆ ದುಂಬು ಸಾಗುಂಡು. ಕತೆ ಮುಗಿನಗ ಕಪ್ಪಲ್ ನೀರ್ಗ್ ಸೇರುಂಡು. ತುಳುನಾಡ್‌ಡ್ ಇಂಚಿನ ಕಬಿತೆಲೆನ ರೂಪ ವೈವಿದ್ಯ ದಿಂಜ ಉಂಡು. ಬಾರಿ ಬಾರಿ ಪೊರ್ಲುದ ನಾಟಿದ ಪದೊಕುಲು ತುಳುಟು ಉಲ್ಲೊ.

ಜಾನಪದ ಗೀತೆಲೆಡ್ ಭಾವಗೀತೆಲುಲಾ ಉಲ್ಲೊ. ಬಾರಿ ದುಂಬುದ ಒಂಜಿ ಸಿಂಗಾರ ಪದ ಇಂಚ ಉಂಡು.

ಆಯೆರೆಟ್ ಯೀ ಉಲ್ಲ ಈಯೆರೆಟ್ ಯಾನುಲ್ಲೆ

ನಿಕ್ಕೊ ಎನಟ ಮನಸಾಂಟ ಸುದೆ ಮೀಂದ್‌ತ್ ಬಲ್ಲಾ

ಇಂಚಿನ ಕಬಿತೆಲು ಕನ್ನಡೊಡ್ಲಾ ದಿಂಜ ಉಲ್ಲೊ.

“ಆಚೆ ಕರೆಯಲಿ ನೀನು, ಈಚೆ ಕರೆಯಲಿ ನಾನು | ಭಾಷೆಯ ಕೊಡು ಹೆಣ್ಣೆ || ಬಲಗೈಲಿ”  
ಇನೆ ಮೋಕೆಡಿತ್ತಿ ಆಣ್ ಪೊಣ್ಣಲೆನ ನಡುಟೆ ಒಂಜಿ ಸುದೆ ಅಡ್ಲೊ ಬರ್ಪಿನವು ಸಾಮಾನ್ಯ.  
ಉಂದು ಮಾತ ಕೋಡಿಡ್ಲಾ ಇತ್ತಿನವೆ.

ನಮ್ಮ ಊರುದ ಒಂಜಿ ಮಾಕಟೆ ಪೊಣ್ಣನ ಬಗ್ಗೆ ಒರಿ ತುಳುವೆ ಇಂಚ ಪದೊ ಮುಡೆತೆ.

ಆಳ್ ಪಾಣೆರ್ ದೂಮಪ್ಪಣ್ಣನ ಮಗಳಾಲ್

ಆಳ್ ಪುತ್ತೂರ್ ಕೊರಗಪ್ಪಣ್ಣನ ಮರ್ಮಳಾಲ್

ಆಳೆ ಕಂಡನ್ಯನ ಇಲ್ಲುಂಡು ಗುಂಡೂರುಡು

ಆಳೆ ಮಿಂಡೆರೆನ ಇಲ್ಲುಂಡು ಮುಂಡೂರುಡು

ಆಳ್ ಸುತ್ತಿನ ಸೀರೆ ಉಂಡು ಪುತ್ತೂರುಡು

ಆಳ್ ಪಾಡಿನ ರವಕೆ ಉಂಡು ರಾವೂರುಡು

ಆಳ್ ಕೋತಿನ ಕೊಪ್ಪು ಉಂಡು ಉಪ್ಪೂರುಡು

ಇಂಚ ಪುದರ್ ಪಡೆಯಿನ ಕುಲೊಟು ಪುಟ್ಟಿನ ಆಳೆನ ಮೂಲೊ - ಕೀರ್ತಿ ಬಾರಿ ಪುಗರ್ತೆ ಪಡೆತ್ಂಡ್. ಪತ್ತಾ ಊರುಲೆಡ್ ಆಳೆನ ದುಸ್ತೆತ, ಪದ್ವೆಯಿ ಬಂಗಾರ ಪದ್ರಾದ್ಂಡ್ ಪಂಡ್‌ದ್ ವರ್ಣನೆ ಮಲ್ಪುವೆ. ಇಂಚಿನನೇ ಪದ ಹಲಸಂಗಿದ ಲಾವಣಿಕಾರೆಲಾ ಪಂಡೆ. “ಹೆಣ್ಣಸಲ ಜಾತ ಪದ್ಮಿನಿ| ಸುರತ ಚಂದ್ರಣಿ | ಹೊಂಟೆ ನಾಗಿನೇ ||”

ಪಂಡ್‌ದ್ ರಾಗ ವ್ಯೋತೆ.

ಮೇಲ್ನೋಟೊದ ವಿಮರ್ಶೆಗಾದ್ ಜಾನಪದ ಗೀತೆಲೆನ್ ಮತೀಯ, ಕತೆ, ಕಬಿತೆ, ಕೆಲಸೊದ ಪದೊಕುಲು ಪಂಡ್‌ದ್ ಅಜಕಲ ಪಾಡ್‌ಂಡಲಾ ಈ ಸಾಲ್‌ಗ್ ಸೇರಂದಿನ ನನಲಾ ಏತೋ ಉಲ್ಲೊ. ಕೆಲವು ವಸ್ತುಲೆನ ಪುದರ್ ಲೆಪ್ಪರೆಗಾದ್ತಿನ, ಕೆಲವು ಬಜೀ ಸಿಂಗಾರೊ. ತುಳುನಾಡ್ ಒಂಜಿ ಕಬಿತೆಡ್ ಒರ್ತಿ ಪೊಣ್ಣು ಇಸ್ಪೆರೆನ್ ಲೆತ್ತ್‌ದ್ ಪಡ್ಡಯಿ ಪೋಯಿಂಡ್ ಪನ್ಪಲ್. ಪಡ್ಡಯ್ಯೂಡಲುಂಡು. ಅಲ್ಪ ಮೀನುಂಡು. ಪತ್ತುನ ಆಸೆ ಆಳೆನವು.

“ಓ ಮನಂಗೋ, ಓ ಚೆನಂಗೋ, ಪಡ್ಡಯಿ ಪೋವಂತಾಯಿಜೇ,

ಎಟ್ಟಿ ತಿನಂತೆ ಕರೀಜೆ”

ಇಂಚ ಈ ಪದೊ ಎಟ್ಟಿಡ್ ಸುರು ಆದ್ ಬೇತೆ ಬೇತೆ ಮೀನುಲೆನ ಪುದರ್ಲೇ ದುಂಬು ಸಾಗುಂಡು. ಪನ್ನಿನಕುಲೆಗ್ ಏತ್ ಮೀನಾತ ಪುದರ್ ಗೊತ್ತುಂಡಾ ಆಡೆ ಮುಟ್ಟಿ ಕೊನೊವೊಲಿ.

ನಮ್ಮಲ್ಪ ಪ್ರಚಾರೊಡುಪ್ಪಿನ ಜಾನಪದ ಗೀತೊಲೆನ ಸಾಹಿತ್ಯ ಇಂಚಿನ ಕಾಲೊಡೇ ಉಂಡಾಂಡ್‌ಂದ್ ತೆರಿಯುನ ಬಂಜ. ಆಯಿಟುಪ್ಪಿನ ಬೇತೆ ಬೇತೆ ವಿಷಯೊಲೆಗ್, ಭಾವನೆಲೆಗ್, ಕಲ್ಪನೆಲೆಗ್ ಅವಕಾಶ ಮಲ್ತ್ ಕೊರ್ತಿನ ಸಂಗತಿಲು ಬೊಕ್ಕ ಸಂದರ್ಬೊಲು ವಾ ಕಾಲೊದವು ವಾ ಪ್ರಾಂತ್ಯೊದವು, ವಾ ಜನೊಕುಲೆನವು, ಎಂಚಿನವು ಪನ್ನಿ ವಿವರಣೆಲೆನ್

ನಮ ಚರಿತ್ರೆ ಬೊಕ್ಕ ಭೂಗೋಳದ ದೃಷ್ಟಿಡ್ ನಾಡೊಡಾಪುಂಡು. ಅವೆನ್ ತೆರಿಪವುನ ಸಾಕ್ಷಿಲು ಅವ್ವೇ ಪದೊಕುಲು ಪ್ರಚಾರೊಡುಪ್ಪಿನ ಜನೊಕುಲೆಡ್ ಒರಿದುಪ್ಪರೆಲ ಯಾವು. ದಾಲ ಒರಿಯಂದೆ ಅರಿದ್ ಪೋದುಪ್ಪರೆಲ ಯಾವು. ಲಿಪಿನ್ ಬಳಕೆ ಮಲ್ಪಂದೆ, ಬಜೀ ಜನೊಕುಲೆನ ಬಾಯಿಡ್ ಕೆಬಿಕ್ ಪರಿತೊಂದು ಬತ್ತಿನಂಚಿನ ಸಾಹಿತ್ಯ ರೂಪೊಲೆನ ಬಾಸೆಲಾ ಬದಲಾಪುಂಡು. ಮೂಲ ರೂಪೊನು ಕಳೆವೊಂದು ಇಂಚಿಪದ ಶಬ್ದೊಲು ಸೇರೊನ್ನೊ. ಕಲ್ತಿನ ಪದೊಟು ಒಂಜಿ ಸಬ್ದೊ ಮದತ್‌ದ್ ಪೋಂಡ ಪದೊ ಪನ್ನಿನಾಯೆ ಆಡೆಗ್ ಆಯಗ್ ತೆರಿನ ಬೇತೆ ಒಂಜಿ ಸಬ್ದೊ ಸೇರವೊನ್ನೆ. ಸುರುತ ಕೃತಿಟ್ ಕಾಲಾಂತರೊಡ್ ಬೊಕ್ಕ ಬೇತೆ ಊರುದ, ಬೇತೆ ಜನೊಕುಲೆನ ಭಾವನೆ, ಕಲ್ಪನೆಲು ಸೇರೊನ್ಯರೆಲಾ ಯಾವು. ಇಂಚಿನ ಸೇರ್ಪಡೆನೇ ಜಾಸ್ತಿಯಾದ್ ಮೂಲಕೃತಿ ಮಾಯಕ ಆಪಿನೆಂದ್ ಉಂಡು.

ದಕ್ಷಿಣಕನ್ನಡ ಜಿಲ್ಲೆದ ಒಂಜಿ ಭಾಗೊಡು ಮರಿಯಲೊದ ಆಟಿ (ಕರ್ಕಾಟಕ) ತಿಂಗೊಳ್ಳು ಆಟಿಕಳೆಂಜ ಪನ್ನಿ ಒಂಜಿ ನಲಿಕೆ ತಂಡ ಇಲ್ಲ್ ಇಲ್ಲಡೆ ಬರ್ಪುಂಡು. ತಾರೆದ ಮಡಲ್ಡ್ ಮಲ್ತಿನ ಕುದುರೆ ಸವಾರೆ, ಆಯನ ಜೊತೆಟ್ ಡೋಲು (ತೆಂಬರೆ) ಬೊಟ್ಟೊಂದು ಬರ್ಪಿ ಒಂಜಿ ಪೊಂಜೊವು. ವೇಸೊ ಕಟ್ವೊದ ನಲ್ಪಿನ ಒರಿ ನಲ್ಕೆದಾಯೆ. ಇಂಚ ಮೂಜಿ ಜನ ಬರ್ಪೆರ್. ಅಕುಲು ತುಳುಬಾಸೆಡೊಂಜಿ ಪದೊ ಪನ್ನೆರ್.

ಆಟಿಟ್ ಬತ್ತೆ ಕಳೆಂಜೆ ಮಾರಿ ಕಳೆಪೆನೋ  
ಮೂಡೈತ ಮಾರಿನ್ ಮೂಡೈಗ್ ಕೊಂಡೋಪೆನೋ  
ಆಟಿಡ್ ಮುಪ್ಪ ದಿನ ಕಳೆಂಜಗ್ ಮಾಮಿ ಬುಡಾರೊ  
ಬಾರೆದ ಕಂಡೆ ತಿಂದೆನೋ ಕಳೆಂಜೆ ಬಂಜಿ ಬಳತ್ತಂಡ್  
ಮುಂಡಿದ ಕಂಡೆ ತಿಂದೆನೋ ಕಳೆಂಜಿ ದೊಂಡೆ ಮೂರೊಂಡೆ  
ಕಳೆಂಜೆ ಕಣ್ಣ್‌ಡ್ ತೂಪೆನೋ ಅಡ್ಡ ಬುಳೆಪೆನೋ  
ಮೂಡೈ ಪೋಪೆನೋ ಕಳೆಂಜೆ ಮಾರಿ ಕಳೆಪೆನೋ  
ಮುವೊಡುತ ಸಾಂತನಿ ನಟ್ಟೆನೋ ಕಳೆಂಜೆ  
ಈವೊಡುತ ಪೆಲತ್ತರಿ ನಟ್ಟೆನೋ  
ಬಾಕಿಲ್ ಬಾಕಿಲ್ ಪೋಪೆನೋ ಕಳೆಂಜೆ  
ಮಾರಿಕಳೆಪೆನೋ  
ಆಟಿಡ್ ಬತ್ತೆನೋ ಕಳೆಂಜೆ  
ಸೋಣೊಡು ಪೋಪೆನೋ ||

ಈ ಪದೊಕುಲಾ ಕೃಷಿಕ್‌ಲಾ ದಾಲ ಸಮ್ಮಂದ ಒರಿತಿಜಿ. ಆಂಡ ನಲಿಕೆದ ಅಕೇರಿಗ್ ಪನ್ನಿ ಸುಗಿಪುಡು ಕೃಷಿಕ್ ಬರ್ಪಿ ರೋಗೊರುಜಿನ ಮಾಯಕ ಆವಡ್‌ಂದ್ ಪನ್ನೆರ್. ಆಟಿ



ತಿಂಗೊಳ್ಳು ಸಾಮಾನ್ಯ ಆದ್ ನೇಜಿ ಪುರಿ ಪತ್ತುಂಡು. ಆ ಸಂದಬೊರ್ ತೂಂಡ ಈ ನರ್ತನ ಪೂಜೆದ ಉದ್ದೇಶೊ ರೋಗ ಕಳೆಪುನನೆ ಆದುಪ್ಪು. ಆಂಡ ಅವು ಪದೊಟು ದಾಲ ತೆರಿವುಜಿ. ಆಂಡ ಅಲ್ಪ ಕುದುರೆದ ಕೆಲಸೊ ದಾದ ಪಂಡ್‌ದ್ ತೆರಿವುಜಿ. ಇಂಚಿನ ಬಗೆತ ಕುದುರೆ (Hobby horse) ಕೆಲವೊಂಜಿ ಆದಿವಾಸಿ ಗುಂಪುದಕುಲು ಮಲ್ಪಿ ನಲಿಕೆಡ್ ರೂಢಿಡಿತ್ತಂಡ್ (ಇತ್ತೆ ಆಟಿ ಕಳೆಂಜದ ಒಟ್ಟಿಗೆ ಕುದ್ರೆ ಉಪ್ಪುಜಿ). ಇಂಚ ಈ ಕುದುರೆದ ಮೂಲ ಕಲ್ಪನೆ ಒವ್ವೊ ದೇಶೊದ, ಒವ್ವೊ ಜನೊಕುಲೆನ ಆದಿಪ್ಪು. ಅವು ನಮ್ಮ ಜಿಲ್ಲೆ ಮುಟ್ಟಲಾ ಬತ್ತಾದುಪ್ಪುಂದು ಸ್ಪಷ್ಟ ಆಪುಂಡು.

ಮಾನವ ಶಾಸ್ತ್ರೊದ ಅಭ್ಯಾಸ ಮಲ್ಪುನಕುಲು ನಮ್ಮಲ್ಪ ರೂಢಿಗ್ ಬತ್ತಿನ, ನಮೊ ನಂಬುನ ಜಾತಕರ್ಮಾದಿ ಆಚರಣೆಲೆದ ಮೂಲೊನು ತೆರಿಯೊನೊಡು. ಅಯಿಕ್ ಆ ರೂಪೊ ಎಂಚ ಬತ್ತಂಡ್ ಪನ್ನಿನೆನ್ ತೆರಿಯೊನೊಡು. ಕಂಬುಳ, ಬಿಸು (ಸುಗ್ಗಿ) ದೀಪೊಳಿ, ಆಟಿ ಕಳೆಂಜ - ಇಂಚ ಮಸ್ತ್ ಆಚರಣೆಲು ಮೂಲು ಒರಿದುಪ್ಪರೆ ಕಾರಣೊ ದಾದ? ದೀಪೊಳಿ ಪರ್ಬೊದ ಒಂಜಿ ವಿಚಾರೊನೆ ದೆತೊನುಗ. ಅಯಿಟ್ ಬಲಿ ಚಕ್ರವರ್ತಿನ ಪೂಜೆ ಉಂಡು. ಎಣ್ಣೆ ಪೂಜಿದ್ ಬೆಂದ್ರ್ ಮೀಪುನ ಉಂಡು. ದೀಪಾರಾಧನೆ ಉಂಡು. ಧಾನ್ಯೊದ ಆರಾಧನೆಲಾ ಉಂಡು. ನರಕಾಸುರ ವಧೆತ ಕತೆಲಾ ಸೇರೊಂದುಂಡು. ಬಲಿ ಚಕ್ರವರ್ತಿನ ಪುರಾಣ ಗೊತ್ತುದಾಂತಿನಕುಲುಲಾ ನರಕಾಸುರನ ಸುದ್ದಿ ತೆರಿಯಂದಿನಕುಲುಲಾ ದೀಪೊಳಿ ಪರ್ಬೊ ಮಲ್ಪುವೆರ್. ಬಲಿನ ಬದಲ್ ಬಾರ್ಡ್ ರಾಶಿ ದೀದ್, ಪೊಲಿ ಪೊಲಿಯೇ ಬಲಾ ಪಂಡ್‌ದ್ ಲೆತ್ತಾದ್ ಧಾನ್ಯೊ ಎಚ್ಚಾವಡ್ ಪನ್ನಿ ಬಯಕೆನ್ ತೋಜವೆರ್. ಬಲಿ ಚಕ್ರವರ್ತಿಗ್ಲಾ ಬಾರ್‌ಗ್ಲಾ ದಾನೆ ಸಮೊಂದೊ. ಉಂದು ಒಂಜಿ ಕೃಷಿಕರ್ಮೊದ ಪರ್ಬೊ. ಅಯಿತೊಟ್ಟಿಗೆ ಎಂಚಿನನೋ ಮಾತ ಸೇರೊಂದ್‌ಂಡ್. ಅಂಚಾದ್ ಸಂಸ್ಕೃತಿನ ಅಧ್ಯಯನ ಮಲ್ಪುನಗ ನೆನ್ನಾ ಪೂರ ದೀವೊಂದು ವಿಮರ್ಶೆ ಮಲ್ಪೊಡು. ಖಂಡಿತೊ ನೆಕ್ ಜಾನಪದ ಗೀತೊಲುಲಾ ಸಾಯೊಗು ಬರ್ಪ.

ಜಾನಪದ ಗೀತೆಲೆಡ್ ಕೆಲವು ಮಕ್ಕಾರ್ ಮಲ್ಪಿನ ಗೀತೊಲುಲಾ ಉಳ್ಳೊ. ಜಾನಪದ ಗೀತೊಲು ಶಿಷ್ಟ ಸಾಹಿತ್ಯೊ ಪ್ರಕಾರೊಡ್ಲ ದಾಲ ಕಮ್ಮಿದವತ್ತಂಡ್ ಕಾರಂತೆರ್ ತೋಜದ್ ಕೊರ್ತೆರ್. ಅಯಿಕೊಂಜಿ ಉದಾಹರಣೆ ಇಂಚ.

ಬರಾಂದಿ ಬಿನ್ನೆರ್ ಬತ್ತರೆ ಮಗ ಸೇಸು  
ಕೊರಾಂದಿ ತಮ್ಮನೊ ಕೊರೊಡಾಂಡೆ ||  
ಅಟ್ಟೊದ ಬಿತ್ತಾದ ಮುಡಿ ದೊರಿಪೊಡಾಂಡೆ  
ಕಿದೆಟಿತ್ತಿ ಮುಂಬುಲೆನ್ ಮಾರೊಡಾಂಡೆ ||  
ಕೆಬಿತ ಬುಗುಡಿ ಮಾರ್‌ದಾಂಡಲಾ ಸೇಸು

ಕೊರಾಂದಿ ತಮ್ಮನೊ ಕೊರೊಡಾಂಡೆ ||

ಕಯಿತ ಬಳೆನ್ ಮಾರ್ಡಾಂಡಲ ಸೇಸು

ಸೊಂಟೊದ ಪಟ್ಟಿ ಮಾರ್ಡಾಂಡಲಾ ಸೇಸು ||

ಕೆಕ್ಕಿದ ಕರಿಮಣಿ ಮಾರ್ಡಾಂಡಲ ಸೇಸು ||

ತರೆತ ರಾಕುಟಿ ಮಾರ್ಡಾಂಡಲ ಸೇಸು ||

ಇಂಚ ಪದೊತ ಪಲ್ಲವಿ, ಅನುಪಲ್ಲವಿ ಮಕ್ಕಾರ್ ಭಾವನೆನ್ ಬಾರಿ ಪೊರ್ಲುಡು ದೆರ್ತ್ ತೋಜವುಂಡು. ಸಾಹಿತ್ಯೊಡ್ತಿ ಹಾಸ್ಯೊ ನಾದ ಸ್ವರೊಪೊಡ್ತಾ ತೋಜಿದ್ ಬರ್ಪುಂಡು. ಇಂಚಿನನೆ ಪದ ಉಂದುವೇ ಜಿಲ್ಲೆದ ಬಡಕಯಿ ಮೆಯಿಟ್ ಕನ್ನಡೊಡುಂಡು.

‘ಕೂಕಾಣಿ ನೆಂಟರೆ ಉಂಬೋಕೆ ಅಕ್ಕಿಲ್ಲ

ನಾ ಕುಟ್ಟೊ ಅಕ್ಕಿ ನನದಲ್ಲ

ನಾ ಕುಟ್ಟೊ ಅಕ್ಕಿ ನನದಲ್ಲ ನೆಂಟರೆ

ಬೇಕಾರೆ ಹೋಗಿ ಹೊಳಿ ಹಾಯ್’

ಹಾಸ್ಯೊ, ಮಕ್ಕಾರ್‌ದಂಚನೆ ನೆರಡೆದ ಪಾತೆರೊಲ ಜಾನಪದೊನೆ. ಕಾರಂತೆರ್ ಅಯಿಕ್ಕೊಂಜಿ ಪದೊತ ಉದಾರ್ಮ ಕೊರ್ತೆರ್. ಪದೊ ಭಜನೆದ ಪದೊ. ದೇವೆರೆನ್ ಸುಗಿಪುನ ಪದೊ. ಆಂಡ ಆ ಪದೊಟು ಪದೊ ಕಟ್ಟಿನಾಯೆ ಆಯನ ಮನಸಾಡ್ತಿ ನಂಜಿ - ಗರ್ವೊನು ಪೂರ ತೋಜದ್ ಬುಡ್ತೆ. ಅವೊಂಜಿ ಪರಕೆದ ಪದೊ.

ಪೂ ಮುಡಿಪಾವೆ ದೇವಿ ತೊಟ್ಟಿಲ್ ತೂಂಕಾವೆ || ಪ ||

ಗಟ್ಟಿಗ್ ಪೋಯಿನ ಬಾವೆ ಅವುಲೇ ಕೊಟ್ಟಯಿ ಕಟ್ವಾದ್

ಆಯೆ ಸಯಿತ್ತಾ ಪೋವಡ್ | ಆಯನ್ ಚಟ್ಟೊಡು ತುಂಬಡ್

ಆಯನ್ ಕಾಟೊಡು ದೀವಡ್ || ದೇವಿ ||

ಉಂದು ಕಾರಂತೆರೆ ಜಾನಪದ ಗೀತೆಗಳು ಬೂಕುಡು ಬರ್ಪಿ ತುಳು ಗೀತೊಲೆನ ವಿಚಾರೊ.

ಇಂಚ ಕಾರಂತೆರ್ ತುಳು ಜಾನಪದ ಗೀತೆಲೊನ್ ದಿಂಜ ಸಂಗ್ರಹ ಮಲ್ತಾದ್ ಅಯಿನ್ ಅಧ್ಯಯನ ಮಲ್ತಾದೆರ್. ತುಳು ಗೀತೊಲೆನ ತಿರ್ಲ್ ಎಂಚಿನ ಪನ್ನಿನೆನ್ ತೋಜದ್ ಕೊರ್ತೆರ್. ತುಳು ಜನಪದ ಸಾಹಿತ್ಯೊದ ಬಗ್ಗೆ ಇತ್ತೆ ಇಂಚಿಪ ಮಸ್ತ್ ಜನ ಸಂಶೋಧನೆ ಮಲ್ತಾದ್ ಡಾಕ್ಟರೇಟ್ ಪದವಿ ಪಡೆತೆರ್. ಪರದೇಶೊದಕುಲುಲಾ ಬತ್ತಾದ್ ಸಂಶೋಧನೆ ಮಲ್ತಾದ್ ಬೂಕು ಬರೆತೆರ್. ಫಿನ್ಲೆಂಡ್ ದೇಶೊದ ತುರ್ಕು ವಿಶ್ವವಿದ್ಯಾನಿಲಯದ ಪ್ರೊ. ಲೌರಿ ಹಾಂಕೋನ ಕೂಟೊದಕುಲು ಜಾನಪದೊತ ಮಲ್ಲ ತುಪ್ಪೆನೇ ತುಳುನಾಡ್ ಡುಂಡುಂದು ಪಂಡ್‌ದ್ ತೆರಿಯೊಂದು ಸಿರಿ ಮಹಾಕಾವ್ಯೊ 1990ಡ್ ಸಂಪಾದನೆ

ಮಲ್ತೆರ್. ಬೆಳ್ತಂಗಡಿದ ಮಾಚಾರು ಗೋಪಾಲ ನಾಯ್ಕರ್ ಪಂಡಿ 15683 ಸಾಲ್ ಪದೊಕುಲೆನ್ ಬರೆದ್ ಆಯಿತ ತರ್ಜುಮೆ ಇಂಗ್ಲಿಷ್‌ಡ್ ಕೊರ್ದು ಬೂಕು ಬುಡುಗಡೆ ಮಲ್ತೆರ್. ಡಾ. ಕೆ. ಚಿನ್ನಪ್ಪ ಗೌಡೆರ್ ಬೊಕ್ಕ ಪ್ರೊ. ಬಿ.ಎ. ವಿವೇಕ ರೈ ಮುಕುಲು ಈ ಮಲ್ಲ ಕಾರ್ಯೊಡು ಪಾಲ್ ಪಡೆಯೆರ್. ಜಾಗತಿಕ ಮಟ್ಟೊಡು ತುಳು ಜನಪದ ಸಾಹಿತ್ಯೊ ಮಲ್ಲ ಮಾನಾದಿಗೆ ಪಡೆಂಡ್.

ಆಂಡ ಜಾನಪದೊತ ಗಂದ ಗಾಳಿ ಗೊತ್ತುದಾಂತಿನ ಪೂರ್ತುಡು, ಜಾನಪದೊ ಪಂಡ ಪಾಮರ ಸಾಹಿತ್ಯ, ಅನಾಗರಿಕರ ಸಾಹಿತ್ಯ, ಗೊರವರ ಡುಂಡುಚಿ - ಅಯಿಟ್ ಮಣ್ಣಾಲಾ ಇಜ್ಜಿ. ಬೊಕ್ಕ ತುಳು ಜಾನಪದ ಪಂಡ ಕೇನೊಡ್ಚಿ - ತುಳು ಒಂಜಿ ಬಾಸೆನೇ ಅತ್ತ್ಂದ್ ಮಲ್ಲ ಮಲ್ಲ ವಿದ್ವಾಂಸರ್, ಪಂಡಿತೆರ್ನಕುಲು ಪಂಡೊದುಪ್ಪಿ ಪೂರ್ತುಡು (ಇತ್ತೆಲಾ ಕೆಲವೆರ್ ಪಂಡೊಂದೇ ಉಲ್ಲೆರ್), ಕಾರಂತೆರ್ ತುಳು ಜನಪದ ಗೀತೊಲೆನ್ ಹಳ್ಳಿ ಹಳ್ಳಿಗ್ ಪೋದು ಸಂಗ್ರಹ ಮಲ್ತೆರ್. ಜೋಕುಲೆಗ್ ಅವೆನ್ ಸಾಲೆಡ್ ಮಾಸ್ತ್ಯಾನಕುಲು ಬಾಯಿಪಾಠ ಕಲ್ಪವೊಡು ಪಂಡೆರ್. ಆಯಿತ ವಿಮರ್ಶೆ ಮಲ್ತ್ದ್ ಮಾನವ ಶಾಸ್ತ್ರ ಅಧ್ಯಯನೊಗು ಜನಪದ ಗೀತೊಲೇ ಆಧಾರೊಂದು ಪಂಡೆರ್. ಬೇತೆ ಬೇತೆ ನಮೂನೆದ ಪದೊಕುಲೆನ್ ವಿಂಗಡಣೆ ಮಲ್ತೆರ್. ಆಯಿತ ಸತ್ವೊ - ತತ್ವೊ ಎಂಚಿನಂದ್ ಪಂಡೆರ್. ಜಾನಪದೊತ ಆಧಾರೊದ ಮಿತ್ತೇ ಕೆಲವು ಕಾದಂಬರಿಲೆನ್ ಬರೆಯೆರ್. ಕೆಲವು ನಾಟಕ ಬರೆಯೆರ್.

ಕಾರಂತೆರ್ ಭೂತಾರಾಧನೆದ ಮಿತ್ತ್ ಬರೆಯಿನ ಬೂಕುಡು ಈ ಆರಾಧನಾ ಪದ್ಧತಿ ಎಂಚ ಉದಿಪನ ಆಂಡ್ ಪನ್ನಿ ವಿಚಾರೊನು ಬರೆತೆರ್. ಜಗತ್ತ್ದ ಮಾತ ಕೋಡಿಡ್ಲಾ ಈ ಒಂಜಿ ಆರಾಧನಾ ವಿಧಾನೊ ಇತ್ತ್ಂದ್‌ಂದಾಂಡಲಾ ಇತ್ತೆ ಅವು ಅರಿಯೊಂದು ಬತ್ತ್ದ್‌ಂದ್. ಆಂಡ ತುಳುನಾಡ್ ಬೊಕ್ಕ ಕೇರಳಡ್ ಅವು ನನಲಾ ಒರಿದುಂಡು. ತುಳುನಾಡ್ ಭೂತ ತಾನೊಲು ಇತ್ತೆಲಾ ನಿರ್ಮಾಣ ಆವೊಂದೇ ಉಂಡು. ಭೂತಾರಾಧನೆ ದ್ರಾವಿಡ ಸಂಸ್ಕೃತಿ, ತುಳುನಾಡ್‌ಗ್ ಆರ್ಯ ಧರ್ಮ ಪ್ರವೇಶ ಆಂಡ್, ಜೈನ ಧರ್ಮ ಪ್ರವೇಶ ಆಂಡ್. ಅಯಿಡ್ಲಾ ಬೊಕ್ಕ ನಾಥ ಪಂತೊ ಬತ್ತ್‌ಂದ್. ಮುಕುಲು ಪೂರ ದ್ರಾವಿಡ ಸಂಸ್ಕೃತಿದ ಭೂತಾರಾಧನೆನ್ ಸ್ವೀಕಾರ ಮಲ್ತೆರ್. ಆರ್ಯ ಧರ್ಮೊಡು ದೇವರೆಗ್ ಪುರಾಣ ನಿರ್ಮಾಣ ಆಯಿಲೆಕನೇ ಭೂತೊಲೆಗ್ಲಾ ಪುರಾಣ ನಿರ್ಮಾಣ ಆಂಡ್. ರಡ್ಡ್ ಪುರಾಣೊಲುಲಾ ಒಟ್ಟು ಸೇರೊಂಡೊ. ಈ ಪುರಾಣೊನೇ ಪಾಡ್ಡನ. ಒಂಜೊಂಜಿ ಭೂತೊಗು ಒಂಜೊಂಜಿ ಪಾಡ್ಡನ ಉಂಡು. ಒಂಜೇ ಭೂತೊದ ಪಾಡ್ಡನ ಬೇತೆ ಬೇತೆ ಕೋಡಿಡ್ ಬೇತೆ ಬೇತೆ ರೀತಿಡ್ ಉಪ್ಪುಂಡು. ಬೊಬ್ಬರ್ಯನ ಪಾಡ್ಡನ ತುಳುನಾಡ್ ಬಡಕಯಿ ಮೆಯ್ಯಾಟಿತ್ತಿಲೆಕ ತೆನ್ನಯಿ ಮೆಯ್ಯಿಟಿಜ್ಜಿ. ತುಳುನಾಡ್ ಪುದರ್ ಪಡೆಯಿನ ಭೂತೊ



ಪಂಡ ಪಂಜುರ್ಲಿ. ಈ ಪಂಜುರ್ಲಿನ ಪಾಡ್ಡನೊನು ಕಾರಂತೆರ್ ಮೂಜಿ ಕೋಡಿಡ್ ಸಂಗ್ರಹ ಮಲ್ತೆರ್. ಆ ಮೂಜಿ ಕತೆಲಾ ಬೇತೆ ಬೇತೆ ರೀತಿದವು. ಈ ಮೂಜಿ ಕತೆನ್ನಾ ಆಧಾರ ದೀವೊಂದು ಕಾರಂತೆರ್ ಪಂಜುರ್ಲಿ ಭೂತೊದ ಉದಿಪನ ದಾಯೆಗಾಂಡ್ ಪನ್ನಿನೆನ್ ವಿಮರ್ಶೆ ಮಲ್ತಾದೆರ್. ಆಣ್-ಪೊಣ್ಣು ಪಂಜಿಲು ದುಂಬು ತಗೆ - ತಂಗಡಿಯಾದಿತ್ತೆರ್. ಈಸ್ವರ ದೇವರೆಡ ಅಪ್ಪಣೆ ನಟ್ಟೊಂದು ಅಕುಲು ಕಂಡನಿ - ಬುಡೆದಿ ಆಯಿರ್. ಉಂದು ಲೋಕಾಚಾರೊಗು ವಿರುದ್ಧವಾಯಿನ. ಅಕುಲೆಗ್ ಕುರ್ಲೆಲ್ ಪುಟ್ಟಿಯೊ. ಅವೆಕ್ ದುಸ್ಸು ಬುದ್ಧಿ ಬತ್ತಂಡ್. ಈಸ್ವರ ದೇವರ್ ನಂದನವನೊನು ಅವು ಹಾಳ್ ಮಲ್ತು. ಈಸ್ವರೆ ಅವೆನ್ ಕೆರೈರೆ ಪೋನಗ ಪಾರ್ವತಿ ಒಂಜಿ ಕುರ್ಲೆನ್ ಒರಿಪಯಿರ್. ಅವ್ವೇ ಪಂಜುರ್ಲಿ ಭೂತೊ ಆಂಡ್. ನಿಷೇಧ ಆಯಿನ ತಗೆ-ತಂಗಡಿನ ಮದಿಮೆ ಬೊಕ್ಕ ತುಳುನಾಡ್ಡ್ ದುಂಬಿತ್ತಿ ಭಯಂಕರ ಕಾಡ್, ಅಯಿತ ನಡುಟಿತ್ತಿ ಕೃಷಿ ಬುಳೆನ್ ಕಾಡ ಪಂಜಿಲೆನ ಉಪದ್ರೋಡ್ ತಡೆವೊನ್ನ ಬಂಜ ಅಂಚೆನೆ ದುಸ್ವೆರೆಗ್ ಶರಣಾದ್ ಅಕುಲೆನ್ ಒಲಿಸವೊನುನ ಮಾನ್ಯ ಸಹಜ ಗುಣ. ಈತ್ ಮಾತ ಕಾರಣೊಲೆಡ್ವಾವರ ಪಂಜುರ್ಲಿ ತುಳುನಾಡ್ ದೈವೊ ಆಂಡ್ ಪಂಡ್‌ದ್ ಅಭಿಪ್ರಾಯೊ ಕೊರೈರ್.

ಪಾಠಾಂತರ ಇತ್ತ್ಂಡನೇ ಮಾತ್ರ ಅವು ಜಾನಪದ ಆಪುಂಡು, ಅವು ಸಮಸ್ತಿ ಆಪುಂಡು. ಇಜ್ಯಂಡ ಅವು ವ್ಯಸ್ತಿ ಮಾತ್ರ ಅತ್ ಶಿಷ್ಟಲಾ ಆಯರೆಗ್ ಯಾವು ಪಂಡ್‌ದ್ ಕಾರಂತೆರ್ ಅಲ್ಪಲ್ಪ ಒತ್ತುದು ಪನ್ನೆರ್. ಕಾರಂತೆರ್ ಪಂಡಿನೆಡ್ ಏತೋ ಬೊಕ್ಕ ಯುರೋಪುದ ಜಾನಪದ ವಿದ್ವಾಂಸರ್ ಪಾಠಾಂತರ ಜಾನಪದೊತ ಒಂಜಿ ಮುಖ್ಯ ಲಕ್ಷಣೊಂದು ಪಂಡೆರ್.

ಇಂಚ ಕಾರಂತೆರ್ ತುಳು ಜಾನಪದೊತ ಬಗ್ಗೆ ವಿಸೇಸೊ ಆಸಕ್ತಿ ತೋಜದ್ ಅಯಿತ ಮೌಲ್ಯೊನು ತೆರಿಪಯಿರ್. ಅಯಿತ ಬಗ್ಗೆ ದಿಂಜ ಮನಸ್ ಕೊರೈರೆ ಅವಕಾಶ ಆಯಿಜಿಂದ್ ಆರೇ ಪಂಡೊಂಡೆರ್. ನನಲಾತ್ ಉಮೇದ್‌ಡ್ ಜಾನಪದೊತ ಬಗ್ಗೆ ಕೆಲಸೊ ಮಲ್ತದ್ವೆರ್‌ಂಡ ಆರೊರಿ ಜಾಗತಿಕ ಮಟ್ಟೊದ ಜಾನಪದ ವಿದ್ವಾಂಸೆ ಆತ್ವೆರ್ ಪನ್ನಿನೆಗ್ ದಾಲಾ ಸಂಶಯ ಇಜ್ಜಿ.

### ಪುಟ್ಟಿನ ಊರುಗು

ತನ್ನ ಬುಡೆದಿನ ಅನಾರೋಗ್ಯೊದ ಕಾರಣೊಡ್ವಾವರ ಕಾರಂತೆರೆಗ್ ಪುತ್ತೂರು ಬುಡೊಡುಂದು ತೋಜಿಂಡ್. ಅವ್ವೇ ಪೂರ್ತುಗು ಬೆಂಗಳೂರುಡಿತ್ತಿ ಕೋಟದ ರಾಮಕೃಷ್ಣ ಐತಾಳ್ ಪನ್ನಿನಾರೆಗ್ ಕೋಟದ ಕೈತಲ್ದ ಸಾಲಿಗ್ರಾಮೊಡು ಪಾಲ್‌ಡೊಂಜಿ ತುಂಡು ಭೂಮಿ ತಿಕ್ಕಂಡ್. ಆರ್ ಅಯಿಟೊಂಜಿ ಇಲ್ಲ ಕಟ್ಟಯಿರ್. ಆ ಇಲ್ಲಡ್ ಕುಲ್ಕರೆ ಜನ ಇಜ್ಜಿ.

ಆ ಇಲ್ಲಗ್ ಬತ್ತದ್ ಕುಲ್ಲೊಡುಂದು ಐತಾಳ್, ಕಾರಂತೆರೆಗ್ ಪಂಡೆರ್. ಆರೆ ಮೆಗ್ಯಮಗೆ ಸೂರ್ಯನಾರಾಯಣೇರ್ಲಾ ಸಾಲಿಗ್ರಾಮೊಗು ಬರೊಡುಂದು ಒತ್ತಾಯ ಮಲ್ತೆರ್. ಕಾರಂತೆರೆಗ್ಲಾ ಅವು ಸರೀಂದ್ ತೋಜಿಂಡ್. ಕೋಟಡ್ ರಡ್ಡರೆ ಕಿಲೋಮೀಟರ್ ಇಂಚಿಡುಪ್ಪಿ ಸಾಲಿಗ್ರಾಮೊದ ಮಲ್ಲ ಮಾರ್ಗೊದ ಬರಿಟಿತ್ತಿ 'ಸುಹಾಸ' ಇಲ್ಲಗ್ ಪೋಯರೆ ಕಾರಂತೆರ್ ಮನಸ್ ಮಲ್ತೆರ್. 1973ಡ್ ಪುತ್ತೂರುನು ಬುಡುದು 1974ಡ್ ಸಾಲಿಗ್ರಾಮೊಗು ಬತ್ತದ್ ಕುಲ್ಲೆರ್. ಪುತ್ತೂರ್ ಬಾಲವನೊನು ಏರೆಗಾಂಡಲಾ ಮಾರೊಡುಂದು ಕಾರಂತೆರ್ ಎನ್ನಿನಗ ಅಪಗದ ಕರ್ನಾಟಕ ರಾಜ್ಯೊದ ಮುಖ್ಯಮಂತ್ರಿ ದೇವರಾಜ ಅರಸು ಸರಕಾರೊದ ಪರವಾದ್ ಕ್ರಯೊಗು ದೆತೊಂಡೆರ್.

ಸಾಲಿಗ್ರಾಮೊಗು ಬತ್ತದ್ಲಾ 1974-86ದ ಮಧ್ಯೊಡು ಆರ್ ಏತೋ ಲೇಖನ ಬರೆಯೆರ್. 9 ಕಾದಂಬರಿ ಬರೆಯೆರ್. ವಿಶ್ವವಿದ್ಯಾಲಯೊದ ನಿಘಂಟ್ ಪರಿಷ್ಕರಣ ಮಲ್ತೆರ್. ಕೇಂದ್ರ ಸರಕಾರೊದ ಚಲನಚಿತ್ರೋದ್ಯಮ ಧೋರಣೆಗ್ ರೂಪು ಕೊರ್ಪಿನ ಸಮಿತಿದ ಅಧ್ಯಕ್ಷರಾದ್ ಕೆಲಸ ಮಲ್ತೆರ್.

ಕಾರಂತೆರೆ ಬುಡೆದಿ ಲೀಲಮ್ಮ ಸಾಲಿಗ್ರಾಮೊಗು ಬತ್ತಿ ಬೊಕ್ಕಲಾ ಉಸಾರಾಯಿಚೆರ್. ಆರ್ ಜೆತ್ತಿನಲ್ಪ ಆಯೆರ್. ಜೋಕುಲು ಬತ್ತೊಂದು - ಪೋವೊಂದು ತೂವೊಂದಿತ್ತೆರ್. ಕಾರಂತೆರೆನ ಲಿಪಿಕಾರ್ತಿಯಾದಿತ್ತಿ ಶ್ರೀಮತಿ ಮಾಲಿನಿ ಮಲ್ಯೆರ್ಲಾ ಆರೆನ ಸೇವೆ ಮಲ್ತೊಂದಿತ್ತೆರ್. ಭಗವಾನ್ ಶ್ರೀ ಸತ್ಯಸಾಯಿ ಬಾಬೆರೆನ ಪರಮಭಕ್ತಿಯಾದಿತ್ತಿನ ಕಾರಂತೆರೆ ಬುಡೆದಿ ಲೀಲಾ ಕಾರಂತೆರ್ 1986ನೇ ಸಪ್ಟಂಬರ ತಿಂಗೊಳ್ 23ನಾನಿ ಸೊರ್ಗೊ ಸಂದ್ಯೆರ್.

## ರಾಜಕೀಯ ರಂಗ

ಕಾರಂತೆರ್ ತತ್ವ ಪ್ರತಿಪಾದನೆಗಾದ್ ರಾಜಕೀಯೊಗು ಜತ್ತಿನ ಉಂಡು. ಆಂಡ ಆರ್ ರಾಜಕೀಯ ವ್ಯಕ್ತಿ ಅತ್ತ್. ಗಾಂಧೆರ್ ಸಮಾಜ ಸುಧಾರ್ಥಿಗಾದ್, ಸ್ವಾತಂತ್ರ್ಯ ಹೋರಾಟೊಗಾದ್ ಕಾಂಗ್ರೆಸ್ ಸೇರೈರ್. ಅಯಿಟ್ ಕೆಲಸ ಮಲ್ತೆರ್. ಗಾಂಧೆರ್‌ನ ಶಿಷ್ಯ ಕಾರಂತೆರ್ಲಾ ಅಪಗ ಕಾಂಗ್ರೆಸ್ ಸೇರ್ದಿತ್ತೆರ್. ಸ್ವಾತಂತ್ರ್ಯ ತಿಕ್ಕಿ ಬೊಕ್ಕ ಆ ಸಾದಿನ್ ಬುಡೈರ್. ಆಡಳಿತ ಪಕ್ಷ ಕಾಂಗ್ರೆಸ್ ಸರಿ ಇಜ್ಜಿಂದ್ 1952ಡ್ ನಡತಿ ಮಲ್ಲ ಓಟುಡು ಕಿಸಾನ್ ಮಜ್ದೂರ್ ಪಾರ್ಟಿಡ್ ದಕ್ಷಿಣ ಕನ್ನಡೊಡ್ಲ ಅಸೆಂಬ್ಲಿ ಕ್ಷೇತ್ರೊಗು ಓಟುಗುಂತ್ಯೆರ್. ಅಯಿಟಾರ್ ಗೆಂದ್‌ಚೆರ್.

ಕಾರಂತೆರ್ ಪರಿಸರವಾದಿ, ಪ್ರಜಾಪ್ರಭುತ್ವವಾದಿ. ಕೈಗಾ ವಿದ್ಯುತ್ ಸ್ಥಾವರೊಡ್ಲಾವರ ಪರಿಸರ ನಾಶ ಆಪಿನೆನ್ ತಪ್ಪಯೆರೆಗಾದ್ ಚಳವಳಿ ಮಲ್ತೆರ್. ಆರೆನ ಹೋರಾಟ ಫಲ ಕೊರ್ಪುಜಿ ಪನ್ನಿ ಪೂರ್ತುಗು ತನ್ನ ಸಿದ್ಧಾಂತ ಪ್ರತಿಪಾದನೆಗಾದ್ 1989ಡ್ ಲೋಕಸಭಾ

ಸದಸ್ಯ ಸ್ಥಾನೋಗು ಉತ್ತರ ಕನ್ನಡೊದ ಕೆನರಾ ಕ್ಷೇತ್ರೊಡ್ಲ ಪಕ್ಷಾತೀತೆರಾದ್ ಓಟುಗು ಉಂತ್ಯೆರ್. ಆಂಡ ಓಟುಡು ಆರೆಗ್ ಗೆಲ್ವರೆ ಆಯಿಜಿ. ಇತ್ತೆದ ರಾಜಕಾರಣದ ಬಗ್ಗೆ ಆರ್ ಪನ್ನಿನಿ ಇಂಚೆ “ಸ್ವಾತಂತ್ರ್ಯ ಬರ್ಪಿನೆಗ್‌ದುಂಬು ಮೂಲು 400 ಜನ ನಿರಂಕುಶ ತುಂಡರಸುಲಿತ್ತೆರ್. ಅಕುಲು ಮಾಯಕ ಆಯೆರ್. ಇತ್ತೆ ನಾಲ್ ಸಾರೊ ಜನೊ ಅಕುಲೆನ ಮೊಟ್ಟು ಪಾಡೊಂದು ಮೆರೆಪೆರ್. ನಾಲ್ ದಿನ ರಾಜೆರಾದ್ ದಿನ ನೂಕುವೆರ್”.

ನಮ್ಮ ದೇಶೊದ ಜನೊ ಬಜೀ ಒರೊಯ್‌ನ ಲಾಭೊಗಾದ್ ಸ್ವಾರ್ಥೋಗಾದ್ ತನ್ನ ಶೀಲೊನು ಮಾರೊಂದುಲ್ಲೆರ್. ಅಂಚಿನನೇ ಪುಡಾರಿಲೆನ ಬೆರಿಯೆ ಪೋದು ಅಕುಲೆ ಪೂಜೆ ಮಲ್ತೊಂದು ಅಕುಲೆ ಪಜ್ಜೆಡೇ ನಡತೊಂದುಲ್ಲೆರ್. ದುಡ್ಡು ದ ದರಿದ್ರೊದೊಟ್ಟಿಗೆ ನೈತಿಕ ಬರಗಾಲೊನ್ನಾ ಅಕುಲಾದೇ ಪಡೆವೊಂದುಲ್ಲೆರ್.

ಗಾಂಧೀಜಿ ಭಾರತ ದೇಶೊಗು ರಾಮರಾಜ್ಯ ಕನವೊಡುಂದು ಬಯಕಿಯೆರ್. ಆರೆನ ಒಟ್ಟಿಗೆ ಯಾನ್ನಾ ನಾಲ್‌ದಿನ ನಲಿತೆ. ರಾಮರಾಜ್ಯ ಎನ್ನ ಕಾಲೊಗು ಬುಡಿ, ಎನ್ನ ಪುಲ್ಕಲೆನ ಕಾಲೊಗ್ಲಾ ಬರ್ಪಿಲೆಕ ತೋಜುಜಿ. ರಾಮರಾಜ್ಯೊದ ಬದಲ್ ಹರಾಮ ರಾಜ್ಯ ತೋಜೊಂದುಂಡು.

### ಪರಿಸರವಾದಿ - ಹೋರಾಟಗಾರೆ

ಸ್ವಾತಂತ್ರ್ಯ ಹೋರಾಟಡೇ ಬದ್ಕಾದ ಸಾದಿ ತೂಯಿನ ಕಾರಂತೆರ್ ಜೀವನ ಪೂರ್ತಿ ಹೋರಾಟೊಡೇ ಕಳೆಯಿನಾರ್. ಆರ್ ಬಾರಿ ಮೋಕೆಡ್ ತುಳುನಾಡ್‌ಗ್ ಸಹ್ಯಾದ್ರಿ ಸಂಪದ ಪನ್ನಿ ಪುದರ್ ದೀಪೆದೆರ್. ಆಂಡ ಸಹ್ಯಾದ್ರಿದ ಅರಣ್ಯ ಸಂಪೊತ್ತು ದಿನೊಡ್ಲ ದಿನ ಕುಂದೊಂದು ಬನ್ನಗ ಆರೆನ ಉಡಲ್‌ಗ್ ಬೇನೆ ತಟ್ಟೊಂದಿತ್ತಂಡ್. ಕಾಡ್ ನಾಶ ಆಂಡ ಬರ್ಸ ಬರ್ಪುಜಿ ಭೂಮಿ ಮರುಭೂಮಿಯಾಪುಂಡು ಅಣು ವಿದ್ಯುತ್ ಸ್ಥಾವರ ಸ್ಥಾಪನೆಯಾಂಡ ಜನೊಕುಲೆನ ಆರೋಗ್ಯ ಕೆಟ್ಟುಂಡು ಪನ್ನಿ ವಿಚಾರೊಲೆನ್ ಜನೊಕುಲೆನ ದುಂಬು ದೀಯೆರ್. ಬರವಣಿಗೆಡ್ ತೋಜಯೆರ್. ಭಾಷಣ ಮಲ್ತೆರ್. ಅಂಚಿನ ಕೆಲಸೊಲೆನ್ ಉಂತಯರೆಗಾದ್ ಕೋರ್ಟು ಮಿತರೆರ್. ಪಶ್ಚಿಮ ಘಟ್ಟ ಉಳಿಸಿ ಆಂದೋಲನ ಮಲ್ತೆರ್. ಅಪಗ ಆರೆಗ್ 90 ವರ್ಸೊ ಪ್ರಾಯೊ. ಕಪಿನಿ ಪ್ರಕರಣೊಡು ಪಾಲ್ ಪಡೆಯೆರ್. ಸೈಕಲ್ ಜಾಥಾ ಮಲ್ತೆರ್. 1989ಡ್ ಓಟುಗುಂತ್ಯೆರ್. ಇಂದಿರಾಗಾಂಧಿ ತುರ್ತು ಪರಿಸ್ಥಿತಿ 1975ಡ್ ಜಾರಿ ಮಲ್ಪುನಗ ಅಯಿನ್ ವಿರೋಧಿಸದ್ ತನ್ಕೆ ಕೇಂದ್ರ ಸರಕಾರ 1968ಡ್ ಕೊರ್ತಿನ ಪದ್ಮಭೂಷಣ ಪ್ರಶಸ್ತಿನ್ ತಿರಸ್ಕಾರ ಮಲ್ತಾದ್ ಪಿರ ಕಡಪುಡ್ಯೆರ್. ಕೈಗಾ ಅಣು ಸ್ಥಾವರ ವಿರೋಧಿ ಚಳವಳಿ, ಹರಿಹರಪಾಲಿ ಫೈಬರ್ಸ್, ಟೇಲೆರೇಸ್, ನಂದಿಕೂರು ಉಷ್ಣ ವಿದ್ಯುತ್ ಸ್ಥಾವರ - ಇಂಚ ಓಲು ಲೆತ್ತೆರ್‌ಂಡಲಾ



ಆಡೆ ಪೋದು ಆರ್ ಪರಿಸರ ಮಾಲಿನ್ಯದ ವಿರೋಧ ಚಳವಳಿಡ್ ಪಾಲ್ ಪಡೆವೊಂದಿತ್ತೆರ್. ನರ್ಮದಾ ಬಚಾವೊ ಆಂದೋಲನ, ಕೇರಳದ ಅಣುಸ್ಥಾವರ ವಿರೋಧಿ ಚಳವಳಿಡ್ಲಾ ಪಾಲ್ ಪಡೆಯೆರ್. ಇಂಚ ಪರಿಸರ ಮಾಲಿನ್ಯದ ವಿರುದ್ಧ ಆರೊಂಜಿ ಮಹಾಯುದ್ಧೋನೇ ಮಲ್ತೆರ್.

ಕಾರಂತೆರೆಗ್ ಪ್ರಾಯೊ ಒಂಜಿ ಮಲ್ಲ ಸಂಗತಿಯೇ ಆದಿಜ್ಯಾಂಡ್. ಸೊನ್ನೊ ವರ್ಸ ಕರಿ ಬೊಕ್ಕಲಾ ಆರ್ ಏತೋ ಬೂಕು, ಲೇಖನ ಬರೆತೆರ್. ವಿಚಾರಗೋಷ್ಠಿಲೆಡ್ ಭಾಷಣ ಮಲ್ತೊಂದಿತ್ತೆರ್. ಚಳವಳಿಲೆಡ್ ಪಾಲ್ ಪಡೆವೊಂದಿತ್ತೆರ್. ಇಂಚ ಆರ್ ಸುಮಾರ್ ಇರ್ವ ವರ್ಸೊ ಮುಟ್ಟು ಸುಹಾಸ ಇಲ್ಲ್ಯಾಡಿತ್ತೆರ್. ಆತನಗ ಆ ಇಲ್ಲ್ಯಾದ ಯಜಮಾನಿ ಐತಾಳೆರ್ ತೀರ್ಯೆರ್. ಆತ್ ಪೂರ್ತುಗು ಆರೆನ ಜೋಕುಲು ಊರುಗು ಬರೊಡಾದ್ ಬತ್ತ್ಂಡ್. ಕಾರಂತೆರ್ ಇಲ್ಲ್ಯಾ ಬುಡೊಡಾಂಡ್.

### ಅಂತ್ಯೊದ ದಿನೊಕುಲು

ಕಾರಂತೆರೆನ ಪ್ರಾಯೊದ ಪೂರ್ತುಗು ಆರೆನ ಆರೈಕೆಗ್ ತಿಕ್ಕಿನಾರ್ ಮಾಲಿನಿ ಮಲ್ತೆರ್. ಕಾರಂತೆರೆಗ್ ಬರವಣಿಗೆಗಾದ್ ಬತ್ತಿನಾರ್ ಅಕೇರಿಗ್ ಕಾರಂತೆರೆಗ್ ಊರುಕೋಲಾದ್ ಉಂತ್ಯೆರ್. ಕಾರಂತೆರೆನ ಮಾತ್ರ ಅತ್ತ್ ಆರೆ ಬುಡೆದಿನ ಆರೈಕೆನ್ನಾ ತೂಯೆರ್. ಕಾರಂತೆರೆ ಅಪ್ಪಲೆಕ - ಮಗಳೆಲೆಕ ಸೇವೆ ಮಲ್ತೆರ್. ಗೌರೀಶ ಕಾಯ್ಕಿಣಿ ಮಾಲಿನಿ ಮಲ್ತೆರೆನ್ ಕಾರಂತೆರೆ ಮಾನಸ ಪುತ್ರಿಂದ್ ಪನ್ನೆರ್.

ಸುಹಾಸ ಬುಡ್ಡಗ ಮಾಲಿನಿ ಮಲ್ತೆರ್ ಕಾರಂತೆರೆನ್ ಸಾಲಿಗ್ರಾಮೋಡೇ ಉಪ್ಪಿನ ತನ್ನ ಇಲ್ಲಡೆ ಲೆತೊನು ಬತ್ತೆರ್. ತನ್ನ ಇಲ್ಲ್ಯಾನೇ ಒಂತೆ ಮಲ್ತೆ ಮಲ್ಪದ್ ಕಟ್ಟಾದ್ ಕಾರಂತೆರೆಗ್ ಆಸರೆ ಕೊರೈರ್.

‘ಪಣವುದ ಪೂಜೆ’, ‘ಪುಗರ್ತೆದ ಬೋಂಟೆ’ ಉಂದು ರಡ್ಡ್ ನರಮಾನ್ಯನ ಅವಸಾನೊಗು ಕಾರಣ ಪನ್ನಿನ ಕಾರಂತೆರ್ ಪಣವು ಇಜ್ಜಿ ಪಂಡಾದ್ ತನ್ನ ಮನಸ್ಗ್ ತೋಜಿನ ವಾ ಕೆಲಸೊನ್ನಾ ಕೈ ಬುಡ್ಡಾರತ್ತ್. ಉನ್ಯರೆ ಬಂಜ ಇತ್ತಿನ ಪೂರ್ತುಗ್ಲಾ ಬತ್ತಿನಕುಲೆಗ್ ನುಪ್ಪು, ಬಾಜೆಲ್ ಕೊರಂದೆ ಕಡಪುಡ್ಡಿನಾರತ್ತ್. ದುಡ್ಡು ಸಂಪಾದನೆ ಮಲ್ತಾದ್ ಆ ದುಡ್ಡುಡು ಯಾನ್ ಸುಖೊ ಪಡೆವೊಡು ಪನ್ನಿ ಅಬುಲಾಸೆ ಆರೆಗಿಜ್ಯಾಂಡ್. ಕೈಟ್ ಕಾಸೇ ಇಜ್ಯಂದೆನೇ ಆರ್ ಬಾಲವನೊ ಕಟ್ಟೆರ್. ಸಾಲೆ ಮಲ್ತೆರ್, ನಾಟಕೊ ಗೊಬ್ಬಯೆರ್. ಸಿನಿಮಾ ಮಲ್ತೆರ್. ಆರೆ ವಾ ಕೆಲಸೊಡ್ಲಾ ಖರ್ಚಿ ಮಲ್ತಿನಾತ್ ದುಡ್ಡು ಸಂಪಾದನೆ ಆಯಿಜಿ. ಆರೆನ ಬದ್ಕಾದ ಮುಕ್ಕಾಲ್ ಭಾಗೊಲಾ ಆರ್ ನಷ್ಟೊಡೇ ಕಳೆಯೆರ್. ಪುದರ್ ಬರೊಡು, ಪ್ರಶಸ್ತಿ ತಿಕ್ಕೊಡು ಪನ್ನಿ ಅಬುಲಾಸೆಡ್ ಆರ್ ವಾ ಕೆಲಸೊನ್ನಾ

ಕೈಕೊಂಜೆರ್. ತಾನ್ ಪುಟ್ಟಿನ ಈ ಪೂರ್ವದ ಪ್ರಪಂಚೊನು ನನಲಾತ್ ಪೂರ್ವ ಮಲ್ಪೊಡು ಪನ್ನಿನನೇ ಆರೆನ ಉದ್ದೇಶೊ. ಸ್ವಾರ್ಥೋಗಾದ್ ಆರ್ ವಾ ಕೆಲಸೊಲಾ ಮಲ್ತಿಚೆರ್. ಮಾತಲಾ ಲೋಕೊಗಾದ್. ತನ್ನ ಮನಸ್ಸಾಗ್ ತೋಜಿಲೆಕ ಆರ್ ಮಲ್ತೊಂದೇ ಪೋಪೆದೆರ್. ಆರ್ ಕೆಲಸೊಗು ಕೈ ಪಾಡ್ಕಗ ಜನೊಕುಲು ಉಂದು ದಾನೆಗ್ ದಾನೋ ಆಯರುಂಡು ಪನ್ನೆದೆರ್. ಕಾರಂತರಾಯಿನೆಡ್ ನೆನ್ನ ಮಲ್ತೆರ್ಂದ್ ಕೆಲಸೊ ಆಯಿ ಬೊಕ್ಕ ಪನ್ನೆದೆರ್. ಲೋಕದೃಷ್ಟಿಡ್ ಆರ್ ಕೆಲಸ ಮಲ್ಪುನಗ ಅಯಿಕ್ ಏರಾಂಡಲಾ ವಿರೋಧ ಮಲ್ತೆರ್ಂಡ ಅಕುಲೆನ ವಿರುದ್ಧ ಕೋರ್ಟುಗು ಪೋಯರೆಗ್ಲಾ ಆರ್ ತಯಾರಾದುಪ್ಪೆದೆರ್. ಸತ್ಯವಾದಿಗರೆನ್ ಆರ್ ಮೆಚ್ಚೆದೆರ್. ಬಡವರೆಗ್ ಕೈ ನೀರ್ನ್ ದಾನ ಮಲ್ತೆದೆರ್.

### ಬಿರ್ದ್ ಬಲ್ಮನೊಲು

ಕಾರಂತರ್ ಸುಮಾರ್ 33 ಎತ್ತರ ಮಟ್ಟೊದ ಪ್ರಶಸ್ತಿ ಬಿರ್ದ್ ಇನಾಮುಲೆನ್ ಪಡೆತೆರ್. ಉಂದು ಮಾತ ಆರ್ ಎನ್ಯಂದೆ ಬತ್ತಿನವು. ಅವೆಟ್ ಕೆಲವೆನ ವಿವರಣೆ ಇಂಚ ಉಂಡು

1. ದೇವರಾಜ ಬಹದ್ದೂರ ಬಹುಮಾನ 1929  
“ಭಾರತೀಯ ಚಿತ್ರಕಲೆ” - ಈ ಕೃತಿಕ್
2. ದೇವರಾಜ ಬಹದ್ದೂರ ಬಹುಮಾನ 1931  
“ಮರಳಿ ಮಣ್ಣಿಗೆ” - ಈ ಕೃತಿಕ್
3. ಕನ್ನಡ ಸಾಹಿತ್ಯ ಸಮ್ಮೇಳನದ ಅಧ್ಯಕ್ಷ ಪಟ್ಟಿ 1955  
(ಮೈಸೂರುಡು ನಡತಿನ ಕನ್ನಡ ಸಾಹಿತ್ಯ ಸಮ್ಮೇಳನ)
4. ಲಾ ಆರ್ಟ್ಸ್ ಲಾ ಇಂಟರ್ ನ್ಯಾಶನಲ್ ಸ್ಟಾಕ್‌ಹೋಮ್ 1958  
(ಸ್ವೀಡನ್ ಪದಕ) ಯಕ್ಷಗಾನ ಕಲಾ ಸೇವೆಗಾದ್
5. ಕೇಂದ್ರ ಸಾಹಿತ್ಯ ಅಕಾಡೆಮಿ ಪ್ರಶಸ್ತಿ 1959  
“ಯಕ್ಷಗಾನ ಬಯಲಾಟ” - ಕೃತಿಕ್ ತಿಕಿನ ಪುರಸ್ಕಾರ
6. ಗೌರವ ಡಿ.ಲಿಟ್ (ಕರ್ನಾಟಕ ವಿಶ್ವವಿದ್ಯಾನಿಲಯ) 1962
7. ಗೌರವ ಡಿ.ಲಿಟ್ (ಮೈಸೂರು ವಿಶ್ವವಿದ್ಯಾನಿಲಯ) 1963
8. ಮೈಸೂರು ರಾಜ್ಯ ಸಾಹಿತ್ಯ ಅಕಾಡೆಮಿ ಗೌರವ (ಫೆಲೋಶಿಪ್) 1966
9. ಭಾರತ ಸರಕಾರದ ಪದ್ಮಭೂಷಣ ಪ್ರಶಸ್ತಿ 1968  
(ಈ ಪ್ರಶಸ್ತಿನ 1975ಡ್ ತುರ್ತು ಪರಿಸ್ಥಿತಿ ವಿರೋಧಿಸದ್ ಪಿರ ಮಲ್ತೆರ್)

10. ಕೇಂದ್ರ ಸಂಗೀತ ನಾಟಕ ಅಕಾಡೆಮಿ ಗೌರವ (ಫೆಲೋಶಿಪ್) 1973
11. ಚೋಮನ ದುಡಿ ಚಲನಚಿತ್ರೋಗ್ ಚಿತ್ರಕಥೆ ಪ್ರಶಸ್ತಿ  
(ರಾಷ್ಟ್ರ ಮಟ್ಟೋಡು) 1975
12. ಗೌರವ ಡಿ.ಲಿಟ್ (ಮೀರತ್ ವಿಶ್ವವಿದ್ಯಾನಿಲಯ) 1976
13. ಜ್ಞಾನಪೀಠ ಪ್ರಶಸ್ತಿ “ಮೂಕಜ್ಜಿಯ ಕನಸುಗಳು” ಕಾದಂಬರಿಗ್ 1978
14. ಕರ್ನಾಟಕ ಸಾಹಿತ್ಯ ಅಕಾಡೆಮಿ ಪ್ರಶಸ್ತಿ “ಕಲಾ ಪ್ರಪಂಚ” ಕೃತಿಕ್ 1979
15. ಜಾಪಾನೀಸ್ ಡಾನ್ಸ್ ಕ್ರಿಟಿಕ್ಸ್ ಸೊಸೈಟಿ ಅವಾರ್ಡ್ - 1981 1982  
(ಕಾರಂತ ನಿರ್ದೇಶಿತ ಯಕ್ಷಗಾನ ಪ್ರದರ್ಶನಲೆಗ್)
16. ಗೌರವ ಡಿ.ಲಿಟ್ (ಮಂಗಳೂರು ವಿಶ್ವವಿದ್ಯಾನಿಲಯ) 1983
17. ಗೌರವ ಡಿ.ಲಿಟ್ (ಜಬ್ಬಲ್‌ಪುರ ವಿಶ್ವವಿದ್ಯಾನಿಲಯ) 1983
18. ಕರ್ನಾಟಕ ರಾಜ್ಯ ಲಲಿತ ಕಲಾ ಅಕಾಡೆಮಿ ಪ್ರಶಸ್ತಿ  
“ಭಾರತೀಯ ಶಿಲ್ಪಕಲೆ” - ಈ ಕೃತಿಕ್ 1984
19. ಕೇಂದ್ರ ಸಾಹಿತ್ಯ ಅಕಾಡೆಮಿ ಗೌರವ ಫೆಲೋಶಿಪ್ 1985
20. ಗೌರವ ಡಿ.ಲಿಟ್  
(ವರ್ಲ್ಡ್ ಅಕಾಡೆಮಿ ಆಫ್ ಆರ್ಟ್ ಆಂಡ್ ಕಲ್ಚರ್) 1986
21. ದಿ ಏಸಿಯಾಟಿಕ್ ಸೊಸೈಟಿ ಆಫ್ ಬಾಂಬೇ -  
ಕ್ಯಾಂಪೆಬೆಲ್ ಮೆಮೋರಿಯಲ್ ಬಂಗಾರ್ಡ್ ಪದಕ 1989
22. ದಾದಾಬಾಯಿ ನವರೋಜಿ ಸ್ಮಾರಕ ಬಹುಮಾನ 1990
23. ತುಲಸೀ ಸಂಮಾನ್ - (ಮಧ್ಯ ಪ್ರದೇಶ ಸರಕಾರ) 1990
24. ಕೇಂದ್ರ ಸರಕಾರೊದ ಮಾನವ ಸಂಪನ್ಮೂಲ ಬೊಕ್ಕ  
ಮಾನವ ಕಲ್ಯಾಣ ಇಲಾಖೆದ ಫೆಲೋಶಿಪ್  
(ಯಕ್ಷಗಾನೊದ ಕೆಲಸೊಗಾದ್) 1992
25. ಪಂಪ ಪ್ರಶಸ್ತಿ (ಕರ್ನಾಟಕ ಸರಕಾರ)  
“ಮೈಮನಗಳ ಸುಳಿಯಲ್ಲಿ” ಕಾದಂಬರಿಗಾದ್ 1992
26. ಇಂದಿರಾಗಾಂಧಿ ಪರ್ಯಾವರಣ ಪುರಸ್ಕಾರ  
(ಕಾರಂತೆರ್ ಅಧ್ಯಕ್ಷರಾದಿತ್ತಿನ ಸಮಾಜ ಪರಿವರ್ತನ  
ಸಮುದಾಯ ಸಂಘಟನೆಗ್) 1992
27. ಜಸ್ಟಿಸ್ ಕೆ.ಎಸ್. ಹೆಗ್ಡೆ ಪ್ರತಿಷ್ಠಾನ ಪ್ರಶಸ್ತಿ 1993
28. ಇಂದಿರಾಗಾಂಧಿ ಪರ್ಯಾವರಣ ಪುರಸ್ಕಾರ (1992) 1994



29. ಸರ್ ಎಂ. ವಿಶ್ವೇಶ್ವರಯ್ಯ ಸ್ಮಾರಕ ಪ್ರಶಸ್ತಿ	1995
30. ಲಯನ್ಸ್ ಅಂತರಾಷ್ಟ್ರೀಯ ಗೌರವ ಸದಸ್ಯತ್ವ	1996
31. ಭಾರತೀಯ ವಿದ್ಯಾಭವನ ಗೌರವ ಸದಸ್ಯತ್ವ	1996
32. ದೇಶಿಕೋತ್ತಮ ವಿಶ್ವಭಾರತಿ ವಿಶ್ವವಿದ್ಯಾಲಯ ಶಾಂತಿ ನಿಕೇತನ - ಗೌರವ ಡಾಕ್ಟರೇಟ್	1997
33. ನಾಡೋಜ ಗೌರವ ಡಾಕ್ಟರೇಟ್ - ಕನ್ನಡ ವಿಶ್ವವಿದ್ಯಾಲಯ, ಹಂಪಿ	1997

### ಬಾಕಿ ಮಾನಾದಿಗಳು

1. ತಿರುವನಂತಪುರೂರು ನಡತಿನ ಅಖಿಲ ಭಾರತ ಗ್ರಂಥಕರ್ತರೆ ಸಮಾವೇಶದ ಅಧ್ಯಕ್ಷತೆ.
2. ಮರಾಠಿ ಸಾಹಿತ್ಯ ಸಮ್ಮೇಳನ (ಬಾರ್ಸಿ)ದ ಉದ್ಘಾಟನೆ.
3. ಬೆಂಗಳೂರುಡು ನಡತಿನ ದಕ್ಷಿಣ ಭಾರತ ಮಟ್ಟದ ಜೋಕುಲೆ ಸಾಹಿತ್ಯ ನಿರ್ಮಾಣ ಕಮ್ಮಟದ ನಿರ್ದೇಶನ.
4. ದಿಲ್ಲಿಡ್ ನಡತಿನ ಅಖಿಲ ಭಾರತ ಮಟ್ಟದ ಜೋಕುಲೆ ವಿಜ್ಞಾನ ಸಾಹಿತ್ಯ ನಿರ್ಮಾಣ ಕಮ್ಮಟದ ಅಧ್ಯಕ್ಷತೆ.
5. ದಿಲ್ಲಿಡ್ ನಡತಿನ ಅಖಿಲ ಭಾರತ ಮಟ್ಟದ ಚಲನಚಿತ್ರ ತೀರ್ಪುಗಾರರೆ ಮಂಡಳಿದ ಅಧ್ಯಕ್ಷೆ.
6. ದಿಲ್ಲಿಡ್ ನಡತಿನ 3ನೇ ಅಖಿಲ ಭಾರತ ಚಲಚಿತ್ರ ಧೋರಣಾ ಮಂಡಳಿದ ಅಧ್ಯಕ್ಷತೆ.
7. ದಿಲ್ಲಿಡ್ ನಡತಿನ ಅಂತರಾಷ್ಟ್ರೀಯ ಭಾಷಾಂತರಕಾರರೆ ಸಮ್ಮೇಳನದ ನಿರ್ದೇಶನಾ ಭಾಷಣ.
8. ಮುಂಬಯಿಡ್ ನಡತಿನ ಪ್ರಥಮ ಭಾರತೀಯ ಪರಿಸರ ಸಮ್ಮೇಳನದ ನಿರ್ದೇಶನಾ ಭಾಷಣ.
9. ಸಮಾಜ ಪರಿವರ್ತನ ಸಮುದಾಯದ ಅಧ್ಯಕ್ಷೆ.
10. ಆಂಧ್ರ ಪ್ರದೇಶದ ವೆರುೂಕಿದ ಪರ್ಯಾವರಣ ಸಮಿತಿದ ಅಧ್ಯಕ್ಷೆ.
11. ಮೈಸೂರುಡು ನಡತಿನ ವಿಶ್ವ ಕನ್ನಡ ಸಮ್ಮೇಳನದ ಅಧ್ಯಕ್ಷೆ.
12. ನ್ಯೂಯಾರ್ಕ್‌ಡ್ ನಡತಿನ 9ನೇ ಈಶಾನ್ಯ ಅಮೇರಿಕ ಕನ್ನಡ ಸಮ್ಮೇಳನದ ಅಧ್ಯಕ್ಷತೆ.
13. ಕರ್ನಾಟಕ ಸರಕಾರದ ವಿಜ್ಞಾನ, ತಂತ್ರಜ್ಞಾನ ಬೊಕ್ಕ ಪರಿಸರ ಇಲಾಖೆದಕುಲು ನಡಪಾಯಿನ ಅಖಿಲ ಭಾರತ ಅಣುಸ್ಥಾವರ ಯೋಜನೆಲೆನ ಕಮ್ಮಟೊಡು ಕೈಗಾ ಅಣುಸ್ಥಾವರದ ಬಗ್ಗೆ ಸಮ್ಮೇಳನದ ಗೋಷ್ಠಿದ ಅಧ್ಯಕ್ಷತೆ.
14. ಟೆಹರಾನ್‌ಡ್ ನಡತಿನ ಯುನೆಸ್ಕೋ ಶಿಕ್ಷಣ ಸಮ್ಮೇಳನೊಗು ಭಾರತದ ವಿಶೇಷ ಪ್ರತಿನಿಧಿ.

15. ಯಕ್ಷಗಾನ ಕೇಂದ್ರ ಉಡುಪಿ - ನೆತ್ತ ನಿರ್ದೇಶಕರ್.
16. ಬೆಂಗಳೂರುಡು ನಡತಿನ ದಕ್ಷಿಣ ಭಾರತ ರಾಜ್ಯೋಲೆನ ಜೋಕುಲೆ ಬೂಕುದ ಲೇಖಕರ್, ಚಿತ್ರಗಾರ್, ಪ್ರಕಾಶಕರ್, ಮುದ್ರಕರೆ ಸಮ್ಮೇಳನೊದ ನಿರ್ದೇಶನ.
17. ತಿರುವಂತಪುರಟು ನಡತಿನ ಅಖಿಲ ಭಾರತ ಆಧರ್ಸ್ ಗಿಲ್ಡ್ ವಾರ್ಷಿಕ ಸಮ್ಮೇಳನದ ಅಧ್ಯಕ್ಷತೆ.
18. ಮೈಸೂರು ವಿಶ್ವವಿದ್ಯಾನಿಲಯದ ಇಂಗ್ಲಿಷ್, ಕನ್ನಡ ಅರ್ಥಕೋಶ ಸಂಸ್ಕರಣ ಮಂಡಲದ ಸದಸ್ಯ - ಇಂಚ ನನಲಾ ಏತೋ ಉಂಡು.

## ಅಸ್ತಮಾನ

ಇಂಚ ಶತಮಾನೊಗು ಮುಟ್ಟು ಮುಟ್ಟು ಸಾರ್ಥಕ ಬದ್ಕ ನಡಪಯಿನಾರ್ ಕಾರಂತರ್. ಆರ್ ಒರಿ ಯುಗ ಪುರುಷ. ಸಾಹಿತ್ಯ ಜಗತ್ತಾದ ಪರಶುರಾಮ. ಬಿಕ್ಕಟ್ಟಾದ ಬಿರುಗಾಳಿ ಬೀಜಿಂಡಲಾ ಅಯಿನ್ ಗೆಣಿಪಂದೆ ಗೆಲ್ಲೊಂದು ದುಂಬು ಪೋದು ಅಂತಾರಾಷ್ಟ್ರೀಯ ಮಟ್ಟದ ಕೀರ್ತಿ ಪಡೆಯಿನ ಮಹಿಮಾವಂತ. ಸಾಹಿತ್ಯೊದ ಮಾತ ಮಜಲ್ದಾಲಾ ದತ್ತಾದ್ ಬೆನ್ನಿ ಮಲ್ಲಿ ಬೆನ್ನಿದಾಯೆ. ವೈಯಕ್ತಿಕ ಜೀವನೊಡು ಶಿಸ್ತು, ಶ್ರದ್ಧೆ ದೀವೊಂದು ಬತ್ತಿ ಹಟಯೋಗಿ, ಸ್ವತಂತ್ರ, ಸೃಜನಶೀಲ, ಸುಮಾರ್ 417ಡ್ಡಾಲಾ ಎಚ್ಚ ಗ್ರಂಥೊಲೆನ್ ಕನ್ನಡ ಸಾರಸ್ವತ ಲೋಕೊಗು ಕೊರ್ದು ಕನ್ನಡೊದ ಕೀರ್ತಿ ಪತಾಕೆನ್ ಬಾನೊದೆತ್ತರೊಗು ರಾಪದ್ ಉಳಯಿಡ್ಪುಲಯಿಗೇ ತುಳು ಸಂಸ್ಕೃತಿದ ಮಹತ್ವೊನು ತನ್ನ ಸಾಹಿತ್ಯೊದ ಮೂಲಕ ಒರಿಪವೊಂದು ಬುಳಿಪವೊಂದು ಬತ್ತಿನಾರ್ ಕೋಟ ಶಿವರಾಮ ಕಾರಂತರ್.

96 ವರ್ಸೊ ಮುಟ್ಟು ಬದ್ಕಾದ್ ಏಳೇ ದಿನೊತ ಕಾಯಿಲೆ ಅನುಭವಿತ್‌ದ್ 1997ನೇ ದಶಂಬರ್ 9ನಾನಿ ಜೂವೊ ಕಳೆದ್ ಜೋಗೊಗು ಸೇರೈರ್. ಪ್ರಕೃತಿದ ಗಟ್ಟಿ ತಿಪ್ಪಿ ಉಡೆದ್ ಬತ್ತಿ ಕಾರಂತ ಕಲ್ಪವೃಕ್ಷ ಪೊರಿದ್ ಬೂರ್‌ಂಡ್. ಅದ್ಭುತ ಸಾಧನೆದ ಒರಿಮಾನ್ಯೆ ಮಾಯಕೊ ಆದ್ ಮಹಾತ್ಮೆ ಆಯಿರ್. ಮಣಿಪಾಲ ಆಸ್ಪತ್ರೆ ದಿಂಜ ಜನ ಸೇರೈರ್. ಜೂವೊ ಕಳೆಯಿನ ಆರೆನ ಶರೊಗು ಮಗೆ ಉಲ್ಲಾಸೆ ಸೂ ಕೊರೈರ್. ಈ ತುಳು ಮಣ್ಣ್‌ಡ್ ಬತ್ತಿ ಕಾರಂತರ್ ಪಿರ ತುಳು ಮಣ್ಣ್‌ಗೇ ಸೇರ್‌ ಮಣ್ಣಾದ್ ಪೋಯಿರ್. ಆರ್ ಪೋಯಿರ್‌ಂಡಲಾ ಆರೆನ ಪಾತೆರ, ಬರವು, ಮಣ್ಣಾತ್‌ಜಿ. ಅವು ನಮ ದುಂಬುಡುಂಡು.

ನಮ್ಮ ಬದ್ಧ್ವಾಗ್ ಸಾದಿ ತೋಜವೊಂದುಂಡು.

### ಕಾರಂತೆರೆನ ಕೃತಿಕುಲು

ಕಾರಂತೆರ್ ಬರೆತಿನ ಬೂಕುಲು ಎಚ್ಚಿಕಮ್ಮಿ ಸುಮಾರು 417 ಅವೆನ್ ಇಂಚೆ ವಿಂಗಡಣೆ ಮಲ್ಪೊಲಿ.

1. ಕಬಿತೆ ಗೊಂಚಿಲ್	-	2
2. ಕಾದಂಬರಿಲು	-	45
3. ನಾಟಕೊಲು	-	31
4. ಕಿನ್ಯ ಕತೆಕುಲು	-	4
5. ವಿಡಂಬನಾ ಕೃತಿಕುಲು	-	6
6. ಜೋಕುಲೆ ಸಾಹಿತ್ಯ	-	231
7. ವೈಚಾರಿಕ ಗ್ರಂಥೊಲು	-	9
8. ಯುವಜನತೆಗಾದ್ ಬರೆತಿನ ಬೂಕುಲು	-	8
9. ವಿಜ್ಞಾನ ಗ್ರಂಥೊಲು	-	8
10. ಕಲೆತ್ತ ವಿಷಯೊಡು ಬರೆತಿನ ಬೂಕುಲು	-	13
11. ತಿರ್ಗಾಟೊದ ಸಂಗತಿಲು	-	6
12. ಜೀವನಚರಿತ್ರೆ ಬೊಕ್ಕ ಆತ್ಮಕತೆ	-	9
13. ಅರ್ಥಕೋಶ	-	1
14. ವಿಶ್ವಕೋಶೊಲು	-	9
15. ಲೇಖನಮಾಲೆ	-	8
16. ಸಂಪೊಲ್ಲಿನ ಕೃತಿಕುಲು	-	5
17. ತರ್ಜುಮೆ ಮಲ್ತಿನ ಕೃತಿಕುಲು	-	16




## ಪೊಲಬು ಮಲ್ತ್ ಕೊರ್ನ್ ಗ್ರಂತ್ಸೊಲು

1. ಶಿವರಾಮ ಕಾರಂತ : ಯಕ್ಷಗಾನ ಬಯಲಾಟ, 1957  
ಹರ್ಷ ಮುದ್ರಣ, ಪ್ರಕಟಣಾಲಯ, ಪುತ್ತೂರು, ದ.ಕ.
2. ಕೆ. ಶಿವರಾಮ ಕಾರಂತ : ಜಾನಪದ ಗೀತೆಗಳು - 1966  
ಪ್ರಸಾರಾಂಗ, ಮೈಸೂರು ವಿಶ್ವವಿದ್ಯಾನಿಲಯ
3. ಡಾ. ಕೆ. ಶಿವರಾಮ ಕಾರಂತ : ಭೂತಾರಾಧನೆ - 1976  
ಐಬಿಎಚ್ ಪ್ರಕಾಶನ, ಬೆಂಗಳೂರು
4. ವಿ.ಎಂ. ಇನಾಂದಾರ್ : ಶಿವರಾಮ ಕಾರಂತ ಬದುಕು ಬರಹ - 1978  
ಉಷಾ ಸಾಹಿತ್ಯಮಾಲೆ, ಮೈಸೂರು
5. ಶಿವರಾಮ ಕಾರಂತ : ಹುಚ್ಚು ಮನಸ್ಸಿನ ಹತ್ತು ಮುಖಗಳು - ಅಳಿದುಳಿದ  
ನೆನಪುಗಳೊಂದಿಗೆ - 1983  
ಎಸ್.ಬಿ.ಎಸ್. ಪಬ್ಲಿಷರ್ಸ್ ಎಂಡ್  
ಡಿಸ್ಟ್ರಿಬ್ಯೂಟರ್ಸ್, ಬೆಂಗಳೂರು
6. ಮಾಲಿನಿ ಮಲ್ಯ, ಶೇಖರ ಇಡ್ಕ : ಡಾ. ಶಿವರಾಮ ಕಾರಂತರ ಸಾಹಿತ್ಯ ಕೃತಿ ಸೂಚಿ  
1991, ಎಸ್.ಬಿ.ಎಸ್. ಪಬ್ಲಿಷರ್ಸ್ ಎಂಡ್  
ಡಿಸ್ಟ್ರಿಬ್ಯೂಟರ್ಸ್, ಬೆಂಗಳೂರು
7. ಐ.ಎಸ್. ಕಾರಂತ (ಸಂ) : ಕರಾವಳಿ ಸ್ಮರಣ ಸಂಚಿಕೆ - 1993  
ಜಿಲ್ಲಾ ಕರಾವಳಿ ಉತ್ಸವ ಸಮಿತಿ, ಮಂಗಳೂರು
8. ಟಿ.ಪಿ. ಅಶೋಕ (ಸಂ) : ಕಾರಂತ ಮಂಥನ - 1994  
ಕರ್ನಾಟಕ ಸಂಘ, ಪುತ್ತೂರು
9. ಡಾ. ಸೂರ್ಯನಾಥ ಕಾಮತ್ : ತ್ಯಾಗವೀರ ಕಾರ್ನಾಡ್ ಸದಾಶಿವರಾಯರು - 1997  
ಕನ್ನಡ ಮತ್ತು ಸಂಸ್ಕೃತಿ ನಿರ್ದೇಶನಾಲಯ, ಬೆಂಗಳೂರು
10. ಬಿ. ಮಾಲಿನಿ ಮಲ್ಯ (ಸಂ) : ಕಾರಂತ ಉವಾಚ - 1999  
ಶಿವರಾಮ ಕಾರಂತ ಅಧ್ಯಯನ ಕೇಂದ್ರ, ಪುತ್ತೂರು
11. ಬಿ. ಮಾಲಿನಿ ಮಲ್ಯ (ಸಂ) : ಶಿವರಾಮ ಕಾರಂತರ ಸಾಹಿತ್ಯ ಶ್ರೇಣಿ 2000,  
ಸಂಪುಟ 3, ಕಾದಂಬರಿ - 2  
ಕನ್ನಡ ಮತ್ತು ಸಂಸ್ಕೃತಿ ನಿರ್ದೇಶನಾಲಯ, ಬೆಂಗಳೂರು
12. ಕೂರಾಡಿ ಸೀತಾರಾಮ ಅಡಿಗ : ಬದ್ಧತೆಯ ಬದುಕು - 2001

- ಶಿವರಾಮ ಕಾರಂತ ಅಧ್ಯಯನ ಕೇಂದ್ರ, ಪುತ್ತೂರು
13. ಬಿ. ಲೀಲಾ ಭಟ್ (ಸಂ) : ಲೀಲಾ ಕಾರಂತ ನೆನಪಿನ ಸಂಪುಟ - 2001
- ಶಿವರಾಮ ಕಾರಂತ ಅಧ್ಯಯನ ಕೇಂದ್ರ, ಪುತ್ತೂರು
14. ಡಾ. ಶ್ರೀಧರ ಎಚ್.ಜಿ. (ಸಂ): ಕಾರಂತ ಸ್ಮರಣೆ : 1 - 2002
- ಶಿವರಾಮ ಕಾರಂತ ಅಧ್ಯಯನ ಕೇಂದ್ರ, ಪುತ್ತೂರು
15. ಡಾ. ಕೆ. ಶಿವರಾಮ ಕಾರಂತ : ಚಿತ್ರಮಯ ದಕ್ಷಿಣಕನ್ನಡ - ಅಂದು ಇಂದು 1991
- ಎಸ್.ಬಿ.ಎಸ್. ಪಬ್ಲಿಷರ್ಸ್







ತುಳುನಾಡ್, ತುಳುಬಾಸೆ, ತುಳು ಸಾಹಿತ್ಯ, ಸಂಸ್ಕೃತಿ  
ಬೊಕ್ಕ ತುಳುವೆರೆ ಏಳಿಗೇಗಾದ್ ತನ್ನಲೆ ಸರ್ವಸ್ವೊನುಲಾ  
ಮುಡಿಪು ದೀದ್ ಮಸ್ತ್ ಪೊಣೆಯಿನ ನಮ್ಮ ಹಿರಿಯಾಕ್ಲೆನ  
ಸಾಧನೆಲೆನ್ ಅಕ್ಲಲ್ ತುಳುಕಾದ್ ಸಂದಾಯಿನ  
ಸೇವೆಲೆನ್ ಮಾತೆರೆಗಲಾ ತೊಜಿಪಾದ್ ತೆರಿಪಾವುನ  
ಉದ್ದೇಶೊಡು 'ಮದಪ್ಪಿಯೆರಾವಂದಿ ತುಳುವೆರ್' ಗ್ರಂಥ  
ಮಾಲೆನ್ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಪ್ರಕಟ  
ಮಲ್ಪೊಂದುಂಡು.

ತುಳುಕಾದ್ ಅನನ್ಯ ಸಾಧನೆ ಮಲ್ತಾದ್ ಕೋಡೆಗ್ ಸಂದಿನ  
ಹಿರಿಯೆರೆಗ್, ಈ ನೆಲತ ಬಾಸೆ, ಸಂಸ್ಕೃತಿದ ಮಿತ್ತ್ ಇತ್ತಿನ  
ಪ್ರೀತಿ, ಅಭಿಮಾನ, ಗೌರವಭಾವೊನು ಈ ಮಾಲೆದ  
ಬೂಕುಲು ತೆರಿಪಾದ್ ಕೊರ್ಪ್. ಎಲ್ಲೆದ ತುಳುತ  
ಬುಲೆಚ್ಚಿಲ್ ಗಾದ್ ಇನಿ ನಮ ಎಂಚೆಂಚಿ ಕಾರ್ಯ  
ಕಜ್ಜೊಲೆನ್ ಪಾಡೊಂದು, ನಡಪಾವೊಂದು ದುಂಬು  
ಪೋವೊಡು ಪನ್ನುನೆಕ್ ಈ ಮಹನೀಯೆರೆನ ಬದ್ -  
ಸಾಧನೆಲು ನಂಕ್ ಪ್ರೇರಣೆ - ಚೈತನ್ಯೊನು ಕೊರ್ಪೊ.

**ಡಾ. ವಾಮನ ನಂದಾವರ**

ಅಧ್ಯಕ್ಷೆರ್

ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ